

宛陵集

冊一

宛陵集

冊二

宛陵集

冊三

宛陵集

冊四

宛陵集

冊五

宛陵集

冊六

宛陵集

《四部備要》

集部

上海中華書局據緡宋本校刊

校刊

桐鄉

陸費達總勘

杭縣

高時顯輯校

杭縣

丁輔之監造

宋梅聖俞先生工於詩吳趨徐七來氏重刻其所爲宛陵集者以廣其傳請序於予至五六而不已可爲勤矣予遲久未有以應豈不以先生之友歐陽公知之深道之詳生序其集書其藁死祭以文葬銘其墓而予之荒文不能以有加也哉世欲知先生之詩讀歐陽公之文而可知也已雖然歐公謂世所傳詩者多出於古窮人之辭則學者不能無疑焉詩三百篇如武王周公成王宣王召康穆公尹吉甫衛武公之倫其所賦詩皆目爲古窮人之辭可乎非窮人也而遂疑其詩有未工也而可乎且康哉之歌載於虞書舜皋陶豈窮而工者乃曰愈窮則愈工世之學者求其說而不得必且以采薇天保清廟閟宮之作謂反不如桑柔菀柳北門中谷之感情而悲涼是歐公斯言滋之惑矣何也先生旣繫官於朝而爲尙書都官員外郎則非沈淪氓庶也史稱西南夸布弓衣皆織其詩名重於時如此豈窮哉然則歐公奚以云蓋嘗聞諸孔子曰君子通於道之謂通窮於道之謂窮凡位不配德任不展才是皆所爲不得志而窮焉者之事也故歐公曰若使其幸得用於朝廷作爲雅頌而追商周之作者豈不偉與

奈何使其老不得志而爲窮者之詩也觀於是而歐公之言明先生之意得矣  
太史公謂詩三百篇此人皆意有所鬱結不得通其道夫鬱結不得通豈非所  
謂窮人之辭哉韓昌黎亦云窮愁之音易工歐公之言有以夫周公聖相也成  
王宣王賢君也其人不窮矣然鴟鴞桃蟲雲漢諸作內有憂思感憤之鬱積而  
寫人情之難言是亦與窮人之辭何以異信乎非詩之能窮人殆窮者而後工  
也我故曰讀歐陽公之文而先生之詩可知矣歐公雖專稱其詩然誌又云他  
文章皆可喜今梓之共六十卷序既不獲辭聊書是以塞其請亦因以曉學者  
康熙壬午仲夏商丘宋犖撰

予聞世謂詩人少達而多窮夫豈然哉蓋世所傳詩者多出於古窮人之辭也  
凡士之蘊其所有而不得施於世者多喜自放於山巔水涯之外見蟲魚草木  
風雲鳥獸之狀類往往探其奇怪內有憂思感憤之鬱積其興於怨刺以道韜  
臣寡婦之所歎而寫人情之難言蓋愈窮則愈工然則非詩之能窮人殆窮者  
而後工也予友梅聖俞少以廕補爲吏累舉進士抑於有司困於州縣凡十餘  
年年今五十猶從辟書爲人之佐鬱其所畜不得奮見於事業其家宛陵幼習  
於詩自爲童子出語已驚其長老旣長學乎六經仁義之說其爲文章簡古純  
粹不求苟說於世世之人徒知其詩而已然時無賢愚語詩者必求之聖俞聖  
俞亦自以其不得志者樂於詩而發之故其平生所作於詩尤多世旣知之矣  
而未有薦於上者昔王文康公嘗見而歎曰二百年無此作矣雖知之深亦不  
果薦也若使其幸得用於朝廷作爲雅頌以詠歌大宋之功德薦之清廟而追  
商周魯頌之作者豈不偉歟奈何使其老不得志而爲窮者之詩迺徒發於蟲  
魚物類羈愁感歎之言世徒喜其工不知其窮之久而將老也可不惜哉聖俞

詩既多不自收拾其妻之兄子謝景初懼其多而易失也取其自洛陽至于吳興以來所作次爲六十卷予嘗嗜聖俞詩而患不能盡得之遽喜謝氏之能次也輒序而藏之慶曆六年三月右正言知制誥知滁州事歐陽脩序

宛陵先生文集總目

第一卷

西京詩五十六首

第二卷

西京詩五十首

第三卷

西京詩六十一首

第四卷

池州後詩五十八首

第五卷

池州後詩上二十九首

池州後詩下三十三首

第六卷

池州後詩三十七首

汝州後詩十一首

第七卷

汝州後詩五十一首

第八卷

汝州後詩四十三首

湖州後詩六首

第九卷

湖州後詩四十六首

第十卷

湖州後詩六十五首

第十一卷

湖州後詩五十九首

第十二卷

詩六十三首

第十三卷

詩二十九首

第十四卷

詩十六首

第十五卷

詩四十六首

第十六卷

詩四十四首

第十七卷

詩六十四首

第十八卷

詩四十六首

第十九卷

詩三十五首

第二十卷

詩五十二首

第二十一卷

詩四十四首

第二十二卷

詩四十三首

第二十三卷

詩四十二首

第二十四卷

詩五十九首

第二十五卷

詩四十四首

第二十六卷

詩四十七首

第二十七卷

詩四十四首

第二十八卷

詩五十八首

第二十九卷

詩五十首

第三十卷

詩五十六首

第三十一卷

詩五十七首

第三十二卷

詩六十一首

第三十三卷

詩五十四首

第三十四卷

詩六十四首

第三十五卷

詩三十七首

第三十六卷

詩五十二首

第三十七卷

詩六十首

第三十八卷

詩四十七首

第三十九卷

詩二十七首

第四十卷

詩四十五首

第四十一卷

詩四十首

第四十二卷

詩三十八首

第四十三卷

詩六十三首

第四十四卷

詩三十八首

第四十五卷

詩三十七首

第四十六卷

詩三十二首

第四十七卷

詩五十二首

第四十八卷

詩四十二首

第四十九卷

詩二十八首

第五十卷

詩二十九首

第五十一卷

詩五十首

第五十二卷

詩三十七首

第五十三卷

詩三十二首

第五十四卷

詩三十三首

第五十五卷

詩三十四首

第五十六卷

詩二十九首

第五十七卷

詩三十首

第五十八卷

詩三十四首

第五十九卷

詩三十四首

第六十卷

記一首

序一首

賦十九首

宛陵先生文集卷第一

和謝希深會聖宮

三后威靈遠層巒棟宇興衣冠漢原廟歌舞魏西陵日月融光盛山河王氣增  
叢楹琢文石連網絡朱繩碧瓦寒鋪玉重欄瑩鏤冰粹儀神霧擁法袞繡龍升  
星斗羅容衛軒墀侍股肱宸蹤耀璇榜瑞羽集觚稜闕殿深珠箔雕垣界綺滕  
笙從緱嶺咽雲傍帝鄉凝龜組恭來詣貂璫肅奉承欲知歸厚意孝德自烝烝  
右丞李相公自洛移鎮河陽

侯服齊三輔天臺聳百僚新章刻銅虎舊德冠金貂已作歌襦化方期執玉朝  
雙鞬辭洛宅千騎向河橋鼓角春城暮鶯花故苑遙瓜亭猶接畛棠茆自敷條  
夾道都人擁迎風駟牡驕莫隨文學乘空望旆旌飄

上巳日午橋石瀨中得雙鰕魚

脩禊洛之濱湍流得素鱗多慚折腰吏來作食魚人水髮黏篙綠溪毛映渚春  
風沙暫時遠紫線憶江蓴

寒食前一日陪希深遠遊大字院

一百五將近千門煙火微閑過少傅宅喜見老萊衣晚雨竹間霽春禽花上飛  
禪庭清溜滿幽興自忘歸

遊龍門自潛溪過寶應精舍

遙愛夏景佳行行清興屬安知轉迴溪始覺來平谷古殿藏竹間香菴遍巖曲  
雲霞弄霽暉草樹含新綠時鳥自絲蠻山花競紛縵莫言歸路賒明月還相續

依韻和希深遊大字院

白傅舊宅

夫君康樂裔顧我子真派湛然懷清機超爾尋虛界暫來香園中共憩寒松大  
先生醉復吟長老言不壞信與賞心符寧同俗士愛杖屨恣遊遨池塘仍感慨  
焚香露蓮泣聞磬霜鷗邁青板今已空濁醪誰許載軟草當熊細低篁挂纓帶  
不覺月明歸候門僮僕怪

傷白雞

我庭有素雞翎羽白如脂日所慮狂犬未嘗憂孽狸暝棲向檐隙朝啄循階基

每先烏鳥鳴不失風雨時雖吾困廩薄尙汝稻梁遺昨宵天氣黑陰物恣所窺  
潛來銜搏去但覺聲音悲開門俾馳救已過牆東陲呵叱不敢食奪然留在茲  
湧血被其頸嚙呷氣甚危皓臆變丹赤霜翅兩離披憫心欲之活碎腦安能治  
委瘞從爾命孰忍薑桂爲猶看零落毛蕩漾隨風吹念始託茲地蒙幸信可知  
充庖豈云患度日無苦飢如何遇凶獸毒汝曾不疑斯事義雖小得以深理推  
鄧生賜山鑄未免終餒而人道尙乃爾愴焉聊俛眉

尹師魯治第伐樗

伊人利營構思欲新其居匠築經舊址檐楹礙高樗且云忍不伐何以成吾廬  
人言此樹古百怪所憑依獨秉一定議自將羣俗違乃俾執柯者丁丁霜刃揮  
殲殞條百尺橫仆株數圍從茲朝夕間不聞鳥雀喧既能考子室而復高其門  
周也昔騁辯得以不材論工今誠匪度苟害安可存舟楫且非藉薪爨聊用燔  
莫比溝中斷區區望犧樽

尹陽尉耿傳惠新栗

金行氣已勁霜實繇林梢尺素走下隸一奩來遠郊中黃比玉質外刺同芡苞  
野人寒齋會山爐夜火炮梨慚小兒嗜茗億羸官拋此焉真可貺遽爾及衡茅

和楊子聰會董尉家

董生方好雅茲日爲掃扉森爾延嘉賓歡然去塵機有客振雙袂敢言陽春暉  
聊停玉麈尾爲歌金縷衣古辭何稠疊無乃惜芳菲三閭不鋪糟二子自採薇  
雖留千載清未免當時飢吾愛曹公詩古來不敢非人生若朝露捨醉當何歸  
四座驚此語未厭翠觴飛胡能後天地何可恃輕肥沉酣且長詠白首空獻欵

嶺雲

片雨過青天山雲歸絕嶺林際隱微虹溪中落行影還看隴首飛復愛山間靜

垂澗藤

寒松偃澗濱弱蔓垂纓綠波縈翠帶長水濺低花馥終日採蘋人攀條映巖曲

林翠

鬱鬱長條抽林間翠堪翦背嶺山氣濃幽人趣不淺

舟中遇雪

曉風鳴大澤春雪下長河沙草綠堤沒楊花拂水多驚鷗不知遠候鴈幾聞過  
欲問邪溪轉今朝奈興何

田家四時

昨夜春雷作荷鋤理南陂杏花將及候農事不可遲蠶女亦自念牧童仍我隨  
田中逢老父荷杖獨熙熙

草木遶籬盛田園向郭斜去鋤南山豆歸灌東園瓜白水照茅屋清風生稻花  
前陂日已晚聒聒競鳴蛙

荒邨人自樂頗足平生心朝飯露葵熟夜春雲谷深採山持野斧射鳥入煙林  
誰見秋成事愁蟬復怨碁

今朝田事畢野老立門前拊頸望飛鳥負暄話餘年自從備丁壯及此常苦煎  
卒歲豈堪念鶉衣著更穿

塗中遇雪寄希深

方爲郡邑吏日與故人違極目千山碧馳心一鳥飛岸傍邨杳杳波上雪霏霏  
欲寄洛陽信沂流行客稀

妾薄命

昔是波底沙今爲陌上塵曾聞清泠混金屑誰謂飄揚逐路人悠悠萬物難自  
保朝看穠華暮衰老須知鉛黛不足論何必芳心競春草草有再三榮顏無一  
定好曩恩寧重持徒能亂懷抱

秋日同希深昆仲遊龍門香山晚泛伊川觴詠久之席上各賦古詩以  
極一時之娛

落日川上好徘徊弄孤舟鳴榔進山口清唱發渡頭淺瀨不可沂停橈信中流  
山樽對蒼翠溪鳥自沉浮濯足破嵐影采菱臨芳洲千龕晚煙寂雙壁紅樹秋  
細細石間泉搖搖波際樓澄潭若瀉鑑萬象已盈眸康樂足清尚惠連仍此遊  
摘景固無遺揮筆曾未休醉來同淵明興盡殊子猷歸傍漁梁靜行看夜火幽  
露華初滴滴夜吹何颼颼不犯嚴城漏誰言憐近丘

依韻和希深雨後見過小池

碧池新雨後清興一何賒有客過顏巷無貧似阮家白醪聊泛蟻黃菊未開花  
既至休辭醉君其奈歲華

依韻和子聰夜雨

窗頭光更迴宿霧晦層檐寒氣微生席輕風欲度簾濕螢依草沒暗溜想池添  
況值相如渴無嫌魯酒甜

和趙員外良佐趙韓王故宅

開國勳庸大重城邸第寬枯楊映樓角蔓草被牆端不見分香妾空餘鬪鴨闌  
誰來悲孔雀金翠羽毛殘

春日遊龍門山寺

還邀二三子共到鑿龍遊陰壑泉初動春巖氣欲浮竹藏深崦寺人渡晚川舟  
始覺山風急歸鞍不自留

依韻和希深遊府學

東府尊儒日中州進學初  
牲牢奠商後典籍講秦餘  
大法存無外羣英樂自如  
時慚遊聖末來駕折轅車

傷桑

柔條初變綠春野忽飛霜  
田婦搔蓬首冰蠶絕繭腸  
名翬依麥雉戴勝繞枝翔  
不見羅敷騎金鉤自挂牆

觀理稼

稂莠日已長恩恩芟薙初  
來時露霑屨歸去月侵鉏  
一腹餒猶甚百骸勤有餘  
吾無力畊苦謬讀古人書

新繭

露柘林初靜煙梯不復收  
春蠶吐絲足工女忌寒休  
翠薄時方獻清泉緒未抽  
閨中能自巧繡作玉釵頭

依韻和希深遊樂園懷主人登封令

竹映紅蕖水榭開門閑乳雀下  
青苔伊人何戀五斗粟不作淵明歸去來

錦竹此草也似竹而斑

雖作湘竹紋還非楚筠質化龍徒有期待鳳曾無實本與凡草俱偶親君子室

### 廢井

陲廢不知年石欄蒼蘚澀渴心空自煩長綆曾誰汲無復語滄波坎蛙奚所及

### 茶竈

山寺碧溪頭幽人綠巖畔夜火竹聲乾春甌茗花亂茲無雅趣兼薪桂煩然爨

緱山子晉祠

以下陪太尉錢相公遊嵩山七章

王子居玉京故山空寂寞猶聞遡月笙尙想賓天鶴翠柏深古壇丹霞留迴壑  
芝庭誰款扉旌旗穿林薄

### 少林寺

紅旌過翠岑林際瞻蓮宇門對幾千巖花開第一祖禪庭松色寒石室苔痕古  
寂寂不逢人空檐燕方乳

### 少姨廟

靈祠古殿深少室羣峯碧行雨欲隨車望巖非化石常聞蘭氣蒸誰奠椒香液  
寄謝洛川妃凌波定何益

天封觀

車馬雲外來衣霑半山雨弭節叩真居捫蘿笑塵矩迴溪響石叢靈茹抽巖塢

玉檻刻年華應無媿前古

殿檻石柱上有唐樊宗師石鴻韓退之盧仝題名在焉今亦刻名於此

會善寺

杳藹隨龍節縈紆歷寶山琉璃開淨界薜荔啓禪關煮茗石泉上清吟雲壑間  
峯端生片雨稍促畫輪還

啓母石

曠哉嵩室陽神怪所棲宅蒼石不知年靈熊去無迹煙巖想桂宮苔壁疑椒掖  
不學舜娥悲瀟湘竹枝碧

轅轅道

險絕稱漢關晨躋瞻一室盤紆石路回迤邐雲峯出古壁挂青蒼天風起蕭瑟

洛城西首時望望平煙密

中伏日陪二通判妙覺寺避暑

時有僧鼓琴於座上

紺宇迎涼日方牀御綵衣清談停玉塵雅曲弄金徽高樹秋聲早長廊暑氣微  
不須河朔飲煮茗自忘歸

元政上人遊終南

雉節居杜陵南山常在目今茲羨行遊因以謝巖谷環錫恣探勝椽棊方踐陸  
五門嵐翠橫人水秋陰覆雲峯多隱見林嶺乍回復若見採芝人余非戀微祿

寄河陽僉判富彥國

籍籍各方遠人知第一流翻同貴公子來事外諸侯地險長河急天高畫角秋  
仲宣應自樂寧復賦登樓

河南受代前一日希深示詩

我昔在桐鄉伊人頗欣戴今來佐洛南事事爲時背自媿居下流無能謝前輩  
固乏橫草功當蒙及瓜代且遺牒訴還何用吏民愛洗眼看舊書怡然忘字內

秋雨

雨後秋氣早涼歸室廬清既摧蚊蠅勢任壯蜩蟬聲石榴墜枝熟蒼蘚緣階生  
閉門且高臥畏向泥塗行

白雲和子聰

長憶江海間龍鳴向寒水藹藹蒼渚空悠悠白雲起是時在漁舟放溜看未已  
今來居洛陽埃壙生蹄軌羨君茲日心悵悵聊徙倚

同尹子漸王幾道訪郭三別墅不遇

秋野已澄曠偶來幽興多茨居隔寒水柴戶蔭喬柯看竹曾留鳳攜朋不爲鵝  
人歸碧苔徑應識履痕過

水荭

灼灼有芳豔本生江漢濱臨風輕笑久隔浦澹妝新白鷺煙中客紅蕖水上鄰  
無香結珠穗秋露浥羅巾

黃河

積石導淵源沄沄瀉崑閬龍門自吞險鯨海終涵量怒狀生萬渦驚流非一狀  
淺深殊可測激射無時壯常苦事隄防何曾息波浪川氣迷遠山沙痕落秋漲  
槎沫夜浮光舟人朝發唱洪梁畫鷁連古戍蒼崖向浴鳥不知清夕陽空在望  
誰當大雪天走馬堅冰上

王氏昆仲歸寧

昨夜雪霏霏梁山吟未歸關河誰道遠鴻鴈自相依落日人煙少寒雲驛路微  
共將彭澤酒稱壽向庭闈

子聰惠書備言行路及遊王屋物趣因以答

自我河橋來清話殊未已亟言閱通疇晨駕遂遵彼尺書忽見遺經由皆可紀  
草草始辭家怱怱渡河水前邨客心速入暮陰風起脩路隘且長疲驂未能止  
茅居聒夜春寒犬吠墟里明發西北行岡巒踰迤邐叢藁但蒙密未見山中美  
谷開逢邑閭豈謂連都鄙冠帶一二同麇麋左右比問子奚所之俛眉聊啓齒  
瞥往登天壇煙雲隨步趾傍臨日觀低卻望高丘邇屑屑視塵埃紛紛若螻蟻

便有林壑心期將榮宦委我昔愛青蒼無時常徙倚今朝羨君游勝事空聳企  
徒嗟黃綬身莫接青霞軌安得憑羽翰幽懷寄如此

環州通判張殿丞亢

欲向蕭關外窮陰雪暗沙磧寒鴻鴈少冰合水泉賒自有從軍樂應無去國嗟  
春風曾不到吹角寄梅花

張太素之邠幕

應幕向豳郊晨裝辭邠邠長亭欲少留飛鵠初成曲魯酒上離筵行塵生驥足  
悠悠關戍遙黯黯煙雲屬塞邑多苦寒國風遺舊俗寄音文讌餘莫待霜條綠

孫屯田召爲御史

薦牘交車府恩書下建章輕軒辭瑞翟危弁學神羊祖酌方滋桂行威欲犯霜  
鳳毛仍襲慶雞舌更含香氣鬱翔龍闕風清振鷺行今朝洛民思東陌盛壺漿

與諸友普明院亭納涼分題

岸幘清涼地脩然樂未窮竹陰過晚雨林表見殘虹花影平波上經聲小隴東

還思醉吟者寧與此時同

梅花

似畏羣芳妒先春發故林曾無鶯蝶戀空被雪霜侵不道東風遠應悲上苑深  
南枝已零落羌笛寄餘音

依韻和希深立春後祀風伯雨師畢過午橋莊

青郊誰駐馬謝客思池塘野水微波綠江梅嫩蕊黃初從奠風雨遂此樂壺觴  
已愛幽禽語園林即日芳

尹子漸歸華產茯苓若人形者賦以贈行

因歸話茯苓久著桐君籍成形得人物具體存標格神岳畜粹和寒松化膏液  
外凝石稜紫內蘊瓊腴白千載忽旦暮一朝成琥珀既瑩毫芒分不與蚊蚋隔  
拾芥曾未難爲器期增飾至珍行處稀美價定多益

初見杏花

不待春風遍煙林獨早開淺紅欺醉粉肯信有江梅

宛陵先生文集卷第一

宛陵先生文集卷第二

依韻和載陽登廣福寺閣

過聞聯騎出登覽思踰清曉漲林煙重春歸野水平始看仙杏發已愛袂衣輕  
誰見吟餘處殘陽上古城

依韻和歐陽永叔同遊近郊

洛水橋邊春已迴柳條蔥蒨眼初開無人拾翠過幽渚有客尋芳上古臺林邃  
珍禽時一囀酒酣紅日未西頽知君最是憐風物更約偷閑取次來

依韻和永叔同遊上林院後亭見櫻桃花悉已披謝

去年君到見春遲今日尋芳是夙期祇道朱櫻纔弄蕊及來幽圃已殘枝飄英  
尙有遊蜂戀著子唯應谷鳥知把酒聊能慰餘景乘歡不厭夕陽時

依韻和王幾道塗次杏花有感

馬上逢丹杏芳條拂眼過可憐荒徑少不道故園多豔萼黏紅蠟仙葩縹薄羅  
客心知易感路遠奈愁何

遊園晚歸馬上希深命賦

興盡夕陽天言歸躍杏韉新陰六街樹遠目萬家煙歌咽樓千尺吟餘月一弦  
花間有遊妓醉去墮金鈿

留題希深美檜亭

幽深有佳趣曾不減林泉衆綠經新雨殘紅墮夕煙栽萱北堂近夢草故池連  
乘月時來往清歌思浩然

留守相公新搆雙桂樓

藻棟起霄間芳條俯可攀晚雲談次改高鳥坐中還日映城邊樹虹明雨外山  
唯應謝池月來照袞衣閒

和希深避暑香山寺

有客乘新霽雲林共扣扃輕舟過下渡遠水漲前汀原隰含幽藹岑嵐入杳冥  
誰知得深趣履齒石苔青

和希深晚泛伊川

放溜下平波舟移不知遠稍回溪口風恣愛雲中嶽水鳥靜相依蘆洲藹將晚  
歸路莫言賒何妨乘月返

路中月夕登霽景臺與唐英話別

風枝不動月光午況是高臺過新雨吳客方思千里歸不負洛陽塵與土到時  
水落鰕鱸肥香稻初炊鱠紅縷休言羊酪敵蓴羹我亦長行念東楚平胡馬嘶  
誰可留去去相望富春渚

張侍郎中隱堂

疇昔人歸老於茲望白雲門高知後慶賓至誦先芬草樹中園秀衣冠舊里聞  
寧同江令宅寂寞向淮濱

太尉相公中伏日池亭宴會

得山字

何言避徂暑清宴水軒閑竹氣陰池鳳雲峯照袞山玳簪方映座綵服亦承顏  
樂奏寒波上杯香綠芰間瓜浮五色爛簾卷半鉤彎今日賓裾盛袁劉豈足攀

送臧尉

珍做宋版印  
藹藹神仙尉西風躍馬歸離羣賦黃鵠拜慶著斑衣雨氣連關黑槐花上路飛  
同爲洛陽客今日故人稀

新秋普明院竹林小飲詩序

余將北歸河陽友人歐陽永叔與二三君具觴豆選勝絕欲極一日之歡以爲  
別於是得普明精廬釀酒竹林間少長環席去獻酬之禮而上不失容下不及  
亂和然嘯歌趣逸天外酒旣酣永叔曰今日之樂無媿於古昔乘美景遠塵俗  
開口道心胸間達則達矣於文則未也命取紙寫普賢佳句置坐上各探一句  
字字爲韻以誌茲會之美咸曰永叔言是不爾後人將以吾輩爲酒肉狂人乎  
頃刻衆詩皆就乃索大白盡醉而去明日第其篇請余爲敘云

得高樹早涼歸

翻然思何苦昨夜秋風高良友念將別幅巾邀此遨清梵隔寒流亂蟬鳴古樹  
誰知林下游復得杯中趣池上暑風收竹間秋氣早回塘莫苦留已變王孫草  
未墜高梧葉初生玉井涼愁心異潘岳獨自向河陽不減阮家會所嗟當北歸

厭厭敢辭醉明發此歡非

新秋雨夜西齋文會

夜色際陰霾燈青謝客齋梧桐生靜思絡緯動秋懷小酌寧辭醉清言不厭諧  
誰憐何水部吟苦怨空階

秋陰

已過蕭蕭雨猶成黯黯陰登臨潘岳思慘慄楚臣心遠吹鳴高樹低雲冒晚岑  
久爲關外客不忍聽疎砧

雨中移竹

荷鍾冒秋霖怱怱移翠竹欲分溪上陰聊助池邊綠中散林未開子猷心已足  
青青謝栽培豈媿凡草木

希深所居官舍新得府相蔬圃以廣西園

楚相拔葵後蕭條三畝餘煙畦偶連畛蕙圃得增墟便欲開春沼何妨薤野蔬  
始添臺榭美況近子雲居

和永叔柘枝歌

留守相公  
南莊按舞

漁陽三疊音隆隆紅蘂亂坼當秋風披香擁霧出妖嫵眉壯髮翻驚鴻鏘鏘  
雜珮離芳渚珠帽紅鞵振金縷相迎垂手勢如傾障袂倚歌詞欲吐最憐應節  
乍低昂便轉疾徐皆可覩飄揚初認雪迴風躑躅還看繭縈緒小小寧聞怨曲  
長盈盈自解依儔侶藝奇體妙按者誰金貂大尹宴清池綺茵繡幄粲輝映玳  
簪珠履何委蛇是時郊原新退暑天清氣爽過林墅淮王載酒昔嘗聞謝公攜  
妓那能數始知事簡樂民和不厭來觀柘枝舞

依韻和載陽郊外

近隰蔥蘢曙驚鳥睥睨啼日光林杪動吹騎管中嘶路遶寒原古煙橫遠戍迷  
今來異賓孟誰復歎雄雞

奉和永叔得辛判官伊陽所寄山桂數本封殖之後遂成雅韻以見貺  
團團綠桂叢本自幽巖得惠好知不忘青蔥寧改色香生蓮幕間花白萱堂側  
月露夜偏滋瓊枝相翕赫

河陽秋夕夢與永叔遊嵩避雨於峻極院賦詩及覺猶能憶記俄而僕夫自洛來云永叔諸君陪希深祠岳因足成短韻

夕寢北窗下青山夢與尋相歡不異昔勝事却疑今風雨幽林靜雲煙古寺深

此二句  
夢中得

攬衣方有感還喜問來音

希深惠書言與師魯永叔子聰幾道遊嵩因誦而韻之

聞君奉宸詔瑞祝疑靈岫山水聊得游志願庶可就豈無朋從俱況此一二秀  
方蘄建春陌十刻殘晝漏初經緱氏嶺古柏尚鬱茂却過轅轅關巨石相撐鬪  
夕齋禮神祠法袞被藻繡畢事登山椒常服更短後從者十數人輕齋不爲陋  
是時天清陰力氣勇奔驟雲巖杳虧蔽花草藏澗竇傍林有珍禽驚聒若避殼  
盤石暫憩休泓泉助吞漱上窺玉女窗蘄絕非可構下玩擣衣碓焜燿金紋透  
尹子體雄恢攀緣逾習狃歐陽稱壯齡疲軟屢顛踣競歡相扶持芒屨資踐蹂  
八仙存故壇三醉孰云謬鄙哉封祝碑數子昔鑄鏤偶誌一時事曷虞來者諾  
絕頂瞰諸峯隘然輕宇宙遙思謝塵煩欲知羣鳥獸韓公傳石室聞之固已舊

當時興稍衰不暇苦尋究東崖暗壑中釋子持經呪于今二十年飲食同猿狖  
君子聆法音充爾溢膚腠嘗期躡屐過吾儕色先愀叶遂乖真諦言茲亦甘自  
咎中頂會幾望涼蟾皓如晝紛紛坐談諱草草具觴豆清露濕巾裳誰人苦羸  
瘦便卽忘形骸胡爲戀纓綬或疑桂宮近斯語豈狂瞽歸來遊少室嶒嶸殊引  
脰石室迢遞過探訪仍邂逅捫蘿上岑邃仙屋何廣袤乳水出其間涓涓自成  
溜凡骨此熏蒸靈真安可覲霞壁幾千尋四字侷篆籀咸意苔蘚文誠爲造化  
授標之神清洞民俗未嘗違忽覺風雨冥無能久瞻扣恩恩遂宵征勝事皆可  
復俚歌縱喧譁怪說多駁糅凌晨關塞陽追賞顏匪厚窮極四百里寧憚疲左  
右昨朝書報予聞甚醉醇酎所嗟遊遠方心焉倍如疚

送河清賈主簿歸任

不遠水雲間悠悠沂鷁還分亭接雞犬舉酒對河山殘雪依荒磧寒煙入暝灣  
昔人鸞枳歎一并在離顏

依韻和永叔雪後見寄兼云自尹家兄弟及幾道散後子聰下縣久不

得歸頗有離索之歎

常欲登芒嶺無由見洛橋雪飛關戍迴人憶剡溪遙廣隰嘶征鴈長河起怒飈  
遽言歡友散能使去魂銷晚日窮幽藹愁雲暝沈寥縱令佳約在載酒定何邀  
依韻和歐陽永叔黃河八韻

少本江南客今爲河曲遊歲時憂漾溢日夕見奔流齧岸侵民壤飄槎閣鴈洲  
峻門波作箭古郡鐵爲牛目極高飛鳥身輕不及舟寒冰狐自聽源水使嘗求  
密樹隨灣轉長簪刮浪收如何貴沉玉川興是諸侯

季父知并州

捧詔出明光飛軒陟太行玉墀分近侍虎綬給新章笳吹喧行陌旌旗卷夜霜  
鴈歸汾水綠城壓代雲黃土屋春風峭氈裘牧騎狂關山寧久駐剩宴柳溪傍  
河陰中寨寒食

擊柝聲初絕爲魚夢已殘幽禽哢清曉宿雨度餘寒爨火明千竈風旗展一竿  
歸心慚社燕自歎此微官

再至洛中寒食

西洛逢寒食依依似昔年  
千門方禁火九野自生煙  
飄泊梨花雨追隨杏葉韞  
遊人莫惜醉風景滿伊川

同永叔子聰遊嵩山賦十二題

公路澗

我來袁公溪斷岸猶殘壘  
僵柳遠臨灣新蒲初出水  
行行古臺近兩兩驚禽起  
雞犬何處聞人家深塢裏

拜馬澗

王子昔凌霓國人茲拜馬  
依稀日夜笙聲入寒泉  
瀉空傳七日期飛鶴何時下  
二室道

度嶺失羣山千峯出天際  
方欣左右看屢改縈迴勢  
勝事誰與同芬然有蘭蕙  
自峻極中院步登太室中峯

稅駕綠巖前攀蘿不知倦  
人從樹杪來路向雲端轉  
忽覺在煙霓回看峯嶺變

玉女窗

玉洞倚霞壁天窗露微明  
驂鸞去不返啼鳥空相驚  
萬木自虜蔽捫蘿復誰情  
玉女擣衣石

幽石稱擣衣擣衣人不見  
雲纓白飄飄巖樹長蔥蒨  
猶應寒夜中山月來鋪練

天門

古壁何蒼蒼穿雲玉梯出  
歛然起青冥却立觀少室  
前巖復後峯陰晴狀非一

天門泉

泠泠雲外泉的的巖光入  
靜若仙鑑開寒疑玉龍蟄  
時應下鹿羣迹印青苔濕

天池

安知最高頂清淺水池開  
有時片雲出倏忽生風雷  
誰羨雙黃鵠刷羽來徘徊  
三醉石

相期物外遊共醉仙壇石  
舉手薄高穹清風生兩腋  
都忘塵世煩笑傲聊爲適

登太室中峯

日夕望蒼崖  
嶄嶄在天外  
及來步其巔  
下見河如帶  
半壁雲霧昏  
山根已霧縹

峻極寺

山高路已窮  
倏爾逢蘭若  
落日老僧閑  
支頤古松下  
緩步入禪庭  
苔蒼但蕭灑

擬玉臺體七首

欲眠

鴛鴦羅薦開  
翡翠香幃寂  
解帶竟羞明  
移燈向東壁

攜手曲

攜手出中閨  
殷勤尅密期  
密期雖不遠  
迴顧步遲遲

雨中歸

來時雲冉冉  
去值雨霏霏  
莫怪羅衣濕  
荆王夢罷歸

別後

昨日日暮別  
今日日暮愁  
猶認縱裙色  
依依在石榴

夜夜曲

情來不自理明月生南樓坐感昔時樂翻成此夜愁

落日窗中坐

含情獨不語落日窗中時妾意與君意相思只自知

領邊繡

出門重新製纖手行自整願作花工兒長年承素頸

無題

斗覺瓊枝瘦慵開寶鑑妝臨風恐仙去倚扇怯歌長綠桂薰輕服靈符佩縹囊  
西鄰空自賦不解到君傍

宛陵先生文集卷第二

珍傲宋版印

宛陵先生文集卷第三

依韻和希深新秋會東堂

何必水周堂  
脩然萬木涼  
朋簪茲共樂  
節物自迎商  
巧笑承歡劇  
新詞度曲長  
驂鸞悲霧扇  
泛蟻醕雲漿  
並蒂榴房熟  
連叢桂蕊香  
人初投轄醉  
客甚摻櫓狂  
鬢約寒鴉碧  
衣輕舞蝶黃  
流波閑任注  
錯席豈依行  
亶亶談寧倦  
耿耿夜未央  
良時誠可惜  
清燕此無荒

客鄭遇曇穎自洛中東歸

禪衣本壞色  
不化洛陽塵  
獨有煙霞染  
況將山水親  
西風入關戍  
宿雨過城闔  
誰羨飄然迹  
吾車亦已巾

馬判官歸闕

與君歸洛陽  
仕宦頗相偶  
荏遷歲時徘徊  
樂文酒今歸已及瓜  
爲贈聊折柳  
亦將隨計書  
慘別寧嗟久

錢彭城公赴隨州龍門道上作

零雨送車輪初清遠陌塵歸藩漢東國遮道洛陽人伊水照虹旆楚山懷玉麟  
征軒不可戀梗淚返城闈

早行道中相逢

黯黯雨雲晦駸駸車馬繇唯憂不及見及見反無言

古意

故人留雅曲今與新人彈新人聽不足復使後人歡

送弟良臣歸宣城

喬木句溪邊秋光幾曲連將歸三畝宅遠寄下江船伴爾唯征鴈悲予有暮蟬  
親朋如見問貧外似當年

河南張應之東齋

昔我居此時鑿池通竹圃池清少游魚林淺無棲羽至今寒窗風靜送枯荷雨  
雨歇吏人稀知君獨吟苦

河南王尉西齋

官舍古城隅西齋何寂寂種竹幽趣深開屏翠光滴青山露南牆落日明東壁  
危臺起其傍平隰坐可覲歲暮野田空天高霜隼擊更憐風月時幾弄林間笛  
劉秀才歸河內

君家太行下應復近蘇門河氣知寒早嵐煙覺暮昏犬鳴林外火笛響月中邨  
久作山陽客逢人爲寄言

憶洛中舊居寄永叔兼簡師魯彥國

東堂石榴下夜飲曉未還絺衣濕浩露桂酒生朱顏君同尹與富高論曾莫攀  
開吐仁義奧傲睨天地間以此爲朋樂衡門未嘗關自從北闕來擾擾時少閑  
登危欲引望尙不見雲山何由覲夫子客袂淚瀾斑

武陵行

生事在漁樵所居亦煙水野艇一竿絲朝朝狎清泚忽自傍藤陰乘流轉山觜  
始覺景氣佳潛通小溪裏常時不見春入谷驚紅蕊幽興窮綠波翫芳心莫已  
花外一峯明林間碧洞啓遙聞雞犬音漸悟人煙邇捨舟遂潛行石徑劣容屣

豁然有田園竹果相叢倚  
彪眉髻髻人倏遇心顏喜  
尙作秦衣裳那知漢名氏  
自言逢世亂避地因居此  
來時手種桃今日開如綺  
更看水上花幾度逐風委  
競引飯彫胡邀歡酌瓊醴  
復呼童穉前綠鬢仍皓齒  
翻遣念還茅思歸釣鱸鮓  
將辭亦贈言勿道丘壑美  
鼓枻出仙源繁英猶遷迤  
薄暮返蒼洲微風吹白芷  
他日欲重過茫茫何處是

西宮怨

漢宮中選時天下誰爲校  
寵至莫言非恩移難恃貌  
一朝居別館悔如何由效  
買賦豈無金其如君不樂

夏夜小亭有懷

西南雨氣濃林上昏月色  
寒影不隨人寥寥空露白

外兄施伯侃下第赴并門叔父招

共是干時者同爲失意人  
言趨太原召如慰宛陵親  
笳鼓聽臨塞琴書未離身  
別君無斗酒當識士安貧

鄭戡及第東歸後赴洋州幕

卻生方得桂王粲始從戎一舸辭吳會單車入漢中  
亂山雲木古側徑野泉通欲識風煙美心知故國同

施判官赴饒州

昔日里中舊今爲幕下英煙波歸楚國風月滿都城  
食有江魚美時無羽檄驚他年儻行縣肯使折腰迎

楊旼赴官并州

嘗聞地近湖寒氣盛中都車馬行臨塞關山見落榆  
吳鉤皆尙壯章甫幾爲儒寄謝西曹掾能吟秀句無

歐陽寺丞桐城宰

葉落淮南樹青山徧馬頭人煙將近郭松竹不知秋  
夜虎林間嘯溪泉舍下流門前仲卿廟遺迹待君求

朱邑冢祠在焉

祝熙載赴任東陽

李都尉客

東陽美山水之子本風流稍去何平叔還追沈隱侯清江飛晚雨斜日半滄洲  
縣道行無媿煙蘿有勝遊

彥國通判絳州

結友時未久情親心已照氛埃外自遣風月還同調復與任浮沉未嘗趨近要  
以此雖處貧寧防俗者誚今將辭我去盡日來談笑窮巷斲茅茨高言出廊廟  
且作朱轂行聊能發光耀當亦就銅墨遠之江海徼山郭寂無喧雲川不妨釣  
所嗟胡越人千里煩登眺

餘姚陳寺丞

試邑來勾越風煙復上游江潮自迎客山月亦隨舟海貨通閭市漁歌入縣樓  
絃琴無外事坐見浦帆收

明州推官鄭先輩

應幕海邊郡秋風千里歸隨潮吳榜駛轉浦楚山微野橘霜前熟江螯露下肥  
還家候靈鵲人想罷鳴機

聚蚊

日落月復昏飛蚊稍離隙聚空雷殷殷舞庭煙冪冪蛛網徒爾施螿斧詎能磔  
猛蝎亦助惡腹毒將肆螫不能有兩翅索索緣暗壁賢人居大第蛟綃圍枕席  
嗟爾於其中寧夸觜如戟忍哉傍窮困曾未哀癯瘠利吻競相侵飲血自求益  
蝙蝠空翱翔何嘗爲屏獲鳴蟬飽風露亦不慚喙息薨薨勿久恃會有東方白

賦秋鴻送劉衡州

沆

秋鴻整羽翮去就自因時往春南方來遂止天泉池天泉水清泚鴛鷺日追隨  
蒲藻豈不樂江湖信所宜今朝風色便暫向衡陽歸洞庭逢葉下瀟湘先客飛  
渚有蘭杜美心無稻粱卑曾繳勿爾念鷹隼寧爾窺煙波千萬里足以資盤嬉  
峯前想回日青冥生路岐

清池

泠泠清水池藻荇何參差美人留采掇玉鮪自揚髻波瀾日已淺龜鼈日復滋  
蝦蟇縱跳梁得以緣其涯競此長科斗凌亂滿澄漪空有文字質非無簡策施

仙李勿苦羨寧將廬蛤卑徒剖腹中書悠悠誰爾知聊保性命理遠潛江海湄  
泚泚曷足道任彼鼃龜爲

弟得臣歸覲并州

知君歸去心已逐秋風起明發登太行遙將望汾水藹藹白雲下吾親正居此  
拜慶曷爲榮新除一官美

張脩赴威勝軍判官

青驪渡河水俠氣動刀環入幕沙塵暗臨風鼓角閑地形通柏谷秋色滿榆關  
誰復輕儒者難淹筆硯間

弔唐俞

通閨年最少才俊罕能雙鵬去塵棲室魂歸霧起窗慈親留漢水愛妾返荆江  
一穉纔能語恍然寄遠邦

任適尉烏程

俛作程鄉尉折腰還自甘卞峯晴照黛雲水曉澄藍葑上春田闢蘆中走吏參

到時蘋葉長柳暉蓋江南

馬殿丞通判密州

晨裝辭北闕懷紱貳東侯地本全齊勝風仍變魯優危帆淮上去古木海邊秋  
相送江潭客曾同十載遊

夏侯彥濟武陟主簿

懷縣曾余往風謠爲爾知寒先太行近潤接大河卑賓酒材公秣晨羹翦露葵  
簿書行正委何似布衣時

余居御橋南夜聞禊鳥鳴效昌黎體

都城夜半陰雲黑忽聞轉轂聲咿呦嘗憶楚鄉有禊鳥一身九首如贅疣或時  
月暗過閭里緩音低語若有求小兒藏頭婦滅火閉門雞犬不爾留我問楚俗  
何苦爾云是鬼車載鬼遊鬼車載鬼奚所及抽人之筋繫車軸昔聽此言未能  
信欲訪上天終無由今來中土百物正安得遂與南方傳上帝因風如可達願  
今驅逐出九州

月夜與兄公度納涼閑行至御橋

夕月吐澄明陰雲淨如掃空庭引天翠爽氣生懷抱家近御橋頭因爲橋伴遊  
倚欄波上影不共水東流思歸此清夜何處是江樓四望遠寂歷微風動颼颼  
觀闕垂萬象山河趨九州壯哉帝王宅顧我一蟬蛸富貴非可取田園今向秋  
明當拂衣去試與問扁舟

隨州錢相公挽歌三首

築巖無往夢遊岱有飛魂墮隋侯國遺金漢帝恩文章留日域忠孝在王門  
天道何由問秋風徧九原

昔日傷歸國今朝歎舉輶憂愁傳楚些殄悴感周詩文章明時訪忠言故吏知  
居常嗚咽涕翻作衆人悲

去年伊水上傾府望雲岑路轉猶回首人誰不殞心可憐飛語後擠恨九幽深  
從此埋英骨空令淚滿襟

僧可真東歸因謁范蘇州

仲淹

姑蘇臺畔去雲壑付清機野策過寒水山童護衲衣松門正投宿竹笠帶餘暉  
誰愛杼山句使君應姓韋

廖秀才歸衡山縣

千里倦爲客秋歸烏榜輕過林湘橘暗收潦楚江清晚泊親鷗鷺殘芳襲杜蘅  
長沙幾日到天際見高城

魏屯田知楚州

淮南木葉驚淮上使君行天外高帆出沙頭候吏迎夜潮通廢埭秋月滿孤城  
正遲文翁化從來楚俗輕

張子野赴官鄭州

盡室寄東里一官辭上都只應乘小駟寧肯躡雙鳧秋雨生陂水高風落廟梧  
梅山爲余訪還有舊家無

擬王維偶然作

嵇康任天性傲散喜端居自云安卑者竊比老莊歟一月十五日頭面忘洗梳

危坐恣搔蝨於時嬾作書一曲情自寄一杯歡有餘  
尚子志所慕阮生甘不如  
黃精可養壽廣澤宜覩魚不堪行作吏章服裏猿狙

蘇祠部通判洪州

飛鷁去江西秋颿滿桂旗蘆洲花白處楓岸葉丹時  
沙鳥看來沒雲山愛後移  
高才屬滕閣家擅子卿詩

中秋與希深別後月下寄

薄霧生寒水寥寥穢畫船人傷千里別桂吐十分圓  
把酒非前夕追憶去年  
南樓足佳興好在謝林川

望芒碭山

出舟跳古岸林外見脩岡回頭問榜子前巘是芒碭  
其顛有高廟松柏鬱蒼蒼  
迤邐堆阜屬蕭條茆葉黃千古收王氣一川平夕陽  
人家纔四五雞犬自相望  
尚爾想新豐誰復思沛鄉臨流一舉酒可以喻悲傷

初見淮山

遊宦久去國扁舟今始還朝來汴口望喜見淮上山斷嶺碧峯出平沙白鳥閑  
南歸不厭遠況在水雲間

旌義港阻風

清晨下長淮忽值秋風惡渺瀰雲霧昏掀合魚龍作方驚白浪高又以寒潮落  
遠渚時出沒輕舟自前却將投古戍迷偶得孤港泊下纜寄蘆林尋邨步芒屨  
儻有白醪酷聊爲野田酌茆屋何颼颼瓦罌空索索却持杖頭歸相顧還寂莫  
一夕不能眠孤吟當狂藥

依韻和劉六淮潮

汝潮如有信時向舊痕生始覺回波定還看曲渚平舞鷗隨下上寒日共浮傾  
後夜人無寐遙聽入浦聲

舟中聞蛩

秋月滿行舟秋蟲響孤岸豈獨居者愁當令客心亂展轉重與嗟所嗟時節換  
時節不苦留川塗行已半霜落草根枯清音從此斷誰復過江南哀鴻爲我伴

雙野鳧

野水雙紋翼雲羅謾自媒驚飛帶波起行唳拂萍開暖日浮還沒寒汀去復來  
王喬如可挹仙鳥此徘徊

和才叔岸傍古廟

樹老垂纓亂祠荒向水開偶人經雨踏古屋爲風摧野鳥棲塵坐漁郎奠竹杯  
欲傳山鬼曲無奈楚辭哀

山光寺

煬帝  
故宮

古橋經廢寺蒼蘚舊離宮柏殿秋陰冷蓮堂暮色空鳥啼山靄裏僧語竹林中  
寂寞蕪城近蕭蕭牧笛風

自急流口至長蘆江入金陵

始發碧江口曠然諧遠心風清舟在鑑日落水浮金瓜步逢潮信臺城過鴈音  
故鄉何處是雲外卽喬林

早渡長蘆江

帶月出寒浦殘星浸水濱帆開風色正舟急浪花分霧氣橫江白雞聲隔岸聞  
天晴建業近鍾岫起孤雲

采石懷古

青峯來合沓勢壓大江雄舟渡神兵後城荒王氣空山根魚浪白巖壁石蘿紅  
弄月人何在孤墳細草中

望夫山

亭亭千古質曾是念征夫一作山頭石畏看天際塗猶如託蘿蔓不似采藤蕪  
時有江雲近仙衣挂六銖

泊牛渚磯

所謂鼓吹山也  
有竹可作笙竽

落帆牛渚前便爲牛渚宿波搖殘照中采翠浮巖谷巖谷足幽篁石上羅寒玉  
裁作媧氏笙堪吹鳳皇曲楚客夕無眠獨將清籟續更看江月來還想燃犀燭

遊響山

久憶門前勝聊乘逸興遊寒篙進溪曲古木暗城頭鳥過空潭響船隨碧瀨流

梅花三疊罷煙火起滄洲

蕪湖口留別弟信臣

少也遠辭親俱爲異鄉客昨日偶同歸今朝復南適南適畏簡書叨茲六百石  
重念我當去送我江之側溪山遠更清溪水深轉碧因知惜別情愈賒應愈劇  
登臨無盡興清燕日徘徊霞影緣觚落嵐光入牖來離宮分碧瓦太液俯青槐  
好待邀明月瑤琴爲一開

金霞閣

送蟾上人遊南嶽

葉下瀟湘闊杯浮豈道遲賓鴻不到處危約獨行時翠嶺祝融宅喬松虞舜祠  
雲霞遊徧日振錫更何之

王公慥東歸

行色上東陌秋槐葉亂飛囊無一錢用篋有古書歸羸駟嘶寒草荒城背落暉  
莫嫌牛馬隔走別入行稀

幾道隰州判官

清曉赴國門西風生早涼天地大道出苑樹短亭傍相看車馬色共照池水光  
舉酒酒非淺明朝誰重觴話別語難盡去後空回腸計彼行路遠幾日至洛陽  
洛陽多舊友一一道相望失意非惟悴懷昔無悲傷無由戀中國不久之南方  
音書儻能問鴻鴈亦能翔此外念出處便爲參與商到官秋節晚塞近百草黃  
定隨劉武威校獵赤土岡余方楓林下野艇泛滄浪弄月江波闊冒衣菱苕香  
雖知各所適未免涕霑裳操袂却引顧煙蕪平夕陽獨回唯鳥影相與過林塘  
朋游頓茲減客心仍未央

宛陵先生文集卷第三

珍傲宋版印

宛陵先生文集卷第四

池州進士陳生惠然見過不日且行因以詩贈別

呼童具雞黍頗識故人期  
竹館忽枉駕山樽聊解頤  
醉歌返北郭春雨生東陂  
便與千峯隔登高空復思

春陰

濃澹雲無定淒微氣宇寒  
鳩鳴桑葉吐邨暗杏花殘  
客子行裘薄春塘野水寬  
輕雷欣已發謬作採茶官

春晴對月

雲埽魚鱗靜天開桂魄清  
梨花鑑中色杜宇晝時聲  
寥落將寒食羈離念故京  
都無惜春意樽酒爲誰傾

植梔子樹二窠十一本於松側

舉世多植藥而我學種梔  
顏色固不別良苦誠異宜  
團團綠階側豈畏秋風吹  
同心誰可贈爲詠昔人詩

百舌

天窗明未明  
颯颯過微雨  
已聞高樹頭  
百舌間關語  
幽人枕上聽  
不聽變盡春  
聲始飛去

提壺鳥

山路暗松篠  
幽禽語前後  
上言勸提壺  
下言勸酤酒  
但取醒復醉  
莫問升與斗  
人生朝菌榮  
綠髮可無負

青梅

梅葉未藏禽  
梅子青可摘  
江南小家女  
手弄門前劇  
齒軟莫勝酸  
棄之曾不惜  
寧顧馬上郎  
春風滿行陌

挾彈篇

長安細侯年  
尙小獨出春  
郊不須曉手  
持柘彈霸陵  
邊豈惜金丸  
射飛鳥金丸  
射盡飛鳥空  
解衣市酒向  
新豐醉倒銀  
餅方肯去去  
臥紅樓歌吹  
中不管花開  
與花老明朝  
還去杜城東

五日登北山望競渡

南方傳競渡多在屈平祠  
簫鼓滿流水風烟生畫旗  
千橈速飛鳥兩舸刻靈螭  
盡日來江畔誰知輕薄兒

寄新安通判錢學士

昔人言訪舟江水賦清泚  
冬春常一色深淺皆見底  
崖日半寒潭登明動朱鯉  
君懷素已高塵慮都應洗

得歐陽永叔回書云見來客問予動靜備詳

昨日使人回聞君與之坐  
君問我何爲但云思寡過  
寡過真未能得便北窗臥  
此趣今已深世間誰與和

建德新牆詩

山廨不營堵筠篁爲密籬  
初年固可蔽晏歲不能支  
已被巢蜂蠹復爲荒葛藟  
夏雨久枯脆秋風遂傾欹  
雞鷲恣穿逸牛羊來踐窺  
我議欲板築羣走皆不怡  
首吏先進白土疎不可爲  
潦雨忽暴集澗流如突馳  
我心曠其極斯語其見欺

用竹乃戶率破得緣而私冬斂葺西角春調完北陞循環日有壞煩擾無虛時  
介決勿爾惑遂飭闢其基榛莽一芟去畚鍤能悅隨膏潤非朽壤峭削隱金鎚  
荏苒未踰月屹如長雲垂疏塹備水害既圻復蓬茨豈唯禦獾豹亦以防狐狸  
且有內外隔絕聞閭巷卑安然茲燕息來者勿吾隳

九月五日得姑蘇謝學士寄木蘭堂官醞

公田五十畝種秫秋未成杯中無濁酒案上唯丹經忽有洞庭客美傳烏與程  
言盛木蘭露釀作甕間清木蘭香未歇玉盞貯華英正值菊初坼便來花下傾  
一飲爲君醉誰能解吾醒吾醒已不解百日毛骨輕

九月見梅花

江南風土暖九月見梅花遠客思邊草孤根暗積沙何曾逢寄驛空自聽吹笳  
今日樽前勝其如秋鬢華

新安錢學士以近詩一軸見貺輒成短言用敘單悃

早事太尉府謬以才見論身作邑中吏日陪丞相尊嵩山雲外寺伊水渡頭邨

泉味入香茗松色開清樽題詩人半醉馬上景已昏歸來屬後乘冠蓋迎國門  
悠悠失貧賤冉冉歷涼溫而今處窮僻落莫思舊恩終日自鮮適終年長不言  
已覺人事寡惟聞雞犬喧東風有來信滿幅蘭與蓀深知故人意遺我滌冥煩  
一章言罨畫谿好如目存何須到雲壑便若遊桃源一一先造化可以輕瑤琨  
成誦今在口願將醒病魂

答陳五進士遺山水枕屏

妙畫能成趣谿山迴得君漁舟長映浦巖樹半藏雲征鳥無時沒橫橋有處分  
數峯來枕席曾不媿移文

謝賓客挽歌三首

位不登三事才宜列四科清名時自得華冕世空多望氣悲埋劍臨風歎逝波  
吳阡蒿作里楚挽薤成歌會葬千人至來觀數郡過無由親執紼東首淚滂沱  
自昔居門下游觀必許偕豈將千里別遂作九泉乖已恨霜松折行嗟玉樹埋  
蒼生空有望丹旄不勝懷曩日言歸里飛章願乞骸今朝赤松畔烟壠對蒼崖

當年罷會稽還郡錦爲衣老作龍樓貴終稱鳳沼違英魂遊岱去石棹渡江歸  
揚子春風惡南徐過客稀衆帆看屢溺素舸獨如飛始見中郎孝松門自有輝

往東流江口寄內

艇子逐溪流來至碧江頭隨山知幾曲一曲一增愁巢蘆有翠鳥雄雌自相求  
擘波投遠空丹喙橫輕儵呼鳴乃不已共啄向蒼洲而我無羽翼安得與子遊

代內答

結髮事君子衣袂未嘗分今朝別君思歷亂如絲棼征僕尙顧侶嘶馬猶索羣  
相送不出壺倚楹羨飛雲日暮秋風急雀聲檐上集并作千里愁愁極翻成泣

訪礦坑老僧

山深無外事日夕愛潺湲趺坐樹間石力耕溪上田解言南國事能詠碧雲篇  
莫貰遠公酒余非陶令賢

除夕與家人飲

莫言寒漏盡春色來應早風開玉砌梅薰歇金爐草穉齒喜成人白頭嗟更老

年華箇裏催清鏡寧長好

立春在元日

新春與新歲時候不相先未肯欺殘臘何曾占舊年  
綴條花翦綵插戶柳生煙  
獨坐空山裏唯驚節物遷

遊水簾巖

春山時獨往榛穢旋芟斫飛泉蔽幽巖杳藹疏朝旭  
光垂白龍顙鳴漱寒潭玉  
半壁生晝寒陰草潤秋綠穿藤出溪口流沫縈山足  
莫遣吏人來方歌白雲曲  
詠官妓從人

少爲輕薄誤失行落優倡去作小家婦願同貧里裝  
無心歌子夜有意學流黃  
他日東郊上誰人見採桑

夏雨

林梅初弄熟密雨閉重關潤裊衣巾上涼生竹樹間  
水聲通遠澗雲色暝前山  
野鳥寂無語公庭盡晝閑

五日與陳真卿飲

五日逢南國三年別舊都招魂傳楚客撫節見靈巫蒿艾因時採蛟龍爲俗驅  
清樽與鵝炙忻此故人俱

彼鷲吟

斷木喙雖長不啄柏與松松柏本堅直中心無蠹蟲廣庭木云美不與松柏比  
臃腫質性虛朽蝎招猛鷲主人赫然怒我愛爾何毀彈射出窮山羣鳥亦相喜  
啁啾弄好音自謂得天理哀哉彼鷲禽吻血徒爲爾鷹鷂不搏擊狐兔縱橫起  
沉茲樹腹怠力去宜濱死

感遇

衆默瘖莫辨衆寐盲不知問而使之對覺而使之窺瘖盲自窮矣所感在一時  
苟昧哲人理寐默定妍媸

雪詠

雪色混青冥褰幃宿酒醒龍蛇緣古木鳳鶴舞幽庭密勢因風力輕姿任物形

公堂何寂寞橫案對玄經

臘日出獵因遊梅山蘭若

我與二三騎爭馳孤戍旁  
逐麋逢野寺息馬據胡牀  
鷹想支公好人思灞上狂  
歸來何薄暮烟火照溪光

依韻和楊敏叔吳門秋晚見寄

方在洞庭上秋懷那得禁  
西風楚波急度鴈海雲陰  
洛客吟初苦騷人思已深  
顛毛隨日減冉冉不勝簪

田家

南山嘗種豆碎莢落風雨空收一束箕  
無物充煎釜

陶者

陶盡門前土屋上無片瓦十指不霑泥  
鱗鱗居大廈

縣署叢竹

裊裊幽亭竹團團自結叢  
寒生綠樽上影入翠屏中  
陶柳應慚弱潘花只競紅

方持雪霜操不敢倚春風

巧婦

巧婦口流血辛勤非一朝  
莠荼時補紕風雨畏漂搖  
所託樹枝弱而嗟巢室翹  
周公誠自感聊復賦鴟鴞

聞歐陽永叔謫夷陵

共在西都日居常慷慨言  
今嬰明主怒直雪諫臣冤  
謫向蠻荆去行當霧雨繚  
黃牛三峽近切莫聽愁猿

聞尹師魯謫富水

朝見諫臣逐暮章從謫官  
附炎人所易抱義爾唯難  
寧作沈泥玉無爲媚渚蘭  
心知歸有日時向斗牛看

寄饒州范待制

山水番君國文章漢侍臣  
古來中酒地今見獨醒人  
坐嘯安浮俗談詩接上賓  
何由趨盛府徒爾望清塵

詠王右丞所畫阮步兵醉圖

胡公疎  
新勒石

右丞筆通妙阮籍思玄虛獨畫來東平倒冠醉乘驢力頑不肯進俛首耳前趨  
一人牽且顧一士旁挾扶捉鞍舉雙足閉目忘窮塗想像得風度纖悉古衣裾  
玉骨化爲土丹青終不渝而今幾百歲乃有胡公疎買石遂留刻漬墨許傳模  
白黑就髣髴毫芒辨精麤千古畜深意終朝懸座隅誰謂盈尺紙不慚雲霧圖

猛虎行

山木暮蒼蒼風淒茆葉黃有虎始離穴熊羆安敢當掉尾爲旗纛磨牙爲劍鋌  
猛氣吞赤豹雄威躡封狼不貪犬與豕不窺藩與牆當塗食人肉所獲乃堂堂  
食人旣我分安得爲不祥麋鹿豈非命其類寧不傷滿野設置網競以充圓方  
而欲我無殺奈何飢餒腸

白鷗

喬木暗青山晴川下白鷗春雲生嶺上積雪在巒間綠草張新翳柔冠總翠鬢  
時哉養文素不是雜斑斑

後園桃李花

後園桃李花灼灼復皎皎南枝開已繇北枝榮尙少  
蘼萼相輝映根本自鉤繞  
無爲驚風吹紛紛逐飛鳥

道傍虎跡行

朝履猛虎迹暮宿猛虎林猛虎終夜嘯陰風生遠岑  
我懷何所畏所畏在官箴  
傷哉此遺體冒險輕百金

脩真觀李道士年老貧餓無所依忽縊死因爲詩以悼之

唐室王子後黃冠事隱淪餐霞不滿腹披雲不蔽身  
八十不能死縊以頭上巾  
始慕老莊術終厭道德貧營營求長生反困甑中塵

野田行

輕雷長陂水農事乃及辰茅旌送山鬼瓦鼓迎田神  
青皋暗藏雉萬木欣已春  
桑間偶耕者誰復來問津

水輪詠

孤輪運寒水無乃農者營隨流轉自速居高還復傾利纔畎澮間功欲霖雨并  
不學假混沌亡機抱甕罌

山邨行

征馬去不息幽禽隨處聞深源樹蒼鬱曲塢花氛氲澹澹平田水濛濛半嶺雲  
長鬢弄春女溪上自湔裙

鳴雉詞

雄雉鳴桑林雌雉雒麥隴結愛誠有宜別啄義亦竦哺雛深莽中摧頽錦翅擁  
辛勤何爾爲應自念遺種

寄公異弟

池塘去後春一夕生綠草無由夢阿連詩句何能好

去春城

前日去春城今朝還故陌馬有甚煩意人多遠行色暫爾厭風埃那堪爲久客

讀范桐廬述嚴先生祠堂碑

二蛇志不同相得榛莽裏一蛇化爲龍一蛇化爲雉龍飛上高衢雉飛入深水  
爲蜃自得宜潛游滄海涘變化雖各殊有道固終始光武與嚴陵其義亦云爾  
所遇在草昧旣貴不爲起翻然歸富春曾不相助治至今存清芬烜赫耀圖史  
人傳七里灘昔日來釣此灘上水濺濺灘下石齒齒其人不可見其事清且美  
有客乘朱輪徘徊想前軌著辭刻之碑復使存厥祀欲以廉貪夫又以立懦士  
千載名不忘休哉古君子

禽言四首

子規

不如歸去春山云暮萬木兮參雲蜀天兮何處人言有翼可高飛安用空啼向  
高樹

提壺

提壺蘆酤美酒風爲賓樹爲友山花繚亂目前開勸爾今朝千萬壽

山鳥

婆餅焦兒不食爾父向何之爾母山頭化爲石山頭化石可奈何遂作微禽啼  
不息

竹雞

泥滑滑苦竹岡兩蕭蕭馬上郎馬蹄凌兢雨又急此鳥爲君應斷腸

讀漢書梅子真傳

子真實吾祖耿介仕炎漢權臣始擅朝忠良被塗炭輦下莫敢言上書陳治亂  
是時卿大夫曾不負媿汗其文信雄深爛然今可玩危亡識禍機滅迹思汗漫  
一朝弃妻子龍性寧羈絆九江傳神仙會稽隱廛閉舊市越溪陰家山鏡湖畔  
唯餘千載名撫卷一長歎

宛陵先生文集卷第四



宛陵先生文集卷第五

贈黃庭筠舉進士

橘柚生南國幽林日蔥蒨上有嘉禽鳴五色被餘絢彼美發華英厥包待秋薦  
根本當自持無爲風土變

和滕公游穿山洞

洞口水石淺潺潺瀉綠蒲緣源進巖竇陰黑人境殊中言有物怪蟠蟄春未蘇  
霖雨雖有意風雷莫肯扶風雷自鼓盪不久當何如幸欣禪林近鍾梵來有無  
回策履幽逕衣香草露濡老僧長松下麋鹿與之俱溪雲時見起山鳥自相呼  
羨爾得茲樂何用勞形軀

陳真卿將有秋試倏見訪不日告行送於北門歌鵠庭爲五言以贈

送君北岡上舉酒歌黃鵠黃鵠去何高天池待棲宿寧復戀江湖聊茲混雞鶩  
暉暉振羽裳不羨淵明菊

秋日詠蟬

羣蟲喜炎熱此獨愛高陰薄蛻聊依葉清聲已出林人閑感衰節風急雜遙砧  
虛腹曾何竟常憂蟪斧侵

范饒州夫人挽詞二首

聽飲大夫日止言京北辰常憂伯宗直曾識仲卿貧蒿里歸魂遠芝山旅殯新  
江邊有孤鶴嘹唳獨傷神

君子喪良偶拊棺哀有餘莊生慚擊缶潘岳感游魚夕苑凋朱槿秋江落晚蘂  
猶應思所歷入室淚漣如

弔礪坑惠燈上人

生棲雲際巘沒葬寺傍邨破案殘經卷新墳出樹根松悲隔溪路月照舊山門  
自昔多詩句而今幾許存

寄題石埭權縣樂尉碧瀾亭

遙知溪上亭秋水瀼泠泠雲影無時翠嵐光到底清危樓喧晚鼓驚鷺起寒汀  
聊作淵明飲臨流酒易醒

斑竹管筆

翠管江潭竹斑斑紅淚滋東毫何勁直在橐許操持欲寫湘靈怨堪傳虞舜辭  
蔚然君子器安用俗人知

古意

月缺不改光劍折不改剛月缺魄易滿劍折鑄復良勢利壓山岳難屈志士腸  
男兒自有守可殺不可苟

觀博陽山火

十月原野枯連山起狂燒高燄過危峯飛火入遐嶠玉石被焚灼誰能見輝耀  
援猱失輕捷亦不暇相弔長風又助惡怒號生萬竅炎炎赤龍奔劃劃陰雷笑  
願傾寒江潮勢逆難沃澆願傾天河水雖順雲衢遙青松心已爛蔓草根未焦  
小農候春鉏寒客失冬樵誰知兼并子平陸閑肥饒不易天地意長養非一朝

聞鴈寄歐陽夷陵

閑坐獨無寐鴈來更未闌聲長河漢迴影落戶庭寒荆楚橘包熟瀟湘楓葉丹

南飛過三峽試問故人看

送謝舍人奉使北朝

漢使下西清胡人擁道迎  
寒笳隨宿堡衛甲出孤城  
犯雪貂裘重衝風錦綬輕  
山川辭國遠車騎踏沙行  
授館氈爲幄供庖酪和羹  
戎王拜天賜虜帥伏名卿  
紫塞千烽靜黃雲萬里平  
甘泉歸奏日重見鳳池榮

觀放鷄子

白皙少年子秋郊臂蒼隼  
日暖飢目開風微雙翅緊  
草際鳴鶉驚蒿間黃雀窘  
下鞞誠必獲得俊還復哂  
碎腦此非辜食肉爾何忍  
取樂在須臾我心良惻憫

食橙寄謝舍人

洞庭朱橘未弄色襄水錦橙已變黃  
玉白擣齏憐鱠美金盤案酒助杯香  
雖生南土名猶重未信中州客厭嘗  
欲寄白苞憑驛去只應佳味怯風霜

夜聞居人喊虎

猛虎豈云猛潛藏伺天昏行行出叢薄  
稍稍入孤邨孤邨何所利所利犬與狔

誰知仁者勇去惡義自敦

採白朮

吳山霧露清羣草多秀發白朮結靈根持鋤採秋月歸來濯寒澗香氣流不歇  
夜火煮石泉朝煙徧巖窟千歲扶玉顏終年固玄髮曾非首陽人敢慕食薇蕨

寓言

寒燈不照遠光止一室明小人不慮遠義止目前榮燈旣無久燄人亦無久情  
誰言結明月明月豈長盈

送李尉子京之邵武光澤

母老不擇祿一官勤夙興長河未結凍去客已懷冰露蟬不飽腹志士甘曲肱  
遠方人所畏所畏非所競

銅坑

碧鑛不出土青山鑿不休青山鑿不休坐令鬼神愁

朝日

日色纔出海曉月無光彩曉月在青空不與日色同誠知大君德照耀無不通

失鷓鴣

愛翫日已久開籠爲馴故點臆雪花圓連袂浪紋素鉤轉格磔鳴耗耗翻翁去  
誰知煙渚深綠水脩篁處

過小石潭

樹老石連潭潭深煙翠入羣魚石下游獨鳥潭上立泉暖草長綠山高風自急  
徘徊興不窮苔屐雲霑濕

縣齋對雪

密雪夜來積起見萬物春山川忽改色草木一以新古邑失荒穢王路覆平均  
從茲慶豐年蹈詠慚小臣

對花有感

新花朝竟妍故花色顛顛明日花更開新花何以異

山中夜行

孤客心多恐寒風夜度溪山長羸馬困月黑怪禽啼遠火生樵舍荒榛亂野蹊  
喜言林館近聞犬入猶迷

啄木

中園啄盡蠹未肯出林飛不識黃金彈雙翎墜落暉

夢與公度同賦蕩華追錄之

吳王舊宮闕水殿芙蓉披濁泥留玉骨疑是葬西施西施魂不滅嬌豔照清池

和綺翁游齊山寺次其韻

蒼山南望截雲煙中有紺宇通諸天長橋直度清溪水寒湖收潦曠平田古木  
陰森大堤上千峯濃澹高樓前龍筍未迸角出縮虎石亂踞筋拳攣陰崖乳泉  
濕苔蘚陽谷暖氣留蘭荃澗戶曉闌煙的的松軒夜啓月娟娟聞有謫仙乘興  
入飄然欲拍洪厓肩玩游逐勝不覺遠露奇發怪工無全捫蘿但識康樂徑飲  
酒安問遠公禪清緩不到俗土耳其香草已入騷人篇水鳥念佛次淨界野鹿銜  
花來象筵在昔探賞猶可數深景秀句今得傳辭韻險絕茲所駭何特杜牧專

當年重以平澹若古樂聽之疏越如朱絃祕藏褚中爲不朽咨諏坐上皆曰然  
誰意羸官獲此貺洗去鄙吝空池邊聊欲報言罕驛使春郊唯見鴈連連

范待制約游廬山以故不往因寄

平昔愛山水茲聞廬嶽遊遠期無逸興獨往畏湍流舉手謝雲壑棲心慚鳥鷗  
香爐碧峯下應爲一遲留

范饒州坐中客語食河豚魚

春洲生荻芽春岸飛楊花河豚當是時貴不數魚鰕其狀已可怪其毒亦莫加  
忿腹若封豕怒目猶吳蛙庖煎苟失所入喉爲鏌鋸若此喪軀體何須資齒牙  
持問南方人黨護復矜誇皆言美無度誰謂死如麻我語不能屈自思空咄嗟  
退之來潮陽始憚餐籠蛇子厚居柳州而甘食蝦蟆二物雖可憎性命無舛差  
斯味曾不比中藏禍無涯甚美惡亦稱此言誠可嘉

徐元與見邀與諸君同遊至峯山溪上作

春霽重行行行在墟里攄懷厭樓觀寓興欣山水斷壁翠連雲寒流清見底

主人開綠樽下馬臨芳芷澄溜瀉灣濤跳波生石齒園林始弄尊皋壘時鳴雉  
談謔忘機心笑言驚俗耳曠哉茲日遊何羨稽山美

和元輿遊春次用其韻

乘閑多遠興信馬與君行碧樹斜通市清流曲抱城山花高下色春鳥短長聲  
日暮吾廬近還歌空復情

留別李君君頗有歸意而未遂

酌我樽中酒知君羨北歸如何沙上鳥遠逐片帆飛

離蕪湖至觀頭橋

江口泊來久菰蒲長舊苗爭雛洲鵲鬪遺子浦魚跳宿岸欣逢戍歸船競趁潮  
時時望鄉樹已恨白雲遙

馬祕書始約同行久而未至因以寄

渡江落我前入汴居我後日日是南風時時爲回首逢船一借問遠權見來否  
明朝儻相及閑步河堤柳

寄建德徐元輿

才子方爲邑千峯對縣門靜寒琴意古閑厭鳥聲喧山茗烹仍綠池蓮摘更繁  
訟稀應物詠庭下長蘭蓀

詠苜蓿

苜蓿來西域蒲萄亦旣隨胡人初未惜漢使始能持宛馬當求日離宮舊種時  
黃花今自發撩亂牧牛陂

汴河雨後呈同行馬祕書

雨霽晚虹收河堤淨如掃清陰拂人樹翠色垂流草漢漕走王都華言雜夷獠  
時方同馬生野泊聊論道

夏日汴中作

倚櫂望平野低雲密未收黃鸝度高柳歸燕拂行舟濁水不堪照清江空憶遊  
晚晴蒸潤劇喘月見吳牛

夢故府錢公

故相方來夢分明接座隅只知冠劍是不道死生殊西府看如舊東山詠久徂  
遽然興寤歎不覺淚霑鬚

謝紫微以畫鷺二軸爲寄

白鷺畫雙素粉毫幽趣多翹沙依折葦刷羽對衰荷浦思懸秋壁江情憶釣蓑  
因君遠相寄詩詠對滄波

宿州河亭書事

遠泛千里舟暫向郊亭泊觀物趣無窮適情吟有託林中鷗舅獰席上蠅虎攫  
雨久草苗盛田蕪瓜蔓弱香秔穉子慣脫粟家人薄少年都下來聊問時所作  
新衣尙穿束舊服變褻博我今貧且賤短褐隨宜著

晚泊觀鬪雞

舟子抱雞來雄雄踣高岸側行初取勢俯啄示無憚先鳴氣益振奮擊心非悞  
勇頸毛逆張怒目皆裂肝血流何所爭死鬪欲充玩應當激猛毅豈獨專晨旦  
勝酒人自私粒食誰爾喚緬懷彼與魏傍睨當衰漢徒然驅國衆曾靡救時難

羣雄自苦戰九錫邀平亂寶玉歸大姦干戈託奇算從來小資大聊用一長歎

聞表兄施先輩上第

昔人事功名五十未爲老而今君已及得桂誠非早所慰白頭親且將黃綬好  
吾始日夜心望盡京關道拜慶早歸來莫變秋庭草

雍丘逢錢寺丞載陽

殷勤魏公子落莫吳王孫下客獨垂淚傷心思舊恩

廟子灣辭

廟子灣風俗云有白龍憑險日爲波潮以驚異上下余過而作辭云

我之東萊兮過彼雍丘舟師奏功兮濁水湍流歷長灣兮勢曲鉤傾高斗折兮  
若奔虬潛伏怪物兮深幽幽發作暴漲兮爲潮頭土人立祠兮在彼沙洲老木  
蒼蒼兮蟬噪啾啾輸卒引絆兮蓬首裸體劇縲囚赤日上煎兮膠津蹙氣塞咽  
喉胸盪肩挨同軛牛足進復退不得休竟持紙幣挂廟陬微風飄揚如喜收我  
今語神神聽不何不歸海事陽侯穹魚大龜非爾傳奚必區區此汴溝驚愚駭

俗得肴羞去就當決何遲留

送蔡侍禁赴長沙

寒葉下瀟湘之官逐鴈行水經濩浦晚船過橘洲香二女竹林外三閭楓葉傍  
平時息戎律物景助才章

送馬廷評之餘姚

越鄉知勝楚君去莫辭遙曉日魚鰕市新霜橘柚橋河流通海道山井應江潮  
近邑逢鷗鳥先應避畫橈

送秀州海鹽知縣李寺丞

吳帆千里去邑屋富魚鹽霜鶴亭皋淚風烏海客占滄涼朝日近紫翠晚山尖  
若過陸機宅寒蕪應不嫌

送馬廷評知康州

南去晉康郡風帆幾千里辭家上洞庭落葉過湘水瀧吏迎使君壺漿出蠻壘  
問俗言未通觀風想先喜曾非異方趣頗與華人擬期子寄梅花無由問行李

過鳴鴈城

九月過鳴鴈斜陽上廢臺兵車千載會桑柘萬疇開代謝隨秋草英靈化死灰  
我來空詠古寒鳥有餘哀

送余駕部江州

內史九江行潦收波已清何時鷁舟上遠見爐峯迎野色連葭菼秋香薦橘橙  
寒潮如特送不肯過潞城

依韻和陳祕校見寄

鬱鬱東堂桂常期接袂攀羽翰殊不及蓬華却空還江水幾經歲鑑中無壯顏  
音塵能見問誰道隔雲山

送張子野祕丞知鹿邑

忽作五年別相逢雙鬢疎不知從此去當見復何如公秣時爲酒晨庖日有魚  
沛譙風物美聊以樂琴書

送王紫微北使

天子命儒臣退方重專對持書下西閣擁節來窮塞貂服紫蒙茸虎旗光綵綵  
將迎走氈騎衛從羅金鎧當宣漢恩德更使胡欣戴幾日過陰山南飛鴈相背  
九月都下對雪寄永叔師魯

陰風中夜鳴密雪逗曉積誰言有蓬巷但見鋪瑤席忽憶在山中開戶羣峯白  
當時吟不厭盡日坐巖石傍徨懷故人憔悴爲遷客欲泛剡溪船路長安可適  
劉第示詩一軸走筆荅之

昔與伯氏吟青銅照人髮今又讀君詩寒冰徹人骨時時探古趣往往到月窟  
清濟流不休終期至溟渤

劉十秀才見過尋以爲寄次韻和酬

放言破崖岸塵事盡磨刮況此氣澄明幽襟亦軒豁竟日坐衡茅同心異胡越  
吾道今不孤長吟爲君發

依韻和劉敞秀才

安得采虛名師道欲吾廣雖然存術業曾不計少長孔孟久已亡富貴得亦儻

後生不聞義前輩懼爲黨退之昔獨傳力振功不賞舌吻張洪鍾小大扣必響  
近世復泯滅務覺多忽况今子誠有志方駕已屢枉自慚懷道淺所得可下上  
正如種青松而欲託朽壤典冊皆可尋聖言皆可仰幸無增我過此語固不爽  
依韻和劉十秋霖

秋草更綠秋霖衰長安遊客未成衣淒淒斗欲變寒色一夜獨語看燈輝

送劉十往荆渚

臨水一太息解舟當落暉上樓人已遠極目鳥空飛荆楚時方晏江湖客未歸  
定知吟憶處林外月光微

宛陵先生文集卷第五

宛陵先生文集卷第六

禘禮頌聖德詩 以下池州後詩

溥哉孝享將事于寧文武卿士冠劍在庭爰俟帝齋風霰其零風霰不已鉤陳  
豹尾龍旂太常立列比比帝居路寢百辟就次至于穀旦漫漫翳翳帝入靈宮  
左撞黃鍾陞階置玉日氣曛鴻鴻鴻杲杲氛駁陰掃宿于太宮月星皓皓侍祠  
之臣鵠舉鷺振或捧其匜或進其中輔相夾導俯僂鱗鱗圭瓚以陳登歌以均  
東向虛位發爵親親平明帝還紫宸序班望帝之顏穆穆閑閑檐步廊廊雪浮  
陽光大楹爛爛朱陛煌煌稱祝萬壽萬壽無疆却登寶輿以御端門揭雞肆赦  
雷動乾坤于時都人于時婦女于時蠻夸異口同語天子萬年仁聖之主臣時  
執冊與物咸覩敢播于詩庶聞九土

獎諭

敕梅堯臣省所進禘享詩事具悉爾學優而粹行懿而淳以詩自名爲衆所服  
矧乃詠歌祖宗之功德述禮樂之聲容宜被朱絃以薦清廟載披來獻深用歎

嘉故茲獎諭想宜知悉

裕享觀禮二十韻

卜惟陽月吉孝享禮方脩齋幄嚴宮殿羣臣奉冕旒北風先集霰夜雪競侵幃  
羽仗天街立龍笳象魏流翌朝升寶輅夾道列華輶琳宇躬將款珠塵密未收  
撞鐘鈞奏合奠玉日光浮捧冊叨於左觀儀得以周帝來清廟下月欲大刀頭  
既裸還初次更衣戴遠遊黃麾轉槐路朱輦駕雲虬武士羅金甲中人著錦鞬  
千官入稱慶萬國與同休却出紫宸閣俄登宣德樓雞星傳巽令鶴馭作天郵  
肆赦通皇澤深仁被九州巍巍百世業坦坦四夸柔惠及高年叟恩差五等侯  
力田仍給復有道俾旁求何以歌堯美茲同擊壤謳

寶元聖德詩

齋誠羽衛陳庚戌推奠蒞靈宮容物備清廟威儀攝遲明導玉輿出宿戒清堦  
冥濛雲霧低泱漭乾坤接時雪凝九霄金笳競三疊來賓萬國會受職百神協  
中夜卽壇壝濃陰駁鱗鬣及爾圭幣升煥然星斗曄華鐘帝樂張法從天衢躡

端門清旭上肆宥歡聲浹寶圖增大號元曆開皇劫吉甫獨何人詠歌揚聖業  
送胡臣秀才  
汴水日夜淺歸船不可留天高雲就嶺地冷鴈迴洲江館魚堪食家林橘已收  
平生素業在莫見里人羞

送張秀才之淮南

聊爲楚客唱一送淮南行出汴遠心喜移舟孤岫橫危帆將進浦寒霧不分城  
枚乘舊居處向來秋草生

還文雅師書帙

編絕不加新于今十二春綠窗重展日靜几勿生塵豈愛吾廬日終將道者親  
莫嫌同刺字漫滅看難真

依韻和徐元輿讀寄內詩戲成

鴛鴦同白首相得在中河水客莫驚笑雲間比翼多

送賢良田太丞通判江寧

世爲燕趙客慷慨有奇才對策漢庭後拜官江國來舟從瓜步去潮自蔣山回  
心寄城頭月相隨上古臺

送邵夢得永康軍判官

且歸洛中明年春赴任

言離洛陽日正值春風前伊水矯白鷺蜀山鳴杜鵑輕袍游宦去匹馬度關年  
若過君平肆窮通可問焉

送蕭監丞濬宰臨邑

羨君先拜邑殘臘見登車遠驛寒雲重長郊積雪餘行當勸民稼始信帶經鉏  
還到濟南日應傳古尚書

南鄰蕭寺丞夜訪別

憶昨偶相親相親如舊友雖言我巷殊正住君家後壁裏射燈光籬根分井口  
來邀食有魚屢過貧無酒明日定徂征聊茲酌升斗宵長莫惜醉路遠空迴首  
讀司馬季主傳贈何山人

長安新雨後九陌少行人同輿有宋賈游市懷隱淪日聞古賢哲必與醫卜鄰

來過季主室再拜語逡巡矍然悟辭貌何爲居埃塵捧腹乃大笑吾道非爾臻  
驥慚罷驢駟鳳豈燕雀親筮占聊助上功利儻及民大夫與博士登車若喪神  
今我見何遜始驗太史真順性誨善惡不離義與仁言孝諭爲子言忠諭爲臣  
又得蜀嚴比寧將日者均京都盛龜筮坐肆如魚鱗噤口不正言唯能辨冬春  
鴻冥復所慕安得雞鶩馴

臘日雪

風毛隨校臘浩浩古原沙寒入弓聲健陰藏兔徑賒馬頭迷玉勒鷹背落梅花  
少壯心空在悠然感歲華

依韻和雍丘尉王祕校兆見寄

東瞻杞國城半日鳥飛程度鴈不曾下新文誰寄評舊年因使至秀句欲人驚  
聊効題齋壁先賢亦以旌

送新安張尉乞侍養歸淮甸

天兵出塞日西尉去官初却衣老萊服曾無梅福書春郊欲回鴈寒水正沉魚

任意歸舟駛風煙亦自如

依韻和子聰見寄

嘗念餞行舟風蟬動去愁獨登孤岸立不見遠帆收及送故人盡亦嗟歸迹留  
洛陽君更憶寧復醉危樓

送何遜山人歸蜀

春風入樹綠童穉望柴扉遠壑杜鵑響前山蜀客歸到家逢社燕下馬澣征衣  
終日自臨水應知己息機

寄衡山福嚴長老

衡山幾千里聞在湘川側雲霞不可到峯壑無由識方丈開其間青松隱寒色  
飛鴻尙莫過況寄雙鳧翼

曲渚橋送張祕校赴慶州幕

野客伐山桂橫爲曲渚橋勢危寧過馬徑狹欲通樵小艇何妨繫離魂正此銷  
想君回首處虹影在林椒

南陽謝公祈雨

雲龍本職雨不雨其失職萬草欲焚如千疇幾赭色刺史爲民憂侵晨車競飭  
竭來款宮祠豈不念黍稷霽霽隨輪軒霧霽徧畛域孰謂雲龍愚能成仁惠德  
濯濯羣物新蔥蔥衆苗殖莫比邵父渠初慚用人力

西禪院竹

古寺帶脩岡青蔥萬竿玉春梢長舊林夏雨濕新綠幽禽嘯呼雜晚照陰晴續  
解帶欲忘歸壺觴歡自足

新霽望岐笠山

謝紫微  
坐中賦

北望直百里峨峨千仞青斷虹迎日盡飛雨帶龍腥陰壑煙雲畜陽厓草木靈  
登臨終不厭時許到茲亭

師厚生日因以詩贈

龍驥產龍駒良金出良冶良冶無頑礦駒龍豈凡馬致遠在御徒作礪由工者  
君子生慶門詩書未嘗舍進道期日隆無媿金馬下

晝寢

嘗聞晉高士時偃北窗風及爾寂無慮始知機盡空  
便便嘲已解栩栩夢何窮  
一寤復一寐百年消此中

過白水

下馬獨懷古脩然臨渡風真人去來久流水自無窮  
兩闊沙痕漲灣平野色通  
曾與漢家業今與百川同

泛舟城隅呈永叔

藤竹繞城陰煙梢拂濠水山禽時一鳴楚客孤舟裏  
孤舟穿綠荷獵獵雨新過  
誰思暮江上只尺採蓮歌

送永叔歸乾德

淵明節本高曾不爲吏屈斗酒從故人籃輿傲華紱  
悠然目遠空曠爾遺羣物  
飲罷卽言歸胸中寧鬱鬱

代書寄歐陽永叔四十韻

始謫夷陵日當居建德年一書冤逐客四詠繼稱賢自謂臨江徼相逢莫我先  
白醪封畫榼素鯉養泓泉戒吏收山粟呼童惜沼蓮只期東浦過共醉小谿邊  
日日占風勢時時到水堦安知貪挂席不肯暫回船自爾皆無定歸歟亦未然  
指程幾一月泝險歷三千魚鳥都難問音塵杳莫傳因之走羸僕試與訪南遷  
比及過牛峽還聞迎璧田報言雖不獲吉語喜多全我解歸堯闕君移近漢淵  
問塗曾未遠命駕亦何緣衰野今行矣隆中有待焉鄉亭瓜接畛風化蟻同羶  
卽欲朋簪盍翻爲俗事牽愛嬰嬌啞啞嗜寢復便便雞黍煩爲具輪轅豈得前  
寄聲勤以謝幸子恕而憐來貺誠爲望論情恐未捐嘗親馬南郡果謁謝臨川  
遂得窺顏色重忻論簡編聊咨別後著大出篋中篇問傳輕何學言詩詆鄭箋  
飄流信窮厄探討愈精專道舊終忘倦評文欲廢眠寧知主人貴但見左魚懸  
所至同風月相歡憶澗漚清歌嗟在耳素髮怪侵顛翠堞時登眺芳洲屢泝沿  
難醒撥醅醪殊厭落頭鮮坐竹聽啼鳥臨流聒嘒蟬孤亭起歸夢南陌去揚鞭  
出餞陪雙旆方蘄歷廣鄠始生山吏敬頗釋利塗遭會面辭何吐離膺事已填

空餘郡樓望野色際平煙

漸嘉樓望雨陪謝守

冒雨上城頭淒淒欲報秋雲低密藏樹風急暗侵樓  
漸積荷珠重新添沼鑑幽憑闌未能去公自念民疇

和謝舍人游震

盛夏萬物當長養驕陽不雨誰爲憂天無纖雲野  
赭色草木焦卷如經秋南陽太守自引咎不以天  
時爲怨尤齋精潔慮祠望內僚屬奔從無停輟謾  
取詩言占離畢徒依風俗驗鳴鳩忽聞郡北直百里  
岑岑岐笠藏靈湫持牲遣吏詣其下俎豆未徹升  
陰虬電光劃劃遶崑壁雷聲隱隱生山陬擁雲馳  
雨自東上西風斗猛雲還收神龍蓄志未發泄明日  
更與頑陽讎躡靄陰黑若卷海聯絲霹靂能破仇  
沃然原隰洗妖氣浩爾溝瀆揚平流九穀有登百姓  
喜蜿蜒歆祀神何羞

和謝舍人新秋

西風一夕狂古屋吹可恐微變蜻蛉吟斗摧蚊蚋勇朝驚露墜梧遠愛雲飛隴  
還憶舊溪遊水清漁箔壅

中秋新霽壕水初滿自城東偶泛舟回謝公命賦時余將赴襄城

齋舫談經後官池載酒行斜陽鳥外落新月樹端生演漾思江浦夷猶繞郡城  
東轅有遺恨日日物華清

陪謝紫微晚泛

積雨漲秋壕輕舟此共遨菰蒲斂鉉鏗蓮芡熟橐韜岸靜魚跳月林喧鳥避篙  
歸時興不淺風物正蕭騷

奉陪覽秀亭拋壻

聊爲飛礫戲愈切愈紛如自是取勢闊非關用意疎誤驚花鳥起亂破錦苔初  
童指拾將禿多慚賈勇餘

傷馬此馬季父爲樞直日恩賜以遺余

吾貧只一馬昨日忽云喪庭樹齧無膚秋郊誰復放空傷駿骨埋固乏弊帷葬

况本出天閑因之重怙悵

一日曲

此而下離南陽作

妾家鄧侯國肯媿邯鄲姝世本富繒綺嬌愛比明珠十五學組紉未嘗開戶樞  
十六失所適姓名傾里閭十七善歌舞使君邀宴娛自茲著樂府不得同羅敷  
涼温忽荏苒屢接朝大夫相歡不及情何異逢路衢昨日一見郎目色曾不渝  
結愛從此篤暫隔猶恐疎如何遂從宦去涉千里塗郎跨青驄馬妾乘白雪駒  
送郎郎未速別妾妾仍孤不如水中鱗雙雙依綠蒲不如雲間鵠兩兩下平湖  
魚鳥尚有託妾今誰與俱去去約春華終朝怨日賒一心思杏子便擬見梅花  
梅花幾時吐頻搗欄竿數東風若見郎重爲歌金縷

依韻和謝副閣寄新酒

以下汝州後詩

聞道芳洲景氣新却輸鷗鷺日相親小槽酒熟玻璃色誰憶高臺共賦人

送劉子思殿丞宰巫山

千里向巴東青山不可窮峽猿初入聽蠻語未全通暮雪思梁國朝雲識楚宮

吏人迎拜處嘶馬入丹楓

朔風寄永叔

朔風嗥枯枝遠鴈不能起  
日色寒無光原野澹千里  
所思在南國遐路闊音旨  
潛鱗亦安託冰結長河水  
峨峨既未泮獵獵終不已  
悠然傷我心歷亂非可擬

襄城對雪二首

風急夜窗鳴暗知庭下積  
曉幔忻以卷虛堂睡成癖  
飄飄初縈林凌亂欲侵席  
擁扉人莫掃何似袁家宅

登城望密雪浩浩川野昏  
誰思五原下甲色千里屯  
凍禽立枯枝飢獸齧陳根  
念彼無衣褐媿此貂裘温

雪夜留梁推官飲

晝雪落旋消夜雪寒易積  
燈清古屋深爐凍殘煙碧  
爲沽一斗酒暫對千里客  
酒薄意不淺輕今須重昔  
重昔是年華飄飄猶過隙  
一醉冒風歸平明馬無迹

南陽謝紫微挽詞三首

忽驚南郊信半夜雪中來遂哭寢門外始嗟梁木摧文章千古盛風韻故人哀  
憶昨臨湍水寧知隔夜臺

平昔聞嚴助承明厭直廬請章來未久捐館遽何如無復淮南論曾成太史書  
蒼蒼不可問揮涕望輜車

自古豈無死賢哉獨可悲家貧留旅櫬門慶有諸兒里社當存祀邦人定立碑  
還同羊叔子罷市見遺思

丞叔自南陽至余郊迓馬首訪謝公奄然相與流涕作是詩以寫懷  
郭門臨汝水鏡色入高衢鞍馬過其上塵襟蕩已無及郊逢故友出涕各霑濡  
神物喪頭角空存尾與軀溝木失匠斲誰施藍與朱並轡不能語斯文其已夫  
歸來授子館自爲炊彫胡且勿厭茲會日月易以徂

贈琴僧知白

上人南方來手抱伏羲器頽然造我門不顧門下吏上堂弄金徽深得太古意  
清風蕭蕭生脩竹搖晚翠聲妙非可傳彈罷不復記明日告以行徒興江海思

教授宋著作還

何以擬君子雲鴻肅羽儀將過上林苑先集孝王池  
唼藻有餘樂漸磐方得時  
野塘歸莫晚白水遠連陂

宛陵先生文集卷第六



宛陵先生文集卷第七

夏日晚霽與崔子登周襄故城

以下汝州後詩

兩脚收不盡斜陽半古城獨攜幽客步閑閱老農耕寶氣無人發陰蟲入夜鳴  
余非避喧者坐愛遠風清

永叔寄澄心堂紙二幅

昨朝人自東郡來古紙兩軸緘滕開滑如春冰密如繭把玩驚喜心徘徊蜀牋  
脆蠹不禁久剡楮薄慢還可哈書言寄去當寶惜慎勿亂與人翦裁江南李氏  
有國日百金不許市一枚澄心堂中唯此物靜几鋪寫無塵埃當時國破何所  
有帑藏空竭生莓苔但存圖書及此紙輦大都府非珍瓊于今已踰六十載弃  
置大屋牆角堆幅狹不堪作詔命聊備麤使供鸞臺鸞臺天官或好事持歸祕  
惜何嫌猜君今轉移重增媿無君筆札無君才心煩收拾乏匱櫝日畏捨裂防  
嬰孩不忍揮毫徒有思依依還起子山哀

聞尹師魯赴涇州幕

胡騎犯邊來漢兵皆死戰昨聞衛將軍賢俊多所薦知君慮不淺永對未央殿  
天子喜有言輅車因召見籌畫當冕旒袍魚賜銀茜曰臣豈身謀而邀陛下睭  
青衫出二嶠白馬如飛電關山冒風露兒女泣霜霰軍客壯士多劍藝匹夫街  
賈誼非俗儒慎無輕寡變

夏日陪提刑彭學士登周襄王故城

聊隨漢使者一上周王城片兩北郊晦殘陽西嶺明野禽呼自別香草問無名  
誰復黍離詠但與箕頽情

王殿丞赴莫州日就余求釣竿數莖以往今因其使回戲贈

去日覓釣竿定能垂釣否若不暇釣魚釣竿當去取

詠蜘蛛

日結一尺網知吐幾尺絲百蟲爲爾食九腹常苦飢

宋著作寄鳳茶

春雷未出地南土物尙凍呼譟助發生萌穎彊抽共團爲蒼玉璧隱起雙飛鳳

獨應近臣頌豈得常寮共顧茲實踐賤貧何以叨贈貢石碾破微綠山泉貯寒洞  
味餘喉舌甘色薄牛馬漣陸氏經不經周公夢不夢雲脚俗所珍烏觜誇仍衆  
常常盪杯甌草草盈罌甕寧知有奇品圭角百金中祕惜誰可邀虛齋對禽哢

觀水 并序

庚辰秋七月汝水暴至溢岸親率縣徒以土塞郭門居者知其勢危皆結菴于  
木末傍徨愁歎故作是詩

秋水漫長堤郊原上下迷孤城閉板築高樹見巢棲耳厭蛙聲極漚生兩點齊  
渚間牛不辨誰爲掃陰霓

大水後城中壞廬舍千餘作詩自咎

不如無道國而水冒城郭豈敢問天災但慚爲政惡湍迴萬瓦裂槎向千林閣  
獨此懷百憂思歸臥雲壑

依韻和李君讀余注孫子

我世本儒術所談聖人篇聖篇闢乎道信謂天地根衆賢發蘊奧授業稱專門

傳箋與注解璨璨今猶存始欲沿其學陳迹不可言唯餘兵家說自昔罕所論  
因暇聊發篋故牘尚可溫將爲文者備豈必握武賁終資仁義師焉媿道德藩  
揮毫試析理已厭前輩繁信有一日長可壓千載魂未涉勿言淺尋流方見源  
廟謀盛夔禹正議滅烏孫吾徒誠合進尙念有親尊

新霽登周王城

行行古城頭歷覽古城下水鳥傍人煙河流隔桑柘秋山豁晴翠野老親時稼  
民訟今已稀閑登厭官舍

依韻答李晉卿結交篇

上交執正道下交守奇節當爲蘭死香勿作竹枯裂試看溫玉堅何似春冰折  
貴賤事乃見古今情不別平生相與親晏歲誰可決君能持此意足以表風烈

秋日屬疾

體羸易生疾況乃淩秋陰微寒薄膚腠飲藥增衣衾一日失所治百骸將不任  
當從華氏學聊欲爲戲禽

田家

高樹蔭柴扉青苔照落暉荷鋤山月上尋徑野煙微老叟扶童望羸牛帶犢歸  
燈前飯何有白薤露中肥

苦雨

秋空幾旬雨四海低鵬翮晝不見日精夜不見月魄灑盡天漢流蒸爛女媧石  
塗潦將埋輪牛馬困負軛羣蟲無土蟄百果就枝拆安能誅陰虬坐使天地闢  
聞永叔復館因以寄賀

東方有鍛禽已喜羽翰插重來金馬門莫忘黃牛峽黃牛無冬春遠水生鱗甲  
今非昔日憂賀酒特新壓

九月一日

去歲南陽與謝公別今謝已歿

授衣念徂節闔棺傷故人故人昔送我把酒湍水濱只道後期易豈知無會因  
死生意不及欲語鼻先辛既乏羨門術安得如松筠寒暑更數十應亦同埃塵

弔李膺祠

陰虬橫天長劍欲抉匣穎未露兮精鋼已折層冰塞川猛炬方烈凝氣未銷兮  
高燄已滅雖忠毅之有志兮當衰運之閉結嗟身禍之不免兮甘就死於縲絏  
何賢者之景慕兮或自表而謝絕惟荀公之獲御兮見顏間之氣悅奚服媚之  
若茲兮蓋操秉乎峻節風裁獨高而罕接兮號龍門而無凡轍允簡亢不容於  
時兮玉雖碎而猶潔痛漢網之頽圯兮又何毀乎賢哲歷千古而可悲兮故余  
不得而面結叨此邦而長民兮過舊隴而增咽嗟異代之有遇兮若登履乎閩  
闌對風樹之蕭蕭兮想魂氣之未竭聊感概於斯兮寫憂心之惓惓

送李康伯赴武當都監

城下漢江流滄波照鬢秋山川包楚塞風物似荊州試聽清砧發何如畫角愁  
遙知絕戎事水味有槎頭

重送

得朋如得寶何恨相知晚舊友貴來疎嗟君行復遠秋城隔寒水驛路入蒼巘  
古情深不深所祝加餐飯

田家語 并序

庚辰詔書凡民三丁籍一立校與長號弓箭手用備不虞主司欲以多媚上急責郡吏郡吏畏不敢辨遂以屬縣令互搜民口雖老幼不得免上下愁怨天雨淫淫豈助聖上撫育之意邪因錄田家之言次爲文以俟採詩者云

誰道田家樂春秋稅未足里胥扣我門日夕苦煎促盛夏流潦多白水高於屋水旣害我菽蝗又食我粟前月詔書來生齒復板錄三丁籍一壯惡使操弓鞬州符今又嚴老吏持鞭扑搜索穉與艾唯存跛無目田廬敢怨嗟父子各悲哭南畝焉可事買箭賣牛犢愁氣變久雨鐺缶空無粥盲跛不能耕死亡在遲速我聞誠所慚徒爾叨君祿却詠歸去來刈薪向深谷

檢覆葉縣魯山田李晉卿餞於首山寺留別

我本山水鄉看山常不足自從到官來塵事便拘束嘗聞此山寺法宇深雲木無由一來過夢想向巖谷案甲趨鄰疆跨馬涉平陸良久送我行偶與賞心屬禪庭鳴白雞祖席歌黃鵠野氣逼人寒嵐光添酒綠言離非遠離但愛交情篤

重游應有期君亦行車促

臥羊山

亂石若羣羊緣岡臥斜日曾非左慈化更想初平叱無羶穴蟻去有乳寒泉出  
誰憶灞陵原纍纍冢傍質

汝墳貧女

時再點弓手老幼俱集大雨甚寒道死者百餘人自壤河至昆陽老牛陂僵尸相繼

汝墳貧家女行哭音悽愴自言有老父孤獨無丁壯郡吏來何暴縣官不敢抗  
督遣勿稽留龍鍾去攜杖勤勤囑四鄰幸願相依傍適聞閭里歸問訊疑猶彊  
果然寒雨中僵死壤河上弱質無以託橫尸無以葬生女不如男雖存何所當  
拊膺呼蒼天生死將奈向

昆陽城

試看昆陽下白骨猶銜鏃莫願隍水頭更添新鬼哭

老牛陂

吳牛行欲老漢馬焉得肥筋力不可恃遊子當念歸

雙鳧觀

山下溪流照城郭  
幽庭柏子風自落  
古壇蒼蘚少人行  
不見雙鳧見黃雀

葉公廟

兵物還見驚從來  
人所悼今看古壁畫  
應合當時好

己卯歲紫微謝公赴南陽  
過葉縣陪遊興慶精舍題各壁間而去庚辰  
歲余求案田因訪舊迹盡然於懷故作此謠以志其悲

昔與南陽太守行  
車騎休時訪庭柏  
今來重看壁間題  
太守已爲泉下客  
獨流清血是門人  
怙悵便令生死隔

觀扱兔

莽莽蒿萊下  
紛紛狡兔迷  
枯株坐守者  
若箇是忘歸

燈花

灼灼生寒燼  
終朝照席明  
從教占有驗  
然滅本無情

魯山山行

適與野情愜千山高復低好峯隨處改幽徑獨行迷霜落熊升樹林空鹿飲溪  
人家在何許雲外一聲雞

游元紫芝琴堂

訪古歷荒城城孤落日鳴人琴兩不見破月高臺傾

至香山寺報秀叔

家近心還速川長馬易疲望山孤寺出渡水夕陽遲來向林間宿歸須月上時  
只應庭際鵲已報汝先知

寒草

寒草纔變枯陳根已含綠始知天地仁誰道風霜酷

送崔秀才二首

晨風無定巢遠寄鷦鷯枝天寒鼓翼健粒食寧所窺大澤多羣羽翱翔各有時  
今子振衣去焉能久迤羈

少年游太學著盡篋中衣獨劍自爲伴無家何處歸秋蓬隨野轉寒鵲遶林飛

霄漢有知己行行寧久微

思遠寄師厚

馬蹄踐霜雪不畏道路寒游子重衣裘慈母懸心肝懸心幾千里冉冉歲已殘  
大河今漸涸遠日常不乾度鴈朝夕聞尺書寄亦難願同車輪復勿比弦上丸

送師厚歸南陽會天大風遂宿高陽山寺明日同至姜店

往日送子春風前春風酣酣杏正妍今來送歸秋風後秋風撼撼沙滿川馬鬣  
斜傾毛瑟縮馭吏噤噤足後先弊裘吹裂寒入骨枯株磨夏火欲然忽逢古寺  
出崑腹與君下馬相留連殿堂高下就山勢松柏森聳侵雲巔長廊落葉卷若  
掃丈室垂幔翻如褰像塑神母乳九子抱攜撫玩皆可憐却令遠客自生念欲  
見幼穉心煩煎擁爐對坐日昏黑龕燈共借僧榻眠雖然覆衣冷如鐵不及在  
家貧無氈曲肱難寐要天曉兩股凍痺仍筋攣根根殘夜木魚響起看昂畢傾  
西躔怒號斗息東方白童僕肅整吾將還老僧掃壁持筆硯請予彊此題歲年  
出門並轡至山店茅屋揭盡餘尺椽又據胡牀一談笑君不解飲聊開筵程次

都無五百里篋中可乏一囊錢拂衣頻起畏日吳應恐慈母心懸懸顧我便當  
江海去却思此地何由緣

疲馬

疲馬不畏鞭暮塗知幾千當須量馬力始得君馬全

依韻和永叔子履冬夕小齋聯句見寄

遙知夜相過對語冷無火險辭鬪尖奇凍地抽筍筍吟成欲寄誰談極唯思我  
學術窮後先文字少許可敢將蠹測海有似脂出輒必餓嘗見憂此病各又果

弊駕當還都重門不須鎖到時春怡怡萬柳枝娜娜定應人折贈只恐絮已墮

行橐且不貧明珠藏百顆永叔嘗見嘲謂自古詩人率多寒餓顛困屈原行吟

溺於宣城孟郊盧仝栖道路以子之才必類數  
子今二君又自為此態而反有飯顆之誚何邪

古冢南陽道中作此以下汝州  
罷官再至鄧州葬希深

南陽古原上荒冢若魚鱗劍佩不為土衣冠應化塵枯骸託魑魅細草沒麒麟

何必問名氏漢家多近親

仲春同師直至壠山雪中宿穰亭

與子乘羸馬夜投山家宿風雪滿締裘燈火深竹屋烹雞賴主人吠犬憎僮僕  
明發到巖前春蕙凍雲木

依韻和師直仲春雪中馬上

自倚春風暖輕袍犯雪來過塘迷綠水拂樹雜芳梅山蔽峯難辨樵通徑易開  
野行方有味緩轡不須催

和師直早春雪後五壠道中作

來尋谷口春正值陰雲結日暮冰霰繚宿亭孤飯設侵晨登壠去始見羣峯列  
草凍未抽心松枯猶抱節川傍認飛鷺林上墜殘雪何意待芳菲遲留未堪折  
依韻和師直晚步徧覽五壠川

窮覽川源勝經行未厭頻樵深但聞斧谷暖自留春臨水何妨坐看雲忽滯人  
誰家煙塢裏竹樹遠相鄰

暮春過洪氏汝曲小園

三月花已休閑來羨叢薄河回地勢偏  
雨入灘聲惡綠草旋抽心青梅猶帶萼  
主人歸未歸誰省曾遊樂

雷祕校入闕擬官時將登舟過輦下

與君先後發同走向京華羨躍青驪去  
將乘烏榜賒著鞭辭宿雨渡水踏春沙  
聞道求爲縣應當學種花

登許昌城望西湖

城望許西偏湖光浸曉煙岸痕添宿雨  
草色際平田夏木陰猶薄朱荷出未員  
人閑綠波靜幽鷺插頭眠

孫主簿惠上黨寺壁胡霈然書墨迹一匣

上黨佛祠何可觀開元瑞物圖高閣又有長廊古壁上復是名輩題丹牘當時  
泥用絲作筋意欲千載無剝落書奇畫妙了不識訛傳墨土能治平瘡寺僧不  
惜人指取筆墨遂缺如鳥啄後來好事恐磨滅寶刀裁剗泥如剝取之龕置綠  
板匣便寶箱楮同美璞拂拭還看體勢生盤屈蒼虬舞鸞鷲在昔不畏屋壁壞

今也常恐兒童撲夫君知我心所重南歸贈以致誠慙此時雖喜落吾手老大腕硬無由學但當拜祝不敢忘莫爲報言曾未數

寄永興招討夏太尉

代人

寶元元年西夏叛天子命將臨戎行二年孟春果來寇高奴城下皆氏羌五原偏師急赴敵晝夜不息趨戰場馬煩人怠當勁虜雖持利器安得強二師覆敗乃自取豈是廊廟謀不臧朝廷又選益經略三幕賢俊務所長或取李悝備邊策或欲五道出朔方仲夏科民挾弓矢季冬括驢齎道糧官軍未進復犯塞塞旗殺將何猖狂遂令士卒愈沮氣欲使乘障膽不張我願助畫迹且遠側身西望空淒涼庶幾一言可裨益臨風欲寄鳥翼翔所宜畜銳保城壁轉饋先在通行商守而勿追彼自困境上未免小歟攘譬如蚊蚋嗜膚體實於肌血無大傷此言雖小可喻遠幸公采用不我忘誠知公慮若裴度聖上聽用同憲皇當時豈不歷歲月猶且衆鎮未陸梁況今鷹犬乏雄勇便擬馳騁徒蒼惶且緩須時勵犀卒終期拉朽功莫當

桓妒妻

昔聞桓司馬娶妾貌甚都其妻南郡主悍妒誰與俱持刀擁羣婢逕往將必屠  
妾時在窗前解鬟臨鏡梳鬢髮雲垂地瑩姿冰照壺妾初見主來縮髻下庭隅  
斂手語出處國破家已殂無心來至此豈願奉君娛今日苟見殺雖死生不殊  
主乃擲刃前抱持一長吁曰我見猶憐何況是老奴盛怒反爲喜哀矜非始圖  
嫉忌尙服美傷哉今亦無

宛陵先生文集卷第七

宛陵先生文集卷第八

夏日晚晴登許昌西湖

以下許州後詩

新晴萬柳齊鶯度水東西城上明殘照雲間挂斷霓烟蒲勻若翦沙岸淨無泥  
果壓繇枝重人乘小駟低嵐光開翡翠湖色浸玻璃只欠朱藤密如過罨畫谿  
許昌晚晴陪從過西湖因詠謝希深蘋風詩愴然有懷

疎雲漏斜照殘雨葉間明飛蓋城頭去澄湖水正平荷盛鮫客淚蔓濯野人纓  
公獨思康樂臨流誦句清

故原戰

落日探兵至黃塵鈔騎多邀勳輕赴敵轉戰背長河大將中流矢殘兵空負戈  
散亡歸不得掩抑泣山阿

故原有戰卒死而復蘇來說當時事

縱橫尸暴積萬殞少全生飲雨活胡地脫身歸漢城野穉穿廢竈妖鵬嘯空營  
侵骨劍瘡在無人爲不驚

西湖閑望

夏景已多趣湖邊日更佳園葵雜紅紫岸柳自敲斜雨氣收林表城陰接水涯  
愛閑輸白鳥盡日立汀沙

寄謝師直

憶同仲春月冒雨過穰亭聊酌山酒別獨吟夜燈青明朝上嶺路羣岫張雲屏  
忽入川谷秀固非平生經綠竹間紅萼紫藤垂千局春塘水淩淩野老髮星星  
田父相與至里言尚可聽始聞丹砂岑遂識五壠形傍瞻禹湯迹競信廟貌靈  
邀我陟嶢嶢宿霧方冥冥暗霑衣裘濕時襲草木馨棟宇敞絕頂牲酒列幽亭  
竹杯占禍福巫錦醉一疇日晏別雲外月出至近坳僕夫疲不進鞭策無暫停  
我馬忽顛墜君心同鶴鴿再駕體無傷扣關燭已熒自茲期莫逆未契心所銘  
恩恩操行袂汎汎如水萍今來各一方安得同醉醒

感二鳥

雄雌雙好鳥託棲空樹中有蛇出旁穴噴毒氣如虹半夜此驚飛瞥去隨西東

有喙不能達啼雲復嘯風迴翔隔歲月老木高童童眼生衆禽噪雖近未由通  
昨朝烟雨晦並翼向幽叢鷹鷂尙橫集颺颺意無窮

古相思

劈竹兩分張情知無合理織作雙紋篔依然淚花紫淚花雖復合疑岫幾千里  
欲識舜娥悲無窮似湘水

舟次朱家曲寄許下故人

藹藹桑柘岸喧喧雞犬邨晚雲連雨黑秋水帶沙渾稍聽鄰船語初分異土言  
雖嗟遠朋友日喜近田園

送曇穎上人往廬山

潯陽幾千里無不見爐峯蒼翠入衆目巖壑少行蹤高僧忽獨往杳杳懷遠公  
嘗聞虎溪上醉令或來同而今競邀致幾里聞松風塵心古難洗瀑布垂秋虹

弔石曼卿

前時京師來對馬嘗相揖埃塵正滿衢笑語曾未及雖然恨莫親往往聞風什

星斗交垂光昭昭不可挹獨哦秋露中豈顧衣裘濕酒杯輕宇宙天馬難羈繫  
今朝我還都但見交朋泣借問泣者誰曼卿魂已蟄堂堂豪傑姿遂爾一棺戢  
君生寒月明君沒寒月入月入還復升精魄寧未集孤墳細草遍翠碣嗟新立

醉中留別永叔子履

新霜未落汴水淺輕舸唯恐東下遲遶城假得老病馬一步一跛令人疲到君  
官舍欲取別君惜我去頻增嘻便步髯奴呼子履又令開席羅酒卮逡巡陳子  
果亦至共坐小室聊伸眉烹雞庖兔下箸美盤實釘鉅栗與梨蕭蕭細雨作寒  
色厭厭盡醉安可辭門前有客莫許報我方劇飲冠幘敲文章或論到淵奧輕  
重曾不遺毫釐間以辨謔每絕倒豈顧明日無晨炊六街禁夜猶未去童僕竊  
訝吾儕癡談兵究弊又何益萬口不謂儒者知酒酣耳熱試發泄二子尙乃驚  
我爲露才揚己古來惡卷舌噤口南方馳江湖秋老鱖鱸熟歸奉甘旨誠其宜  
但願音塵寄鳥翼慎勿却効兒女悲

汴水斗減舟不能進因寄彥國舍人

朝落幾寸水暮長幾寸沙深灘鰲背出淺浪龍鱗斜秋風忽又惡越舫嗟初閣  
坐想掖垣人猶如在寥廓

陪淮南轉運魏兵部遊潁州女郎臺寺

舊傳媯氏女將適楚人時築館自臨水故臺空此基因爲楚宮媵來與使車期  
樓上望湖上烟林晚蔽虧

望仙亭

并序

壽春望仙亭廣平宋公所作也宛陵梅堯臣之官吳興道出其下公命賦之  
公來有餘樂所樂爲郡間訟稀聊自適靜勝以紓顏清軒開曉幔歷歷見淮山  
山色洗新雨佳氣如可攀代異雞犬去時平草木閑試望天衢近飛駕應此還  
陪淮南轉運魏兵部遊濠上莊生臺

周當戰國時何爲守靜正干戈旣日尋仁義固不競天下皆跖徒寧知聖爲聖  
是將萬物齊不顧千金聘所以忘形骸所以保性命安能小仲尼豈不識世病  
我從魏公來訪古停烏榜聊識賢者心吁嗟一長詠

淮上雜詩六首

宿雲未全斂微雨入船疎問伴失前後暝行隨疾徐相親沙上鴈自樂水中魚  
亭午日光透遠分林際居

暗開淮水平遠見孤城出出舟問舟子遽對那能悉始聞莊生臺還想觀魚日  
果得真隱心魚鳥情非密

輕舟晚投處聒聒渚禽嘶椽子隨薪束蔬科帶土攜岸幽雲滿石潮落蚌生泥  
客思無慘極唯將魯酒迷

野鴈不知數翳然川上鳴曾無設羅意空自見船驚渺渺拍波去紛紛孤嶼盈  
苦寒非塞外霜落夜淮清

漠漠晝烟披縱橫見魚艇輕橈上急水或與飛鴻並魚大釣絲微牽隨碧潭迴  
向晚得志歸浩歌山月靜

舟閣下灘遲蒼黃暮灘上偏愁逆水風更駕崩沙浪落日看已昏漁燈遠相向  
夜闌天轉寒坐待潮流漲

赴讐任君有詩相送仍懷舊賞因次其韻

湖山饒邃處曾省牧之遊  
鴈落葑田闊船過濞渚秋  
野烟昏古寺波影動危樓  
到日尋題墨猶應舊壁留

過揚州參政宋諫議遺白鵝

曾遊鳳池上曾食鳳池萍  
乞與江湖去將期養素翎  
不同王逸少辛苦寫黃庭

金山寺

并序

昔嘗聞謝紫微言金山之勝  
峯壑攢水上秀拔殊衆山環  
以臺殿高下隨勢向使善工  
摹畫不能盡其美初恨未遊  
赴官吳興船次瓜洲值海汐  
冬落孤港未通獨行江際始  
見故所聞金山者與謝公之  
說無異也因借小舟以往乃  
陟迴閣上上方歷絕頂以問  
山阿危亭曲軒窮極山水之  
趣一草一木雖未萼發而或  
青或凋皆森植可愛東小峯  
謂之鷗山有海鷗雄雌棲其上  
每歲生雛羽翮既成與之縱  
飛迷而後返有年矣惡禽猛  
鷲不敢來茲以搏魚鳥其亦  
不取近山之物以爲食可義  
也夫薄暮返舟寺僧乞詩強  
爲之句以應其請偶然而來

不得髣髴敢與前賢名迹邪

吳客獨來後楚橈歸夕曛山形無地接寺界與波分巢鶻寧窺物馴鷗自作羣  
老僧忘歲月石上看江雲

瓜洲對雪欲再遊金山寺家人以風波相止

臘月海風急雪吹巖下窗輕舟不畏浪昨日過寒江渡口復夕興區中無與雙  
忽牽兒女戀空聽遠鐘撞

金山芷芝二僧攜茗見訪

一遊江山上日日吟不足雙錫忽來過衣霜帶初旭况能持茗具向此烹新綠  
中瀟水若飴北焙花知粟還將塵慮滌自媿冠纓束何以報勤勤奴扣雲谷  
淮南遇梵才吉上人因悼謝南陽疇昔之遊

久已厭宦旅故茲歸江南始時遽辭邑不及事春蠶殘臘猶在道險阻固所諳  
扁舟次淮海喜遇釋子談契闊十五年尙謂臥巖菴偶見如夙期淹留良亦甘  
歎逝獨泫然懷悲情豈堪班班雲中鳥共看投夕嵐曷不念舊隱山水唯素耽

我從湖上去微爵輕子男

送櫟陽宰朱表臣

塞上備胡羌關中調兵食秦民尙苦輸漢吏勤求職君今喜懷詔馳騎寧暇息  
其邑嘗兩金於時豈能得行嘗經灞上故事猶可憶前代多戰爭鬼火弄陰黑  
蒼蒼路傍草憔悴希春色縣塗誠有政威惠爲令德

依韻和長吉上人淮甸相遇

淮上一相遇憶在京都時雖驚歲月換未改松桂姿童侍兩三人餅錫相與隨  
自言東越來篋中多好詩文字皆妥帖業術無傾敬前輩嘗有言清氣散人脾  
語妙見情性說之聊解頤始推杼山學得非素所師此固有深趣吾心久已知  
橫琴乃玄悟豈必弄鳴絲古樂衆少聽誰知彼吹簫師曠沒世後伯牙衆身悲  
願同黃鵠舉遠歸滄海涯老驥雖不病長坂安可馳天台況奇勝日夕勞夢思  
尙忝齒纓綬終年趨路岐俯媿淵中魚游泳水之湄仰羨雲間鷲凌厲辭紮維  
居嘗起斯念未去情不怡今朝更道舊感愴各顰眉同遊謝公門遠想袂霑漉

惜哉胡不仁碎彼東方琪又出數紙書手澤尚可披眷眷疇昔意於今當語誰  
復遣三百言玩味自挽髭序事盡成故慨吟良有資其詞何疊疊宛若對風規  
泠然聳心目不覺整冠綉重以超俗韻顧予賤職司是猶援鳥情並此驚櫪卑  
報投仍勉強實謬匠者爲應哂不量力短兵茲已疲

歲日旅泊家人相與爲壽

舟中逢獻歲風雨送餘寒推年增漸老永懷殊鮮歡江邊無車馬鑑裏對衣冠  
孺人相慶拜共坐列杯盤盤中多橘柚未咀齒已酸飲酒復先醉頗覺量不寬  
岸梅欲破萼野水微生瀾來者卽爲新過者故爲殘何言昨日趣乃作去年觀  
時節未變易人世良可歎

寄題梵才大士台州安隱堂

巢禽託靜林潛魚戀深壑豈不能自安翔泳得所樂達士遠紛華於茲守沖漠  
堂前鳴松風堂後馥花萼好鳥時一呼澄明望寥廓詩興猶不忘禪心詎云著  
所以得自然寧必萬緣縛未能與之游懷慕徒有作

農難

稂莠非所殖嘉禾共一田老農實惡之豈共時稼捐管蔡與盜跖同氣詎能遷  
周公不妨聖柳惠不妨賢賢哉彼薶矣取舍得其然

舟中值雨裴刁二君相與見過

江上滄淒淒天形接野低岸痕生舊水馬迹踏春泥風急侵衣重山昏卷幔迷  
誰驚二客論不媿巨源妻

題刁經臣山居時已應辟西幕

向不樂郡府遂云歸田園結廬復種藝草樹日已緜散帙理舊學了然無俗喧  
春雨一迴過覽耕登古原青山每自愛霽色當衡門故人苟來往名宦未嘗言  
趣適已不淺道心良亦存忽聞辟書至便令驅犢轅豈期同瓠瓜長繫蒿萊根  
始知古君子出處唯義敦

前者裴君雨中見過因以詩謝復承來章輒依韻奉和

主人門下客寂寞在江涘我昨謝銅章解組猶脫屣前日至朱方正值春雨起

君時冒雨來曾不避泥滓林枝滴衣襟沙岸平履齒相歡了無間偶論通遠旨  
去逢親交問爲報心如水

甘露寺

曾非遠城郭寂爾隔躑氛尙有南朝樹能留北固雲川濤觀海若霜磬入江濱  
衛國丹青在孤堂綠桂薰

依韻和刁經臣讀李衛公平泉山居詩碑有感

當時植珍木豈是昧前規廢宅長春草故山存舊碑已嗟良璧毀安識古松姿  
叔子每懷慕此心空自知

春日舟中對雪寄刁經臣

誰道江南暖新春見雪飛鷗來親客艇花亂上人衣古郡地偏寂野窗寒入微  
戴家仍不遠欲去未能歸

依韻和達觀禪師春日雪中見寄

密霰來新歲春陽氣漸微侵庭草芽凍紛雜鴈行飛江寺誰開逕湖山我欲歸

兩花無六出休怪著人衣

和刁太博新墅十題

靜舍

野木扶疎重復重塘蒲涵水綠茸茸琴書尤古得爲樂休問前山有戴顓

西齋

靖節歸來自結廬稚川閑去亦多書請君架上添芸草莫遣中間有蠹魚

北軒

冬日迎暄此未宜苦吟那對朔風時祇誇砌下留殘雪不看檐間斗柄垂

叢杉

植幹森然美在庭更憐相倚自青青翠姿且有干雲勢豈是孤生向遠坳

松阜

勾引風聲已可聽高陰仍更接岡形知君久欲平心氣早晚根傍長茯苓

小舫

小舫閒撐莫厭遲比於剡艇劣相宜漕河有處通陂水深入荷花人不知

移竹

遠愛檀欒碧逕開荷鋤乘雨破秋苔直須探作阮家趣更向煙林缺處栽

花隴

雜芳春發淺深叢曲隴逶迤紫間紅色賤格微應不數少添蘭菊待秋風

綿檜

翠色凌寒豈易衰柔條堪結更葳蕤松身柏葉能相似勁拔緣何不自持

新井

淺淺清泉自鑑開鱗鱗寒螿未生苔山中亭午野禽渴不畏人驚欲下來

發陶莊却寄刁經臣裴如晦

方看梅柳春共別川河上移舟人已歸回首竹林望水渾不照影山遠猶相向

聞道欲西遊漢家今尚壯

發丹陽後寄徐元輿

別君忽五年相望非一日會合如夢寐欣喜對形質是時春已仲臨水柳未密  
載酒相與遊輕舸劣容膝禪局竹下過乳井松間出烹茶覺暫醒岸幘情彌逸  
興闌乘月歸及旦解行綵離懷更宿醒遠想都如失

胡武平遺牡丹一盤

以下湖  
州後詩

疇昔居洛陽看盡名園花臨水復蔭竹豔色照彤霞良友相與至競飲歡無涯  
而今猶老翁鬢髮但未華昨日到湖上碧水涵蒲芽此情頗已愜薄宦非初嗟  
况乃蒙見憐帶雨摘春葩雖無向時樂惠好仍有加

題滕學士九華山書堂

處山方畏淺曾慕結深廬要與雲峯近寧將野客疎澗苗來入俎林鳥或窺書

何事輕茲樂而從出塞車

公今爲  
涇州

送劉成伯還都

余昔困川塗今非羨行者離心寄南風相送過平野既吹蓮葉舟更逐桂條馬  
中州多故人懷抱幸君寫

送舍弟正臣赴都

吳兒能刺舟其駛劇飛鳥行行固莫留望進前山小家貧吾不憂身計爾自了  
何當還里門拜慶期秋杪

訪報本簡長老

比泛苕溪來初逢卞山雨雨收精舍出喜與高僧語門臨水若鑑萬象皆可覩  
清淨欲誰鄰野蓮無處所

依韻和淮南祝祕校初春見寄

客有袖中書初憑春燕寄春燕不時來秋鴻今始至水落蒲藻寒悠悠江浦意

宛陵先生文集卷第八

宛陵先生文集卷第九

依韻和胡武平懷京下游好

以下湖州後詩

南國易悲愁西風起高樹枯荷復送雨度鴈寧知數欲問北來音繫書復若故  
冥飛杳無迹弋者徒有慕况在白蘋洲而懷石渠署石渠多故人鷓鴣方鷺  
鏘鳴尚可希絳翼何由附主人賴知己未變疇昔顧乘桴豈仲尼好勇非季路  
幸依南郡帳不學邯鄲步自守終日愚都志向時慮睠戀此江湖親年當喜懼  
既獲庭闈近又多山水趣邇來對明月千里猶會晤長橋人絕聲舉酒逢秋露  
迴聞孤舟笛烟水在何處俯檻意無涯跳波魚夜乳頗得真隱情奚須慕巢許  
思寄梅枝香遠隔蘭溪渡緘之付好風精爽亦隨去

依韻和武平九月十五日夜北樓望太湖

東吳臨海若看月上青冥河漢微分練星辰澹布螢細烟沉遠水重露裊空庭  
孤坐饒清興惟將影對形

依韻武平憶玉晨觀

世路多氛垢人間浪逐名是非還自喻寵辱固堪驚薄宦真何戀丹砂儻可成  
終尋谷口隱鄭子豈其卿

凝碧堂

始至荷芰生田田湖上密復當花競時豔色凌朝日今來蓮已枯碧水墮秋實  
更待雪中過羣峯應互出樽有綠蟻醅俎有蘋壺橘可以持蟹螯逍遙此居室  
送劉成伯著作赴弋陽宰

我昨之官來值君爲郡掾當年已知名是日纔識面未久嗟還都始應羣公薦  
遂除芸省郎出治江上縣縣劇素所聞其俗到可見水精製盤盂去冰瑩產郊  
甸鳴箏斲桐梓雕飾雜寶絢有藥化銅鉛方士多伏鍊君今齒尚壯好學常不  
倦二者定非惑吾言亦狂狷絃歌將有餘幸可窮經傳歸來期著書篋楮盈百  
卷莫學此疎慵無能守貧賤明朝君當行勉勉自出錢豈無一壺酒豈無一鼎  
饌

冬雷

上帝設號令隱其南山下震發固有時曷常事憑怒春以動含生夏以奮風雨  
冬其息不用藏在黃厚土我今來江南歲曆惟建午如何小雪前向曉疑鳴釜  
蛟蛇龜蟲厄鱗裂口塊吐蝦蟆不食月深窟僵兩股天公豈物欺若此汨時序  
或言非天公實乃陰怪主嘗觀古祠畫牛首椎連鼓黑雲雜狂飈相與爲肺腑  
是不由昊穹安能順寒暑吾因考厥事復以驗莽鹵市井欺量衡定知不活汝  
元惡逆大倫弗加霹靂斧比豈曰無私故予未所取必恐竊天威似將文法侮  
焉顧五行錯詎畏萬物覩欲扣九門陳恨身無鳥羽

劉成伯遺建州小片的乳茶十枚因以爲答

玉斧裁雲片形如阿井膠春溪鬪新色寒籜見重包價劣黃金敵名將紫筍拋  
桓公不知味空問楚人茅

冬日送暹上人

霜風刮地如刀鎌鳥不遠飛魚已潛何況削髮冷入骨草屨不畏冰雪霑緣山  
涉水去幾里晝盜野飯誰來添毗陵舊寺苦欲到索我贈行無久淹

和壽州宋待制九題

熙熙閣

初日照城樓流暉及菊閣上收花霧紅下見春烟薄信美是殊邦而淹佐時略  
自慚江外人敢慕淮南作

春暉亭

卉木日已發中圃日已嘉歡言樂和景及此鬢未華春風實無幾凌亂枝上花  
山陰况暮月俯仰誠可嗟

白蓮堂

蟋蟀在秋堂芙蓉出深水浩露同一色澄澈寒鑑裏佳人恥施朱欲與天真比  
沙鳥閑且都誰將擬公子

式宴亭

從事誰獨賢而來均宴喜幽禽雜嘯呼珍木竟叢倚興將物色俱閑厭簫鼓美  
寧同不聞問訟息時遊此

秋香亭

高軒盛叢菊可以泛綠樽餘甘自同齋忘憂寧用萱有木皆剝實何草不陳根  
獨此冒霜豔芬郁滿中園

狎鷗亭

羣生自知機不可欺以異此雖鷗與馴鷗亦魚所避坐熊臨碧水安得同一致  
然此海客心還應無有媿

齊雲亭

城隅結危棟髣髴凌烟霓平觀飛雨來俯窺巢禽棲浩蕩孤思發纂歷蔓草齊  
長安去不遠何言西北迷

美蔭亭

野材仍翦茅當此茂林下晴暉葉上明翠影杯中瀉鮮風時颺颺輕裾自蕭灑  
固殊嵒生鍛曷慕巖棲者

望仙亭

嘗聞淮南王雞犬從此去至今山頭石馬迹尚有處使君辭從宮終日絕塵慮  
望望雲漢間想見賓天馭

依韻和僧說上人見訪

客從東國來山雲猶在屨是時正窮臘鴈落溪陰暮投宿古城隅雪迷松下路  
衣楮足蘭荃相過寧厭屢

立春前一日雪中訪烏程宰李君俞尋有詩見貺依韻和答

粉絮先春拂面翔臨風躍馬到君堂縣民將喜土膏起令尹未驚農事忙疾呼  
小吏具山酌便欲盡醉爲詩狂我牽塵俗不得久何意更煩投夜光

送劉比部

青山夜來雨溪水已潺湲侵曉桂旗動傷離蘋渚前百壺臨祖道兩槳破春烟  
舊業西河上歸心向日邊

贈月上人彈琴

人閑溪上橫劒木素琴寒倚一枝玉吳王城畔鎖深房月下空彈孤鴈曲

冬日陪胡武平遊西余精舍

侵晨霜氣嚴溪口冰已合烏榜將進遲寒篙旋摧拉遙看松竹深雪屋藏山衲  
登臨興都盡薄暮沿清雪

依韻和武平苕霅二水

昔愛伊與洛今逢苕與霅南郭復西城曉色明於甲塵纓庶可濯白鳥誰來狎  
落日潭上歸魚歌自相答

依韻和武平昇卞二山

北峯壓城蒼南岫緣溪綠誰知昔人遊尙想叢桂馥鳥獸安可羣呼鳴自爲族  
儻聞羨門術一躡塵外躅

送崔主簿赴睦州清溪

舟輕不畏險逆上子陵灘七里峽天翠千重雲木寒古祠鳴野鳥亂石激春湍  
正與高懷愜寧歌行路難

依韻和劉比部留別

春雲已泊簾濃澹半晴天沙草微抽綠林枝遠帶煙況茲逢晚景那更送歸船  
苦酒聊爲酌無勞辨聖賢

送潘供奉承勛

與君迹熟情已親欲將行邁聊感人舉酒不能効時俗半辭苦語資立身長大  
實好帶刀劍曷不往助清邊塵門戟雖高豈自有當思乃祖爲功臣所宜踴躍  
發奇策嘉名定體庶得真儻以斯言作狂說乘肥食脆任青春

答新長老詩編

江東釋子多能詩窗前樹下如蟬嘶朝風暮月只自老建安舊體誰攀躋唯師  
獨慕陶彭澤奇蹟仍收王會稽嘗示余右軍書一軸比焉趣尙已不淺更在措意摩雲霓

題劉道士奉真亭

降真沈水生爐煙扣齒曉漱華池泉心存崑閩未可到夜瞻北斗何聯聯顧茲  
虛室如有遲一草一石幽且妍芝蓋雲輶杳無至不知誰更似羊權

依韻和烏程李著作四首

縣署西園

春入西園何苦誇我曾狂醉洛城花如今老大都無興獨坐晴軒看落霞

雪上一二首

共愛雪溪風物美春來清可鑑鬚眉頰生楚客將歸日花暖吳蠶始浴時臨水  
竹樓通市陌跨橋雲屋接川湄畫船載酒期君醉已是無謀助翦夷

靚妝艷服遊川上簫鼓聲中俗自歡寄語春風休用惡恐教潭水起波瀾

早春遊南園

東國春歸早南園百卉宜萱芽開翠穎杏萼破烟姿青壠將鳴雉喬林未嘒鸝  
石尤風莫起芳物畏君吹

送僉判張祕丞赴秀州

江燕歸時君亦歸燕巢未暖君還去去去溪邊楊柳多正值清明欲飛絮競折  
贈行何所益時當長養傷嘉樹不如舉酒對青山酒罷移舟須薄暮嘉禾主人  
余久知迹冗不擬彊攀附儻或無忘問姓名爲言嬾拙皆如故

送第赴和州幕

夾河爲郡不如古江北江南作冗官須記長傳一經訓雖貧莫改飲瓢歡歷陽  
況與吾廬近春穀休言問膳難此日停舟聊舉酌明當水驛自加餐

寄題徐都官新居假山

太湖萬穴古山骨共結峯嵐勢不孤苔徑三層平木末河流一道接牆隅已知  
谷口多花藥祇欠林間落狄鼉誰侍巾構此遊樂里中遺老肯相呼

送梵才吉上人歸天台

頃余遊鞏洛值子入天台當時羣卿士共羨出氛埃荏苒踰一紀却向人間來  
問子何爲爾言與般若臺雖將發愚闇般若安在哉此教久已熾增海非一杯  
我言亦爝火豈使萬木灰蓋欲守中道焉能力損裁子勿疑我言遂以爲嫌猜  
忽聞攜錫杖思向石橋迴城霞與琪樹璨璨助詩才嘉辭徧人口幸足息巖隈  
公度以余嘗語洛中花品而此邦之人多不敢言花於余今又風雨經  
時花期遂過作詩以見貽故次其韻

去年三月來吳中欲擬看花無與從今年二月花偏早發作無節雨與風前時  
清明要尋賞謂夸洛陽多不容我心豈是限南北美好未必須深紅姚黃魏品  
若盡有春色定應天下空因君見贈又及此莫怪還思澗水東

留題可及明心堂

秭雉已先號卉木萼漸歇俯檻弄條枚因心悟生滅上人本高胄季父踐清列  
而能厭紛華樂彼方外說

陪武平游雅上人房卜峯亭

晚愛池上清羣峯對檐隙常恐雲氣生坐令蒼翠隔復繞曲塘陰映寶孤花拆  
誰知禪者居來伴使君適

送張舍人自安吉移宰同安

遠辭湖上山徙治海邊邑機杼吳俗饒魚鰕越人給操琴在更張殊土宜順襲  
何以贈勤勤薄言茲所及

劉彝秀才歸江南

鳳鳴不在笈麒麟寧受軒君思此二物中夜忽興歎況值南風來襲蘭歸楚岸  
送胡武平

來見江南昏使君詠汀蘋再看蘋葉老汀畔送歸人人歸多慕戀遺惠在茲民  
始時繞郊郭水不通蹄輪公來作新塘直抵吳松垠新塘建輿梁濟越脫輶仁  
言度新塘去隨迹如魚鱗從今新塘樹便與蔽芾均我雖備僚屬筆舌敢妄陳  
因行錄所美願與國風振

迴陳郎中詩集

嘗觀陳伯玉感遇三十篇矯矯追古道粲爾日星懸今公豈其後佳詠久已傳  
憶爲童子日早誦錦繡妍茲來預官屬而許玩奇編明珠三百琲一一徑寸圓  
他人握中有未獲毫髮焉家貧敢懷寶況近驪龍淵又畏風雨作神物不得全  
再拜捧明月長跪還席前

依韻和武平別後見寄

溪遠檣危一望遙此焉悽絕府中僚已同鴈鶩依清淺共看鸞皇上泐寥別岸

無端縈細柳迴舟不忍過新橋醉來事事能生感誰道愁腸酒易銷

蘄州廣濟劉主簿

相識雖非久相親似舊年論文君豈後尙齒我慚先慣狎吳兒水將浮楚客船  
安知不離恨高柳正鳴蟬

依韻和僧說夏日閑居見寄

城郭非清涼山僧抱微疾又況三伏時當茲一禪室炎飈正爍爍溪水徒瑟瑟  
唯詠冰雪辭可以銷夏日

依韻和李宰秋思

一葉與風舞已知天地情將令百果實競振羣蟲聲陶令欲收秫豳人思誓觥  
更吟君麗句誰爲寫鍾評

送儲令赴韶州樂昌

嘗聞韶石下虞舜古祠深至樂久已寂況持陶令琴炎方不道遠一去值秋霖

隱真亭

烏程史尉署

珍傲宋版印  
作尉慕吾祖吾祖非得時誰似芙蓉國日見芙蓉披涼雨隨風來清香入酒卮  
自得真隱趣不慚吳市爲

說上人遊廬山

夙懷高世趣固足林壑情欲遊名山徧遂爲廬岳行又訪遠公蹟東林氣象清  
瀑布秋影落香爐曉煙生洗蕩萬古慮薰蒸千載名我今滯孤宦空羨餅錫輕  
和元之述夢見寄

高秋枕席涼晝寢還清曠不嘲君腹便獨夢予爾訪豈忘相規言仍記羣小謗  
始知端正心寐語尙不誑恂恂何讒人告子亦孟浪吾聞有尸蟲伺惡多相尙  
眈睡受其惑子心恐成恙勉子守庾曹勿使茲物王魂交昧聰明寤後成清唱  
誦玩自省循徒爾增怙悵不能檢細微遂使言屢貺雖然甚頑鄙內顧無過當  
仲尼稱天厭季路猶行行何當謝勤誠爲子傾嘉釀

秋日臥疾恭上人來過不及見因以詩答

溪上秋霧多溪居曉寒入呼吸遂生疴嘔泄不下粒素知江南地大率皆卑溼

久從吳土居氣候非所襲伏枕欲經旬冠帶拈已澀女奚特扣關問疾提山笠  
我非金粟身寄謝何暇揖屈性茲不能他時冀來及

依韻和守賢上人晚秋書事

秋霧鬱不開矇矓夾溪樹深枝尙宿禽寒葉時驚露我居溪之陰早景誠所慕  
開谿吐初陽獨吟神與晤豈意方袍人而懷此焉趣忽在瓊玖章無慚惠休句

宛陵先生文集卷第九



宛陵先生文集卷第十

臧子文剡縣主簿

以下湖州後詩

剡縣無淺深歷歷能見底潛鱗莫見窺塵紱聊堪洗古木潭上陰遺祠巖下啓  
應識道傍碑因風奠醪醴

余令之會稽新昌

越舸將渡西陵時臘雪欲作陰雲垂古岸潮迴夜冰閣冰上鯉魚紅尾髻知君  
奉親聊自得窮冬涉險仍熙熙縣民但可觀此意休羨江邊孝女碑

傳神悅躬上人

握中一寸毫寶匣百鍊金鑑貌不鑑道寫形寧寫心古人固不識今人或所欽  
依然見其質儼爾恨無音子誠丹青妙巧奪造化深妍媸必盡得幻妄恐交侵  
文曜師之南徐

班班上川羽薄暮未安巢擾擾方外士歲晏遊遠郊正值風霜急晚冰隨處敲  
何時居巖下都把塵事拋

送芝上人歸姑蘇

身衣竺乾服手援犧氏琴  
絲聲不願奏古意一何深  
晏景託孤艇倦飛還舊林  
闔閭城下寺幾里認鍾音

唐寺丞知南雄州

前林尙含凍南國史君行  
逆水春風峭孤舟挂席輕  
踏歌聞舊俗信鬼有頽氓  
當識朱衣貴壺漿擁道迎

依韻和孫秀才朱長官見寄

二首  
同韻

古來富貴蹈危機樂性安貧莫謂非  
未及功名蒼鬢改欲從疎嬾五湖歸  
昔年同志逢時盡今日相親似子稀  
犀僕忽辭雲海上遠持雙壁扣吾扉

謝尉西歸

曾爲洛陽客喜見洛陽人  
每憶舊遊處相逢借問頻  
當時伊水上醉弄巖花春  
而今絕茲樂欲語已酸辛  
明朝君當去又復與誰親  
唯應有素月相照寒溪濱

陳浩赴福州幕

梅殘杏將坼楊柳都未堪欲贈無所贈春風吹酒酣遠山猶帶雪野水已如藍  
羽檄不應有詩書自可耽

示沈生

穉子每多疾始與藥物親由茲沈生迹遂歷吾門頻我居無鳥鼠乃知屋室貧  
舉世競趨利爾非閭井人

和潘叔治早春遊何山

泛泛寒溪流縈紆向山去淺石長蒲茸朝煙暖巖樹捨舟當禪扉踏蘚污野屨  
誰愛鮑參軍登臨多秀句

張法曹歸闕

海底日未上屋頭羣雀喧晨興溪館迴坐聽櫓聲煩出戶望行舸羨心如野爨  
暮春余亦去爲見故人言

送張叔展北歸

江南春候早水暖野芹生北客欲歸日故人持贈行莫嫌爲物薄言采幽蘭并

休惜臨流醉高帆去櫂輕

依韻和叔治晚春梅花

楚人住處將爲援越使傳時合有詩常是臘前混雪色却驚春半見瓊姿笛吹  
遠曲還多怨風送清香似可期我欲細看持在手誰能爲折向南枝

僧元復院枕流軒

寺外寒流駛開軒靜者棲淺深看藻荇出沒愛鳧鷖一悟此中趣萬緣皆可齊  
誰來驚節物岸木長春萋

惱儂

期我以踏青花間儻相遇果然南陌頭翩若驚鴻度不語彊躊躇羞人映芳樹  
兩心常自憐兩目空相注依依不得親薄暮還愁去記取似丹葩知開在何處

相逢

晚日南城歸橋邊見郎去遠遠逐郎迴羅衣汗微污不惜污羅衣要與郎相顧  
留連芳苑中肯謝花天嬖傍欄思晤言羞畏情誰諭草草各還家幽懷是飛絮

檣烏

檣頭飛去烏夜啼聲碎猶不如水禽雙棲向煙外煙外少分張渚間多翳蒼  
休同八九子反哺人誰愛

過華亭

晴雲號鶴幾千隻隔水野梅三四株欲問陸機當日宅而今何處不荒蕪

月暈

月暈已知風燈花先作喜明日挂帆歸春湖能幾里

逢謝師直

昔歲南陽道中別今向華亭水上逢把酒語君悲且喜流光冉冉去無蹤

回自青龍呈謝師直

共君相別三四年巖巖瘦骨還依然唯髭比舊多且黑學術久已不可肩嗟余  
老大無所用白髮冉冉將侵顛文章自是與時背妻餓兒啼無一錢幸得詩書  
銷白日豈顧富貴摩青天而今飲酒亦復少未及再酌腸如煎前夕與君歡且

飲飲纔數瓊我已眠雞鳴犬吠似聒耳舉頭屋室皆左旋起來整巾不稱意挂  
帆直走滄海邊便欲騎鯨去萬里列缺不借霹靂鞭氣沮心衰計欲睡夢想先  
到蘋渚前與君無復更留醉醉死誰能如謫仙

青龍海上觀潮

百川倒蹙水欲立不久却迴如鼻吸老魚無守隨上下閣向滄洲空怨泣推鱗  
伐肉走千艘骨節專車無大及幾年養此膏血軀一旦翻爲漁者給無情之水  
誰可憑將作尋常自輕入何時更看弄潮兒頭戴火盆來就溼

社前

欲社先知雨將歸未見花那能長作客夜夜夢還家

水次髑髏

不知誰氏子枯首在沙洲肉化烏鳶腹肢殘波浪頭曾聞南面樂寧有九原愁  
厚葬不爲貴漢官其登丘

葉大卿挽辭三首

位列名卿重年躋賜几尊臧孫宜有後定國已高門舊族聲華遠名藩治行存  
秋風簫吹咽隴隧起雲根

自古賢才少滔滔豈足云善人安得見清譽久來聞器隕龍文鼎魂歸馬鬣墳  
豐碑幾當立籍甚著遺芬

終始爲全德生榮歿亦榮里人悲畫翬郡吏拜銘旌石馬天麟肖松枝國棟成  
更看追孝意捧土作新塋

湖州寒食陪太守南園宴

寒食二月三月交紅桃破類柳染梢陰晴不定野雲密黝黝鼓聲湖岸坳使君  
千騎出南圃歌吹前導後鳴鐃是時輒預車馬末傾市競觀民業拋竹亭臨水  
美可愛嗑啣草木皆吐苞遊人春服靚妝出笑踏俚歌相與嘲使君白髮體尤  
健自晨及暮奏酒肴爾輩少年翻易倦倚席欠伸誰得教公雖不責以正禮我  
意未容誠斗筲逡巡秉燭各分散小人爭路何嗷嗷

牡丹

洛陽牡丹名品多自謂天下無能過及來江南花亦好絳紫淺紅如舞娥竹陰  
水照增顏色春服貼妥裁輕羅時結遊朋去尋玩香吹酒面生紅波粉英不忿  
付狂蝶白髮彊插成悲歌明年更開余已去風雨摧殘可奈何

惜春三首

九十日春無幾日不堪風雨競吹花舞英逐水向何處泛泛斜溪伴晚霞  
前日看花心未足狂風暴雨忽無憑此身不及深溪水隨得殘紅出武陵  
春色斗空花亦休綠園深鎖更誰遊殘枝遺萼不中看暮雨霏霏起暗愁

花孃歌

花孃十二能歌舞籍甚聲名居樂府荏苒其間十四年朝作行雲暮行雨格夫  
氣俊能動人人能動之無幾許前歲適從江國來時因讌席相微語雖有幽情  
未得傳暗結殷勤度寒暑去春送客出東城舟中接膝已心傾自茲稍稍有期  
約五月連航並釣行曲隄別浦無人處始笑鴛鴦浪得名爾後頻逢殊嫵婉各  
恨從來相見晚月下花前不暫離暫離已抵銀河遠青鳥傳音日幾迴雞鳴歸

去暮還來經秋度臘無纖失愛極情專易得猜前時南園尋芳卉小忿不勝投  
袂起官私乘興作威稜督促倉皇去閭里蕭蕭風雨滿長溪一舸翩然逐流水  
忽逢小史向城來泣淚寄言心欲死願郎日日致青雲妾已長甘在泥滓更悲  
恩意不得終世事誰憑何若此郎聞茲語痛莫深天地無窮恨無已我今爲爾  
偶成章便欲緘之託雙鯉

程山人歸歙州

新安固與吾鄉鄰山水清絕殊可擬我今暫來子亦歸空聽杜鵑雲樹裏

重過南園

誰作此園爲宴喜而今樂事已難并佳人去後門長鎖蔓草離離上古城

送滕監簿歸寧岳陽

乃翁守西鄙胡騎敢馮陵撫士無餘貨吏以文結繩向聞來三堂今復走巴陵  
泝流幾千里雲夢苦炎蒸風檣易陣馬猶使勇氣增子今遠寄省寄謝余豈能  
江山可留詠燕許昔嘗會

寄題千步院兼示譚上人

郊郭山林有美處皆爲釋子所棲託高閑不與時俗侵寂靜豈唯魚鳥樂朝望  
平田插稻苗暮看西邨收雨脚

早夏陪知府學士登疊嶂樓

高陵自可眺況復更層樓峨峨衆山翠活活寒溪流新篁未掃籜緣險已脩脩  
曲道出林杪飛宇跨城頭春餘衆芳歇子結纍蔓抽庭空野鼠竄日暝啼禽留  
誰知郡府趣適有林壑幽主人易吾土惟襲是瀛洲伊我去閭井爾來三十秋  
昔望白雲下今從輕軒游

得孫仲方畫美人一軸

駿駒少馴良美女少賢德常聞敗君駕亦以傾人國因觀壁間畫筆妙仍奇色  
持歸非奪好來者恐爲惑

塗次寄羅道濟

去年五月君到官紅蕖正開湖水寬共酌汀洲不知暮扣舷月露霑衣寒今年

我罷欲歸去朋酒久來無此歡移舟不忍便爲別競挈杯有情未闌城闔欲閉  
各分散溪雲暗澹生悲端明日抱醒風雨急野蓮空看寄君難

和潘叔治題劉道士房畫薛稷六鶴圖

啄食

窮年見俛啄但有飢乏意雖存玉山禾不入丹青喙因思方朔嘲此豈優諧類

顧步

舉足徒有勢行沙遂無蹤迴頸誠已久未知竟何從安能見儔侶顧望自顛顛

唳天

引吭向層霄聲聞期在耳鼓吻意豈疎知音何已矣安得九皋同流響入萬里

舞風

如逢仙圃風飄飄奮雙翅拊節余欲助和歌誰爾類但看矯然姿固於流雪異

警露

孤標近仙壇依約聞墜露儼如舉止揚稍見神爽悟曉月坐清軒寒添壁間素

理毛

六鶴皆不同初生薛公筆況茲刷羽者奮迅如天質墨客懷賞心題詩仍我率  
留題毗陵潘氏宅假山  
人心本好靜世事方擾擾丘壑未去時庭中結山小長欲見蒼翠何須聽猿鳥  
有志同尚平當期昏嫁了

觀居寧畫草蟲

古人畫虎鵠尚類狗與鶩今看畫羽蟲形意兩俱足行者勢若去飛者翻若逐  
拒者如舉臂鳴者如動腹躍者趨其股顧者注其目乃知造物靈未抵毫端速  
毗陵多畫工圖寫空盈幅寧公實神授坐使羣輩伏草根有織意醉墨得已熟  
權豪不可致節行今仍獨

和穎上人南徐十詠

鐵甕城

漸江以爲池增山以爲壁鐵甕喻其堅金城非所敵前朝經喪亂曾是輕鋒鏑

覽古一徜徉空聽漁浦笛

北固山

山勢自北來高城倚爲固當時偶登臨邇者遂淪誤微雲思作雨古樹嘗霑露  
今非恃險艱草木藏狐兔

京口水

江頭潮正平日照土山口坐見遠來舟高帆忽前後將隨入浦風稍度遙圻柳  
客無南北虞信是承平久

金山寺

山與衆山殊寺非諸寺擬無面不當江有林皆照水南泠隔吳會北渡通揚子  
還看上下帆日日何常已

望海樓

嘗聞觀蹄沔詎識海水大浩浩與天同滔滔衆流會平吞江作練遠瀉河如帶  
終日郡樓間欲取長鯨鱠

季子廟

信如季子賢自昔知能幾依約有荒祠寂寥無奠篚壞梁生溼菌古木憑山鬼  
英靈豈顧茲青史辭疊疊

鶴林寺

松竹暗山門颺颺給青吹傳聞宋高祖舊宅爲茲寺地以黑龍升經因白馬至  
何必問興亡山川應可記

夫子篆

季札墓傍碑古稱尼父篆始沿春秋義十字固莫淺磨敲任牧童侵剝因野蘚  
嗟爾後之人萬言書不顯

甘露寺

山頭百畝宮庭下千年樹在昔甘露霏嘗疑神物護陰連殿閣寒聲撼雷霆怒  
瞻影衛公堂英魂想來去

范公橋

謂公天下才非專一方惠及此作輿梁力行無鉅細既異國喬爲將同傅崑濟  
礮石亘長川寧須伐山桂

邵伯堰下王君玉錢王仲儀赴渭州經略席上命賦

未破河西寇朝廷尙有憂淮南命儒帥塞上足封侯莫擐黃金甲須存百勝謀  
昔嘗經黠虜今去正防秋

悼亡三首

結髮爲夫婦於今十七年相看猶不足何況是長捐我鬢已多白此身寧久全  
終當與同穴未死淚漣漣

每出身如夢逢人彊意多歸來仍寂寞欲語向誰何窗冷孤螢入宵長一鴈過  
世間無最苦精爽此銷磨

從來有脩短豈敢問蒼天見盡人間婦無如美且賢譬令愚者壽何不假其年  
忍此連城寶沉埋向九泉

淚

平生眼中血日夜自涓涓瀉出愁腸苦深於浸沸泉紅顏將洗盡白髮亦根連  
此恨古皆有不須愚與賢

秋日舟中有感

天乎余困甚失偶淚滂沱世事隨時遠秋風順水多鰥魚空戀穴獨鳥未離柯  
歲月都無幾存亡可奈何兒嬌從自哭婢駭不能呵已覺愁容改休將舊鑑磨  
弊衣留暗垢殘藥恨沉疴斗厭驅驅役終期老薜蘿

書哀

天旣喪我妻又復喪我子兩眼雖未枯片心將欲死雨落入地中珠沉入海底  
赴海可見珠掘地可見水唯人歸泉下萬古知己矣拊膺當問誰惟悴鑑中鬼

宛陵先生文集卷第十一

謁雙廟 以下湖州後詩

八月過宋都泊舟雙廟側永懷此忠良遺烈傳碑刻五位儼朝裾千年同血食  
當時多苟生貴爵曾誰識縱今有丘墳都已荒荆棘古人非輕死於義實罕得  
英骨化埃塵令名同鳥翼飛翔出後世景慕無終極豈若目前榮未沒聲已息  
西登孝王城王氣由邦國

送弟禹臣赴官江南

昔與子同歸夜向瓜洲泊持杯月正清盪水平如削爾來蘆岸深須防虎潛搏  
行行無朋友遇事自斟酌

和永叔晉祠詩

并州古來稱近胡山雄氣壯民足儲山根晉水發源處平若皎鑑潛決疏漸流  
漸急不可測以至灑灑鳴清渠豈惟俯可見毛髮況乃了了看龜魚下漑平田  
幾百頃稻苗穠稔曾不枯興亡莫問隨水遠廟深草樹空扶疎伊君持節過其

下愛此佳趣聊停車北望故城無舊物泱泱野色連丘墟已向風前聽好鳥只  
畏落日聞蒼狐晉人須識漢使美冉冉青頰似綠蒲

得李殿丞端州硯

蛟龍所窟處其石美且堅蠻匠斲為硯漢官求費錢持歸向都邑爭乞如瓦墼  
豈識萬里險謬竊好事傳

書謝師厚至

爾來哭爾姑清淚滴塵几一聞在目言不謂今則死而猶意遠行所念當至止  
秋風忽助號萬木欲摧毀

詠蘇子美庭中千葉菊樹子

生與眾草生不與眾草榮彼皆春爭葩茲獨秋吐英千葉共一萼百蒂共一莖  
幽亭聳扶疎獨本非措撐吾友蘇子美有酒對自傾香隨青陵蝶色映黃金鶯  
昨日偶來過頗與陶令情豈敢復言詩君家有子卿

新冬傷逝呈李殿丞

惡老今逼衰孤寂仍足悲寒風一夜起曩事無不思手澤在故物默歷非故時  
夢寐猶平常反悟恨莫追人生苦情累安得木石爲賴有同舍郎相語彊解頤  
送趙升卿之韶幕

舟車歷盡險風物乃還君俎肉應多味虞韶不復聞林鳴異音鳥山冒欲晴雲  
若弔張丞相空祠舊近墳

蘇子美竹軒和王勝之

庭無十步廣有竹纔百个子時哦其間賓交或來和琴壺置于旁圖籍亦在左  
誰憐脩脩影只畏寒日過誰憐青青枝下有暗葉墮我期霰雪時來聽幽聲臥  
應當爲設榻勿使賞心剝持以報主人此興不可破

偶書寄蘇子美

君詩壯且奇君筆工復妙二者世共寶一得亦難料我今或盈軸體逸思益峭  
有如秋空鷹氣壓城雀鷁又如飲巨鍾一舉不能酌旣酌心已醉顛倒視兩曜  
吾交有永叔勁正語多要嘗評吾二人放檢不同調其於文字間苦硬與惡少

雖然趣尙殊握手幸相笑

寄題洪州李氏涵虛閣

耳熟滕閣美未爲豫章遊近聞東湖上可見西山頭朝愛雲氣生暮數鳥行幽  
主人趣向遠登覽日不休父兄已三人挂冠此遲留他年儻一往風物詠可周

送蕭祕校

比從江南來又從江南去孤舟隨鴈羣晚泊定何處霜橙可爲齏冰鱸思下箸  
此興吾不知薄言聊所慕

送李殿丞通判處州

拜官將近親不畏千里險泝流上贛水石亂波驚颭舟人素已諳曲折就迴閃  
豈虞失便利倚慣憂亦掩昔余從平流悸夢尙成魘今逢子方去青紵絲新染  
沙頭有堠吏惴立板方斂鴻鴈正來翔競看朱服儼

古劍篇送蔡君謨自諫省出守福唐

生銅夜夜鳴剡鐵未嘗缺主人久提攜何事贈離別借問豈酬恩請看鐔上血

休慚補履功出處異施設

雜興

主人有十客共食一鼎珍一客不得食覆鼎傷衆賓雖云九客沮未足一客嗔  
古有弑君者羊羹爲不均莫以天下士而比首陽人

送逐客王勝之不及遂至屠兒原

犯霜出國門送客客已去猶意行未遠策馬過寒戍川長不見人沙沒前岡路  
始聞雲木深忽逢朱亥墓金鎚一報恩義烈垂竹素何須文學爲寄語長沙傅  
送周仲章太博之鉅野

仲月霜氣嚴朝來厚如雪鴻鴈各南飛羽毛將恐折征塗履以足侵骨寒於鐵  
得罪此爲輕君恩大懽悅

鄴中行

武帝初起銅雀臺丕又建閣延七子日日臺上羣鳥飢峨峨七子宴且喜是時  
閣嚴人不通雖有層梯誰可履公幹才俊或欺事平視美人曾不起五官褊急

猶且容意使忿怒如有鬼自茲不得爲故人輸作左校濱於死其餘數子安可存紛然射去如流矢烏烏聲樂臺轉高各自畢逋誇寔尾而今撫卷迹已陳唯  
有漳河舊流水

親郊前三日大慶殿雪中皇帝率羣臣發章聖五后冊

將郊先奉冊拜立未央廷天表君心孝人驚曉雪零冕旒紛點綴劍佩溼晶熒  
曲蓋曾無用羣臣敢自寧鑪煙靜齋幄井氣凍宮餅明日來壇下中宵已見星  
忠上人攜王生古硯誇余云是定州漢祖廟上瓦爲之因作詩以答

硯取漢廟瓦誰恤漢廟隳重古一如此吾今對之悲旣寶若圭璧未知爲用時  
讀後漢書列傳

漢家誅黨人誰與李杜死死者有范滂其母爲之喜喜死名愈彰生榮同犬豕

異同

吾聞聖賢心不限親與疎義殊目前乖道同異代俱堯舜及周孔千載趨一塗  
盜跖誚孔氏弟子將黨歟蹠自驅其衆日念殺不辜河濱捧土人海畔逐臭夫

塞川豈量力同趣卽爾徒爾旣不自過反以此爲紆

蔡仲謀遺鯽魚十六尾余憶在襄城時獲此魚留以遲歐陽永叔

昔嘗得圓鯽留待故人食今君遠贈之故人大河北欲膾無庖人欲寄無鳥翼  
放之已不活烹煮費薪棘

雜擬

忽聞胡騎渡河水月魄夜脅陰貂寒獨侍金輿立城角龍蛇不展繞旗竿

答中上人卷

吹笛皆學龍吹笙皆學鳳又於笙笛閑高下不相中得其精者稀得其麤者衆  
況於真出音千歲不復夢爾爲學笙歟頗已臻妙弄

送蘇子美

勇爲江海行風波曾不懼但欲尋名山扁舟無定處南有鵬若鴉臉有石若鋸  
毒草見人搖短狐逢影怒不遐尙苦乖更遠饒瘴霧東土乃濱海蜃蠃仍可怖  
殼物怪瑣屑羸蜺固無數鹹腥損齒牙日月復易飮二方旣若此往矣無久駐

竟當西北來醉耐炙肥豕夏不厭漿酪冬不厭雉兔勿言專口腹口腹人所務  
天台信奇偉石橋非坦步廬岳趣最幽飢腸看瀑布此致雖爲高實亦難久慕  
君行聽我言不聽到應悟

晚歸聞李殿丞訪別言已屢來不遇

蕭條一陋巷頻日見馬蹄歸來穉子告有客云將暎始知君其南復歎我向西  
豈不懷念慕吾親書新齋曰吾五男子愛惜無不齊所要立門戶安用同犬雞  
齷齪守此客馴馴戀此棲二季留左右足以共挈攜身許遠就祿幸又奉阿孳  
今年還都下路喪子與妻囊罄厭外役進退類藩羝終當改江邑儻得致音題  
刁景純將之海陵與二三子送於都門外遂宿舟中明日留饌膾

人言汴水駛奈何已冬乾蔡雖平且慢臘月行亦難唯聽夜冰合爲君愁苦寒  
暫維青絲紉邀膾白玉盤行人反飫我於理殊未安所忻能自養不復道加餐

寄洪州致仕李國博

湖上悠然度幾春勇拋榮祿遂天真青蒲翠竹圍華屋白酒黃雞命里人果下

有時乘小駟兒曹方見擁朱輪田園歲入千鍾美肯似疎家苦畏貧

同謝師厚宿胥氏書齋聞鼠甚患之

燈青人已眠飢鼠稍出穴掀翻盤盂響驚聒夢寐輟唯愁几硯撲又恐架書齧  
癡兒効貓鳴此計誠已拙

聞子美次道師厚登天清寺塔

二三君少壯走上浮圖巔何爲苦思我平步猶不前苟得從而登兩股應已攣  
復想下時險喘汗頭目旋不如且安坐休用窺雲煙

謝師厚歸南陽效阮步兵

一日復一朝一暮復一旦與子相經過少會不言散我心終未極歲月忽云晏  
嘶馬思長道孤鳥逐前伴駕言慕儔侶懷抱若冰炭南臨白水湄風雪振高岸  
意恐慈母念疾馳節已換解劍登北堂幼婦笑粲粲弊裘一以縫征塵一以澣  
而我客大梁衣垢自悲歎

師厚明日歸南陽夜坐有懷

明朝子當去我若雲失龍龍歸雲未歸索莫將安從半夜出戶望參畢已正中  
倏然變陰黑烈烈鳴窗風窗鳴不得寐擁被一悲翁

永叔贈酒

大門多奇醞一斗市錢千貧食尙不足欲飲將何緣豈能以口腹屈節事豪權  
閉戶飽於齋作詩涌如泉一日復一夕醒目常不眠窮臘忽可怪雙壺故人傳  
呼兒欲自酌瓦盞無完全其能饜甘脆而況侑天妍却令情懷惡分與富貴偏  
收拾不復嘗排置屋角邊儻宜嘉客至傾倒相與顛何暇問濃薄但覺窗扉旋  
誰識我爲我賓主各頽然始得語且橫既醉論益堅曾不究世務閑氣爭古先  
畢竟兩未決辨吻空流涎嗟我儒者飲聒耳無管絃雖云暫歡適終久還愁煎  
自甘不偶死寧慕金印懸願頻致此物勿恤瘡擔肩

得山雨

急雨射蒼壁濺林跳萬珠山根水壅壑漫竅若注壺

范殿丞通判秦州

天水出名馬多稱黃金羈正值羌已和邊草復離離乘肥固未失所蘊不得施  
主人本燕客寧獨事書詩志尙功名間管樂猶一時去去勿復道磊落爲男兒  
陳繹越州從事

母夫人老母兄黜夫人從爾之會稽恐傷爾心不敢泣春岡細雨聞竹雞時亦  
藏淚未出臉奈何相與頭傾低誠知就祿非獲已應欲退耕無舊畦

辛著作知西京永寧

躍馬西畿令家塋在洛陽衣霜寒食雨花發故宮牆冷澹鳩鳴屋寬閑水滿塘  
送君悲漸老空憶釣伊魴

依韻和師厚別後寄

吾與爾別未及旬吾家依舊甌生塵閉門不出將誰親自持介獨輕貨珍盤餐  
豈有鹹酸辛苦吟輟寢昏繼晨夜光忽怪來何頻採拾若在滄浪垠和者彌寡  
唯陽春

普淨院佛閣上孤鶻

我新稅居見寺閣金碧照我破屋前日看閣上聚鳩鴿巢棲飲哺忘窮年雕檐  
畫壁屎污徧以及像塑頭與肩寺僧不敢施彈射忽有蒼鷲張毒拳鴉鳴鵲噪  
鸚鵡叫怒鷗來此窺腥羶鷗心決烈不畏衆瞥碎一腦驚後先死鳥墮空未及  
地返翅下取如風旋獨當屋脊恣捨磔啄肉披肝腸弃捐老鴟無藝又很怯盤  
飛欲近飢目穿逡巡鷗飽自飛去爭殘不辨烏與鳶羣兒指點路人笑我方吟  
憶秋江邊

蜂

春風無主撩亂時分羣養子各守脾爭掇花腴爲臘蜜年年共割不我稽俄逢  
主人若過慮畏爾有蠶成噬臍密將惡物毒爾族爾曾不得同醯雞王雖爾名  
爾何補造甘爲利乃自取

並遊

並出慚羸駕康衢嬾著鞭寒驢能勝馬擘道去如煙何用嗟遲疾從來有後先  
所期皆一至我到爾應還

寄宣州可真上人

昭亭山色無纖塵昭亭潭水見游鱗長松碧篠入古寺石上高僧度幾春

元夕同次道中道平叔如晦賦詩得閑字

金輿在閭闔簫吹滿人寰九陌行如晝千門夜不關星通河漢上珠亂里閭間  
誰與聯輕騎宵長月正閑

正月十五夜出迴

不出只愁感出遊將自寬貴賤依儔匹心復殊不歡漸老情易厭欲之意先闌  
却還見兒女不語鼻辛酸去年與母出學母施朱丹今母歸下泉垢面衣少完  
念爾各尙幼藏淚不忍看推燈向壁臥肺腑百憂攢

同次道遊相國寺買得翠玉罌一枚

古寺老柏下叟貨翠玉罌獸足面以立瓜腹肩而平虛能一勺容色與藍水并  
我獨何爲者忽見日以驚家無半鍾畜不吝百金輕都人莫識寶白日雙眼盲

送惠勳上人

遽告我行何所之東南爾土爾自知山水佛事不暇說去何速兮來何爲公卿  
貴人見爾喜爲爾買屋勾爾資王城幸可樂歲月野鶴終是思陂池去去雲霞  
不容侶却應來此如前時

聞賣韭黃蓼甲

百物凍未活初逢賣菜人乃知糞土暖能發萌芽春柔美已先薦陽和非不均  
芹根守天性憔悴澗之濱

董著作嘗爲參謀歸話西事

子說頗驍勇築城收漢疆提兵無百騎偷路執生羌大將罪專輒舉軍皆感傷  
歸來出萬死羸馬亦摧藏

戲寄師厚生女

生男衆所喜生女衆所醜生男走四鄰生女各張口男大守詩書女大逐雞狗  
何時某氏郎堂上拜媪叟

薛中舍宰聞喜

秦人宦于秦百事順耳目山川我已疎風物子所熟維美行邁時親賓祖車轂  
空將離別心欲出無童僕

聯句附

古木含清吹池上增晚涼余懷本達曠謝少卿聯此傲羲皇孤鷗可與狎絳幽

岸足以觴幸有彭澤酒堯臣便同永嘉堂潘生起爲壽維王子齊陳章林端見

新月衍草際聞寒螿照水螢影亂良臣拂筵蓼花香徘徊戀嘉境坐使歸興忘

少卿

希深洛中冬夕道話有懷善慧大士因探得江字韻聯句

彼有上人者妙談心所降希深達空知不二觀行本無雙堯臣久阻飄花席因

思響雪窗希深社中雖得遠方外自非龐堯臣夢幻慚他劫風塵厭此邦希深

終期親道樹何必憶重江堯臣

希深本約遊西溪信馬不覺行過據鞍聯句

有意訪西溪順塗吟思迷及茲詢野老已恨過芳蹊希深醉客但多興幽禽空

自啼無由駐金勒林表日光低堯臣

同希深馬上口占送九舅入京城親聯句

之子洛中來芳樽喜暫開人誇阿連少吾媿士衡才希深丹闕鳳皇去清川鴻

鴈迴都門春色美相送思悠哉堯臣

玉麈尾寄傅尉越石聯句

齋中獨何物持之想見君惟茲玉麈尾信美而有文夫子善談道疊疊詞如雲

在握昔同色傾坐今離羣絳況託懷袖好曾親蕙蘭薰常許助閑放於焉探典

墳既乃阻清燕復屈驅虻蚊自殊白團扇未畏秋葉紛堯臣

風瑟聯句

竅竹漏天風張絃擬嶧桐佳名從此得妙響未曾窮希深夜靜危臺上人閑皎

月中依依聽不足秋露滿蘭叢堯臣

冬夕會飲聯句

與君數夜飲唯恐酒盞空今我苦欲淺堯臣語志難此同陳編侑歡適謝景初

間謔何魁雄婢子寒且倦堯臣主人哦不窮燈青屢結花景初煎響時鳴蟲穴

鼠暗出沒堯臣風鴈高雍容冰霜覆瓦屋景初貂狐輸貴翁孤牀乏暖質堯臣

苦語有澹工咀嚼患彘小景初煨炮驚殼紅落蟾斜入竅堯臣遠漏微遞風醉

心欺睡魄景初細書刺昏瞳吽呀聞爭犬哮吼厭啼驟撥火亂賴豆附炙雙彎

弓乾果硬迸齒堯臣寒齋酸滿胸枯蛤擘無肉澹脯燒可饜語必造聖賢樂已

過鼓鐘紙窗幸未曙景初絮被令旋縫凍痺兩股鐵跑抓雙鬢蓬脰尿既嬾溺

棍蝨唯欲烘器皿足缺麟捧執無天穠兒女寒不寢堯臣僮僕困欲菅豈無貴

富徒笑此飢寒蹤丈夫固有負道義久已充墨子不黔突齒輩且得封勉哉梅

夫子塞者終自通景初

問答送九舅席上作

金鑿落希深問留贈行人須滿酌銀餅況有宜城醪及取春風花照灼

小屏風問希深座隔流塵素影融方牀六尺偃清晝慚無玉枕名通中

玉蟾蜍希深問廁君筆硯誠有諸可愛亭亭寒月照瑩然四座凝冰壺

金錯刀問希深連環交刃吹風毛美人贈我萬錢貴何必翦犀誇孟勞

青雲梯問希深尺木為階行勿迷勤修道業生羽翼天門九襲須攀躋

鳳于飛希深問差差粹羽今逢時桐花正美喬雪亂家庭玉樹須來儀

宛陵先生文集卷第十一

宛陵先生文集卷第十二

擬李益竹窗聞風寄苗發司空曙

窗前風動竹聲碎影仍繚衝扉忽自啓出誤初迎門驚雀枝未定乳蜂窠暫翻  
飄飄一舉袂聊更遲來轅

擬宋之問春日翦綵花應制

上林花未有中禁綵先成葉逐翦刀出蕊從妝粉生紅繡內人手香染侍臣纓  
不是將春競天心重發榮

郡閣閱書投壺和呈相國晏公

較量人世無窮樂羅列平生未見書聊奉投壺祭征虜休言擊劍馬相如畫樓  
晚去聞寒角縹帙看來落蠹魚日獲誨言皆舊學不慚貧賤帶經鉏

梅花

江南臘月前溪上照水野梅多少株豔薄自將同鵠羽粉寒曾不逐蜂鬚桃根  
有妹猶含凍杏樹爲鄰尙帶枯楚客且休吹玉笛清香飄盡更應無

擬張九齡詠燕

眇眇雙來燕長年與社違任從新曆改只向舊巢歸  
永日當人語輕寒逆雨飛自親梁棟慣不識海鷗機

遲雪

風號大澤晚雲覆女牆低驚霰夜將集廣庭朝復迷  
鶯鳴寒蔽日鴈泊凍生谿會待飄花密開軒意外題

欲雪復晴

陰雲不成雪碧瓦有絲霜日氣生簾額冰條結井牀  
飛鳥鳴自樂古木晝仍殭誰意斗晴後苦寒勝北方

送蒙寺丞赴郢州

郢國當時唱猶傳白雪真問今非昔日和者幾何人  
客自射飛鴈漁能供躍鱗芳洲墮馬處吾祖漢名臣

聞角

一聲催客夢星斗轉西檐風卷梅花去愁從柳塞添馬鳴霜滿鬣龍泣凍生額  
高樹朝光動城頭落海蟾

和人雪意

凍雲低垂野遠樹昏未分朝來庭竹上撼撼霰已聞扣門有兵吏嘉命傳相君  
趨閣展熊席卷幔飄爐薰桂漿貯榼美馬乳薦實蕢賓屬兩三人從容奉評文  
遠稽先儒言風賦可以羣密置筆與硯唯待雪雰雰雪既不可待日暮人半醺  
明朝獲方楮健思欲凌雲

詠楊高品馬殿猢猻

嘗聞養騏驥辟惡繫獼猴供奉新教藝將軍舊病偷聊看緣柱杪尙想傍崖頭  
更祝南州使如拳試爲求

和欲雪二首

貂裘著不暖牙帳曉初開朔氣還先及流風亦屢催擬聞人詠絮將見使傳梅  
公復憂民畝龍沙幾日來

雪欲漫天落雲初著地垂臂鷹過野健走馬上冰遲公子多論酒騷人自詠詩  
都無少年意只臥竹窗宜

梅花

已先羣木得春色不與杏花爲比紅薄薄遠香來澗谷疎疎寒影近房櫳全枝  
惡折憎鄰女短笛橫吹怨楚童墜萼誰將呵在鬢蕊殘金粟上眉蟲

和十一月八日圃人獻小桃花二絕

當時開向杏花後今日綻當梅萼前不畏雪霜何太甚餘英如火滿枝然  
前占寒食一百六算到其時未合開丹豔已先灰管動不由人力與栽培

和梅花

時時不甘春著力年年能占臘前芳水邊攀折此中女馬上覿尋何處郎山舍  
更清栽作援鳳樓偏巧學成妝團枝密葉都如雪野雀飛來翅合香

再送蒙寺丞赴郢州

彎弓落飛鳥少也向幽州來作漢官屬恥爲戎國留身輕拋馬轡地暖厭狐裘

慣見顏如玉江邊問莫愁

擬王維觀獵

晏相公坐中探賦

白草南山獵調弓發指鳴原邊黃犬去雲外  
阜鷗迎近出長陵道還看小苑城  
聊從向來騎回望夕陽平

擬陶潛止酒

多病願止酒不止病不已止之懼無歡雖病未宜止且欲止人事事止不經耳  
次誦止足言行當止田里田里止誰親止樂山水美既止何所助唯酒與止喜  
以言止不止未必止爲是止酒儻不瘳枉止徒可恥止亦隨化遷不止等亦死  
慎勿道止酒止酒乃君子

擬杜甫玉華宮

松聲溪色古中有鼯鼠鳴廢殿不知年但與蒼崖平  
鬼火出空屋未繼華燭明  
暗泉發虛竇似作哀絃鳴黃金不變土玉質空令名當時從輿輦石馬埋棘荆  
獨來感舊物煎懷如沸羹區區人世間誰免此虧盈

擬韋應物殘燈

照此寒夜中欲殘紅燼尾空堂滅復明獨宿擬山鬼

和十一月十二日與諸君登西園亭榭懷舊書事二首

冬日蕭條公府清獨將諸吏上高城而今何處異疇昔鐵墓下聞孤夜鳴  
莎徑依然見莎葉蓮塘無復有蓮花更看白水滿城下說著當時龍骨車

和小雨

蛟龍濕白霧天外細濛濛霑土曾無迹昏林似有風卷旗妨酒舍濕翅下洲鴻  
稍見斜陽透西雲一半紅

擬韓吏部射訓狐

黃昏月暗妖鳥鳴尫然鈍質麤豪聲憑凶自異立屋角潛事黷吻欲我驚豈知  
慣聞此醜狡呼集鬼物夸陰獍夕盜雞雛無畏避曾遭彈射沉泥坑汝今病翼  
未甚愈還作舊態侵平明陽烏曛曛出東海照汝宜喪膽與精何爲世人苦憎  
汝汝常盜物資已榮儻有弓矢勿污辱殺此非得去惡名養雛四三已相似眼

腦實異鸞皇生一朝車輪翅墮地狐鼠入穴梟黨烹

得韓持國書報新作茅廬

聞君作茅廬正在西軒西定移舊蔬圃稍改新藥畦其高如伯鸞況亦有隱妻  
今方漢德盛不必之會稽

和新晴

雲開日照戟衣寒淨掃平沙路已乾吏散庭除少公事畦挑芽甲足春盤要聽  
林上鳴禽變試步塘陰綠水寬誰詠陳根有微綠烏蟾易失似跳丸

清躬詩

所稟介且拙嘗恥朋比爲皎皎三十年半語曾未欺身微德不著尙使人見疑  
省己當自責實負聖相知聖相雖明察不假束蘊辭扣言已可罪引去豈非宜

嘗惠山泉

吳楚千萬山山泉莫知數其以甘味傳幾何若飴露大禹書不載陸生品嘗著  
昔唯廬谷亞久與茶經附相襲好事人砂餅和月注持參萬錢鼎豈足調羹助

彼哉一勺微唐突為霖澍疏濃既不同物用誠有處空林癯面僧安比侯王趣

糟淮白

寒潭縮淺瀨空潭多鮪魚網登肥且美糟漬奉庖廚昔聞漁父賢嘗勉楚人鋪  
楚人懷沙死葬腹千歲餘今茲有遺意敢共杯盤踈

和臘前

漢家戍日看看近雲景蒼茫已歲昏欲驗方書治百藥預調飛走獵平原土人  
熏肉經春美宮女藏鉤舊戲存獨把凍醪驚節物草芽微動見庭萱

題臘藥

尚書晏相公臘日投壺輸詩七首便以臘日所用物賦先成四首上呈

頽顏早覺衰乃藉藥扶持及此季冬日預脩來歲宜鼎成無犬見蜜煉有蜂知  
借問月中兔長年何所為

臘酒

韋氏月錄云臘日造四月成

汲井轆轤鳴寒泉碧甕盛欲為三伏美方俟十旬清夢憶黃公舍徒聞韋氏名  
熟時梅杏小獨飲效淵明

臘脯

收獵得封獸割鮮為臘脩易甘非愛日不敗任經秋可用資賓豆何妨鄙薦脯  
考之新月錄美脆勝庖牛

臘筍

南山深竹養

去

下有鷓鴣鳴破臘初挑筍

呂氏春秋曰和之美竹越之簾筍

誇新欲比瓊薦盤

香更美案酒味偏清馬援當時見曾將禹貢評

伏波至荔浦見冬筍上言禹貢厥包橘柚疑是謂也

和挑菜

十二月十二日

中圃本膏壤始覺氣候偏出土蓼甲紅近水芹芽鮮挑以寶環刀登之饌玉筵  
僻遠尚含凍安占春陽前造物非有意地勢使之然

和臘日

獵鼓逢逢奏寒冰齷齷消正憐風日暖不似雪霜朝敢問祠黃石休從擊阜鵬  
楚郊梅萼末壟麥已多苗

啄木二首

十二月十二日陪步後園所聞見

城頭啄枯楊城下啄枯桑朝啄不停味暮啄不充腸寒風正冽冽蠹穴蟲且殭  
況茲園林迴剝剝響何長

食蠹非嫌蠹聲來古木高誰將琵琶弄寫入相思槽

語鳩

此以上三首補前  
投壺所輸七首

客語南方鳩啄蛇掀巨石遂令山中人多竊禹步迹誰云不可轉烏啄猶能擲

和淮陽燕秀才

我官忝博士曾昧通經術前因辟書來亦不習文律循舊臨學宮虎革被羊質  
倚席未能講占牘聊置日朴鈍既若茲媿彼啖棗栗今者登俊賢充詔冠庭實  
邦伯乃宗公惟帝舊良弼置醴餞以行行行季冬月騏驥入羈駕千里終不蹶  
慚予延蔭人安得結子韞心雖羨名場才命甘汨沒祿仕二十年屢遘龍榜揭  
在昔見麻衣于今盡超越是以對杯觴謹嚴微敢忽寧唯畏後生自恨疎節骨  
肴羞羅食案包核備時物里婦或窺觀戶下紅裙出歸應願生男生男付紙筆  
乃信讀書榮況卽服緼韠長歌食莘詩聲澹異鳴瑟

和石昌言求牡丹栽

昔年藥欄下已多香草名  
更移花本去聊助日邊榮  
莫問西都品存吾舊友評  
會應包萼吐可與魏姚并  
帶土歸金谷封根近玉京  
謫仙方醉詠不倚錦宮城

歐陽永叔  
有花品

和十二月十七日雪

窮冬勁臘已過半曉雪先春  
何處來豈是全資南畝麥  
多應不分北枝梅庭中  
未許野童掃林上唯愁狂吹  
催莫問兔園同賦客相如  
居右最爲才

建溪新茗

南國溪陰暖先春發茗芽  
采從青竹籠蒸自白雲  
家粟粒烹甌起龍文御餅加  
過茲安得比顧渚不須誇

送詹彥迪祕校之粵

夙懷山水心夢寐向東越  
聞爲會稽行獨此羨明發  
渡江信春潮泊館食野蕨  
平時異梁鴻但泛鏡湖月

謝人惠茶

山上已驚溪上雷  
火前那及兩旗開  
采牙幾日始能就  
碾月一罌初寄來  
以酪爲奴名價重  
將雲比脚味甘  
迴更勞誰致中濡水  
沉復顏生不解杯

和立春

茲日何所喜  
所喜物向榮  
條縷作翠柳  
意先新陽生  
塗金縷爲勝  
義不首時輕  
增年已歎老  
斗酒聊自傾

和謝仲弓廷評新理北園

園吏乘冬和荷鋤  
去宿莽主人因其勤  
築土截荒壤移枯復  
窳缺刻徑就平廣  
東北倚高城巖險不  
可上愛彼林木深便  
爲丘壑想更待春風  
歸日探花卉長  
但願多置酒應得時  
一往

和謝仲弓廷評栽竹

移得溪邊翠來爲庭  
下陰惜根存舊土帶  
筍助新林暗換蕭蕭  
葉知虛寸寸心  
東風莫搖撼培壅未  
應深

和歲除日

一年三萬六千刻玉漏唯餘十二時去日苦多誰會惜殘陰全少頗能知己驚  
顏貌徐徐改不奈烏蟾冉冉馳萬國明朝賀新歲東風依舊入春旗

明井

在城東南

顯晦有難必孰云幽不明深井發寒泉光若月色盈陰陽信奇變曷用究厥情  
譬彼出炎火投薪丹燄成吾人勿驚異但自汲餅鬻

楊公懿得穎人惠糟鮓分餉并遺楊叔恬

頭尾接清淮淮魚日登網吳莼芡羹美楚糟增味爽云誰得嘉貺曾靡獨爲享  
乃知不忘義分遺及吾黨

和楊祕校得糟鮓

食魚何必食河魴自有詩人比興長淮浦霜鱗更腴美誰憐按酒敵庖羊

春雪

臘前望盈尺姦縮不忍乞萬物及向榮而反事凝凜與雨暗爭能不念傷彼茁

雖然便消釋終是乖氣律新陽豈憚沮暴柳未爲屈隨風勢更巧著樹媚且密  
誰將背時弃乃欲逞果必摧花自作花旋積旋已失上天施命令冬春不相匹  
生物與死物其道安可壹嗚呼此飛雪何爲在今日

和謝公儀學士正月十七日雨後復雪

本祈春雨成春雪應誤小桃先次開西漢枚生誰復召南朝何遜自多才潑除  
燈火上元去挫却勾萌六出來前此解衣爭貰酒不知爲瑞與爲災

先是七日祈雨九日

霈然至于今

伐桑

二月起蠶事伐桑人阻飢已傷持斧缺不作負薪非聊給終朝食寧虞卒歲衣  
月光無隔礙直照破荆扉

夢登天壇

夜夢登天壇壇上兩仙人來時乘白鳳去時乘白麟我問不我語颯颯山中雨

寒食日過荆山

山郵雖禁火嶺樹自生煙  
嗚咽同歸櫓悲哀欲問天  
泣親非泣玉流淚劇流泉  
春鯊橫刀膾何心更食鮮

過口得雙鰈魚懷永叔

春風午橋上始迎歐陽公  
我僕跪雙鰈言得石瀨中  
持歸奉慈媪欣詠殊未工  
是時四三支推尙以爲雄  
于茲十九載存沒復西東  
我今淮上去沙嶼逢釣翁  
因之獲二尾其色與昔同  
錢將青絲繩羹芼春畦菘  
公平廣陵來值我號蒼穹  
失怙哀無窮烹煎不暇餉  
泣血語孤衷生平四海內  
有始鮮能終唯公一榮悴  
不媿古人風

歲寒亭

種花邀青春種柏要晏歲  
乃知風露前已辨雪霜勢  
時俗愛芳菲不妨鳴鯤鵠  
他年都門歸寧昧始終計

澄虛閣

箇圃隔囂氛閑來衣練裙  
檻邊生靜意水底見微雲  
斜照迴晴景幽芳襲薄薰

主人多賦詠不減沈休文

舟次泗上逢黃令因以詩送

向曉入汴尾隔河聞人聲得聲不得貌問識舊時名泊舟忽來及袖詩多賢英  
言除丹徒宰暫作七閩行東南幾千里日夕挂帆輕渡江莼已老未足助杯羹  
最知便道出先見縣人迎

依韻和許發運遊泗州草堂寺之什

入寺豈緣齋阮公方詠懷心將超紫府手欲拍洪厓雲霧波初淨塵埃鑑已揩  
但能傾玉醕不假列金釵遠客歸空速千櫓密自挨醒論時事正醉戴野巾嗚  
風俗通吳楚清渾見汴淮遙知香刹外獨與賞心諧

依韻和許發運真州東園新成

疏鑿近東城蕭森萬物榮美花移舊本黃鳥發新聲曲閣池傍起長橋柳外橫  
河渾遠波漲雨急斷虹明雲與危臺接風當廣廈清朱髻看自躍翠柏種初生  
香草猶能識山苗未得名南峯及西嶺常共酒杯平

宛陵先生文集卷第十二

宛陵集卷十二

九一中華書局聚



宛陵先生文集卷第十三

禁中瑞竹同本異莖

孤竹二君子聖人知獨清但將奇節並何用首陽名

依韻和集英殿秋宴

殿幄陳金石宮梧集鳳皇侍臣嚴虎帳法袞被龍章九穀初登稔羣黎共樂康  
宴盤犀作鎮舞綴錦成行玉盃盛冰滑紗籠奏饌涼庶深容小語槐密漏微陽  
庭立衛兼霍坐尊蕭與張清塵汲瑤井泛宇藹天香獸躍緣幢地旗開踏鞠場  
樓傳紅幘唱簾隱內家妝鴟攫曾無彈蜂來誤有芳門傍銅鑄馬帝所翠爲觴  
萬國趨王會諸公佩水蒼螭頭左史筆陞楯半更郎雅著明時樂需言盛得光  
添花慕平一賜菊異元嘗身已陪多士心寧媿下鄉薄才何所補歌詠播殊疆

啼禽

盆繭未成絲破袴勸可脫安知增羞顏赤脛衣短褐

沐堤鶯

古堤多長榆落莢鵝眼小其下迅黃流其上鳴黃鳥安知舟中人黑鬢日已少  
千里歸大梁玉笙聞竇窈終朝不成曲幽響在林表莫羨沙路行金鞭馳裊裊

四月二十七日與王正仲飲

我來自楚君自吳相遇汎波銜舳艫時時舉酒共笑樂莫問罌盎有與無醉憶  
曩同吾永叔倒冠落佩來西都是時豪快不顧俗留守贈榼少尹俱高吟持去  
擁鼻學雅鬪付唱纖腰姝山東腐儒漫側目洛下才子爭歸趨自茲離散二十  
載不復更有一日娛如今舊友已無幾歲晚得子欣爲徒

四月二十八日記與王正仲及舍弟飲

孟夏景苦長與子舟中飲酒行三四巡病嘔聊就寢仲氏又發霍洞下忽焉甚  
湯劑不能勝悶絕口已噤我嘔雖未平驚走豈遑枕叫號使呼醫子怪亦莫諭  
遽白何至斯葛巾推小品且尤食物間羶腥失調飪所餉惟豬雞況此乏菌蕈  
以子獨無恙未必因滑瀋稍覺陽脉回慄膚猶痒痒儻其遂不起孰肯謂素稟  
吾鄉千里遙幸免成貝錦

紹巖上人寧親

爾教禁足不出戶盛夏畏蹈螻蟻蹤赤日去省已亡律曷若冠帶共甘濃

送許州知錄王殿丞

霜花如鵠毛萬里點枯槁曉入蓬池道寒侵蘇合袍重來社櫟長舊寄里門高  
去事黃丞相無辭執板勞

慈氏院假山

風濤春斷越山骨聚集奇險成千峯碧甕爲潭立涎石直疑崑底藏蛟龍

夜與鄰幾持國歸

紅塵夜不息橫衢若煙霧朝見車馬來暮見車馬去軍中目炯炯馬上情遽遽  
交相知是誰飛先無覓處

十月晦夢遊嵩山明日訪宋中道見次道寄宿岳寺

忽夢嵩峯下同遊失姓名山腰荒輦道崑竇落泉聲黑石文難辨蒼苔蹟易成  
他時傳洛詠知是陸雲兄

十一月七日雪中聞宋中道與其內祥源觀燒香

三日不相見逢人問始知同車侵朔雪臨水拜靈龜絮撲鴛鴦帶花團蛺蝶枝  
如何東郭叟足迹自穿綦

和江鄰幾詠雪二十韻

十一月將雪寒誰計有無雲橫凍鵬翼霰集泣蛟珠萬里風爲使千門玉作樞  
縞衣來自鄭濤鷺卷從吳積甲聞熊耳觀鵝入越都庭槐高臃腫屋蓋素模胡  
騁巧能藏醜論功解飾枯巢禽皆白鳳來獸必騶虞遼俗休誇豕燕丹久望烏  
袒裘無壯臂附火念焦臚歌竹休王滿餐毛活使蘇亡羊何可問別鶴不應孤  
靡密同脂網縈回似舞姝漸深由片片取重本銖銖日月方收照乾坤不辨隅  
雖輕自相壓更潔亦終渝飢虎僵幽谷游龍脫勁鬚佳人調蜜蔗公子擁貂狐  
共是空囊客曾非暖席儒黃昏特過我興與灞陵俱

送張遂州

華省名郎意若西相如橋柱舊曾題已將符節爲邦守不畏關山入馬蹄千里

過秦看素澹三年還蜀度青泥里門錦綬何爲樂外奏嚴君內阿嬰

送周寺丞宰新鄭

仲冬吉徂征曉月在環玦京水生層冰梅山見殘雪縣庭槐已古堂壁碑未缺

惟吾故交意贈子以爲別

尹師魯有志古堂記

送余郎中知鄭州

西接都門纔百里壓城殘雪照牙旗風煙古是諸侯國鴈鷺新來僕射陂餽食且依當日具鑄刑無改昔人爲濃薰舊舍青綾被不越常衙睡足時

送胡都官知潮州

自昔揭陽郡刺史惟韓侯韓侯初來時問吏瀧水頭到官諭鱷魚夜失風雨湫乃知抱正直異類尙聽謀潮雖處南粵禮義無遐陬勿言古殊今唯在正教脩適聞豫章士勇往登犀舟不畏惡溪惡疊鼓齊歌謳遠持天子命水物當自囚更尋賢侯迹書上揭陽樓

送晏太祝之宣城監稅

每愛昭亭傍清灘石可數兩岸脩竹林孤城嚴晚鼓自辨越人言難度楚鄉語  
郭門春聚船江賈無多取

送張正臣赴泰州幕

敲冰冰未泮塞河流玉段輕舸莫言遲古城滄海畔春皋蘭蕙茁晚井魚鰕亂  
時平無羽書此樂異王粲

月下懷裴如晦宋中道

九陌無人行寒月淨如水洗然天宇空玉井東南起我馬臥我庭帖帖垂頸耳  
霜花滿黑鬣安欲致千里我僕寢我廩相背背兩己夜深忽驚魘呼若中流矢  
是時與我懷顧影行月底唯影與月光舉止無猜毀吾交有裴宋心意月影比  
尋常同語默肯問世俗子

願嚏上辛祈穀  
爲獻官

猛虎不獨宿鴛鴦不雙棲虞舜遊蒼梧帝子夜向瀟湘啼時旣禪禹妃亦老老  
淚灑竹無高低流根及筍駁紅蘚此情乃與天地齊我今齋寢泰壇下侘僚願

懷朱顏妻

和司馬學士上辛祀事出郊寄馮學士

侵曉度南薰禁鐘猶可聞春郊微有霰上苑稍藏雲齋館人相望官橋路已分  
寧同烏鳥樂翔集自成羣

同蔡君謨江鄰幾觀宋中道書畫

君謨善書能別書宣獻家藏天下無宣獻既歿二子立漆匣甲乙收盈廚鍾王  
真蹟尙可覩歐褚遺墨非因模開元大曆名流夥一一手澤存有餘行草楷正  
大小異點畫勁宛精神殊坐中鄰幾素近視最辨纖悉時驚吁逡巡蔡侯得所  
得索硯鋪紙纔須臾一掃一幅太快健檀溪躍過瘦的顱觀書已畢復觀畫數  
軸江吳種稻圖稻苗秧秧水拍拍羣鷺矯翼人荷鉏陂塍高下石籠密竹樹參  
倚荆籬疎大車立輪轉流急小犢欺顧穉子驅令人頗有故鄉念春事況及蠶  
桑初虎頭將軍畫列女二十餘子拖裙裾許穆夫人尤窈窕因誦載馳誠起予  
予無書性無田區美人雖見身老癯舉頭事事不稱意不如倒盡君酒壺

上元夜雪有感

去年昭亭陽今夜苦風雪及雪在京城宵燈亦將滅  
石花廣袖輕梅蕊新妝潔  
恩恩競還家陌上亂車轍

上元雪

春雪如胡蝶春燈如百花漫漫飛不已愁殺千萬家  
我今無復夢擁被讀南華  
送李才元學士知廣安軍

楊柳不堪折柔條時倚風朱輪過灞上杜宇響襄中  
危棧憎春雨晴林發曉紅  
不須言蜀政當自學文翁

送王推官宰上洛先歸關中

跨馬獨歸日春風隨度關客裘將欲綻社燕亦同還  
洛水源邊邑秦人隱處山  
君家有鳧鳥切莫向雲間

送信安張從事吉甫兼寄白使君

西洛故人少世家今亦稀憐君能及祿過我苦言歸  
游宦長城下生涯舊國微

使君應借問出處竟多違

送懷州張從事仲賓

行色在車馬西亭新雨過移家從上黨  
佐幕向三河阜茨林初暗黃梁酒未和  
七賢無復有舊迹尙應多

宛陵先生文集卷第十三



宛陵先生文集卷第十四

和李廷老家會飲

四序豈長停寒革春淺和始愛衣裘輕相與車馬過車馬不畏遠風埃不畏多  
到門門有槐槐上時鳥歌時鳥歌猶澀主人當謂何南開石榴軒中置飲酒羸  
食案施黃金饌炙厭白鵝漢糟槎頭美吳羹成咄呵既醉或放言挾莊引駘宅  
縱論或好辯排墨同孟軻日將薄虞淵執策相交摩欲去舉大白酌我苦大苛  
正月二十七日江鄰幾杜挺之劉原甫貢甫韓持國邀飲於定力院  
昨日會飲我後至誰欲比我爲王戎笑知卿輩意易敗起請便與俗物同似過  
黃公酒壚下嵇阮不見脩竹中杳爾山河隔千里此心正有古人風

送宋中道朝陵仍於西都省親

西出虎牢關南瞻園廟戟漢殿拜衣冠魏臺嚴帳帟春風石闕冷曉氣田塗白  
早晚下朱陵先過洛陽陌

寄西京通判宋次道學士

當時交友都無幾欲問懽娛亦異今花接上林新木變水分清洛舊池深嵯峨  
嵩色雲常在窈窕宮牆草又侵脩竹千竿白家寺昔年題處可能尋

送晁殿丞鄭州僉判

朝離沁水上夕去野亭賒走馬日銜樹度河風卷沙關雲來兩脚陂岸長蒲芽  
共被方爲樂軍中莫摻搗

重送宋中道

隴草陳根發山櫻宿霧蒸將過周故宅先下漢諸陵頽道春經雨官溝暗溜冰  
莼羹休定價羊酪易爲勝

送涇州良原何鬲主簿

春風入邊磧二月沙草生胡馬自偷牧漢農寧廢耕薄田刈晚穀又餉防秋兵  
縣版固當重調輕無與程

依韻和永叔見寄

春風約柳一片西欲託鳥翼傳音稽昨朝偶向東城去草草又逢驄馬蹄長顙

御史威正峭沙堤來坐氣吐霓我乘小駟雖甚瘦喜見驂馭猶解嘶適聞南都  
接大尹笑我出處今何迷恥趨捷徑身已老欲至何用頻吹齏蛟龍失水等蚯  
蚓鱗角雖有辱在泥困居廢井誰引手豈得更望青雲梯筆鋒勁發若彊弩餘  
力曾徹七重犀倦禽雄雌不飽腹日暮徒念還巢棲大椿朝菌各有盡此物何  
怪莊叟齊誠知豪俠自快樂東郊南陌競鬪雞胸中有道無廣狹包括宇宙在  
一稊何時與公去潁尾湖水漫漫如玻璃世間會合固不易況乃仕宦多相睽  
正似郵亭戀行者未到止息空歌驪我貧尙不給朝夕焉得負郭置稻畦筋骸  
幸且稍輕健山水縱好無路躋儻公他時買田宅願以藜杖從招攜吾兒詩書  
不足教亦以助力於耕犁

東城送運判馬察院

春風騁巧如剪刀先裁楊柳後杏桃圓尖作瓣得疎密顏色又染燕脂牢黃鸝  
未鳴鳩欲雨深園靜墅聲嗷嗷役徒開汴前日放亦將決水歸河槽都人傾望  
若焦渴寒食已近溝已淘何當黃流與雨至雨深一尺水一篙都水御史亦卽

喜日夜順疾回輕舸頻年吳楚歲苦旱一稔未足生脂膏吾願取之勿求羨窮  
鳥困獸易逐逃我今出城勤送子酤酒不惜典弊袍數塗必向睢陽去太傅大  
尹皆英豪試乞二公評我說萬分豈不益一毛國給民蘇自有暇東園乃可資  
遊遨

送知和州杜駕部

桐花欲開時羣蠟爭哺兒但求黃口飫焉問丹穴飢常山有四鳥將飛昔已悲  
中間勿殞逝豈得安其枝一飲必屢顧每啄必遲遲今朝竟矯翼去向江之湄  
銜芹不自食欲遺孤與雌此義實已重莫爲梟所噬世俗多嫌忌我胡爲此詩  
此詩美孝悌持贈杜挺之

送劉郎中知廣德軍

昔在少年時辛勤事諸父諸父爲桃州物宜皆可數事君勤職貢采茗先穀兩  
劬農井田桑科薶重鉏斧城西大靈祠措意初似禹將通吳境河身自同豕伍  
期婦來餉時壇上必鳴鼓一爲烏所誤愧恨去不覩至今存遺堤五丈立堅土

正如開轅轅黃熊慚啓姥功利欲及民血食宜簋簠祠後有高山山頭攢棟宇  
此實諸父爲禾麻可就俯歲登有樂事或亦作歌舞賦詩當清明解襖思洛浦  
其言在黑石往往被樂府于今三十年追想漸成古公將乘朱輪去問民疾苦  
治術自有具薄言無所補缺將陳迹書又且劇莽鹵

送洛南周寺丞

政家在華山

將去洛南宰日聞庭下松亂山歸四隱舊墅隔三峯狹谷車能入春林雨易逢  
地多椒與漆貨必厚於農

賦石昌言括蒼石屏

括蒼黃石屏樹如濃墨寫根深稱條葉生意絕蕭灑或聞造物手立意先真假  
指是龜澗摹能同自然者天下莫復言物亦逢知寡

寄致仕張郎中

代人

門榮世美高天下身退心閑住洛陽畫鶴能同薛少保愛書還比蔡中郎花陰  
小酌呼鄰父月下清吟掃石牀不問從來生計薄題籤盈閣是家藏

送錢駕部知邛州

細雨梅初熟輕寒麥已秋路危趨劍道夢穩過刀州秦粟非吳食巴稷類越疇  
當墟無復舊試似長卿求

文惠師贈新筍

劉累死龍不馴世間士不識真有真物實去人或在山亦隱鱗或多孫山出水  
濱奮雷轟轟萬里春厚土坼裂窮蟄振牙甲戢戢不可數削掘誰怕天公嗔煮  
之按酒美如玉甘脆入齒饒流津荆吳易得梁宋少二年不食思無因豈意今  
朝忽有遺不忍獨饗呼吾鄰

宛陵先生文集卷第十四

宛陵先生文集卷第十五

觀何君寶畫

燕馬易畫吳牛難圖馬骨隱細牛骨麓馬毛要密牛毛疎麓疎必辨別細密多  
糗胡乃知戴嵩筆能出韓幹徒幹馬精神在韁勒嵩牛怒鬪無牽拘昨日何家  
觀小軸絹雖破爛色不渝二頭相觸角競倚前脚如跪後脚舒尾株榻直脊脊  
蹙筋力寫盡蹄腕殊一勝一敗又苦似勝者狠逐敗者趨卷窮赤印置小字置  
字乃是陶尚書尚書國初人愛畫收幾廚買時不惜金與帛帛載牛車錢載驢  
後世兒孫不能保賣人窮市無須與凡目矜新不重故千錢酬直皆笑愚四牛  
遂爲何氏有裝背入眼天下無坐中吾儕趣已異又喜玄女傳兵符此本實稱  
閻令畫下筆簡細容顏姝三人鬼狀一牛首八女二十美丈夫黃帝中間蔭葩  
蓋霞扇錯玳旌擁朱冠服難知歲月遠但見儀衛森清都復觀鹿臺獨夫受姐  
己不笑何由娛酒池肉林騎行胔剖心斲脛堪悲吁數幅吳王宴西子綵舟張  
樂當姑蘇宮娥數百簇高下鬢髻一一紅芙蓉危峯細浪得平遠前對洞庭傍

太湖商紂夫差可垂誠歷世傳玩參盤玉鵬鷹草木不足記特詠此事心何如  
送任太博歸省西都

人言少保持家謹載見西京萬石君子舍今歸浣裙切里門重戒下車勤田園  
一一能爲計僮僕訢訢亦有聞我負洛陽山水久試因行色寄嵩雲

送少卿張學士知洪州

朱旗畫舸一百尺五月長江水拍天穩去先應望廬岳暫來誰復見龍泉閣經  
吏部重爲記山識吳王舊鑄錢往迹可尋軍士少贖書遺逸附青編

觀楊之美畫

天官乘車建朱旗赤旛前亞風卷披二龍緩駕蒼髯垂印箱傍挈文籍隨雙驂  
推輓如畏遲行從冠服多威儀水官自有真龍騎兩佐並跨鯨尾螭步趨羣吏  
怪眼眉雲生海面無端涯雷部處上相與期人身獸爪負鼓馳後有同類挾且  
搥次執電鏡風囊吹青蛇有角魚足髻上下引導神所施地官旣失不可知此  
畫傳是閻令爲設色鮮潤筆法奇絹理膩滑雞子皮吳生龍王多裂墮八軸展

玩忘晨炊李成山水曉景移黃荃花竹雀擁枝韓幹馬木摸搭時神駿多失存  
毫釐日高腹枵眼皆眵邂逅獲見何言疲厚謝主翁意不衰他日飽目看無遺

李審言遺酒

大梁美酒斗千錢欲飲常被飢窘煎經時一滴不入口漱齒費盡華池泉昨日  
靈昌兵吏至跪壺曾不候報箋赤泥坼封傾瓦盎母妻共嘗婢流涎鄰家葡萄  
未結子引蔓垂過高牆巔當街賣杏已黃熟獨堆百顆充盤筵老年牙疎不喜  
肉况乃下箸無腥羶空腸易醉忽酪酏倒頭夢到上帝前賜臣蒼龍跨入月不  
意正值姮娥眠無人采顧傍玉兔便取作腊下九天拔毛爲筆筆如椽狂吟一  
掃一百篇其間長句寄東郡東郡太守終始賢切莫汲竭滑公井留釀此醕時  
我傳

送邵郎中知潭州

張鏡疊吹洞庭外緣虎帶刀蠻帥迎且諭漢家綏撫厚莫言湘守事權輕木奴  
洲近霜包熟斑竹林昏野鳥鳴賈誼宅邊寒井在暫留千騎漱餘清

送楊叔恬應北京辟

昔時見子宛丘下丞相待子知子賢子於文字實廣博海客謾估珠盈船欲賣  
明月一寸魄雖豪不肯售以錢通都大邑忽辨寶直取不犯驪龍涎遂作照乘  
物矜夸魏人前從茲十二車光彩生從先

送洪州通判何太博若谷先歸新淦

拜官江上客乘馬不乘船獨畏蛟龍浪將歸風雨天葛花侵野徑源水入腴田  
君住巴丘下西山道路連

五月七日見賣瓠者

老圃奪天時馬通爲煦嫗四月彼種瓜五月此賣瓠陽陂與糞壤功力且異趣  
瓜選瓠何早半邊筒雨露速利乃在人爭先無晚暮

和江鄰幾景德寺避暑

好鱗不應雨鳴鳶不生風鬱氣若甑炊初陽如火紅裸膚汗交流脂體膏將鎔  
龍頭費挹酌犢鼻彊遮蒙常畏俗物來去避青蓮宮廣堂鋪琉璃高檐蔭梧桐

廊壁畫地獄獄具鑊鋸春鐵城何燄燄鐵牀亦形形誰知炮烙死活間傳自西域黃面翁正類人世苦此熱聲利役使亡西東京師貴賃幾椽舍窮煎相似聒欲聾屋頭朝爨作飲食枕底夕艾驅蚊蟲宜爾近巷江夫子賦詩特壓塵土中

送趙諫議知徐州及

鹿車幾兩馬幾匹軫建朱幡騎毅弓兩過短亭雲斷續鶯啼高柳路西東呂梁水注千尋險大澤龍歸萬古空莫問前朝張僕射毬場細草綠蒙蒙

送邵戶曹隨侍之長沙

青袍會稽掾采服湘江行水館魚方美犀舟枕自清鷓鴣啼欲兩蟬螻見還晴風土雖卑溼醇醪可養生

晨起裴吳二直講過門云鳳閣韓舍人物故作五章以哭之

平生交友淚又哭寢門前魯叟不言命楚人空問天月沉滄海底星隕太微邊莫恨終埋沒文章自可傳

使虜嘗專對江湖謫幾年始看還近侍遽此隔重泉沃酒酒空滿託詞詞謾傳

視予猶手足莫怪獨潸然

算數曾無據仁人亦莫聞  
狼愚多至老蘭桂苦先焚  
不竟千秋恨還如萬里分  
臨風一號慟易散日邊雲

昔時賓宴地今見總幃遮  
棲室那因鵬從杯不爲蛇  
曾無越人術竟起漢臣嗟  
明日東城陌悲涼後部笳

曉陌行車過交相歎且驚  
荀龍聞一蛻穆駿失全鳴  
不復中書直空餘左史成  
緒言猶在耳尙想見平生

聞高平公殂謝述哀感舊以助挽歌三首

文章與功業有志不能成  
嘗以躋高位終然屈大名  
遺風猶可見逝水更無情  
歸卜青烏壟韓城苦霧平

京洛同逃酒單袍跨馬歸  
明朝各相笑此分不爲稀  
公旣參鑪冶予將事蕨薇  
悲哀無以報有涕向風揮

一出屢更郡人皆望酒壺  
俗情難可學奏記向來無  
貧賤常甘分崇高不解諛

雖然門館隔泣與衆人俱

歐陽郡太君挽歌二首

夫人有賢子往歲謫夷陵欲使無愁鬱怡然見寢與外詞陽磊磊內畏實兢兢  
隋壽復終貴共爲時所稱

當時丈人歿雖少守孤兒以及成名譽何嘗厭蒺藜暮年終饗福陰隲不應欺  
莫使碧江上獨傳陶母碑

依韻和石昌言學士求鼠鬚筆之什鼠鬚鼠尾者前遺君謨今以松管

代贈

江南飛鼠拔長尾勁健頗勝中山毫其間又有蒼鼠鬚入用不數南雞毛二物  
緩急豈常獲捕刺徒爾操蠻刀舊藏已贈蔡夫子報君松管何蕭騷

邃隱堂

大梁車馬地塵土飛百尺賢愚走其間朝暮不見迹北望天波門垣垣宗室宅  
宗室令王孫愛書輕玉帛華宇何深沉但聞列圖籍曲房有窈窕空自事眉額

體胖生粹和安石處崑石古來爲善樂豈以歌鐘適

讀永叔所撰薛雲衛碣

文章如塗金光彩發美器所宜玉石間摹寫傳千祀堅堅孝子心森森柏庭闕  
豈與石麒麟原傍鬪蒼翠

和石昌言以蜀牋南牋答松竹管之什

蠻牋抽轉龍鱗細秋兔束毫雞距尖楊子校經聊以贈蜀麻江楮報何嫌

赤蟻辭送楊叔武廣南招安

南方赤蟻大若象潛荒穴洞人莫逢天公合雨不決雨從橫亂出將自封侵疆  
凌壤壞城市戰鬪億倍南柯雄嘗聞穿山食此物此物既大非常凶張舌流涎  
莫可餌枉啄不怕長戈春今令智者以智取卽見蚍蜉傳太宮因而使知禍福  
理天子下令雲從龍

走筆戲邵興宗

子魚一尾不曾有又諾毘陵蒼鼠毫細粒吳杭誰下咽尖頭越管底能操

送李中舍襲之宰南鄭

莫問襄中道路難，襄陽直上幾重灘。  
蒼煙古柏漢高廟，落日荒茅韓信壇。  
出水槎頭一絲挂，穿虹兩脚兩橋殘。  
土風大抵如南國，期會先時俗自安。

送王察推績之鄧州

昔向南陽憶洛陽，秋橙初熟半林黃。  
車過白水沙痕闊，鴈落鉗盧稻穗長。  
廢壘漢碑金刻字，古原秦冢石爲羊。  
太平羽檄何曾有，賓主相歡菊薦觴。

戲酬高員外鯽魚

天池鯽魚長一尺，鱗光鬣動楊枝磔。  
西城隱吏江東客，晝日馳來奪炎赫。  
冷氣射屋汗收額，便教斫膾傾大白。  
我所共樂仲與伯，羨君赴約笑啞啞。  
持扇已見飛鸞翮，欲往從之雲霧隔。

送何濟川學士知漢州

丞相初得君，有志重儒術。  
乃言天下士，徒此占清秩。  
遂懲衒鬻人，忝冒十八七。  
進君天祿閣，此衆爲第一。  
又薦王張韓，恬可與君匹。  
吾儕宜慚羞，空自預朝鞞。

欲歸無田園疆住枉歲日值君乘高軒西望函谷出當時迎長卿書史傳未悉  
車馳及襁負千萬今可詰老農喜君來田租不忘率織婦喜君來織機當俟畢  
府胥喜君來督責去暴扶疾苦無不求前人唯法律畫錦榮旣浮康民美方溢  
真爲丈夫志豈是名過實

依韻和達觀師聞蟬

飲餘晨露吸餘風噪遍高枝爲俗聾欲比伯夷清已甚不餐周粟腹常空

依韻和杜相公謝蔡君謨寄茶

天子歲嘗龍焙茶茶官催摘兩前牙團香已入中都府鬪品爭傳太傅家小石  
冷泉留早味紫泥新品泛春華吳中內史才多少從此莼羹不足誇

依韻和接花

唯是圃人巧非關元化偏折條違物理遷豔得花權美女嫁寒壻醜株生極妍  
世間多妄合吾不謂之然

送石昌言學士

混混拍堤瓜蔓水軒軒銜尾挂檣船使君東下只朝夕父老走迎無後先古堞  
秋耕拾銅鏃長淮瀑雨入壕蓮鳴猿舞鶴仍持去不憶承明夜直眠

書南事

大梁國南門驛騎方騰趨波波一何急蠻寇圍番禺番禺本無備前賴魏大夫  
大夫築子城今得守以須兵雖不滿萬閉壁堪指呼老幼轉木石壯健操矛弧  
廩庫得以完日月不易圖城中舊無井魏鑿安轆轤魏由飛語去不使立外郭  
古稱時有待淺薄皆謂紆曲突與爛額看取報功殊

送吳照鄰都官還江南

霜前江水磨碧銅岸背菱葉翹赤蟲吳郎鬢絲蒼幾縷不差月上扶桑東羞見  
清波照人影去時黑髮吹春風五年歸來婦應喜從此不問西飛鴻

馮子都詩

并序

漢霍光愛幸監奴馮子都與梁冀嬖奴秦宮事相對唐李賀作秦宮長辭亦云  
子都當時已有詩予因補之

黃金畫車屋韋絮緣車輪牽以五采絲藉以刺繡茵出入長信宮晝夜將誰親  
所親美且少玉頰丹砂脣殷羅縫輕襦明珠攢緇巾半醉臥車中侍婢躡行塵  
憶昔廣明亭將軍愛憐頻便房不使殉易寵在茲辰嗣侯喜驅逐平樂多從賓  
青絲穿五銖累室貯百珍歡與子都異矯與子都均用財糞土擲吐氣日月跋  
天地可齊久禍患豈有因秋風茂陵下蒼蘚上騏驎

七月十六日赴庾直有懷

白日落我前明月隨我後流光如有情徘徊上高柳高柳對寢亭風影亂疎牖  
我馬臥其傍我僕倦攣肘寂寂重門扃獨念家中婦乳下兩小兒夜夜啼向母  
問耶若箇邊天性已見厚不嗟羈枕孤不愧棲禽偶內有子相憶外有月相守  
何似長征人沙塵聽刁斗

采芡

蝟毛蒼蒼磔不死銅盤蠹蠹釘頭生吳雞鬪敗絳幘碎海蚌口出真珠明磨沙  
漉水葶殼滑斫桂煮釜風波聲齒如編貝嚼明月曼倩不復飢腸鳴莫論一斛

貴與賤堂上狼籍無由行

史氏南軒

庭中碧石盎上結三重山飛光入酒杯舞翠生髻鬟竹林眠黃鸝莎徑欠白鷗  
主人無倦情窗戶不須關

送河北轉運使陳脩撰學士

河隍多宿兵兵食固所須幸時不戰鬥畜養安可無古興十萬師七十萬家輟  
耕鋤今來歲調餉且與往昔殊不使民轉輓但使民歸租急緩實塞下商賈以  
利趨關西河東亦如此軍實雖足民賣虛公平抱長才當有所畫謨應不貸內  
府重錦象牙明月珠邊城預自足寧待臨祭輸莫令稱庭臣爲言桑大夫

奉和寄宣州廣教文鑿師

秋池對門蓮子枯野壁剝月蝸涎塗庭中兩株古楠樹上有山鳥長相呼當時  
聯巢接飛者一落梁宋一海隅扶桑日枝幾千尺光彩不獨生陽烏

送陸介夫學士通判泰州

從來戎馬地饗士日椎牛介冑奉儒服詩書參將謀隴雲連塞起渭水入關流  
豈似瀛洲下窮年事校讎

送徐君章祕丞知梁山軍

蒼壁東江流孤軍水上頭蛟龍驚鼓角雲霧裊衣裘午市巴姑集危灘楚客愁  
使君才筆健當似白忠州

依韻和秋夜對月

陳王苑裏望空虛吳客風前憶具區橫閣漸看河影轉繞枝還見鵲驚無蟲催  
織婦機成素露逼鮫人淚作珠才比陶潛無用處紗巾時任酒霑濡

宛陵先生文集卷第十五

宛陵先生文集卷第十六

和曹光道風拔三檜

飄風西北至樹苦萬縶牽君家三古檜繁根龍地纏其固謂不拔朱欄擁青塼  
今同秀林木摧倒誰復憐安得百力士扶持尙可全慎勿伐作薪豈無庭燎然  
飲劉原甫家原甫懷二古錢勸酒其一齊之大刀長五寸半其一王莽  
時金錯刀長二寸半

主人勸客飲勸客無天妍欲出古時物先請射以年我料孔子履久化武庫煙  
固知陶氏梭飛朱風雨天世無軒轅鏡百怪爭後先復聞豐城劍已入平津淵  
聊讎二百載儻有書畫傳嗚呼纔十一便可傾觥船探懷發二寶太公新室錢  
獨行齊大刀鎌形末環連文存半辨齊背有模法圓次觀金錯刀一刀平五千  
其文如此精銅不蠹蝕肉好鉤婉全爲君舉酒盡跨馬月娟娟

送嘉州監押曹供奉測

舊友尹師魯嘗作送子文文存人已歿行復我何云平時爲郡尉遐方宜撫軍

定過揚雄宅野鶴自成羣

答仲原太傅八日遺酒

陶潛九月九無酒望白衣何言先一日雙榼忽我歸借問遺酒誰天宗分日暉  
明當酌大斗黃菊羔醅肥李賀諸王孫作詩字欲飛聞多錦囊句將報慚才微

送張生還和州

山頭孤石望來久天外行人今獨歸藥囊自有留生術不管淮南木葉飛

李康靖少傅夫人挽詞二首

九月秋風急三川苦霧迷卜邨新隧啓度鞏短簫齊寶劍知終合靈蟾已隕西  
松門來會葬車馬幾千蹄

板輿曾至鄭靈輅此歸周行哭人增慕凝笳月正秋九原開祔穴故土覆新丘  
歲晏寒松下茅苫孝子留

送韓文饒寺丞宰蕭山

吳會未探穴廣陵先看潮橫江百馬怒卷海萬鰲躡舟楫凌湍發魚龍接浪跳

薄言增勇氣少當舉山瓢

蔡君謨示古大弩牙

黃銅弩牙金錯花銀闌線齒如排沙上立準度可省括箭溝三道前直窠其度四寸寸五刻釜光歷歷無纖差蔡侯出此問誰得往年客遺來琅邪琅邪築城穿厚壤既獲磨洗爭傳誇莫知歲月孰製作精妙近世應難加發機高下在分刻今人妄射功仍賒願侯擬之起新法勿使邊兵死似麻

和劉原甫省中新菊

華省切星斗沉沉巖燕房秋風茂陵孫種菊爛生光天晴胡蝶飛上下舞雙黃劉郎才筆豪移榻吟在傍日晚吏已散殘景上粉牆有酒無飲伴掇英襟裾香還思陶淵明棄官歸柴桑東籬獨此物盈把恨無觴賴有白衣來好事遺壺漿適意各一時豈乏同舍郎

依韻和仲源獨夜吟

秋鴻聲澀秋絃苦塗金博山煙夜吐寂歷虛堂燈暈生誰人共聽西窗雨

寄題周敦美琨瑤洞

仙人采玉驅雄龍列山剖璞青腔空因邃爲堂曲爲室石乳溜壁光玲瓏仙歸  
龍去草樹長蔽翳不復人蹤通指疆買墅下峯下洗斲務欲險怪窮地鱗鹿迹  
尙莫到安問樵老諸牛童古人未得今已得萬景付與由天公何當歸來斂頭  
角任從寶我生白虹陰溪淺水菖蒲綠下有蝦蟇雙眼紅及時佐酒斫兩股勿  
使更入明月中

許生南歸

大盤小盤堆明珠海估眩目迷精龕斗量入貢由掇拾未必一一疵類無不貢  
亦自有光價此等固知魚目殊許生懷文頗所似暫抑安用頻增吁倚門老母  
應日望霜前稻熟春紅稈歸來爛炊多釀酒洗蕩幽憤傾盆盃九卿有命不愁  
晚朱邑當年是嗇夫

得沙苑榼棹戲酬

蒺藜已枯天馬歸嫩蠟籠黃霜冒榦不比江南查柚酸橐駝載與吳人看

寄題杭州廣公法喜堂

淘青研朱畫屋梁黃漆柏障連曲房日暉月色不須照了了自可窺毫芒夕陰  
花斂似欲病飛鳥不驚烏帽郎深山窮谷謾幽僻喜得吳儂是藥囊

題滿公僧錄西明軒

赤萍纔落鄧林外青銅半磨傍露明飛光斜入了不隔坐臥一榻琉璃平西方  
古胡黃金質貝葉傳寫烏行橫謂曉此教居此軒滿壁圖畫遙峯生

寄題撫州戴秀才息心亭

蒼蒼開幽林峯嶺日相對雲歸垂衣纓泉落響環珮仕宦雖有負耳目得以貸  
俯仰宇宙中晏然維進退

送臨江軍監酒李太博

三江卑溼地北客宦遊稀霧氣多成雨雲蒸易損衣白醪燒甕美黃雀下田肥  
未辨殊方語山歌半是非

道損司門前日過訪別且云計程二月到郡正看暗惡海棠頗見太守

風味因爲詩以送行

蜀州海棠勝兩川使君欲賞意已猛春露洗開千萬株燕脂點素攢細梗朝看不足暮秉燭何暇更尋桃與杏青泥劍棧將度時跨馬莫辭霜氣冷

送雪竇長老曇穎

朝從雪竇請暮卷雲衲輕莫問居士病自從他方行吳霜點髭根海鳥隨衆迎安隱彼道場萬事都忘情

送襄邑知縣杜君懿太博

霜落水未落令君將度河農耕休叱耒女織罷鳴梭赤幘驅亭長丹砂挈印窠無慚浚儀政才比陸雲多

送晉原喬主簿

太守登車時我病不能出遙期玩海棠度險馬屢叱唯畏行邁遲惡欲及春日何爲愛此花曾非桃杏匹生紅濃復淺瘦蒂脩且密湖傍幾十樹雕盤擁新漆酒傾琉璃盆月上歡未畢縣官同遠宦簿領無督詰刻意詠芳菲追補李杜失

十一月十三日病後始入倉

曾非雀與鼠何彼大倉爲狐裘破不溫黃狗補其皮霜花逐落月綴在枯槁枝  
予年過五十瘦寢冰生肌

閔尙衣盜袴

昔聞廉叔度能使民多袴多袴非或貪持新不忘故嗟嗟亦王官奚自門閥汗  
中府中紋綾袖之呼馬去左右卽其私邀索乃就捕三公出死狗訓導能有素  
今同竊鉄者見爾皆此趣

胡夫人挽歌

子哲

已哉胡夫人其壽七十餘其子哀母死一夕髭皓如髭白髮亦白長號守茅廬  
扶棺埋吳雲來會傾市墟誰復向寒月臥冰求鯉魚

裴直講得潤州通判周仲章鹹豉遺一小餅

金山寺僧作鹹豉南徐別乘馬不肥大梁貴人與年少紅泥罌盜鳥歸飛我今  
老病寡肉食廣文先生分遺微

贈裴直講水梨二顆言太妙答吳甘三顆以爲多走筆呈之  
綠橘似甘來太學大梨如水出咸陽莫將多少爲輕重試擘霜包幾瓣香

送樂職方知泗州

長堤凍柳不堪折窮臘使君單騎行蘇合輕裘霜莫犯銅牙大弩吏先迎山旁  
楚賈連檣泊水上禹書寒磬清試向郡樓東北望煙波千里月臨城

和劉原甫十二月十日試墨

海神不朝雪不作大梁塵土蔽天高道傍牛喘復誰問佛寺吹螺空唱號相公  
跪香恬且佚陛下減膳心焦勞因君試墨偶有激勇辭壯筆揮長刀予無奈何  
亦思飲飲竭鬢甕從鋪糟

十二月十三日喜雪

三日朔風吹暗沙蛟龍卷起噴成花花飛萬里奪曉月白石爛堆愁女媧大明  
廣庭踏朝駕雉尾不埽黏宮鞞宮中才人承聖顏捧觴稱壽呼南山三公免責  
百姓喜斗酒十千誰復慳

送劉職方知汾州

齊

西河風俗厚尙翹古所聞子夏有遺廟干木有遺墳太守下車日當先此二君  
不必汾水上秋風看鴈羣

十三日雷後晚過天漢橋堤上行

堤上殘風雪橋邊盛酒樓據鞍衰意盡倚檻豔歌留海月開金鑑河冰臥玉虬  
當年洛陽醉偏憶董糟丘

送崔黃臣殿丞之任廬山

驂駒西行四千里直度經橋百尋水石上菖蒲未見花蒙頂茶芽初似觜采時  
應憶故園春故園開焙亦思人其間杜鵑不中聽掩耳聊看錦雉馴青崖鞭垂  
瘦蛇尾仙人搯節隨鱗起斫取他年跨馬歸劍棧秦山多折筍

十九日出曹門見水牛拽車

只見吳牛事水田只見黃犂負車輓今牽大車同一羣又與驟驢走長陌叩頭  
闊步塵蒙蒙不似綏耕泥汨汨一夜眠頭向南越鳥心腸誰辨白

吳太博遺柑子

太學先生欺綠橘裴如晦近有贈吳興才士與黃柑黃柑似日勝崖蜜帶葉初擎翠竹

籃還料楚王曾未識徒將萍實詫江南

和普公賦東園十題

櫨芳亭

結宇東園中種花待春風口歌金縷衣手折枝上紅今日映綠髮他年羞青銅

清心堂

寂莫外物亂境清心亦清彼皆居深谷此獨處重城夷齊食薇蕨千古首陽名

石筍

削出青山根峭立碧玉垂不作湘竹老不染帝子啼不為盤中蔬豈與煙茁齊

待月亭

明月過三五飛出滄海遲佳人望清夜隔樹光離離不須磔蝦蟆寒魄自有虧

虛白堂

空堂絕纖塵虛靜自生白長風吹月東窗戶如不隔漆園茲趣深赤水珠難索

假山

太山不可歷石齒齧人足聊集怪與奇蒼蒼都在目何須引寒流平地作溪谷

書齋

聖賢有事業皆在經籍中已愛牙作籤可輕山賜銅還來讀詩禮不用辨魚蟲

小池

小池依小山山晴翠光入無容羣蛙鳴間有孤鶴立曾不起波瀾石郵風自急

紫竹

西南產脩竹色異東筠綠裁簫映檀脣引枝宜鳳宿移從幾千里不改生幽谷

山茶

紅蔞勝朱槿越丹看更大臘月冒寒開楚梅猶不奈曾非中土有流落思江外

宛陵先生文集卷第十六

宛陵先生文集卷第十七

除夜雪

擊鼓人驅鬼漫天雪送寒臘從今日盡花作舊年看著樹多還墮隨風積更乾  
明朝預王會長濕兩梁冠

和吳沖卿元會

千官車馬闐闐來晝漏始上闐闐開峨峨左右升龍進昨夜雪飛雲作堆殿前  
冠劍魚鱗立東風入仗旗脚迴黃鍾一奏寶扇掩玳簾卷起香霧排鳴梢未盡  
霹靂響翠輦已退黃金階聖人端冕御法座大樂旅作聲和諧羣公抃蹈丹墀  
下尙書奏瑞四夷懷乘輿却入更衣閣通天絳袍陞玉榻百拜稱觴萬歲聞兩  
廊賜食簪裾巾曲傳大定舞綬疎波旋煙斂飭宮車衛官解嚴多士退日光停  
午氣象舒吳君才華天下傑歸來作詩傳石渠石渠祕邃無凡愚石渠酬唱皆  
嚴徐我慚短學復在後收餘掇棄聊以書

元日

頻年無入閭今日預朝元丹陛發金奏侍臣稱玉樽旗旌搖細仗雲霧啓千門  
却出蒼龍闕衣冠萬馬屯

依韻和仲源暮冬見寄

曾未學黃庭衰顏已可驚詩能如阮籍評不媿鍾嶸玉軫調初美冰壺想更清  
兔園風雪甚還聽鴈來聲

送韓子文寺丞通判瀛洲

嘗聞河間守介直天下無選才才且殊鐵網收珊瑚珊瑚得亦難鐵網取亦劬  
況茲戎馬郊為貳維多謨新春度滹沱冰上少馳驅

十七日和原甫風花偶書用其韻

風花不戀枝脫萼亂翻飛自學空中雪寧同垣上衣繞庭回旋久無著衆鳥爭  
銜何處歸

貽妾怒

飲食無遠近所美貴甘軟南方食蝦蟇密捕向清畎齒咀口且諱聞語輒忿喘

此物何醜惡猶勝螺螄蜺西蜀亦取之水田名穀犬彼土不爲慚吳人休獨恹  
豈須若中州牛羊烹大豔

十六日會靈火

章聖皇帝興三宮三宮鼎峙何崇崇天聖七年六月尾玉清始災壇宇空于今  
二十有五載上元後夜星軫中乃聞會靈五殿火丹燄赤天明月紅千楹萬棟  
一夕盡赤煙奔突西南風先時二日車駕幸爲民祈福輸清衷大臣驕蹇不從  
祀岳靈不歆爲不恭若此示變猶影響宜鑒陛下無情容神非怒乙遂及甲天  
意警聖不警凶不獨洪水累堯德堯仁未忍流驩共

送潘司封知解州

其父嘗守此州

鹽池暗湧蚩尤血紅波爛爛陽烏熱岸旁遺老記南風五月滿哇吹作雪白徑  
嶺上橐駝鳴太行山中騏驎茶古人射利今人同行商不困何由設朱轡太守  
自東來先世大夫留故轍是非取與應不移秦人休銜張儀舌

飲酒呈鄰幾原甫

天地不爭行日月不爭明晝夜自顯晦冬春自枯榮夸父逐日死共工觸天傾  
二子不量力空有千古名寄語賢與愚何嘗見長生我願會良友醉顏日常赧  
東海爲酒樽五湖爲杯羹海罄湖且竭盡倒爲解醒苟死不復知苟生徒牽情  
項籍乘牛車馳上廣武城強梁取秦鹿慷慨猶爲輕歸來臥酒家豈得慚公卿  
樂亦但如此舉世任營營

寄渭州經略王龍圖

西城橐駝來賀蘭入貢美玉天可汗蕭關夜開月團團彈筆古峽鳴哀湍前將  
軍不擐甲取大官今將軍能撫士尙盤桓河西五郡兵氣完駿馬躍棧無箭瘢  
我嗟乘劣不受鞍焉得乞與都人看

二十一日雪中赴宿懷鄰幾原甫

正月東都雪多於舊臘時酒賓臨迥閣野雀集枯枝馬向西城度花從上苑遲  
劉郎與江叟相對定爭棋

送永興通判薛虞部

灰宮盜玉秦樓空南山不老天無窮  
薛碑剝爛少文字兩耕拾寶牛蹠中其旁  
築城聚貔虎黃土岌業如削銅西州吏人  
氣吐虹摧鱗斂角聽相公少年別乘  
勤爾躬幕府甚盛瓊瑤叢

送宣州簽判馬屯田兼寄知州邵司勳

寒溪翠拖碧玉帶蒼山晴臥蛻骨龍  
水邊苦竹抽肥筍石上老蕨拳紫茸泊船  
繫纜宿明鏡昭亭廟古攢瘦松陰風雨  
電潭心起雲遮北嶺如墨濃田秧浸綠  
白鷺立內史出喜嘉賓從昔時謝公來  
賽神蘭肴作椒金作鍾聯詩姓何名已  
失板蠹粉落蟲鳥蹤我鄉復轉召南化  
磨鏤黑石君亦逢

觀拽龍舟懷裴宋韓李

截春流築沙坻拽龍舟過天池尾矯矯  
角岐岐千夫推萬鱗隨驚鴻鵠沉魚龜  
春三月輕服時薄水殿習水嬉馬特特  
來者誰魏公子人不窺車麟麟集其涯  
邯鄲倡士交馳銀餅索酒傾玻璃用錢  
如水贈舞兒却入上苑看鬪雞擊毬彈  
金無不爲適聞天子降玉輦當門虎脚  
看大旗春風吹花入行幄紅錦百尺爭

蛟螭雲蓋迴綵纜維明年結客觀未遲

二月四日雪

前日春風初擺條昨夜雪飛深一尺北帝及臘不行令東皇發煦遭爾厄侵時  
奪氣四時錯歡問上天何不責天高地厚語難通俛首下土徒叩額或言莫信  
難可聞鶴鳴至微猶不隔休問天問顏蹠休看花看壟麥

答劉原甫

生早多交友常恨會遇稀每念相笑語昨是今或非重惜向時游出處苦乖違  
從今儻有酒莫問梨栗微前夕呼我飲遣奴來叩扉暗犯風雪往醉脫冠服歸  
夜來新霽月清吐萬里輝劉郎戴幅巾江叟披褐衣相過無百步誰虞竊訶譏  
三家若循環但知具甘肥

聞語十方璉長老

舊居廬嶽寺新化給孤園還享國人供應無塵事喧有來聽喻筏一悟見吹幡  
不憶爐峯下臨溪看飲猿

十一日垂拱殿起居聞南捷

二月雪飛雞狗狂錦衣走馬回大梁入奏邕州破蠻賊絳袍玉座開明堂腰佩  
金魚服金帶榻前拜跪稱聖皇一朝嚴氣變和氣初令漏泄飛四方將軍曰青  
才且武先斬逗撓兵後疆從來儒帥空賣舌未到已愁茅葉黃徘徊嶺下自稱  
疾詔書切責仍勉當因人成功喜受賞親戚便擬封侯王昔日苦病今不病銅  
鼓棄擲無鏢鎗

十五日雪二首

寒令奪春令六花侵百花塘冰膠燕觜野水澀芹牙擁柱輕於絮吹墀淨若沙  
乳禽飢啄木誰誤撥琵琶

新雷奮蛇甲密雪鬪鵝毛正欲裁輕縠重令著弊袍沙泉流復凍煙萼圻還韜  
只待鄰醅熟微聲聽酒槽

春風九十日一半已消磨準擬看花少依稀詠雪多官車猶載炭袍鵲不離窠  
向此興都盡戴家誰復過

聞密賜

朝聞政府賀捷回夕賜明月五千枚巍巍聖皇德所該廟略付與何有哉況未  
覆穴翦渠魁宜先戰士老與孩傾肝瀝膽謝不敏豈可使恃張良才

送衛真宰晏寺丞罷長安

捨琴辭苦縣解劍入函關鵲報遠人至馬衝春雨還荒榛郊北園蔥翠國南山  
歸見蕭何政條令舊鎬間

江鄰幾饌鱧

泥鱧魚之下曾不享嘉賓又嫌太健滑治洗煩庖人煎炙亦苦腥未嘗輒向脣  
江侯昔南官家膳無此珍昨日邀我餐下箸勝紫鱗乃知至賤品唯在調甘辛

淘渠

開春溝畎春泥五步掘一塹當塗如壞堤車無行轍馬無蹊遮截門戶鷄犬迷  
屈曲措足高復低芒屨苔滑雨淒淒老翁夜行無子攜眼昏失脚非有擠明日  
尋者爾瘦妻手提幼女哭嘶嘶金吾司街務欲齊不管人死獸顛啼

蓬生麻中

麻畦無由本蓬質有樛莖所託脩仍直安能縱復橫擇鄰聞舊母益友記諸生  
蕭艾從茲遠蒿萊不可并何嗟蔣詡徑孰念衛人行儻匪緣其地秋風廣漠驚

賣鹿角魚

水中龍角而足海小魚角蠢蠢不擬龍乃擬鹿譬彼蝸抗繭犢漬以鹹鹵久且  
醜持賣都市參鼎鍊此人何苦厭豬羊甘爾臭味不飽腹

夜與原甫江家步歸

二十三日

丹砂漆盤盛井水冷浸半坼山櫻花始見春色不奈喜黃昏招飲夜還家劉郎  
居南我居北陌上泥開天正黑風吹蠟燭燒未明素絲作履惜不得

高陽關射亭

星弧射狼夜夜張角弓備寇不可忘將軍屯師古關下不尙武力何由彊日與  
兵官來會此弓須射硬箭射長更如羿中九烏斃獨見杲杲明扶桑

京師逢賣梅花五首

此土只知看杏蕊大梁亦復賣梅花此心還似庾開府不惜金錢買取誇  
驛使前時走馬迴北人初識越人梅清香莫把荼蘼比只欠溪頭月下杯  
憶在鄱君舊國傍馬穿脩竹忽聞香偶將眼趁胡蝶去隔水深深幾樹芳  
曾見竹籬和樹夾高低斜引過柴扉對門獨木危橋上少婦髻鬟猶戴歸  
此去吾鄉二千里不看素萼兩三年移根種子誰辛苦上苑偷來直幾錢

三月五日欲訪宋中道遇雪而止

胡蝶飛時雪鬪輕滿街撩亂得人驚欲尋宋子東城去馬畏春泥不敢行

觀文丁右丞挽辭二首

預政公槐亞談經帝席陳儉恭齊國相清淨漢廷人去夢嘗爲蝶遺文不解麟  
一聞車馬幸豐賜及孤臣

春風百花發露挽九原歸白馬悲鳴駐黃鸝下上飛壠邊新柏盛門外弔人稀  
獨見東牀客攀車淚溼衣

廷老傳沛語戲作

夷門市裏侯嬴老公子時能釋禮過莫問孟嘗招致客薛中遺俗尙應多

送胥平叔寺丞赴洛

單車細馬出虎牢春雲黝黝百舌號穀雨已近花欲盡秉燭夜飲朝坐曹因君  
重思昔日歡醉筆狂掃嵩丘高于今零落二十載縱在各各歎二毛試採上陽  
何首烏刮切仍致苦竹刀俗情相望亦異此競欲折筍籠含桃

送婺州通判徐殿丞

赴上當在  
後年夏

疾湍怒蛟龍不畏東風逆汙汙奔長淮千里在咫尺辭梁始及晨過宋尙未夕  
南州豈難到何處淹行迹

三月十日韓子華招飲歸成

清明曉赴韓侯家自買白杏丁香花雀眼塗金銀蔑籠貯在當筵呼舞娃舞娃  
取捧笑向客不顧插壞新烏紗朝來我舍報生子賀勸大白浮紅霞酒狂有持  
梧桐板暴謔一似鄱陽槎袒裼擊鼓禰處士當時偶脫猛虎牙褊衷不容又何  
益鸚鵡洲上空蒹葭

送下第親舊

花開風雨惡坐見紛紛落明日結子時又復有脫萼莫嗟樹漸老樹老子亦著  
共愛西枝繁不數東枝弱他年會有春却看西枝薄

燕

一避吳宮火千年楚屋春翅迎風雨健聲入戶庭頻掠水過長渚銜蟲落覆塵  
休將漢皇后故故比輕身

雨

春雲易成雨一日幾迴陰燕濕飛猶快花寒色更深邀車愁客遠盤馬畏泥侵  
向晚晴光吐西窗綠影臨

晴

風掃天如鑑雲開日似萍苑花猶帶濕蔬甲已微青蝶翅粉應薄塘潯波更渟  
尋春不惜醉莫笑髮星星

送胡公疎之金陵

綠蒲作帆一百尺波浪疾飛輕鳥翮瓜步山傍夜泊人石頭城邊舊遊客月如  
冰輪出海來江波千里無物隔自古有恨洗不盡于今萬事何由白依稀可記  
鮑家詩寂莫休尋江令宅楊花正飛鮪魚多食膾舉酒謝河伯但令甘肥日飽  
腹誰用麒麟刻青石去舸已快風亦便寧同步兵哭車輓

送裴虞部知信州

攢青歷歷正面山刺史日坐雲屏間楚人竟握水精璞漢女買作月珮環時惟  
產寶不重穀願當化俗無棄管往辭丞相相有言物景清絕何由攀

送李推官之岳州

崑崙燕子五兩竿霧露薄水平湖寒風帆美滿八百里夕從岳陽樓上看魚跳  
鷺立月鉤下星斗爛爛垂闌干羽書不到樽俎裏蠻兵況去荆楚安試尋燕公  
舊賦筆磨圭刻碧獨可完

和和之南齋畫壁歌

終南下臨長安城峻欄高檻黃金羸嵩山亦近洛陽陌鮮車怒馬一日程大梁

平廣市千里不見雲峯來眼底其間自有高趣人掃室呼工巖壑啓初疑巨靈  
勇擘華不比將軍能聚米暗雨輕煙滿室中塵事如脂一朝洗又將餘力作脩  
竹石上數莖風撼玉葉斜枝亞寒聲盡節老根獐生意足何須踐苔眠綠陰然  
後始爲嵇阮公三賢歌詠已見意舞女不看頻整簪

媯婦

黃金一丸入雲端羣貧望逐滿長安衆人爲貴媯不惜棄擲如泥資彈射藏身  
葉底有能鳴辜負春風拖兩翮不飛上天訴至珍幾人辛勤揀砂石

送端式歸漳州

來居天王都常夢苦竹溪乃識高僧趣不爲利物迷海燕乘華屋區區竟銜泥  
安知矯翼鷗豈類斷尾雞性同而質殊何必莊指齊

送黃殿丞通判潤州

前年江州飛火龍樓殿化盡山將鎔今聞棖棟復華壯大閣渠渠出波上南徐  
別乘簡且閑下馬岸旁呼畫舫永日江風不畏人檝師猱獐欺白浪衣上京塵

莫厭多斗擲中流雲在望

揀花

紫絲暈粉綴鮮花綠羅布葉攢飛霞鶯舌未調香萼醉柔風細吹銅梗斜金鞍  
結束果下馬低枝不礙無闌遮長陵小市見阿姊濃薰馥郁升鈿車莫輕貧賤  
出閭巷迎入漢宮人自誇

次韻和端式見贈

不爲阮步兵發詠怨朝陽不學屈大夫行吟思搴芳其雨豈無時細佩空自香  
吾道不苟合我懷固有常江南一畝宅近在句溪旁仕官且如此夢寐安敢忘  
以子論言多重歌木桃章

楊公蘊之華亭宰

月徑千里大中有神娥宮宮旁種玉桂柯葉垂瓏瓏蝦蟆穴其根出輒氣墨蒙  
光魄縱復吐血赤如頑銅不知從何時更使人蹤通年年折桂枝寬少尙易充  
今年拗都盡秃株立童童株秃莫爾攀墮雲雙手空歸來走海上買鶴問吳翁

端午前保之太傅遺水墨扇及酒

畫扇雙酒壺置前  
兵吏立言將國匠  
奇重以風義執樹  
石冰上看山河月中入  
便持菖蒲飲不畏青蠅及

送汝陰宰孫寺丞

編郎唱櫂燕尾下  
穎水落日蛇鱗生  
綠蒲被岸漁網舉  
黃鳥啄葦縹車鳴  
吏無  
詬租官正來不借  
魴鱖與吏烹饋吏  
人情見里黨官非  
喜慢知官清

和曇穎師四明十題

雪竇山

重雲不藏春深竇  
常有雪曉月號松  
猿晴壁挂海靄終  
恍無心人區區佩  
環玦  
龍隱潭

老龍戀潭窟不雨  
亦不雲吐涎出溪  
滑吹腥隔林聞疾  
雷驅未去魚鱉競  
紛紛

含珠林

山爲驪龍蟠谷作  
驪龍顛珠樹存其  
間誰採明月來何  
須循海隅笑蚌未  
成胎

偃蓋亭

既將茅覆檐復有松爲蓋五里入山時憩此得寒籟曾無康樂遊但見雲衲會  
雲外菴

山僧好寂靜入雲恨不深峯間一雨昏林表孤燈沈往來有猿狖呼嘯自成音

石筍峯

巨石如龍孫聳聳煙霧裏明明落溪口納納喧灘齒何當助齋盂菌菴徒爲美

宴坐巖

智覺禪師  
於此不睡

心危身亦危衽席尙顛墜如何巖石上來坐自安意能諭死生間無論寤與寐

三層瀑

山頭出飛瀑落落鳴寒玉再落至山腰三落至山足欲引煮春山僧房架劔竹

丹山洞

山無鳳皇飛洞有仙人迹蝙蝠大如鴉莓苔偏上屐自慚無道骨安問緣雲客

獅子巖

巖形若狻猊不能千里走豈無鳥獸羣當假風雷吼寄謝棲息人想像真妄有

宛陵先生文集卷第十七

宛陵先生文集卷第十八

依韻和原南省中松石畫壁

富彥國爲省判  
日令許道寧畫

山林與城闕事物不相對唯聞秉道義所處無內外趨煩而毀靜此理乃俗輩  
昔有天下賢喜得名筆會買粉塗南牆松石生屋內石怪如春濤松偃如起籟  
畫來二十年數偶未輒愛罕親憑按顏但覩抱犢背雖當省闈嚴晦昧欲何賴  
今逢茂陵人獨唱亦豪邁

依韻和原甫廳壁許道寧山水云是富彥國作判官時畫

山情水思半軒間試問來居有底閑唯有才高方暇佚無論歲月自能攀

依韻和劉原甫見寄

憶昔游臨汝于時太守賢山尋順風處城得豢龍遷民頸纍纍大池荷一一圓  
周碑嗟缺矣少室望嶄然羸馬居人後歸禽落我先事還如響答老去若波旋  
賦分都應定元功豈得偏不須天以問自可鑒於前王粲今方樂邊韶舊好眠  
漢宮聊擲彩梵學競通禪語道滔滔是論情往往牽平生二三友南睇不勝悵

醉和范景仁賦子華東軒樹次其韻

五月十日

樹影落東牆影微人已醉休看枝上綠但對眉間翠

五月十四日與子華自內中歸

君注起居同左史我爲委吏退延和共經南陌東風急側帽偷看意已多

送傅越石都官歸越州待闕

越客舟從真定至夜夜鏡湖生夢寐曉度吳江百尺船洗眼重看會稽翠買臣  
負薪樵徑荒伯鸞賃春苔白棄綠橘黃柑帶葉收白杭紫蟹侵霜飲食蟹易美  
杭易飽綠橘佐酒柑佐醉莫論仕官遠與近布被練袍何所利君恬不忍乞  
爲且返故廬聊以遲

吳沖卿出古飲鼎

精銅作鼎土不蝕地下千年蘚花冪腹空鳳卵留藻文足立三刀刃微直左耳  
可執口可斟其上兩柱何對植從誰發掘歸吳侯來助雅飲歡莫極又荷君家  
主母賢翠羽胡琴令奏側絲聲不斷玉箏絲繞樹黃鸝鳴不得我雖衰茶爲之

醉玩古樂今人未識

二十四日江鄰幾邀觀三館書畫錄其所見

五月祕府始暴書一日江君來約予世間難有古畫筆可往共觀臨石渠我時跨馬冒熱去開廚發匣鳴鑰魚義獻墨迹十一卷水玉作軸光疏疏最奇小楷樂毅論永和題尾付官奴又看四本絕品畫戴嵩吳牛望青蕪李成寒林樹半枯黃荃工妙白兔圖不知名姓貌人物二公對弈旁觀俱黃金錯鏤爲投壺粉障復畫一病夫後有女子執巾裾牀前紅毯平圍爐牀上二姝展氍毹繞牀屏風山有無畫中見畫三重鋪此幅巧甚意思殊孰真孰假丹青模世事若此還可吁

依韻和吳沖卿祕閣觀逸少墨蹟

奇哉王右軍下筆若神聖長戈與伏弩無不從號令賢豪雖林立帖斂孰敢競師徒氣揚揚龍虎旗正正勝聲塞宇宙自昔無此威赫赫猶至今瑰瓚曷云並崇崇中祕書濟濟士游泳墨寶收盈廚來觀遇已橫始知前人蹟鐫多自失勁

紙素儻未壞萬古傳莫竟一從歸人間夢寐不能更但媿將短才輒爾接高詠  
何羞趙壹窮自有鍾嶸評嘗聞曹將軍尚請賦競病我生羣俊末貧賤亦足慶  
文成終媿君鉛刀值枯梗

同江鄰幾龔輔之陳和叔登吹臺有感

在昔梁惠王築臺聚歌吹笙簫無復聞黃土化珠翠當時秦兵強今亦歸厚地  
我與諸賢良舉酒莫言醉曾誰問孟軻空自有仁義

逢羊

予晨過北郭見羣羊有羝處前其卬然而偉膾其角拱然而聳其毛茸然而長  
自膊至腕綖綖與纓胡相若其羣很逐而擁趨如奉焉及其宰也羝存而羣死  
之予歸作詩示諸友云

牧人垂長髯驅羊從北道老羝壓大羣毛比長髯好暮歸同一欄朝出不擇草  
既肥當用烹從羝羝獨保狡誘以全軀角尾徒爲老

依韻和張中樂寺丞見贈

朝車走鱗鱗暮車走鞅鞅黃埃蔽車輪赤日爍車屋靡論遠與近安問疎與熟  
賢愚各有求往返相磨礪我馬不出門我蹟亦以跼心慕中樂賢道義聞且宿  
其言清而新其貌古不俗書可到二王辯可折五鹿往見未爲勞定交然後篤  
惠詩何勁敏對敵射銅鏃穿楊有舊手驚雀無全目彊酬非所當宜將弓矢速  
依韻和原甫對月見還不至

每愛孔北海樽中常不空今無酒與客唯有月兼風遠色曾何隔微涼亦已同  
更期三五夕靜坐接談叢

依韻和原甫月夜獨酌

月下馬啼休擾擾夜涼蟲響競囂囂一杯獨飲愁何有孤榻無人膝自搖北斗  
柄高天漸轉小冠簪冷髮微凋誰知靜對頽然影竟夕幽懷豈易聊

依韻和原甫早赴紫宸朝待旦假寐

月落西樓露氣寒大明將謁望清班燭房猶照衣冠上漏舍欲爲魚鳥間入仗  
采旗開日月在庭公袞儼雲山我慚一似朝宗水亦得隨流到海還

依韻和原甫新置盆池種蓮花菖蒲養小魚數十頭之什

瓦盆貯斗斛何必問尺尋菖蒲未見花蓮子未見心小鮮不足烹安用芎餌沉  
戶庭雖云窄江海趣已深襲香而玩芳嘉賓會如林寧思千里游鳴櫓上清泔  
送施屯田提點銅場兼相度嶺外鹽入虔吉

江西采銅山未竭南越熬波海將結主人貪利不畏刑白日持兵逾盜竊銅私  
鑄器鹽奪商死共吏爭蛇鬪穴姦豪乘勢倚蠻陬劫掠聚徒成蟻垤今雖驅翦  
嶺下平尚恐根存更生孽因擇健才通便民付職與權將有設秋香亭上共爲  
賓却作主人殊少悅徂東走北十五年只有山川看不別

依韻和江鄰幾癸巳六月十日同刁吳韓楊飲范景仁家晚赴館宿覩  
吳興太守章伯鎮題壁記辛卯仲秋初吉九月十一日十月二十二日  
十二月十一日壬辰二月一日館直慨然有感

江翁多感慨飲散來直廬題蹤有舊友連蹇常與渠昨歸天祿下念昔悲有餘  
未久復外補安能戀清虛得請向茗雪幽懷寄禽魚高城浸湖光面面當紅蕖

晚乘畫舫游四坐羅輕裾數杯已酩酊萬事應破除不愛趨時近不恤與世疎  
百歲且過半冉冉將焉如誰慕八十叟猶在磻溪漁嗟哉再宿夕乃自仲秋初  
清談固隔絕可見壁上書

送林大年寺丞宰蒙城先歸餘杭逋之姪孫

東方有奇士隱德珠在淵川壑爲之媚草樹爲之妍歿來十五載獨見諸孫賢  
煌煌出仕塗皎皎如淮蠙今爲蒙城宰歸問浙江船何時渡楊子夜入明月邊  
有鳥不化鳧有琴何用絃真趣還自得治民唯力田

依韻和原甫六月八日曉雨

侵曉忽飛雨颯然戶庭涼滴階初聞聲濯樹暗有香吹燭燄閃閃鳴雞濕昂昂  
稍已便衣冠喜氣眉宇翔安然如涸魚响沫久已望塵纓自可潔何必念滄浪  
送余中舍知漢州德陽

匹馬易爲秣單車長是輕秋風來棧道宿雨度關城石上樹林暗山根江水明  
桐花鳳何似歸日爲將行

勉裴如晦

裴侯失嬰兒心腸如焚煎愛玩白玉玦墜地不復全收拾見顏色瑩澈猶自妍  
鳳皇生九雛一卵破易捐况多令男子拭淚慰目前

送謝寺丞知餘姚

其姪師厚嘗宰此邑

姚江千里海汝應山井亦與江潮通秋來魚蟹不知數日日舉案將無窮高堂  
有親甘可養下舍有弟樂可同縣民舊喜諸郎政芻力莫媿今爲翁

與蔣祕別二十六年田棐二十年羅拯十年始見之

我今五十二常若離別煎屈指數離別正去一半年三君異出處相見有後先  
蔣最會遇早羅倍晚於田仕宦比我遲官資居我前此亦漫輕量無限歸荒埏  
所喜笑語同各驚顏貌遷髮有霜華侵目有蜘蛛懸有酒易以醉有奚徒用妍  
醒來念功名病蟻希蜿蜒安得有園廬寬閑近林泉養魚數千頭種薤三四廛  
餘蔬皆稱此嘉果植亦然既無俗造請窮冬事高眠困貯白杭稻酒沽青銅錢  
飯過飲數杯令兒誦嘉篇仰首看赤日區區隨天旋朝見出滄海暮見入虞淵

畢竟將何窮磨滅愚與賢億億萬萬載筋骨非玉堅桐棺三寸厚在昔誰免焉  
去去欲及時嗟嗟無由緣

別三十弟彥臣

二十  
八日

朝辭都城裏暮止汴堤頭滿目非相親寂默對河流

依韻和雪竇山曇穎長老見寄

處山無獸山林鳥正關關月入潭心白花明谷口閑采薪能自至流水不知還  
聞欲觀滄海高峯峻亦攀

送余中舍監韶州錢監

孤青水中石片白蒼梧雲虞舜不可見簫韶不可聞君爲漢錢官鑿山取銅鑛  
韶石不生銅留爲千古景

七夕詠懷

織女無恥羞年年嫁牽牛牽牛苦娶婦娶婦不解留來往一夕光奕奕河漢秋  
輕傳人世巧未知何時休喜鵲頭無毛截雲駕車駟老鴉少斟酌死欲同造舟

明月不到曉是夜曲如鉤天意與物理注錯將何求嘗聞阮家兒犢鼻竹竿頭  
人生自有分豈媿曝衣樓

送弟禹臣

王都寓居樹陰少惟有牆隅兩株棗去年相見棗花開今年相別棗實好棗實  
未剝風莫吹我鬢愁多似蓬葆淮南到時何所逢秋葉蕭蕭蟹應老憶昔共歸  
江上初對飲蘆洲月如縞半夜魚跳鏡破光萬事騰然何足道自此重經二十  
秋不改青青岸旁草

送叔昭上人附施屯田歸宣城

餅巾過江去遠託故人船惜問風濤勢何如杯度年

山茶花樹子贈李廷老

南國有嘉樹花若赤玉杯曾無冬春改常冒霰雪開客從天目來移比瓊與瑰  
贈我居大梁蓬門方塵埃舉武尙有礙何地可以栽每游平棘侯大第夾青槐  
朱欄植奇卉磨碧爲壅臺於此豈不宜亟致勿徘徊將看榮茂時莫嗤寒園梅

送吳照鄰都官通判成都

君家婦何賢捨舟具車轂五年夢在梁三年行向蜀迢遞今日同辛勤昔時獨看花久莫留買錦慰不足歸來兒女大婚嫁應相續

依韻和原甫昭君辭

武帝常勒兵北登單于臺始欲以威伏竟亦慚懷來徒令出塞師萬里求龍媒未弭後世患玉顏困黃埃丹青不足恨謀慮少徘徊月如漢宮見心向胡地摧在昔李少卿聽笳動悲哀壯士尙如此蛾眉安得開情語旣不通豈止腸九回初冬誠難保死不如草萊

再依韻

一嫁異域去不復臨鏡臺念昔辭家時豈爲單于來適遐固亦命配醜非由媒始欲並日月今嗟隨風埃僕侍共慘戚山川空徘徊鴻鴈爲之悲肝腸爲之摧寧聞琵琶樂但聞琵琶哀休言羊酪甘誰喜氈廬開故國萬餘里此生那得回乃知女子薄莫比原上萊

飲劉原甫舍人家同江鄰幾陳和叔學士觀白鷗孔雀鳧鼎周亞夫印  
鈿玉寶赫連勃勃龍雀刀

主人鳳皇池二客天祿閣共來東軒飲高論雜談諛南籠養白鷗北籠養孔雀  
素質水紋織翠毛金縷薄大誇鳧柄鼎不比龍頭杓玉印傳條侯字辯亞與惡  
鈿劍刻辟邪符寶殊制作末觀赫連刀龍雀鑄鑲鏗每出一物玩必勸衆賓酌  
又令三雲髻行酒何倬約固非世俗懽自得閱古樂聖賢泯泯去安有不死藥  
竟知不免此烏用彊檢縛開目卽是今轉日已成昨歸時見月上酒醒見月落  
恍然如夢寐前語誠不錯

次韻和永叔退朝馬上見寄兼呈子華原甫

公歸初退內朝班馳道南頭躍錦鞍欲雨浮雲猶復暗背陰殘雪愈生寒穿槐  
已覺春禽語載酒重思結客懽吟寄侍臣知有意翠鬟爭唱口應乾

劉涇州以所得李士衡觀察家號蟾蜍硯其下刻云天寶八年冬端州  
刺史李元德靈卵石造示劉原甫原甫方與予飲辨云天寶稱載此稱

年僞也遂作詩予與江鄰幾諸君和之

硯如剗蟆腹如月又若剖瓢萌彊發鐫題天寶年造之刺史李元傳自越剗蟆

剖瓢我莫分稱載作年初辨君君雖能辨猶曰寶

原甫詩云李侯寶硯劉侯得

寶茲僞物吾

何云仰天大笑飲君酒硯真硯僞休開口願封漆匣還與侯請共江翁獨持守

江詩云劉侯寶此處勿忘慎勿將心逐名轉

### 送劉勳秘校赴婺源

雲木蔥蘢處雞鳴古縣城山高地多險源近水偏清斫漆資商貨栽茶雜賦征  
案頭龍尾硯切莫苦求精

### 送閩中李郎中知磁州

簫管梁王臺風雪邯鄲道君行守趙城我向夷門老持麾邦寄重歌袴民欣早  
重岡古獵場驚兔離衰草

### 次韻和王景彝十四日冒雪晚歸

子猷多興憐飛雪向晚歸時又見飄拂馬隨人如著莫舞風吹面亦勝消閉門

珍做宋版印  
我作袁安睡呵筆君爲謝客謠記取明朝朝謁去毳裘重戴冷寥寥

和王景彝晚逢赴江鄰幾飲

殘雪晚生寒良朋邀我飲逢君三省歸交轡一相審乘興興未盡既杯杯太甚  
夜闌踏月迴火冷人已寢

次韻和吳沖卿傷何濟川

生愛虛名苦辯亡淪精竭智可哀傷誰將事附三公傳自有文誇古戰場墳土  
未乾還卜穴挽聲纔絕又新章是非從此方應定弟子猶爭左氏長

次韻景彝赴省宿馬上

烏紗帽底青眸轉朱雀街頭玉轡搖燈火高樓吹短笛簾籠斜巷隘初宵身歸  
蘭省唯看月心在天津欲倚橋枕上夜深應不寐羨他年少酒微消

送李獻甫

覽君南來詩如對江上景今忽告我歸東風生馬頸馬行日幾里到家梅萼遲  
重登石頭城爲我一引領

送周諫議知襄陽

藹藹荊州幾萬家  
竟持壺酒望高牙  
兒尙唱銅鞮曲  
耆舊爭隨畫鹿車  
雄鴨綠頭看漢水  
肥鰻縮項出漁查  
鄉人應笑張平子  
只有歸田賦可誇

依韻和原甫廳壁錢諫議畫蟹

諫議吳王孫  
特畫水物具  
至今圖寫名  
不減南朝顧  
濃澹一以墨  
聲殼自有度  
意將輕蔡謨  
殆被螯基誤

宛陵先生文集卷第十八

宛陵先生文集卷第十九

次韻和酬裴寺丞喜子脩書

唐宋典冊竟駢羅漢詔重令與削磨古聖規模猶可法衆賢馳騁必無蹉旣除  
太史來爲尹遂用非才往補訛代匠只憂傷手甚君宜憐我不違他

送趙虞部士宏知蜀州

春風跨臘至雪作胡蝶飛偏知蜀太守撩亂撲行衣何當海棠下歌管紅袖圍  
一飲一斗酒決訟如發機洛陽花自好聽從杜鵑歸

月蝕

有婢上堂來白我事可驚天如青玻璃月若黑水精時當十分圓只見一寸明  
主婦煎餅去小兒敲鏡聲此雖淺近意乃重補救情夜深桂兔出衆星隨西傾  
次韻和酬刁景純春雪戲意

雪與春歸落歲前曉開庭樹有餘妍楊花撲撲白漫地蛺蝶紛紛飛滿天胡馬  
嘶風思塞草吳牛喘月困沙田我貧始覺今朝富大片如錢不解穿

次韻和楊樂道待制詠雪

梁苑孝王跡灞陵遊客心牧羊來海上泛櫂向山陰興賞曾何淺羈棲亦以深  
穆歌猶在竹郢曲自傳琴旗凍霑天仗槍寒拂羽林且爲豐歲慶休作苦寒吟  
掩帙都忘慮焚香靜擁衾晴明一登閣暮色徧高岑

次韻和景彝閏臘二十五日省宿

君嘗編史似吳兢又直甘泉馬踏冰重臘雪花方漫漫宿廳書架自層層案頭  
美酒初溫火簾底微風欲動燈永夜未眠鐘已發此心閑寂是高僧

姪宰與外生蔡駟下第東歸

事莫必有勝必勝難可持邇來罕相見世上多誇馳黃金鑄佩印白玉刻佩龜  
朝見恃赫赫夕見同蚩蚩方得靡不羨旣處焉所施此理非一日更後當應知  
志士無終窮斯言非爾欺

次韻和永叔

省樹高槐雪壓條沉沉古屋蔽疏寮每嗟守印如枯木欲棄明珠學緯蕭漸老

但知貧賤樂向來徒用歲時銷新年不管魚龍躍安得乘風入剡樵

次韻和范景仁舍人對雪

三尺沒腰雪京華頻歲無高低相掩覆竅隙似封糊帖缺都迷醜增妍不問枯  
因時混貧富遇物得圓觚眩目曾何數流風不可圖冥冥山霧合浩浩海雲鋪  
未覺花飛葉先看霰集珠落機裁扇素獵野割膚腴粲爾娥奔月皤然叟赴醕  
薄才今揣稱少巧媿非夫

嘉祐己亥歲旦呈永叔內翰

階前去年雪鏡裏舊時人不覺應銷盡相看只似新屠酥先尙幼綵勝又宜春  
獨愛開封尹鍾陵請去頻

次韻和吳沖卿歲暮有懷

舊曆卷將盡慨然增永懷唯希步兵醉莫作太常齋孟浪從人笑疎愚共世乖  
定知當汨沒名不與功偕

次韻和沖卿元日

天心欲銷變元會罷來朝新歲起今日舊年猶昨宵凍雲低覆闕殘雪稍封條  
又聽驅儼鼓羣邪不可饒

次韻和景仁對雪

北風吹雪至浩蕩地疑無奕奕將如舞漫漫欲似糊沙場行不盡銀漢落應枯  
興發詩千首豪吞酒百觚山川容可改圭璧巧能圖花竟因酥點砧爭以練鋪  
未煇調鼎鵠全混蔽旒珠懷昔餐衣絮誰今食黍腴善歌知寡和醲飲遂成醕  
衆筆排堅陣多多困老夫

次韻三和景仁對雪

北度龍沙遠南來狗犬無玉階三尺峻粉壁萬重糊獸餒行迷穴禽寒立竝枯  
長川平界限大屋竦稜觚稍見蓬萊闕初張雲霧圖受降鍪甲積罷獵羽毛鋪  
被褐思懷寶游都學賣珠車皆陳蓋轡人盡得瓊腴縞已贈吳札席將開漢醕  
鳳池批詔手特地逞工夫

次韻和永叔新歲書事見寄

尖風細細欲穿簾殘雪微銷凍結檐  
裏醇醪無限滿鏡中白髮不知添  
妍童喜舞開羅幕小吏愁漸入硯  
蟾幸得從公持直筆定應無復歎  
齋鹽

送辛都官

終有知鄂州

夜上大梁雪門前武昌車使君行  
有期將逢烏隼旗車動自轆轤旗  
輕自舒舒去都越千里城在江上  
居黃鶴有高樓樓頭挂蟾蜍下見  
鸚鵡洲葭茁可以蒞爲弔襴處士  
沉蹤異三閭憶昔我仲父五馬來  
峙躡願君訪舊跡因報入行書

次韻王景彝正月十六夜省宿過景靈街

宮街不閉東城月圓影纔虧夜色  
春自躍金羈來宿省從他錦帳欲  
誇人燈光遠近疑爭晝歌韻高低  
競起塵我老都無游樂意似君清  
枕睡侵晨

送韓玉汝太傅知洋州三首

函關見殘雪襄谷聞春禽禽響通  
朱輪馬嘶入青林花明亂石路雲  
抱寒泉岑天外漢江來城下漁網  
沉庖供縮項編坐使宮娥斟農桑  
不須教古俗自通今渭入秦宮古  
襄分蜀道難泉聲春雨後月色曉  
程寒蠶浴桑牙短禽啼杏萼丹

從來稱邵杜民俗在君安

春風東來幾萬里相送入關如有情灞陵原邊柳條暗咸陽橋畔桃花明自古  
恨別此兩處十千美酒琉璃傾日落未落車馬動子規滴血壯士驚行哉使君  
負膽氣蜀道雖險心常輕是時門前大桐樹爛漫紫萼啼流鶯弟兄同懷不可  
見應亦夢覺嗟遠程太白山前一尺雨桑下問蠶田問耕郡城夜開百姓喜喜  
從迢遞壺漿迎

李廷老祠部寄荆柑子

踏雪衝風馳小吏帶霜連葉寄黃柑  
擗包欲咀牙全動舉瓊逢衰酒易酣  
書尾自題知遠意筆頭親答馱多談  
故人莫覓新詩卷都似嵇康七不堪

韻語答永叔內翰

世人作肥字正如論饅頭厚皮雖然佳俗物已可羞  
字法歎中絕今將五十秋  
近日稍稍貴追蹤慕前流  
曾未三數人得與古昔儔  
古人皆能書獨其賢者留  
後世不推此但務於書求  
不知前日工隨紙泯已休  
顏書苟不佳世豈不寶收

設如楊凝式言且直節脩又若李廷中清慎實罕侔乃知愛其書兼取爲人優  
豈書能存久賢哲人焉度非賢必能此惟賢乃爲尤其餘皆泯泯死去同馬牛  
大尹歐陽公昨日喜疾瘳信筆寫此語謂可忘病憂黃昏走小校寄我東郭陬  
綴之輒成篇聊以助吟謳

次韻和韓子華內翰於李右丞家移紅薇子種學士院

紅薇花樹小扶疎春種秋芳賞愛餘丞相舊園移帶土侍臣清暑看臨除薄膚  
痒不勝輕爪嫩幹生宜近禁廬此地結根千萬歲聯華榮莫比茅茹

次韻和吳長文舍人卽事見寄

莫問春風有後先但逢佳處去揚鞭桃花洞遠迷應久杏樹壇荒迹自傳放與  
饒寒能幾許卽看芳意不多偏古來閑氣爭強弱謾費黃金拋楚權

次韻和長文社日禳祀出城

曉出春風已擺條應逢社伯馬蹄驕壇邊宿雨微霑麥水上殘冰壅過橋燕子  
飛來依約近鴈行歸去試教調北扉西掖多才思相與飄飄在沝寥

次韻和長文襟祀郊外見寄并呈韓子華

鶉鴝知雨在桑中雄逐雌飛自不同胡粉未生輕蝶白燕脂先綻野櫻紅高高  
樹裏鞦韆月獵獵牆頭蓓蕾風曉下祠壇多寄詠衣冠方侍大明宮

送馬行之都官

昭亭山下送君時不畏西行劍棧危竿馬跨來身更健吳船乘去計非遲錢塘  
湖上尋雲屋巾子峯前種槿籬此趣已高天下士不須功業似鴟夷

和王景彝詠薜荔

植物有薜荔足物有蜥蜴固知不同類亦各善緣壁根隨枝蔓生葉侵苔蘚碧  
後凋雖可嘉勁挺異松柏

和江鄰幾省中賞小桃

年年二月賣花天唯有小桃偏占先初見嫩紅無不喜終知俗豔幾多妍鄰翁  
已折郊園裏貴客爭誇粉署邊可惜工夫吟向此會須留醉牡丹前

長歌行

世人何惡死死必勝於生勞勞塵土中役役歲月更大寒求以暎大暑求以清  
維餒求以饑維渴求以飭其少慾所惑其老病所嬰富貴拘法律貧賤畏笞榜  
生既若此苦死當一切平釋子外形骸道士完髓精二皆趨死徒足以見其情  
遺形得極樂昇仙上王京是乃等爲死安有蛻骨輕日中不見影陽魂與鬼并  
莊周謂之息漏泄理甚明仲尼曰焉知不使人道傾此論吾得之曷要世間行  
依韻和長文紫微春雨二首

年年潑火雨苦作清明寒梨花猶半綻塘水已迷漫愁看日更永冷漏夜未闌  
酒沫起玉瓊燭淚生銅盤春衣向來脫帶眼斗覺寬試問彼侯少何處跨金鞍  
春雨固多喜雖多安得愁既能勒花苞又解滋耕疇池添痕痕漲渠有細細流  
不同離婦怨一落不可收定知矜有年豈似斗粟賙西掖吳夫子吟觀意遲留  
正聲濟雅頌高論等陽秋我慚才甚薄難繼東山謳

送滕寺丞歸蘇州

驅車入蜀時有弟母不往留婦侍母傍以子囑婦養昨得閩門書婦子死泉壤

此心那得安弃官提轡鞅東馳三千里鬻馬求吳漿吳漿速如飛歸來拜堂上  
堂前去時樹已覺枝條長豈無懷抱感爲壽酌春醴

次韻和酬永叔

春候倏已和林上鳴鳥譁前日是清明驟雨露梨花初聞結客游愛此物景嘉  
歌舞未終宴夕暮各興嗟所嗟歸路暗嘶馬自知家公家八九姝鬢髮如盤鴉  
朱脣白玉膚參年始破瓜幾日苦霖霖當道跳魚鰕閉門飲濁醪鞅韉繫樹丫  
羣姝莫要劇爲公歌啞啞公當是日醉歡適不可涯孔氏有高第內自戰紛華  
我公豈其然秉直異蓬麻果效歸田去願從招轅車

次韻和江鄰幾送客回同過金明池二首

送別西亭車馬塵天池回傍欲迷津畫船龍尾何時發丹杏梢頭漏泄春  
風光猶未老於人獸口泉聲瀉碧津一洗塵襟無俗慮柳條開眼共看春

宛陵先生文集卷第二十

次韻和劉原甫紫微過子飲酒

所居汴水近未有鼓吹蛙昨日春雨晴車騎臨我家我家苦僻遠庭下無泥沙  
爲撇甕面醅爲煎鷹爪茶乳羹芼紫莼蜜果釘乾瓜與我相對飲但恨諸友遐  
笑語雖同昔放浪不少加忽觀壁間字坐歎目昏花公壯尙若此我老死豈賒  
門前賣桃李呼買婀娜華東檐大槐樹上有烏雀譁恃舊無猜嫌醉弁已傾斜  
將去還見規禮數何檢差後從江韓來褫帶歡莫涯

送湯延賞秀才下第歸

參差綠柳上撩亂黃鸞飛失意暫時屈獨嗟千里歸淮船行欲駛江魴去應肥  
謝朓吾鄉守欣欣見綵衣

送門人歐陽秀才游江西

客心如萌芽忽與春風動又隨落花飛去作西江夢我家無梧桐安可久留鳳  
鳳巢在桂林烏哺不得共無忘桂枝榮舉酒一以送

答來上人春日卽事

南國三衣客王城一見春花明馳道遠雨漲御溝新茗憶山中物雲懷嶺上鄰  
如何異鄉感却出解空人

送楊申職方通判信州

從來饒信吏愛寶襲侈越莫買冰玉盤蒼山斲明月明月有時生窮巖有時竭  
君常抱清節歷職老無闕與我年齒同獨未變華髮又爲江外行畫舸羨明發  
送勾諶太丞通判潁州

潁川倒灣流欄船曲轉鉤吏迎如太守民望亞諸侯芳圃深通野寒湖半抱州  
前賢多舊迹佳詠聽君留

和永叔六篇

并序

嘉祐四年春御試進士翰林學士歐陽永叔韓子華集賢校理江鄰幾同爲詳  
定官有詩六篇出而使子和焉

詳定幕次呈同舍

苑樹天邊雨露勻羣公偷看錦叢新眼穿欲折無由折賞到人間不是春

代鳩婦言

不如作繭依蠶族以絲自裹還自足與爾爲婦過一生怒卽分飛同轉目辛勤  
哺雛寄鵲巢子母生離因爾逐羽毛曾未顏色衰飲啄不計豐儉時天陰輒遣  
呼輒歸恩情紙薄誰信之朝爲夫婦夕行路世間反覆那能知伋妻白母非美  
事後代仿此誠堪悲

看花呈子華內翰

時不選數老獨嗟鬢毛未變目未花愛公深殿見桃李長才高詠無能加紅英  
灼灼弄日色穠豔皎皎生鉛華長廊垂幕風不動映柳黃鶯吟未涯燕銜新泥  
補巢缺蝸壓峻陞臨角斜是時唯聞烏雀鬧盡日不聽車輪譁雖傳此景無分  
到但訝習慣猶豪誇他年造物倘有意不使齷齪居貧家

禁中鞞紅牡丹

洛中花  
之奇者

與公同是洛陽客今日論年皆作翁一見此花知有感衰顏不似舊時紅

和鄰幾學士桃花

深殿有春人到稀武陵雖說味當時躊躇莫憶人間世恐至塵中悔却遲

啼鳥

提胡蘆提胡蘆爾莫勸翁沽美酒公多金錢賜醇酎名聲壓時爲不朽百舌子  
百舌子春泥方滑滑泥雖滑滑螿道平莫學竹雞言易發深宮許爾來報春便  
是好鳥同其羣清聲轉入君王耳安用穿叢苦避人桃李無言何所益畢竟有  
謝須紛紛莫以榮華長不歇人間已見翟公門安不忘危誰可貴貴時能憶困  
時聞

縉叔以詩遺酒次其韻

雜言

君嘗謂我性嗜酒又復謂我耽於詩一日不飲情頗惡一日不吟無所爲酒能  
銷憂忘富貴詩欲主盟張鼓旗百觚孔聖不可擬白眼步兵吾久師君多賜壺  
能以遺向口滿盃傾玻璃醇釀甘滑泛綠蟻從此便醉醒無期旣以樂吾真亦  
以泰吾身莫問今人與古人

和范景仁王景彝殿中雜題三十八首並次韻

殿幕閑興

宮殿深沉處鶯花爛熳時  
關關呖清吭萋萋發朱蕤  
天上春應早人間日轉遲  
得賢如漢盛五字變周詩

游延義閣後藥欄

授經聞漢帝嘗此講秦餘  
一日承丹詔同時見子虛  
來游瓊閣外閑傍藥欄初  
柳絮輕黏履薇條澀惹裾  
解歸巢上燕思寄袖中書  
此鳥如矜慎飛飛與客疎

龍柏

花非龍香葉非柏獨竊二美  
誇芳蕤苦練不分顏色  
近紫荆未甘開謝遲  
羣公莫以得地貴竟費佳句何足思

延義閣牡丹

花中第一品天上見應難  
近署多紅藥層城有射干  
生雖由地勢開不許人看  
天子何時賞宮娥捧玉盤

奉呈諸君

參天朱閣峻拂地柳條垂太液綠波漲建章春漏遲長人執兵立小豎插花嬉  
但只逢人說無由預此時

細竹

森森漢宮竹託本異孤生玉砌緣根迸朱欄與筍平朝煙生密翠晚影漏斜明  
應待女媧采參差鳳瑁清

夜賦

月從東殿生叢竹照脩竦葉間清露滴枝上寒禽動閑覺萬慮空靜聞嚴鼓重  
官燭翦更明相看應似夢

三月九日迎駕

前殿臨朝百辟回後宮庭閣九重開鳴梢已自金階出黃屋初迎玉輦來不問  
偷桃方朔飽誰知載戟子雲才羣官望幸無名姓只有窮吟許外陪

浹日

光陰天上早氣候日邊溫  
懸螿時過眼飛蟲稍入軒  
看花成子大聞燕養雛喧  
每覺瑤池宴風飄管吹繁

宮槐

漢家宮殿蔭長槐嫩色蔥蔥不染埃  
天仗龍旂穿影去鈎陳豹尾拂枝來  
青蟲挂後蜂銜子素月生時桂並栽  
我意方同杜工部冷淘唯喜葉新開

有折景福殿後醅醖花至者

有鳥銜花出清香不畏風  
初從上林發來過未央  
中簇簇霜苞密層層玉葉同  
誰將作美酒醉看月生東

詩癖

人間詩癖勝錢癖搜索肝脾過幾春  
囊橐無嫌貧似舊風騷有喜句多新  
但將苦意摩層宙莫計終窮涉暮津  
試看一生銅臭者羨他登第亦何煩

石詠

君王愛石醜百孔皆相通怪狀一如此  
補天有何功匪言不可轉安得來宮中

女豈比柱礎瑩然受磨礪

逾旬

重說已經旬應懷獨寢人通宵彈玉枕白晝拂牀塵幾想迎雕輦何當快倦身  
門前車馬立疑是角生輪

晨起

月向西樓下天光候日開殘星明寶鑑百舌響宮槐玉井傳新汲金爐換宿灰  
黃門馳有詔唱第許卿來

金沙花

金有披沙得花應不可多栽培由地力豔色與天和玉座君王賞朱欄將相羅  
稱觴千萬壽繁葉奈香何

賜食

誰言出相是山東今日求賢欲致功玉饌滿盤來禁裏鵠羹分鼎下天中但知  
愷悌酬君賜舊訝權輿向國風曾笑侏儒飽欲死宜思薇蕨不忘忠

賜酒

時頒光祿酒花出漢宮牆湛露承天渥流霞落羽觴近親龍尾道遠襲雀頭香  
灑殿人誰見終知曼倩狂

賜書

善經  
二字

選來金殿盡英豪帝筆親承始是遭就裏少年唯賈誼其間蜀客乃王褒善經  
有意尊儒甚推擇方知待士高歸付子孫傳百世深堂閑挂亦蕭騷

賜燭

天子賜燭昏夜時嫦娥閉月栽桂枝稱量高下唯妍辭相與盡心無附離求安  
去病如上池照耀不容毫髮私品藻一定何可移光燄奪晝資爾爲宣王徒美  
庭燎詩魏帝自徹月殿披我朝好士萬古垂搜索賢俊登蒿藜孰不力吐肝膽  
脾枉用宴飲生脛脂雲龍將見升駸駸燃此必欲無所遺收殘喜氣如蒸炊蜜  
蜂慚媿空多知

賜果

前日宮醪賜玉樽今朝持果小黃門乾桃熏李非時物置案盈盤不次恩投以赤心思武帝握同文璧詠劉琨嘗聞食奠陳王業知是豳公幾世孫

檜詠

文章老重欲追古便作帝宮蒼檜詩青蔥玉樹傳楊子盤屈洪桃見左思龍鱗已愛松身直珠寶還看柏葉垂秀木豔叢那可擬但將霜雪定堅姿

柳絮

陶令生涯漉酒巾門前種柳萬條新花今吹作蓬萊雪曲舊得於關塞人應與殘英閑是伴不隨舞蝶去爭春可憐輕質都無定一落銀河莫問津

殿後書事

天子尋常幸直廬裏頭宮女捧雕輿紅泥已賜春醅酒黃帕曾經御覽書林果鳥應銜去後燕窠蟲有落來餘禁中事事能傳詠播在人間不是虛

雨夜

電光初照樹峨峨葉上微風與雨和玉腕愁聞無處奈庭花暗落不應多長楊

靜響千重瓦太液寒生幾寸波洗濯青春如有意平明濕羽未離柯

景福殿水

宮井蛟龍天矯垂曉餅初汲喝禽窺清泠已向金盆貯甘滑還從玉椀知九醞  
酒醇由此得小團茶味爲留遲閣門地脈應相似翰苑曾邀詠昔詩

歐陽永叔會邀子賦

閣明水

雨後

新晴殿閣曉初日霧煙中柳重宮腰弱花肥粉頰豐渥恩君自厚藜藿我纔充  
草木欣欣發誰知造化功

象戲

象戲本從棋局爭後宮龜背等人情今聞儒者飽無事亦學婦人閑鬪明堂上  
有奇誰可勝樽中賭酒令方行直驅猛獸如尋邑何似昇平不用兵

再觀牡丹

聞說偷觀近玉欄腸如車轂轉千盤無人憶著洛陽日走馬魏王隄上看

白牡丹

白雲堆裏紫霞心不與姚黃色鬪深閑伴春風有時歇豈能長在玉階陰

紫牡丹

葉底風吹紫錦囊宮爐應近更添香試看沉色濃如潑不媿逢君翰墨場

七寶茶

七物甘香雜蕊茶浮花泛綠亂於霞啜之始覺君恩重休作尋常一等誇

庖煙

冪歷庖煙出綵油欲通雲霧未能周濕薪燒盡日亭午試問霏霏何處浮

省中

漢相家人尙苦疑不言溫室樹何枝君今坦坦無猜忌夸說皇居盡入詩

天上

紫微垣裏月光飛玉佩腰間正陸離天上去來知幾日蟠桃結子是歸時

明月

明月已生城上頭  
小星光滅大星流  
來朝放榜出宮去  
何處殘花轉入溝

再賦

誰人重詠大刀頭  
只願長明不願流  
縱使西傾必東出  
寧同寒水瀉宮溝

殿中柳絮

玉几當中寶作牀  
無端絮惹御袍香  
羣公唱第魚龍化  
列侍金階若堵牆

宛陵先生文集卷第二十



宛陵先生文集卷第二十一

次韻景彝春宴

法座初瞻戶牖間，袞衣垂處見雲山。  
滿斟玉酒傳宣盡，齊插宮花拜賜閑。  
紅線織成庭下毯，明珠結出耳中環。  
鬪雞旗底逢逢鼓，逐勝爭名利害關。

次韻景彝三月十六日范景仁家同飲還省宿

種桃依竹似仙家，邀對春風共泛霞。  
席上未觀雙舞鳳，城頭已覺聚啼鴉。  
恩恩跨馬人歸省，冪冪生煙樹斂花。  
穉子候門知我醉，東方明月照扉斜。

次韻永叔試諸葛高筆戲書

公負天下才，用心如用筆。  
端勁隨意行，曾無一畫失。  
因看落紙字，大小得疎密。  
筆工諸葛高，海內稱第一。  
頻年值我來，我媿不堪七。  
安能事墨研，欲效前人述。  
嬾性真愁康，閑坐喜捫蝨。  
是以持獻公，不使物受屈。  
果然公愛之，奇蹤寫名實。  
豈惟播今時，當亦傳異日。  
嗟哉試筆詩，藏不容人乞。

唐書局後叢莽中得芸香一本

有芸如苜蓿生在蓬藿中草盛芸不長馥烈隨微風我來偶見之乃穉彼翳蒙  
上當百雉城南接文昌宮借問此何地刪脩多鉅公天喜書將成不欲有蠹蟲  
是產茲弱本積爾發荒叢黃花三四穗結實植無窮豈料鳳閣人偏憐葵葉紅

嘲景彝獨  
愛葵花美

嘲江翁還接羅

江簡云嘗憶張籍詩有恐傍  
人偷剪樣尋常懶戴出書堂

何言恐偷樣自是君婦嬾五日縫一巾猶道苦未晚

次韻景彝閣後紫薇花盛開

禁中五月紫薇樹閣後近聞都著花薄薄嫩膚搔鳥爪離離碎葉翦晨霞鳳皇  
浴去池波響鳩鵲陰來日影斜六十無名空執筆顛毛應笑映簪華

送李太伯歸建昌

推天以知命自古豈不然桓魋及臧倉嘗毀聖與賢後人何蹈之其事實好還  
君居麻源谷學禮如鄭玄聲名久已大籍籍四海傳昨因丞相舉便謂升雲煙  
竭來太學館食貧向三年忽懷粉榆下歸思獨絲絲得告許暫往落莫求楚船

捋髯滄江上仰看飢飛鳶誰識鷓鴣志閑誦莊叟篇喜問里中兒重到舊林泉  
洗蕩俗塵垢焚裂跨馬韉不向世路去徒取愁腸煎雞豚粗可養禾黍亦足田  
不慚莎衣蟲以葉自包纏及其飽滿時曷異冠貂蟬君意我彊寫雖慕何由緣

送林大年殿丞登第倅和州

和靖先生負美才族孫今似漢庭枚敗亡項籍江邊廟應媿文場戰勝來

王知章尉河內

古縣太行下老槐三四株以言新作吏不似舊爲儒黃綬心猶壯青雲志豈無  
漢朝吾遠祖不道此官麤

送祖擇之赴陝府

古來分陝重猶有召公棠此樹且能久後人宜不忘君從金馬去郡在鐵牛旁  
山色臨關險河聲出地長樽無空美酒魚必薦嘉魴天子憂民切行當務勸桑  
中伏日永叔遺冰

日色若炎火正當三伏時盤冰賜近臣絡繹中使馳瑩澈宵水玉凜氣侵人肌

近日多故友分貺能者誰信都顧貧賤物物義不遺念我老且病赤瘳生枯皮  
巨塊置我前凝結造化移畏冷不敢食有類夏蟲宜雖然已快意何必咀嚼爲  
天子厚於公不使熾毒欺公亦厚於我將恐煎熬隨我有舐犢愛自憐小子龜

次韻和永叔贈別擇之赴陝郊

古人相送贈以言今人相送舉以酒酒行殷勤意豈疎酒罷躊躇悲更有行當  
何之來者誰陝府兵吏爭迎走壺漿往往過函關翰林惜別方攜手自言老大  
遇知難願得公詩爲不朽公因索筆作長謠落落寓言誠十九我慚竹管廁宮  
懸縱合律度應非偶太守西行已不貧忽獲明珠盈大斗歸立螭頭未是遲暫  
向棠陰問遺叟

送施緯秀才下第

君嘗老於敵輕彼羣兒嬉堅銳不可恃屢北還自疲胸中多奇秘既衄何所爲  
東走滄海上夏果采荔枝奉親樂無涯豈媿祿仕遲

送張山甫武功簿

洛陽舊交有七人五人已爲泉下塵各家生兒爲門戶唯子弟兄先立身我與  
信都侯獨在喜見及祿知天仁昨日聞補武功吏氣調欲與南山親少年勉力  
向職事莫學老貪文字新

送微上人歸省天台

釋子懷慈母吾儒未易輕不尋琪樹去肯向石橋行海近雲多潤山高日少晴  
天恩新賜服書字欲傳名

寄天台梵才上人

常觀月從東方出想照石橋旁畔人試問當年與今日清光不改只如新

送李信臣尉節縣先歸湖州

梁王吹臺側五月多荷花荷開對翹鷺吳客還思家家在水中城四面如鋪霞  
焉能長相守千里獨起嗟補官東海上物景莫言賒

送王巡檢之定海

休淬鸞鷲劍休調鵠血弓平時自壯大何所立戰功得兵不滿百防寇滄海東

駕船如飛鷲出入巨浪中苟能勇於此遇敵無廢忠

同梅二十五飲永叔家觀所鈔集近事劉敞

陶令一畝宅尤愛北窗風心遠地誠僻客來樽不空觀書太史氏全性市門翁  
予亦何爲者於此清賞同

來上人歸宣城兼簡太守孫學士

李白不厭昭亭山看盡飛鳥雲獨閑我今相送一懷想想在謝公窗戶間

始作燕子巾

裹髻不裹額自名燕子巾翼覆尾涎涎誰問巢由人

謹賦

避暑就高臺不如就賢人賢人若冰雪論道通鬼神自言信手書字字事有因  
往往得遺逸烜赫見名臣是日劉夫子拍手氣益振重覩太史公吾徒幸來親  
大笑舉玉杯陶然任天真內樂不復熱豈以身爲身

送侯孝傑殿丞僉判潞州

同在洛陽時交游盡豪傑倏忽三十年浮沈漸磨滅唯餘一二人或位冠夔臯  
我今存若亡似竹空有節人皆欲吹置老硬不可截君自緱山來別我不畏熱  
言作潞從事家貧祿仕切六月上太行辛勤非計拙天當氣候涼清風自騷屑  
雖云數日勞斗與炎蒸絕君本公王孫才行實脩潔鏘鏘發英聲瑩瑩如佩玦  
是爲君子器終見不渝涅相逢未易期夢寐歸鼓枻

送張子野知號州先歸湖州

未赴號太守暫歸吳興家吳興近洞庭橘林正吹花君當橘柚時摘包帶霜華  
清甘不楚齒若酒傾殘霞谿山小女兒姹姹兩髮丫裊裊上氍毹嘈嘈弄琵琶  
是時與之醉何似走塵沙

送尹瞻駕部監靈仙觀

天地如轉磨屑屑今古人一落大化手團品惟其新不幸積不用袞袞同埃塵  
日月行何窮過盡千萬春人生占幾許百歲猶比晨君求灞山潛捨去兩朱輪  
願效陶淵明翦紗爲破巾山前溪多鱗山下酒甚醇看雲舉大杓杓造舒州民

李白嘗愛之死生曾與均此志我亦有更將援鳥親

送朱玠戶曹之廣德軍

南方小兒纔讀書往往得官訶路衢君今五十始作掾手板青袍非壯圖况來  
桐汭水上城折腰彊顏休歎吁城西古祠能致雨歲不有旱民無逋民樂未央  
君可娛舊俗不與吾鄉殊

次韻和永叔原甫致齋集禧

廟嚮靈祠屬二公齊心相望切朱宮綠渠繚繞墀垣水廣沼清泠漲殿風已詠  
應麟來五時仍歌翔鴈雜殊翁遙知畢事期尋勝尙問衰羸未厭窮

送王司徒定海監酒稅

悠悠信風帆杳杳向滄島商通遠國多釀過東夷少懷鄉寄書遲見日知晨早  
應聞有海花何必樹萱草

端明李侍郎挽歌三首

少年爲侍從名譽竟軒騰每吐胸中鳳寧容筆上蠅受釐延漢室被謗過周陵

今日泉宮啓師臣禮秩增

官豈不爲達其如望未充敏辭傾一代發問詘三公厭向承明直思行邵伯風  
嗟玉嗟樹折埋沒彼蒿宮

秋樹無黃鳥蟬聲亦自哀素車新隴去白馬舊賓來薤上朝陽露池中歲劫灰  
短長何足較嗣子有高才

次韻和永叔夜聞風聲有感

月落夜正黑風起庭槐端窗間星動搖枕上人寤歎所歎吹陰雲苦熱彌不歡  
當其氣莫出曷若無衣寒虛堂臥竹簟汗體如露溥驅蚊爇蒿艾寧復襲芝蘭  
煎灼一如此衰枯誰可完消磨任寒暑安有不死丹三伏已過二炎赫應漸殘  
試看蜨螟蟲辛勤方轉丸焉得從釣舟逆上巖子湍此事人所易謝榮爲獨難  
誰顧萬古名黑石持鐫刊風聲不用撼牀頭閑素紈

次韻和永叔石枕與笛竹簟

溪上枕剖龍卵石斲匠篔簹製蛇皮紋客從東方一持贈竹色蒸青石抱雲磨沙

斲骨自含潤飽霜弔節無留塵京師貴豪空有力六月耐此炎蒸劇旱風赤日  
吹熱來大廈高檐任雕飾頭顱汗匝無富貧雖有頒冰論官職官高職重冰則  
多日永冰消難更得唯公掃室施枕簟迎涼自感東方客東方客應非俗昏能  
使賢人心體適賢人何以偏伏人天下才名方赫赫我吟困窮不可聽晝夜蚊  
蚋蒼蠅聲蠅如遠雞耳初感蚊若隱雷空際鳴葛廚頂綻屋蝎墮菅席中裂麻  
經橫平生賦分只煎炒安有祿玉琉璃清猶勝昔年杜子美老走耒陽牛飢死  
因思楊惲廢時言但願人生行樂爾公今事業在朝廷去就尤當慎終始待公  
睡足秋風來去奉高談揮麈尾

寄題朱表臣職方真州新園

青蔥江上樹杳藹宮前道道側有新園園中無惡草松隴方在望茅屋聞已考  
朝廷正急才何得言歸老

次韻和原甫閣下午寢晚歸見示

殿閣風來夏日長青林抽嫩見餘芳筆供五吏詞休敏簟展雙紋睡正涼故事

早歸何獨晚舊交新詠尙無忘不言偃仰中園樂還愛眉間喜色黃

三十二弟寺丞歸宣城因寄太守孫學士

謝公下車日郡內一登望昭亭山蒼蒼寒溪水漾漾句清宛微渾三洲分細浪  
小艇下灘來羣鷗舞潭上借問鷗何若水深魚莫向鷗餒猶識機魚樂不忘餉  
子去見太守於我必有訪但寄此薄言樽前爲之唱

送刁景純學士赴越州

會稽迎太守舟屋畫粉牘前舟載圖書後舟載女樂月出鏡湖心長笛使孤作  
還見漁者來曾令李謨愕吹裂比竹管士果不可度二分學宮裝豔色鬪京洛  
嘗聞有西子菡萏不相若得郡考故跡精絕古所作慎莫爲俗牽乘閑數斟酌

送宋郎中知商州

孝孫

商於六百里太守二千石地廣任亦重車建旗仍赤嘗聞四老人采芝留舊跡  
古廟藏空山曾無漢羽翼其事有圖畫家傳多典籍願君爲政閑案覽知疇昔  
六月晦日定力院同原父賦送伯鎮景純樞言三學士

清秋三黃鵠舉翼東來飛鳴聲既相呼煙水亦相依蓬池不暫止太液未言歸  
酌酒望滄海飄飄思菊衣

次韻和景彝省闈宿齋二首

晝日南宮雨後涼齋嚴官重靜於常庭前鬪雀墮還起欄下秋花落自香看盡  
雲容天漏碧讀殘書帙卷披黃九衢塵土莫能到蕭瑟微風葉響廊  
新月斜光依約見夜蟬高樹有時鳴曲眉不想西家樣餒腹還思二子清迭代  
物華何足較古今榮謝豈須驚靜來應覺能閑少人事區區逐日生

送刁景純知會稽

前有朱翁子後經王右軍至今風俗美自昔誦歌聞秦望臨丹戟邪溪漱白雲  
只應絲管去驚動海鷗羣

次韻答王景彝聞余月下與內飲

仰頭看月見新鴻形影雙飛玉鑑中呼我作卿方舉酒更煩佳句賞高風

次韻和景彝對月

蕭蕭風雨變涼意索索晚雲開斗晴已洗浮埃天外靜忽生圓月樹頭明草根  
蟲月吟來久屋角星河落更清我媿西垣侍臣比景寒霜鬢兩三莖

和景彝新秋西閣獨直

池頭鳳皇寒井上梧桐老鳳寒浴已晚桐老脫亦早是時有詞臣獨直正視藁  
巖巖代王言落落奮清藻演成五色絲世作非常寶貶如市朝撻褻若華袞好  
四方號令施萬耳昏聾掃此職唯其才用居寧草草

宛陵先生文集卷第二十一



宛陵先生文集卷第二十二

次韻景彝奉慈廟孟秋攝事二十韻

闕宮初告饗駕駱已迎秋公哀惟時攝齋廬用爾休  
椒漿滋往奠鸞馭或來游  
任姒徽音繼邦家故事脩前期嚴受誓侵曉肅傳騶  
雞狗藏深戶蚊蠅響暗溝  
別祠緣相漢舊禮效宗周蕭氣接庭燎鼓聲通市樓  
樂章分廟奏牲物用毛柔  
木主升新座牙盤列庶羞叩階除劍履宿羽動梧楸  
錫胙人移俎焚辭漏晷籌  
豆籩將降陞胥史劇奔牛事畢歸烏巷陰餘晦綵油  
驅車多叱咤負擔起歌謳  
却直中書省重瞻十二旒詞供五更敏詔示四方優  
密議存王體斜封贊禹謀  
勤誠酬異等潤色闡嘉猷彊擬鄴中詠我思康樂侯

次韻和景彝秋興

日月機上梭年華東注波未驚涼葉墜已見白髮多  
牧馬歸方健調弓力漸和  
籬邊賸曉菊陶令奈貧何

司徒陳公挽詞二首

位至三公有恩加賜諡無再調金鉉鼎屢剖玉麟符已歎鸞同穴還嗟鳳少雛  
擁塗看鹵部誰爲畢三虞

公在中書日朝廷百事崇王官多不喜天子以爲忠富貴人間少恩榮歿更隆  
若非笳鼓咽寂寞奈秋風

秋思

梧桐在井上蟋蟀在牀下物情有與無節候不相假寥寥風動葉颯颯雨墮瓦  
耳聽心自靜誰是忘懷者

送葉都官赴蜀中倅

舒仲

每有人之蜀先憑問海棠徒知花底醉不報樹頭芳上馬秋風急登山古路長  
西南生片月遙想見清光

次韻荅吳長文內翰遺石器八十八件

山工日斲器殊匪事樵牧掘地取雲根剖堅如剖玉食具與果具待賓良有最  
亦將茶具并飽啜時出俗公何都贈予金多不入目我家固宜之瓦盃居漏屋

得此尤稱窮客來無不足唯應赤脚婢收拾怨常酷夏席堆青齋冬盤釘旨蓄  
竟無梁肉饌甚媿蕭家錄

送張君儀太祝僉判奉寧軍

社雨燕巢空古陂菱葉老燕去春當還菱枯秋不早莫以西風高於焉亂懷抱  
指塗無幾里駛馬一秣草彼美賢主公文章爲世寶笑談樽俎間勿負風月好

寄題陽武宰王安之慶豐亭

官爲人父母身自奉其親結宇後園中散步以怡神寒溫適所適朝夕饋爾珍  
諸孫同在傍嬉戲情各均庭下香草秀梁上乳鳥馴乳鳥名曰烏反哺豈不仁  
香草名曰蘭相襲使之紉二物已可知百里風俗淳

北州人有致達頭魚于永叔者素未聞其名蓋海魚也分以爲遺聊知  
異物耳因感而成詠

孰云北海魚乃與東溟異適聞達頭乾偶得書尾寄枯鱗冒輕雪登俎爲厚味  
向來昧知名漁官疑竊位有如臧文仲不與柳下惠從茲入杯盤應莫慙鮑肆

送柳祕丞大名知錄瑾

言今魏都去聽我願少休地息戎馬牧民苦黃河流渾渾發西極奮奮入九州  
自古患決溢于今爲瘡疣禹力順而東漢防築其陬完壞非一日利害經千秋  
主印無切責治水莫輕謀府公山西種貴已爲通侯樽酒與歌舞十客共優游

送何都官通判虔州若谷

楚越封圻接帆檣上下頻商通洲橘熟信到嶺梅春白紵歌脩頸金盤饋紫鱗  
同勤太守職龔遂漢名臣

秋雷

春雷不發蟄秋雷不收聲向無一日雨今無一日晴昨夕玉女笑閃閃揚目睛  
雷公與雨師自取號令明舒慘由上天誕妄推五行日月不粒食安問下土耕  
雖然屋瓦爛還有地菌生損彼以益此誰能較人情堯時不無水用禹水乃平  
黎民思堯仁往往見於羹猶吾大君意星火立水衡水衡雖努力豈將雷雨爭

送俞尚寺丞知蘄春縣

應見言風物于今有貢蛇潛蹤遠鼃鼃飲露上蒹葭清潔一如此傷殘都莫涯  
君惟脩職業男未女繰車

和劉原甫白鸚鵡

出注輦國注輦在西海去中州四十一萬舟行過西王母三年乃達番禺也

能言異國烏來與船帆飄嘗過西王母曾殊北海鯨雪衣應不妒隴客幸相饒  
因憶禰處士舊洲蘭蕙凋

送劉定賢良下第赴廣陵令

劉蕢不登科衆口誦其策得者爲之羞聞者爲之惜摧藏一時屈論議千古白  
至今簡篇中一字不敢易其言究時病春刺若戈戟引經見大法非蹈春秋僻  
我朝屢得人無不陞顯赫乃知所中否實命繫通厄中則首公相人情作冠幘  
否則走仕塗人情作履舄秋風廣陵城千里夷門客壯心雖暫失美實有時獲  
招悵以送君致龍翻點額

九日永叔長文原甫景仁鄰幾持國過飲

秋堂雨更靜佳菊粲粲芳置酒延羣公掇英浮新黃心猶慕淵明歸來醉柴桑

莫問車馬之去迹亂康莊

送鮑都官錢塘通判

文鱉游西海夕飛向吳洲朱鷺生明月淵潛未可求由來有變化何能計沉浮  
君子蹈出處誰將等隅陬臨水賦二者相送無離憂

送通州通判刁國博

古郡見郎山海雲遮一半陽烏出滄波光彩臨硯案小吏抱牘來磨墨爲點竄  
豈以島嶼人百事皆漫漫朝廷通守任不使守專斷是恐繆其才民勞乃生亂  
辛勤雖然多魚蟹莫知算夜月上蓬瀛偷閑舉杯看因行計較足少別休與歎

吳資政挽詞二首

天下文章老爲公地底銘平生懷道德鋪寫若丹青蒲市一朝罷洛人皆淚零  
嗟嗟廟堂貴今以柏爲庭

峨峨陁土厚自古葬賢人百尺不逢水千年空閉春夜臺埋琬琰隴道刻騏驎  
西望緣纓淚曾無幕府賓

九月二十四日大風

秋飈無蹤迹空中聲奔馳枯桑因已驗老病仍先知驚沙入破隙危葉墮綠枝  
幽懷聒不寐山岳將恐移

二十五日雪

秋露未爲霜秋空已飛雪著樹增葉危壓叢憂菊折平明開戶看斗覺顏檐潔  
天時莫倉猝誰預衣裳設

送唐待制子方北使

王命來天外闕氏坐帳中儀雖聘鄰國禮豈異和戎漢使方持節胡人自帶弓  
唯應沙漠凜不減諫臣風

送劉元忠學士歸陳州省親

芸香閑祕秩蘇合著新裘公子言歸日天王賜問優治分周太宰禮重漢諸侯  
拜慶無如樂黃金作酒舟

送陳賢良忠正軍僉判

書對三千字恩科第一人鯤魚飛北海龍劍躍平津直悟聰文主深論險剋臣  
已能明世弊枉作幕中賓

送韓持正寺丞知餘姚

君家二仲父連爲吳越宰錢塘與蕭山治跡應無改魚鰕莫厭腥網罟從人采  
天晴姚江深縣鼓朝翻海

送周介之學士通判定州

相公秉文武視卒如嬰兒今往佐其軍豈不重撫綏我有愚者慮贈君臨路岐  
相公居并州拓土曾不疑羌戎起潛變一旦覆我師我師無不勇將吏實易之  
常抱雪恥志此旨君所知兵家尤戒貪持重養以威正當士門路自昔屯虎貔  
朔朝及旬望大校飫酒卮未若投簞醪共飲河水湄古人維其均今人意參差  
臨事欲之死身往心已移上能同甘苦下必同安危願君因議論茲語何難爲

送番禺杜杆主簿

行識枕根樹初窺翡翠巢地蒸蠻雨接山潤海雲交訟少通華語蟲多入膳庖

不須思朔雪梅吐臘前梢

還柳瑾祕丞詩編

吾友蘇子美聞昔許君詩子美今下世令人重嗟咨當其不得志泥水蟠蛟螭  
未激西海流安可氣吐霓吳洲逢朱鼈腹有百碧遺他時使我觀我觀顏忸怩  
便欲焚筆硯奈何難爭馳

送張殿丞吉甫知資陽

單騎欲之蜀綵衣初過秦王喬鳧是烏陶令酒名巾灞上愁逢雪裏中喜見春  
兩川風物美不似走京塵

丁端公北使

出聘天王使來乘御史驄馳車看燕婦貂扇禦胡風俗與華人似言從左衽通  
屬庭觀拜舞不似未央中

張斯立遂州司理

自身買馬箠爲婦置罽羅將出咸陽門同涉蜀道危疇昔未祿仕日夕講書詩

不能青雲高乃作黃綬卑前人未遇時往往甘棲遲如築九層臺始起一板基  
雖然用功深歲久終莫墮我今惜君行無力可致之去勿藉芳草世俗多夸毗

寄題哀賢亭

馬仲龍圖墳  
前所砌立也

蒼蒼墓門樹亦有黃鳥哀賢者不在世常恨埋蒿萊山根入溪泉流響出夜臺  
東方見子胥助濤高崔嵬

荅建州沈屯田寄新茶

春芽研白膏夜火焙紫餅價與黃金齊包開青箬整碾爲玉色塵遠及蘆底井  
一啜同醉翁思君聊引領

送曹測崇班駐泊相州

知君鄴城去歷覽古時蹟峨峨銅雀臺其下遺瓦礫不化鴛鴦飛多近蟾蜍滴  
哀哉魏武帝雄智圖九錫俄聞望西陵作妓向朝夕曾何百年間事往如霹靂  
空餘幾仞土陰峭古蘚碧下有牧羊人上有牂與羸寒風吹枯草草短聲刺刺  
珠翠爲埃塵冠劍埋百尺顏回飲一瓢仲尼不暖席擁徒食人肝生莫如盜跖

令名今猶存焉在刻金石我輩當太平白首無戰敵又知爲善樂尙媿苟仕籍  
行行勤撫兵豎威酬德澤

十一月二十三日歐陽永叔劉原甫范景仁何聖徒見訪之什

夷門魏公子來過抱關人車馬立市中貴義不恥貧市人無不驚此老面黧皴  
豈將流俗眼能辨玉與珉爾後幾千載此賢埋埃塵誰謂四君子蹈古猶比辰  
上馬後苑門訪我東城闥爲公開蓬戶沽酒焚紫鱗銀杯青石盤共飲不計巡  
薄暮各已醉歡笑頽冠巾來旣無猜嫌去亦無疎親曷若世上士惟顧勢力均  
次韻和原甫陪永叔景仁聖徒飲余家題庭中枯菊之什

九日車馬過我庭黃菊鮮重來踰七旬枯萼無復妍自非凌霜操枝葉徒相連  
衰敗未忍去根芟尙翹然不意憔悴叢猶爲君子憐固值時節晚豈恨地勢偏  
直如木上蘿緣蔓欲到天一朝風雪厲零落向暮年至此事乃等高低復何言  
公休誇松柏彭祖與顏淵各不相健羨焉能論柔堅願公時飲酒周孔今下泉  
次韻和永叔飲予家詠枯菊

今年重陽公欲來旋種中庭已開菊黃金碎翦千萬層小樹婆娑嘉趣足鬢頭  
插蕊惜光輝酒面浮英愛芬馥旋種旋摘趁時候相笑相尋不拘束各看華髮  
已垂顛豈更少年苔色綠自茲七十有三日公又聯鑣入余屋階傍猶見舊枯  
叢根底青芽歎催促但能置酒與公酌獨欠琵琶彈啄木所歡坐客盡豪英槐  
上凍鴟偷側目盤中有肉鴟伺之烏鳥不知啼觜曲諸公醉思索筆吟吾兒暗  
寫千毫禿明日持詩小吏忙未解宿醒聊和屬

送李獻甫寺丞知虹縣先歸金陵

今日歸爲美塗金作馬纓願言膏沐婦相望石頭城得邑柳隄合還家梅野晴  
里中多樂事州牧是名卿

衛尉邵少卿挽詞二首

位至九卿亞年過七十春桐鄉歸葬日棠樹去思人霧裏開蒿隧原邊起石麟  
地遙徒有淚灑向北風頻

買得吳門宅歸來自種花春風未歌徹東岱已魂賒昔作千年調今爲一日嗟

人將鑄美德磨石取江沙

次韻和永叔對雪十韻

玉月梨梅柳  
絮字皆不用

紛紛何亂目凜凜自開門著莫風難定侵凌物已繇裝成新樹色遮盡古苔痕  
冷入梁王苑清乘衛國軒欺貧凍蓬華增險想轆轤小隙皆能及洪爐逼不温  
雲衣隨處積水甲等閑屯團戲爲丸轉堆雕作獸蹲豈愁穿破履幸喜有清樽  
誰問諸公子高樓與後園

寄題劉仲叟澤州園亭

城臨太行谷谷暖宜草木旣移洛陽花又種阮家竹五色雜黃紅一林常翠綠  
其間廣庭開亦欲危榭築春歸百禽號搏黍及布穀桑上啄椹食林下窺果熟  
果收椹已盡飛去不須逐婆娑黃楊樹誰謂逢閨縮物猶有進退此理何用告  
余心當效君未有地可卜綴書豈貪樂且以苟微祿

送李灝秀才南歸

乘驢雪中來別我千里歸江南梅花發身與越鳥飛幾年客大梁著盡篋中衣

空餘一束書去恨知者稀

宛陵先生文集卷第二十二

宛陵先生文集卷第二十三

送刁經臣歸潤州兼寄曇師

古來山林士一往不復返區區世上名豈畢車自挽前有高山危後有落日晚  
未知所止息已慕田家飯愛君京口歸萬事不著眼乘馬飾鞍轡乘舟畫屋版  
長途與白浪健駛固莫限力殫風定時各各繫岸棧寄語老空人青崖勿鉏刻

贈狄梁公十二代孫國賓

雄雉飛上天牝雞白日鳴驅逐鳳皇雛百鳥不出聲豈無鵬與鸚至死莫得爭  
孤鶴獨不懼使風羽翼成鶴性本君子嘹唳通太清至今有其孫踉蹌田中行  
明時與稻梁重節亦貴名爾無冲天力且與鶯鶯并慎勿啄泥穢坐使白鷺輕  
寄金山曇穎師呈永叔內翰

江中峨峨山上有道人住風濤響殿閣雲霧生席屨道人如不聞道人如不顧  
誰能識此心來往只鷗鷺京洛三十年塵埃一相遇我與信都公已落衣冠故  
平生守仁義齒髮忽衰暮世事不我拘自有浩然趣未由逢故人坐石語平素

寄題刁經臣潤州園亭

新作城邊圃陂原上下斜竹多劉裕宅松接戴顓家山色不須買江流何處涯  
但邀東海月莫聽五更鴉

次韻和永叔夜坐鼓琴有感二首

夜坐彈玉琴琴韻與指隨不辭再三彈但恨世少知知公愛陶潛全身衰弊時  
有琴不安絃與俗異所爲寂然得真趣乃至無言期

舜琴曰朕有語舜鬱陶乎孝悌怨則否傲恨媿豈無我嘗撫卷歎歎此孟氏書  
此書有深意仁義豈久虛公今乃有感其不在茲歟魚躍與鶴舞物情曾未殊  
無情則無應何必問烏魚

李尚書挽詞二首

相門三世貴家法百年同天子賜恩禮史臣書祖風笳聲穿苦霧隴穴起寒蓬  
自古焉能免於茲是始終

伊水西頭月青山北脚雲夜臺無復曉陰嶺有時熏龍劍雙埋沒庭蘭竟鬱芬

不知門下客誰刻道傍文

送朱司封知登州

駕言發夷門東方守牟城城臨滄海上不厭風濤聲海市有時望閭屋空虛生  
車馬或隱見人物亦縱橫變怪其若此安知無蓬瀛昨日聞公說今日聞公行  
行將勸農耕用之卜陰晴

送代州錢防禦

堂堂鴈門行赫赫符節分紫塞千里障紅旗十萬軍世家王爵貴祖廟將臣勳  
鐘鼓陳牛酒衣裘論典墳呼鷹下青漢牧馬出黃雲竇憲何爲者燕然解勒文  
寄題廬陵董氏桂林書齋

山東桑柘多江南松桂茂種桑事春蠶栽桂事華構嘗聞雲蓋下聚書爲大富  
往往見子孫緣天掇星宿掇星星若珠光彩出屋漏秋收萬種田作酒日爲壽  
亦有千里歸錦衣行白晝

次韻永叔乞藥有感

子厚論鍾乳要若鵝翎筒安取啗棗栗謂相出山東所產有所美慎勿憑邨僮  
公問我餌藥石白將使龔我餌乃藤根得方非倉公會聞李習之其品今頗同  
此物俗爲賤不入貴品中吾妻希孟光自春供梁鴻荏苒歲月久顏丹聽益聰  
雖能氣血盛不療貧病攻何如面黧黑腰金明光宮亦莫如學釣緡鉤懸香鷄  
但知煙水樂寧計身瘠豐我生無快意豈異抱篤癘公平忽我求略辯雌與雄  
雄赤而雌白由來不同功沙合固切似朋好殊未窮長年苟不遇笑殺渭上翁

和王景彝正月十四日夜有感

燈光煖熱夜催春天半樓開飲近臣馳道橫頭起山岳露臺周匝簇車輪隔簾  
豔色多相照下馬輕豪各競新我已暮年殊趣嚮濃油一殘案邊身

送雷太簡知虢州

牛車讀古書少作游秦客一朝起爲郎華省何赫赫若有南山雲時時生枕席  
雲潤不益老呼吸乘閒隙抱痾初駭聞旣愈賴藥石遂請號太守號事簡且適  
況有三堂存韓詩猶可覲永歌復飲酒東平希阮籍

次韻和景彝元夕雨晴

春雲收暮城九陌灑然清  
星出紫霄下月從滄海明  
車音還似晝鼓響已知晴  
靜閉衡門臥無心學後生

早春書局卽事

薔薇結舊蔓天桃種新紅  
傷根桃不死著架蔓依叢  
要以玩芳物亦寧負春風  
誰念太行下移谷學愚公

古意

林中卽鹿人常爲虎所卽  
虎豈援鹿者亦各求其食  
趨利不顧害禍患安可息  
古來遜世上輕彼用智力

送李閣使知冀州

騷裊黃金絡春風北渡河  
將軍守漢法壯士發燕歌  
綠水塘蒲短晴天塞鴈多  
家聲復年少矍鑠笑廉頗

郭園梅花 二月一日

未逢柳條青獨見梅蕊好猶怯春風寒不比江南早清香拂酒杯素色欺蓬葆  
佳人金縷衣唱徹嗟身老

送襄陵李令彥輔

李宋丞相妹壻永叔少居隨州常往其家

公相爲近親翰林爲故人親舊各貴顯青袍未離身六十去作令豈慕要路津  
又思漢東歸便置漉酒巾深希陶淵明澹然意已真食棗齒易黃晉俗誠自淳  
尙不顧隋珠安肯與此鄰送君識君心埽迹向世塵

且歸漢東便欲致仕

詠劉仲更澤州園中醜石

君家太湖石何從太湖得太湖天東南太行天西北相去三千里雖有何致力  
古人煩舟車頑質無羽翼竅引木蓮根木蓮依依以植秋蛇出其中舌吐虹霓色  
君常夸於我怪怪亦特特以醜世爲惡茲以醜爲德事固無醜好醜好貴不惑

送趙子淵知潁州

舊穀不棲畝新春原鹿飢野荒多寇斂詔發撫疲羸驛騎東風急菑田小雨遲  
應同漢太守膏澤亦能隨

寄題楊敏叔號州吏隱亭

賢哉號略君守號事頗簡有亭後園中登覽早至晚了了松柏關氣象入醉眼花草發瑣細禽鳥啼曉曉竟日人不來亦莫去杯琖

次韻王舍人憶省中小桃寄江學士

淺綻燕脂紫蠟芳深斟吳酎白瓊觴鳳池人憶去年豔雉省客無今日狂髣髴物華先上苑依稀歌吹下昭陽平明社雨莫催促應翫移牀欲近傍

去歲正開  
禁中賞花

次韻劉原甫社後對雪

社日遇羣飲北風歸馬驕陽烏雲斗晦來燕翅難調朝霞侵花冷春英到地消宿醒無酒解薄被覺寒饒爐炭重燃獸衣裘更御貂蟄宮蟲復閉時鳥腹將枵點綴何多思輕狂不奈飄唯知妍可玩寧恤氣爲妖刺客偶然興海神非次朝唱高仍和寡公又作長謠

次韻永叔二月雪

春雪損萌芽未必摧杞菊我心無愛憎隨分樂自足桃李紅間白豈不悅我目

杞菊嫩且甘豈不飽我腹看花食蔬仍舉杯趁取衰遲鬢猶綠

聞王景彝雪中禱祀還

二月漫漫雪齋宮夜寂寥壇場祠乙鳥桑柘響陰臬履帶春泥重駒回廣野驕

還批五色詔池上踏瓊瑤

來帖云絃歌之外時復林臬哀鳴

次韻景彝祀高禱書事

聞說郊禱喜氣翔曾由乙卯命封商今朝鐘鼓登歌祀何日熊羆作夢祥埽雪

野廬風凜凜陞壇公袞佩鏘鏘君門賜胙予何有不似矜誇鳳沼傍

次韻和永叔雨中寄原甫舍人

賴得春巢燕未歸高檐終日雨衰衰細籠芳草踏青後欲打梨花寒食時美景

已嗟空過盡名園猶許誤相隨錦鞍切莫九衢去拍拍一如鵝鴨池

社日曾慎赴北園

毛君寶祕校將出京示予詩因以答之

古城踏成谷不見人馬蹤古人豈不行舊迹豈不重從何求故步往返自憧憧

觀君百篇詩善畫人形容毫髮無不似落筆任橫縱曷如握明鏡物物目所逢

贈以東南歸擲去手中筇

劉仲更於唐書局中種郁李

冷局少風景買花栽作春前時櫻桃過今日雀李新搦條紅蓓蕾婀娜含雨勻  
舊來薔薇叢饒借與近鄰始移棣萼密不慚車下榛日暮綴書罷暫賞舉杯跋  
和劉原甫復雨寄永叔

階下青苔欲染衣晴光纔漏又霏微衝風燕子銜泥去隔樹鶉鴝嗔婦歸乍冷  
乍陰將禁火自開自掩不關扉渾身酸削嬾能出莫怪與公還往稀

送正仲都官知睦州

每嗟相逢少常苦離別多行行復壯壯往往起悲歌古來易水上義士有荆軻  
捐軀思報恩飲恨歌奈何況彼兒女懷牽纏如蔓蘿是以世間人鬢髮易番番  
喜君得郡章東歸隨春波灘上巖子祠繫船聊過經其人當漢興富貴不可羅  
足加天子腹傲去釣于河冬披破羊裘夏披破草蓑心中小宇宙尤哂獻玉和  
我慚賤丈夫豈異帶面儼未免爲鬼笑誰知懼揮訶安知如君行收迹已蹉跎

空將閑歲月塵埃浪銷磨正同三峽賈盡力向盤渦

續永叔歸田樂秋冬二首

秋風忽來鳴螿蛄豆葉半黃陂水枯織婦夜作露欲冷社酒已熟人相呼坎坎  
擊鼓坐林下醉去自有兒童扶壯男獨獵南山虎中子已扱荒徑狐田家此樂  
樂有餘食肉緝皮裘豈無我雖愛之乏寸土待買短艇歸江湖北風如刀割寒  
骨穀已成困不蒼猝任從密雪落交加旋採乾薪燒楮杻鋤犁滿屋牛在牢鵝  
鴨亂鳴雞亂發割烹炊黍待鄰叟飽向茅檐閑兀兀田家此樂樂無涯誰能一  
生空汨沒公希平子定何如我效梁鴻終適越

和介甫明妃曲

明妃命薄漢計拙憑仗丹青死誤人一別漢宮空掩淚便隨胡馬向胡塵馬上  
山川難記憶明明夜月如相識月下琵琶旋製聲手彈心苦誰知得辭家只欲  
奉君王豈意蛾眉入虎狼男兒返覆尚不保女子輕微何可望青冢猶存塞路  
遠長安不見舊陵荒

酬楊愈太丞之壽州見別

疇昔西州謝法曹聲名籍甚我徒勞升沉一府已荒冢憔悴兩人猶二毛眼見榮華能幾日心知富貴只秋毫淮南魚美香秔滑飽去清吟豈不高

贈太子太傅王尚書挽詞二首

周原開隴隧鹵部葬名臣北極履聲絕東朝車迹湮藏舟移夜壑棲鵬去承塵共看劉寬墓碑陰幾許人

平生性忠厚所守必尊君面實賢愚混心惟白黑分事光中執法書集右將軍天意苦埋沒北邙松柏墳

送陝西都運彭待制

塞下兵難去關中粟未多君心同漢帝糧道得蕭何函谷馬蹄入渭橋車轍過地形終險固山色舊嵯峨不媿先賢傳重聽得寶歌歸來奏天子安穩看鳴珂

送羅職方知秀州

陸雲嘗誇千里莼便輕羊酪同埃塵君今得郡正千里已患無羊厭此珍乃知

南北各所樂乘舟不如乘馬惡水邊不見秦羅敷縱有西施肌肉薄使君事事未稱意綠水芙蓉定何若

寄懷劉使君

敬

昔我從仲父三年在河內春游丹水上花竹弄粉黛人誇走馬來盡眼看沒背薄暮半醉歸插花紅簇隊使君今少年時往勸耕耒安行過樹下野杏正破類何不學山公酪酲還倒載令人知使君心膽不瑣碎切莫懲婦翁慷慨臨并代一朝由謗謫雖去民苦愛實計幸不幸豈較進與退因書寄此懷繩墨老且悔

贈僕射侍中劉相公挽詞三首

處外諸侯重居朝聖主知祆逢庚子日夢異武丁時歸棹關山遠凝笳道路悲欲傳千古迹佐世本無爲

古今皆可見富貴不常存歌者未離席弔賓俄在門朱輪空返轍綠酒尙盈樽人事固如此令名貽後昆

歎此微末迹見公三十年貴爲天子相能擇大夫賢東第門闌在南州隴隧延

立碑思叔子墮淚峴山前

送胥平叔太博通判湖州

依依隄邊柳泛泛水中舟舟行無遠近柳影不隨流東風欲粉絮相逐江上頭  
正見魴魚來貫條尾脩脩使斫橫刀膾便銷千里愁檣端燕暫語卽飛入高樓  
樓中饒客飲共候風色柔明朝同挂帆直過南徐州吳地多平湖纜枕明鏡秋  
芙蓉拂兩舷女艇花底謳不羨乘五馬却逢羅敷羞此官當此時莫憶塵中游

寄題張令陽翟希隱堂

每讀陶潛詩令人忘世慮潛本太尉孫心遠迹亦去不希五斗粟自種五株樹  
曠然箕山情復起濠上趣今時有若此成豈不懷慕

李士元學士守臨邛日有穀一莖九穟者數本芝數本蓮花連葉並蒂  
者各一本因賦之

臨邛傳瑞物太守在郡時旣多九穟穀復有三秀芝芝以保萬壽穀以豐東菑  
更看芙蓉葉並蒂照清池

宛陵先生文集卷第二十三

宛陵先生文集卷第二十四

郭之美忽過云往河北謁歐陽永叔沈子山

春風無行迹似與草木期高低新萌芽閉戶我未知忽聞人扣門手把蟠桃枝  
問我此蟠桃緣何結子遲但笑不復答問者當自推振衣向河朔河朔人偉奇  
以茲不答意遲子北歸時

讀蟠桃詩寄子美永叔

韓孟於文詞兩雄力相當偶以怪自戲作詩驚有唐篇章綴談笑雷電擊幽荒  
衆鳥誰敢和鳴鳳呼其皇孟窮苦纍纍韓富浩穰穰窮者啄其精富者爛文章  
發生一爲宮墜斂一爲商二律雖不同合奏乃鏘鏘天之產奇怪希世不可常  
寂寥二百年至寶埋無光郊死不爲島聖俞發其藏患世愈不出孤吟夜號霜  
霜寒入毛骨清響哀愈長玉山禾難熟終歲芳飢腸我不能飽之更欲不自量  
引吭和其音力盡猶勉彊嗟我於韓徒足未及其牆而子得孟骨英靈空北邙  
誠知非所敵但欲繼前芳近者蟠桃詩有傳來北方發我衰病思藹如得春陽

二人乃可語因觀爾馬圖古筆得神妙俗工非所模收圖兩且止鳥飛當駕驅

答廷評宗說遺冰

仲夏邁餘閨屋室如炊蒸孰云窮處者言贈太官冰時靡有暍死實亦賴友朋  
定能涼一席既已却青蠅吾心久自信飲己不以矜

劉牧殿丞通判建州

平生交遊少海內寡與期識君且恨晚一見已將離人言何嗟別曾此非舊知  
答曰匪我舊亦既接音詞譬彼空林鳥止息偶同枝忽有振翮去尙爾鳴聲悲  
我今臨流送安顧俗所爲

和中道伏日次韻

伏日每苦熱古來亡事侵嘗聞東方朔割肉趨庭陰百職當早罷將畏赫日臨  
我無歸遺人懷念空霑襟

和蔡仲謀苦熱

大熱曝萬物萬物不可逃燥者欲出火液者欲流膏飛鳥厭其羽走獸厭其毛

故交儻相問懷抱今如此豈乏南飛鴈豈無東下鯉自同嵒康嬾作書愁把紙  
薛九宅觀鵑狐圖

蜀中處士李懷哀手畫皂鵑擒赤狐猛爪入頰觜迸血短尾獨俛窮蹄鋪鵑爭  
怒力狐爭死二物形意無纖殊一禽一獸固已別硬羽軟毛非筆模入君此室  
見此圖如在原野從馳驅

寄汶上

大第未嘗身一至人猜巧宦我應非彈冠不讀先賢傳說劍休更短後衣瘦馬  
青袍三十載故人朱轂幾多違功名富貴無能取亂石清泉自憶歸

蕭著作宰豐城

王都二月花正開社雨作陰迎燕子人先春色向江南江南春色歸春水拍岸  
綠波生荻芽晨羞聊可助甘旨縣涂爲政子所諳不敢贈言言且鄙

董安員外之信州鉛山簿

古岸綠蒲老春帆逆水輕烹鮮聊以芼泝險復兼程可用茲時樂無將遠道驚

曾爲江上客因贈北行人

弟得臣殿丞僉判越州

前爲山陰宰

再爲會稽行聊問會稽美禹穴遷所探秦望斯所紀年深已浸深書碑必亡矣  
剡溪有樵風其事恐非是買臣千載後得無負薪子黃庭昔換鵝道士儻不死  
行當訪其真願以鵝報爾慎勿笑我癡萬事難可擬摘筍復盈擔緡魚新出水  
此又食之珍因書悉條理

李舍人淮南提刑

啄木欲除蠹蠹去樹亦撓何須食微蟲爾腹豈不飽天下本無事自爲庸人攪  
君實知古深終慚用傾巧

吳殿丞代州通判

舉才不避世必也知其長王官誠濟濟豈得佐邊疆代郡實雄要昔已選帥良  
功名乃欲取叱馭登太行

和人喜雨

仲冬至仲春陰隔久不雨耕農將失時萌穎未出土帝心實焦勞日夜不安處  
禱祠煩駿奔胙饗杳無補帝時降金輿徧款靈真宇百姓知帝勤變愁爲鼓舞  
和氣能致祥是日雲蔽午夕風不鳴條甘潤忽周普已見堯爲君安問誰爲輔  
胥員外之復州景陵尉

城隅漢水闊正足槎頭編采苻兼登俎施鼠不貴錢江帆風勢美竹屋雨聲連  
必有蒼苔碣留爲好事傳

李審言歸鄭州

嘗從京索間躍馬望春山氣象歸王國丘陵接漢關長榆啼鳥亂細草牧陂閑  
老厭行涂路因歌送子還

李舍人見過

春泥無處所窮巷少人行忽枉青絲騎曾非白面生笑言聊與適雞黍未嘗烹  
莫歎余貧甚吾儕業本清

春鶻謠

春巢纍纍衆鳥哺兒衆鳥不出巢羣雛嗷嗷腹甚飢不出巢其謂何上有蒼鶻  
窺其窠問鶻何仇鶻不我顧我巢有雛開口待哺一日不擊巢雛不食爾憂爾  
雛衆鳥號呼又可吁

來夢

忽來夢我于水之左不語而坐忽來夢余于山之隅不語而居水果水乎不見  
其逝山果山乎不見其塗爾果爾乎不見其徂覺而無物泣涕漣如是歟非歟  
汴之水二章送淮南提刑李舍人

汴之水分于河黃流濁濁激春波昨日初觀水東下千人走喜兮萬人歌歌謂  
何大船來兮小船過百貨將集王都那君則揚舲兮以紕刑科汴之水入于泗  
黃流清淮爲一致上牽下櫓日夜來千人同濟兮萬人利利何謂國之漕商之  
貨實所寄我送行舟于水之次春風吹兩旗君作天王使留客自求魚清江莫  
相避

宋次道一百五日往鄭拜墓

去不避春雨泣望松柏門颯然風悲響如感泉下魂沃醑向墳上空濕陳草根  
人歸夜月冷石馬在九原

孫太祝亳州僉判

微風起船尾雨氣生日脚不愁春路泥正泛春波樂順去疾鳥飛問程殊我度  
才名留守家更入尙書幕

寄靈隱通教僧

奇山若洗青草木生石上根萌不可窮條蔓自增王其陰有高僧日食惟一盞  
世人久已疎援鳥應相向

李少傅鄭圃佚老亭

莊生迷天理老固當念佚舉世用自勞誰能以爲必我公謝鼎司嗣子都華秩  
代言輟帝右作藩輔王室承顏向茲地園宇樂永日佳樹發已繁脩竹移未密  
春禽時弄吭清景付吟筆朱金待金構榮美安與匹

令狐祕丞守彭州挺

前時草草別渺漫二十年從宦各所適非爲道路偏今始一相遇言媿少壯前  
子有萬里翮尙不飛雲煙而復走隴蜀欲以條教宣將西過危棧葉暗聞杜鵑  
未知爲郡樂預已抱愁煎再來與子辭當去復留連且念前期遠歲月實易遷  
依韻和李舍人旅中寒食感事

一百五日風雨急斜飄細溼春郊衣梨花半殘意思少客子漸老尋游非戢戢  
車徒九門盛寥寥煙火萬家微今朝甘自居窮巷無限墻間得醉歸

依韻和張應之見贈

京洛多游好相與歲月深雖同執一籥吹曲各異音自微衆音響安感萬物心  
我窮子來唁慷慨發長吟

哭尹子漸

其弟師  
魯守潞

故人河內守昨日報已亡同氣泣上黨悲風生太行曩爲衆所惜今復人共傷  
阮籍本真率感慨壽不長

次道約食後同敏叔中道平叔如晦詣景德浴以風埃遂止

昔思春服成浴乎沂水上仲尼亦所志語此雖未向子今當是時有意同我尙已邀二三友欲往期畢餉倏然風滿塗塵土阻清曠安得一振衣徒希舞雩唱

陳經祕校之信州幕

東吳海物錯南楚江味多家吳而宦彼風土去幾何旣得風土樂可贊政治和歸來識香草爲綴楚人歌

朱武太博通判常州兼寄胡武平

昔我陽夏公嘗茲同郡治政餘作東園草木尙有意豈不務安養斯民歌樂易是時有賢才鄉舉堪皇器今方居家廬試質當時事願君思前人文雅庶未墜師厚云蝨古未有詩邀予賦之

貧衣弊易垢易垢少蝨難羣處裳帶中旅升裘領端藏迹詎可索食血以自安人世猶俯仰爾生何足觀

依韻和中道寶相花

嘉卉得所托植君之寢陽開榮同此春澹豔自生光不爲露益色不爲風盡香

節換葉已密尙可見餘芳

擬陶體三首手問足

共生一體中出處常相并所動轍有迹何不擇地行履鳥雖可蔽步武豈無聲  
嘗思汝爲玉請剛見直誠

足答手

上下各有分同質實異支要用固爾先當念扶我危我剛爾獨安何以幸華夷  
且願縮袖間操執自有時

目釋

我居元首間分並日月光左右各照耀盲一豈相妨尙恐有所醫獨見不能彊  
嗟爾手與足何爲欲競傷捉馳自有職勿使心悲涼

贈葉山人

傾珍奉賓客傲物云珥貂貴來不以屈飲酒且逍遙黃金百鎰盡左右無纖腰  
但存丹砂術有道在一瓢

李廷臣通判蔡州

夾路青青草隨君去未休亦將離思遠還共翠心抽細藉車輪穩薰牽野蔓柔  
王孫歸不久冉冉莫經秋

朱櫻

明珠摘木末紅露貯金盤始見侍臣賜已爲黃雀殘味兼羊酪美食厭楚梅酸  
苑園東周威纍纍映葉丹

悼子

小名  
十十

舟行次符離我子死阿十臨之但驚迷至傷反無泣款定始懷念內若湯火集  
前時喪爾母追恨尙無及邇來朝哭妻淚落襟袖濕又復夜哭子痛并肝腸入  
吾將仰問天此理豈所執我惟兩男子奪一何太急春鳥獨蔓延哺巢首戢戢  
懷悲

自爾歸我家未嘗厭貧窶夜縫每至子朝飯輒過午十日九食齋一日儻有脯  
東西十八年相與同甘苦本期百歲恩豈料一夕去尙念臨終時拊我不能語

此身今雖存竟當共爲土

和中道兩樹

一旬苟不雨萬木昏蒼蒼朝見洗林葉動搖生輝光晚逢開疎陰枝上漏微陽  
翠色固以好安得無秋霜

永叔寄詩八首并祭子漸文一首因采八詩之意警以爲答

昔聞退之與東野相與結交賤微時孟不改貧韓漸貴二人情契都不移韓無  
驕矜孟無醜直以道義爲已知我今與子亦似此子亦不媿前人爲北都健兒  
昨日至扣門乃得所遺詩上言病中初有寄下言我詠蟠桃枝盛衰開落感殘  
杏暮春無事羨游絲班班鳩鳴忽懷念一埽十幅無閑辭洛川花圖多品目鬪  
新爭巧始可疑讀書又憶石夫子似蠶作繭誠有之鎮陽歸夢北潭北吟此八  
章誰謂癡最後有文弔尹子壽夭難問信所悲共書大軸許傳玩一日百展曾  
忘疲報君亦欲齋滿軸恐費紙墨令人嗤

黃敏復尉新城

新城接桐廬山茗久所利江東亡命兒販不畏黥劓堂上千金子捕以操凶器  
恐非吾徒爲勇少乃可避

寄永叔

夏日永以靜渴鳥方在枝張口不能言翕翕兩翅披庭中有井泉井深無縵縻  
欲汲假其鄰鄰且非我知鴻鷗矯河上比爾得所宜得宜豈不樂胡然我念之  
丞相二章

丞相之拜冠弁旅至乘馬載驅如彼鉅澹有鴈有鷺有龜有魚烝然來萃翔泳  
嘯呼

丞相之去乃還印綬乃飭車輪如彼涸津時靡翔羽時靡游鱗寂兮寂兮豈有  
嘉賓

閔讒狡二章

矯有讒狡讒以戕類狡以媚其貴謂不騫不墜謂人莫爾制而死制之誰謂無  
鬼孰制之死

彼狡之將死若有以見既見既惡之引袂蒙面謂人莫爾辨而自辨之誰謂無鬼孰俾之譴

薛八殿丞有遺

未嘗營貨貝貨貝寧爲來俸苦月不足貧死口肯開好事忽我恤十千助晨杯  
薪水已過豐不得如顏回

師厚與胥氏婦來奠其姑

雙裾來此室慟哭拜靈牀魂衣想髮髯薄酒湛其觴含悽拊孤穉拭淚問平常  
我生都無如仰看燕在梁

諭烏

百鳥共戴鳳惟欲鳳德昌願鳳得其輔咨爾孰可當百鳥告爾聞惟烏最靈長  
乃呼烏與鵲將政庶烏康烏時來佐鳳署置且非良咸用所附己欲同助翱翔  
以燕代鴻鴈傳書識暄涼鸚鵡代鸚鵡剝舌說語詳禿鶻代老鶴乘軒事昂藏  
野鶉代雄雞爪觜稱擅場雀豹代鷓鴣搏擊肅秋霜蝙蝠嘗入幕捕蚊夜何忙

老鴟啄臭腐盤飛使游揚鶴鶴與梟鵬待以爲非常一朝百鳥厭讒鳥出遠方  
烏伎亦止此不敢戀鳳傍養子頗似父又貪噪豺狼爲鳥鳥不伏獸肯爲爾戕  
莫如且斂翮休用苦不量吉凶豈自了人事亦交相

弔裴易進士

力學未及仕口中已含珠賦命固所負讀書非所辜斂送有兄弟哭泣無妻孥  
惟此靡薄厚必竟同一塗

閑詠寄呈次道

我閑日貧縛子閑數疾纏閑固不可常吾觀與子然吾與子嗜學豈獨閑窮年  
安安者誰歟分亦似所偏

寄楚州呂濟叔

亭午鳥不下誰復過我廬忽聞扣門者偶出問何如云是山陽吏太守遣置書  
自惟久窮困游子安念予淮陰況要津賓館無暫虛豈意有所逮委曲情未疎  
報言媿不覩聊以謝興居

答中道小疾見寄

嵇康性彌嬾曾不廢養生子姑當妙年何乃勞其精老聃有至論身孰親於名  
詩本道情性不須大厥聲方聞理平澹昏曉在淵明寢欲來於夢食欲來於羹  
淵明儻有靈爲子氣不平其人實傲佚不喜子纏縈吾今敢告子幸願少適情  
時能與子飲莫惜倒瓶罌

五月五日

屈氏已沉死楚人哀不容何嘗奈讒謗徒欲却蛟龍未泯生前恨而追沒後蹤  
沅湘碧潭水應自照千峯

送可教僧歸越

萬事厭尋常羨慕每不足居南多北思在遠慚近俗旣來橘變枳但見空條綠  
氣味誰復論孤根逗巖曲

和裴如晦雨中過其亡兄易居

人亡雨館寂車馬偶來臨濕衣添新淚故物傷夙心淒淒亭下樹萬葉起哀音

此地嘗對語在昔豈知今

雨中宿謝胥裴三君書堂

急雨射窗鳴燈殘我正寢穴蚓聲苦長流響入孤枕衆醉如不聞彊聒亦已甚  
夜短竟無寢困瞳劇塵礮

和中道雨中見寄

雨淫止復落雲暗不少開泥將沒馬脰思子日幾迴我旣不可往子亦不可來  
屋漏又苦甚巾烏生莓苔安肯問農畝唯憂無酒材但能置醇酎莫負吾尊罍

宛陵先生文集卷第二十四



宛陵先生文集卷第二十五

送謝寺丞新賜及第赴扶溝宰

世所重登科如君特才選麗賦驚宗工妙譽動京輦行鷁路非遐雙旗風欲展  
聊閱民版餘應不負墳典

和李廷老三月十四日

三月日幾望士游溱水陽溱流已渙渙有美此翱翔偶來適此願月色同滿牀  
士曰陟少室女曰歸大梁及晨各異役悲喜竟回腸芍藥有遺風贈好期不忘  
固匪子能遠是焉繼新章

苦熱

赤日若射火林風不動梢羸汗尚流沛冠服豈堪包貴人諒有稟慣習非彊教  
竊觀行車馬空蕩劇煨炮寧思山中人石泉浸兩腋

劉薛二君過予遇雨

猛雨迫好鳥止我屋室隅是時有劉薛亦既此焉俱我廢秣爾馬我廚飯爾奴

二人乃可語因觀爾馬圖古筆得神妙俗工非所模收圖兩且止鳥飛當駕驅  
答廷評宗說遺冰

仲夏溝餘閨屋室如炊蒸孰云窮處者言贈太官冰時靡有暍死實亦賴友朋  
定能涼一席既已却青蠅吾心久自信飲己不以矜

劉牧殿丞通判建州

平生交遊少海內寡與期識君且恨晚一見已將離人言何嗟別曾此非舊知  
答曰匪我舊亦既接音詞譬彼空林鳥止息偶同枝忽有振翮去尙爾鳴聲悲  
我今臨流送安顧俗所爲

和中道伏日次韻

伏日每苦熱古來亡事侵嘗聞東方朔割肉趨庭陰百職當早罷將畏赫日臨  
我無歸遺人懷念空霑襟

和蔡仲謀苦熱

大熱曝萬物萬物不可逃燥者欲出火液者欲流膏飛鳥厭其羽走獸厭其毛

人亦畏絺綌况乃服冠袍廣廈雖云託呼風不動毫未知林泉間何以異我曹  
蠅蚊更晝夜膚體困爬搔四序苟迭代會有秋氣高

儼上人粹隱堂

十年不出戶世事皆剡鉏時無車馬遊焚香坐讀書有堂曰粹隱惟見安且舒  
心遠迹非遠歲月速輪輿寓目暫爲實過者卽爲虛譬若開是室終日於此居  
欲問昨日事已覺今日疎明朝却視今復與前何如聊悟此中樂猶觀濠上魚

送鄭太保瀛州都監

秋氣入關河匈奴久已和琯弓聊可試寶劍不須磨草木將搖落牛羊自寢訛  
能知塞垣景持以贈吾歌

送刁安豐

嘗遊芍陂上頗見楚人爲水有鳥魚美土多薑芋宜寧無董生孝將奉叔敖祠  
舊令乃吾友寄聲於此時

劉八飲將散分得非休沐不得會

閏五月晦日

君非休沐時茲會豈能得我無官局榮幸爾預歡適莫辭衝雨歸歸時烏帽側  
贈張處士

聞爾閑於琴寢處未嘗輟抱之京城來豈與工師列一奏流水聲落指鳴泱泱  
既曰林壑人安事塵土轍

將行與蔡仲謀飲分席上果得桃

會無千歲人安見千歲實聊效昔所投瓊瑤報非一

答裴送序意

我欲之許子有贈爲我爲學勿所偏誠知子心苦愛我欲我文字無不全居常  
見我足吟詠乃以述作爲不然始日子知今則否固亦未能無諭焉我於詩言  
豈徒爾因事激風成小篇辭雖淺陋頗剋苦未到二雅未忍捐安取唐季二三  
子區區物象磨窮年苦苦著書豈無意貧希祿廩塵俗牽書辭辨說多碌碌吾  
敢虛語同後先唯當稍稍緝銘誌願以直法書諸賢恐子未諭我此意把筆慨  
歎臨長川

和張士曹應之晚景

遠空雲解駭南陌雨初收  
獨鳥去煙外斜陽明樹頭  
涼飈虛枕席漲潦起汀洲  
會有從軍役將離更暮愁

送楊浩祕丞入蜀

有才不得試志亦無所干  
有母不得養法當之遠官  
雖曰在民政孝心寧得安  
志願且未遂而趨蜀道難  
行思叱馭者勿復苦長歎

乙酉六月二十一日予應辟許昌京師內外之親則有刁氏昆弟蔡氏子予之二季友人則胥平叔宋中道裴如晦各攜肴酒送我于王氏之園盡歡而去明日予作詩以寄焉

性僻交遊寡所從天下才今朝誰出祖親戚持尊疊晚節相知人唯有胥宋裴  
所欠謝夫子歸穰尚未迴岸傍逢名園繫舟共徘徊嘉蓮如笑迎照水呈丹頤  
南庭蒲萄架萬乳纍將碓羣卉競瑣細紫紅相低偃尋常固邂逅孰辨落與開  
酒闌各分散白日將西頽城隅遂有隔北首望吹臺

開封古城阻淺聞永叔喪女

去年我喪子與妻君聞我悲嘗俛眉今年我聞若喪女野岸孤坐還增思思君  
平昔憐此女戲弄膝下無不宜昨來稍長應惠黠想能學母粉黛施幾多恩愛  
付涕淚灑作秋雨隨風吹風吹北來霑我袂哀樂相恤惟已知自古壽夭不可  
詰天高杳杳誰主之以道爲任自可遣目前况有寧馨兒

寄謝開封宰薛贊善

予生多不偶事事相與背適從平川役乃遇河決潰舟膠在中野寸步使心瘁  
誰知赤縣尹勤恤每外內文符飭亭長寇盜虞鼠輩仍能饋餅餌童穉仰所賚  
今又置酒壺惠問亦已再令我清夜飲是夕值月晦獨酌效謫仙而復無影對  
如何忘情游似亦有世態家人誠可同况我昨喪配雖曰預朝裾左右無粉黛  
兀然唯書史舊學厭瑣碎欲探文字工下筆語多礙却思君西齋新治虛可愛  
燕坐禽鳥寂吟哦簿書退此樂吾未如區區勞覆載

草木

草木無處所動搖知風形今日萬葉黃昨日萬葉青青既漸衰變黃亦漸彫零  
人生恃歲月種柏滿郊坰

夢登河漢

六月二十九日

夜夢上河漢星辰布其傍位次稍能辨羅列爭光芒自箕歷牛女與斗直相當  
既悟到上天百事應可詳其中有神官張目如電光玄衣乘蒼虬身佩水玉璫  
丘蛇與穹鼈盤結爲紀綱我心恐且怪再拜忽禍殃臣實居下土不意涉此方  
既得接威靈敢問固不量有牛豈不力何憚使服箱有女豈不工何憚縫衣裳  
有斗豈不朽何憚挹酒漿卷舌不得言安用施穹蒼何彼東方箕有惡務簸揚  
唯識此五者願言無我忘神官呼我前告我無不臧上天非汝知何苦詰其常  
豈惜盡告汝於汝恐不祥至如人間疑汝敢問於王叩頭謝神官臣言大爲狂  
駭汗忽爾覺殘燈熒空堂

寄宋次道中道

再來魏闕下舊友無一人或爲美官去或爲泉下塵晚歲相知者操節許松筠

日世常山公伯仲文學均與我數還往以義爲比鄰屢假篋中書校證多護真  
次述盈百卷補亡如繼秦中作淵明詩平澹可擬倫于時多驕佚黃卷罕所親  
昨以興西師往往劍射伸短衣誇走馬睥目語常瞋欲效西山勇遂笑東魯仁  
捨本趨富貴乃與市賈濱以此較於子素業固未泯前日之許昌別君已經旬  
偶然值河決窮坐如涸鱗臨風思有寄夜詠還達晨

日蝕

赫赫初出咸池中浴光洗迹生天東不覺有物來晦昧團團一片如頑銅前時  
蝦蟆食爾妃天下戢戢無有忠責罵四方誰膽大仰頭憤憤唯盧仝欲持寸刃  
去其害氣力雖有天難通是時了無毫芒益徒有文字辨且雄仝死于今百餘  
載日月幾度遭遮蒙有人見之如不見誰肯開口咨天公老鴉居處已自穩三  
足鼎峙何乖慵而今有觜不能噪而今有爪不能攻任看怪物瞽天眼方且省  
事保爾躬日月與物固無惡應由此鳥招禍凶吾意髣髴料此鳥定亦閃避離  
日宮安逮后羿不乖暴直與審慤彎強弓射此賈怨鳥以謝毒惡蟲二曜各安

次災害無由逢南不由赤鳥東不誚蒼龍北龜勿吐氣西虎勿嘯風五行不汨  
陳虞舜生重瞳我今作此詩可與全比功

寄王江州

休嗟謫官去山根勝窮邊當職言無隱他時事好還何嘗聞埃火唯是對爐煙  
潮到益城否猶期信可傳

薛九公斯請賦山水字詩

薛君堂懸山水字請我賦作山水詩呼童磨墨慰君意彊作安得有好辭昔年  
曾是杜陵客東城水上橫此碑字方數尺形勢健豈似取次筆畫爲東城父老  
語於我推本勅自開元時不知當時何所用費力刻刻爲瓌奇我去長安十載  
後此石誰輦來京師苑中構殿激流水暮春脩禊浮酒卮是時祠臣出不意酒  
半使賦或氣萎日斜鳴蹕不可駐未就引去如鞭笞脫我幸得預此列玉階立  
寫從然冀今雖下筆不稱意已書滿幅令君嗤

七夕有感

去年此夕肝腸絕歲月淒涼百事非一逝九泉無處問又看牛女渡河歸

過開封古城

荒城臨殘日雞犬三四家豈復古阡陌但聞新桑麻頽垣下多穴所窟狐與蛇  
漢兵墮銅鏃青血爲土花

通判桃花廳

自此詩許州起慶曆五年秋盡六年夏

種桃西庭下有意延東風東風與雨至染出枝上紅花底有小鳥其字曰桃蟲  
既於桃得名爲桃言女工翦羅作舞衣奉君歡莫窮舉杯無媿者避世武陵翁

任廷平歸京

并序

廷平任君往者登進士科入許幕後二年予被太原公辟與君爲代君之嚴君  
以太子少保致仕西都西都去許其道有三北趨鄭過函谷而至洛陽其塗而  
遠西趨汝由闕塞而河南其塗小艱然邇於北道西北趨登封歷轅而至洛師  
其塗險惡不與二道比君之歸也捨二道之平易踐西北之險惡何哉是非急  
於拜慶邪豈特與人情異歟噫人以爲險在君爲易由出於天誠不爲難也出

天誠易險道可謂孝也乎及其行予故作詩以送之

言之少室西定陟輶輶險歸心不避危夕枕屢成魘秋聲故苑空野氣荒陵掩  
獨念京洛塵曾將客衣染

和通判太博雞冠花十韻

神農記百卉五色異甘酸乃有秋花實全如雞幘丹籠煙何聳聳泣露更團團  
取譬可無意得名殊足觀逼真歸造化任巧卽彫刻赤玉書留魏丹砂句誦韓

魏文帝與鍾繇求玉玦書論玉云赤如雞冠韓文公鬪雞聯句云頭垂碎丹砂誠能因物比誰謂一時難有客驅辭穎

臨風運筆端嘗嗟古吟缺每惜此芳殘揣情苦精妙繼音慚未安

秋夜感懷

風葉相追逐庭響如人行獨宿不成寐起坐心屏營哀哉齊體人魂氣今何征  
曾不苦隕籜繞樹猶有聲涕淚不能止月落雞號鳴

依韻和通判八月十五夜招玩月二章

尋常圓魄豈不好競愛今宵分外明明極只知無隔礙誰言桂樹向中生

一年一見最堪惜百歲百夕能幾多縱有明年似今夕明年同會復如何

蚯蚓

蚯蚓在泥穴出縮常似盈龍蟠亦以蟠龍鳴亦以鳴自謂與龍比恨不頭角生  
螻蛄似相助草根無停聲聒亂我不寐每夕但欲明天地且容畜憎惡唯人情

秋風

秋風不饒物斗至聲已惡青林葉尙綠雖好將恐落人意誠愛惜節候肯相若  
白髮無再玄盛衰茲可度

韓宗彥寺丞通判鄧州

往歲陪祠泰壇下始一相見如相知我今入幕君有待喜得款語勝前時便嗟  
陳事日侵汨雖欲數面會無期忽聞兵吏已迎候馬有行色車將脂賀君有意  
事清簡太守亦鄙尋常爲騏驥步驟豈局促鳳皇羽翼多威儀漢家近親不復  
有召父舊聞於今隳隳由狂者生利害曾未略究民間宜祇言引水幸主賦矯  
請罷毀功何施千載厚惠一日去至今農畝空嗟咨夫子才高識且遠勿畏勢

力重扶持他年人作去思頌願以大字書長碑

韓欽聖問西洛牡丹之感

韓君問我洛陽花爭新較舊無窮已今年誇好方絕倫明年更好還相比君疑造化特著意果乃區區可羞恥嘗聞都邑有勝意既不鍾人必鍾此由是其中立品名紅紫葉繖矜色美萌芽始見長蒿萊氣燄旋看壓桃李乃知得地偶增異遂出羣葩號奇偉亦如廣陵多芍藥閭井荒殘無可齒淮山邃秀付草樹不產鬣英產佳卉人於天地亦一物固與萬類同生死天意無私任自然損益推遷寧有彼彼盛此衰皆一時豈關覆燾爲偏委呼兒持紙書此說爲我緘之報

韓子

夢感

生哀百十載死苦千萬春何爲千萬春厚地不復晨我非忘情者夢故不夢新宛若昔之日言語尋常親及寤動悲腸痛逆如刮鱗

秋鴈

珍做宋版印  
秋鴈多夜飛前羣後孤來儔合鳴自得隻去音已哀哀音能感人腸酸非食梅  
共將形影對安得不早衰

依韻和通判把菊有寄

湖邊草樹多蠹葉已少色唯菊不畏霜澹豔如有德自與蘭並生非因人所植  
愛貴曾未厭秋日短苦逼朋好各相望採持空歎息臨杯不能飲對案不能食  
借問君何憂節物感人極

曹承制知永康軍脩

鐵驄黃金羈年少蜀城守蜀城臨古江正在離岸口離岸李涼鑿其利實不久  
既避沫水害又以溉田畝大此百民宜遺祠奉牲酒行當謹厥事無乃爲政首  
三鳥

翩翩三奇鳥各擇松桂宜二鳥同所向並立高高枝一鳥依別樹屈比二鳥卑  
嗟嗟天下鳥莫與三鳥期三鳥鳴少和蒿間多鸞斯頻頻徒爾黨三鳥安可欺

龍箕一首并序

在昔賢人良輔之生也或山之神靈和氣之鄰或星之魄曜晶明之所鍾故詩有高高之作稱厥甫申傳說騎箕之說又得之前古公之誕日考之星曆月次于箕宜與說同也夫登翊王室爲宋鉅臣豈徒然歟依雅頌作龍箕一章十八句以獻

龍箕在天莫不孕靈我公生之旣生旣德曾誰與京爰弼帝右繼序其榮之贊我太平萬事其成之殿我輔邦庶民其寧之政靡薄厚百職其揚之宜言顯光永錫乎后王迺祝眉壽迺獻兕觥福祿其將之

宛陵先生文集卷第二十五



宛陵先生文集卷第二十六

李廷老自蔡州見訪云明日便歸鄭

故人夜相過秉燭爲開席車馬立在門樽酒豈暇索豐豐別後言忽忽恨將適  
旣去暝色合不可見行迹

墨竹

許有盧孃能畫竹重抹細拖神且速如將石上蕭蕭枝生向壁間天意足戰葉  
斜尖點映間透勢虛黏斷還續粉節中心豈可知澹墨分明在君目

江寧李諫議

滄江石頭下沄沄瀉天東寒潮日夕至不與廢興同陛下始封地氣象常鬱蔥  
六代有舊迹物景付與公切莫負山水可追王謝風

方在許昌幕內弟滁州謝判官有書邀余詩送近聞歐陽永叔移守此  
郡爲我寄聲也

從事滁陽去寄音苦求詩吾詩固少愛唯爾太守知不敢輒所拒勉勉作此辭

山城本寂寞物色同淮夷淮俗舊輕僿未識遠博宜無將麟在郊使欲等文狸  
爾去事太守當矯庸庸爲伊人道義富嘗立天子墀我輩在蟻垤難謂太華卑  
又若遊蹄涔安見滄海涯况於爾實親告爾爾勿疑

送胥裴二子回馬上作

陰陰雪雲低遊子去將嬾豈唯遊子倦疲馬行亦款送罷我獨還回看鴈爲伴  
念此日暮時寂莫閉竹館

初冬夜坐憶桐城山行

我昔吏桐鄉窮山使屢躡路險獨後來心危常自怯下顧雲容容前溪未可涉  
半崖風颯然驚鳥爭墮葉脩蔓不知名丹竇拆在茨林端野鼠飛緣撓一何捷  
馬行聞虎氣豎耳鼻息歛遂投山家宿駭汗衣尙浹歸來撫童僕前事語妻妾  
吾妻常有言艱勤壯時業安慕終日間笑媚看婦鬢自是甘努力于今無所懾  
老大官雖暇失偶淚滿睫書之空自知城上鼓三疊

和平叔道傍竹

野田有脩竹叢疎飽於霜下上乏佳禽左右雜枯桑豈無行路子行路厭榛荒  
忽見此翠色徘徊未能忘車馬去何疾迴顧隔山岡

答裴如晦

懷我歌我辭乃知行子倦音雖彼妙發想若此可見歌竟夜燈青野窗鳴濕霰  
髣髴聞孤鴻飛急應有羨

夜酌趙侯家聞合流曹光道詣府遂訪之一夕縱談明日光道赴本任  
邀予詩送因敘其言以贈焉

方與舊將飲談兵燈燭前聞有故交至心喜輒論邊跨馬踏明月往見競留連  
且共語出處子懷予久然男兒太平時功業未可先故當守詩書道義躋古賢  
苟復不得用卷以放林泉吾蘊誠若此奈何貧所纏仕宦偶同郡文字可以傳  
行行志茲語聊用樂永年

暮雪

暮雪止復落暗積如避人平明視庭中物物各已新草木一變妍枯槁忘其真

隨風來無迹高下得以均采薇歌卒章霏霏霑車輪今豈無是作勞苦不足陳

### 西湖對雪

獨玩湖中雪移舟水凍灣寒塘起孤鴈危樹失前山著物偏能積衝風不礙還  
無慚子猷興都盡剡溪間

### 依韻和資政侍郎雪後書事

風旗冷落偏欺酒衆樹芳菲欲並梅人意不知南畝望只驚鴻鴈向川來

### 王龍圖知江陵

捧詔出荊州天心寄遠憂行車踐殘雪寒色犯輕裘祖鞍山川闊歌驪道路愁  
吏迎多越乘兵衛粲吳鉤地與蠻溪接江通溪水流風宜橘林賦俗尙竹枝謳  
樽俎思疇日煙雲感舊遊終當勞侍從寧久渚宮留

### 依韻和通判太博雪後招飲二首

雪晴何所樂樂趣在杯中况復君家美雕盤膾縷紅  
邀飲奏醴醪案杯烹蟹螯吾非獨醒者莫誦楚人騷

依韻和資政侍郎雪後登看山亭

湖上晴煙凍未收湖中佳景可遲留更臨危樹看羣岫雪色嵐光向酒浮

雪中通判家飲迴

時一卒彈胡琴

朔風聲滿枯桑枝陰雲不動蛟龍歸凍琴聚立高樹時密雪萬里增寒威訪君留連舉酒卮胡琴奏罷歡已微小駒跨去沒四蹄飄花零亂霑人衣醉目遠望天地迷何暇更問孤鴻飛茅屋豈無單且飢平明共賀麥壟肥

雪後資政侍郎西湖宴集偶書

潭心不凍處鴈鷺自相依積雪正無際因風忽起飛初驚如避弋復下信忘機偶得從公飲聊書此景歸

近有謝師厚寄襄陽柑子乃吳人所謂綠橘耳今王德言遺姑蘇者十枚此真物也因以詩答

荊州持大橘亦自名黃柑忽得洞庭美氣味何可參遂生吳洲思恨不羽翼南  
運使劉察院因按歷歸西京拜省

在昔志四海所遇非一塗朝以言悟主夕卽被金朱于茲亦未幾用直升雲衢  
臺分東西屬御史從子除天馬日千里豈並局促駒朔北遏亂萌褒嘉賜璽書  
乃衣漢使繡威譽傾國都借問世上榮萬國與此殊明朝歸洛陽聊且餞高車  
亭埃况非遠春郊無疾驅

余之親家有女子能點酥爲詩并花果麟鳳等物一皆妙絕其家持以  
爲歲日辛盤之助余喪偶兒女服未除不作歲因轉贈通判通判有詩  
見答故走筆酬之

翦竹纏金大於掌紅縷龜紋桃作網瓊酥點出探春詩玉刻小書題在榜名花  
雜果能眩真祥獸珍禽得非廣磊落男兒不足爲女工餘思聊可賞

元日

昔遇風雪時孤舟泊吳埭江潮未應浦盡室坐相對行庖得海物鹹酸何瑣碎  
久作北州人食此欣已再是時值新歲慶拜乃唯內草率具盤餐約略施粉黛  
舉杯更獻酬各爾祝鮐背咀橘齒病酸目已驚老態豈意未幾年中路苦失配

嘉辰衆所喜悲淚我何耐曩歡今已哀日月不可賴前視四十春空期此身在  
世事都厭聞讀書未忍退過日雖已忘寧捨心久愛何當往京口竹里翦荒穢  
行歌樂暮節薪菽甘自刈

通判遺新柳

園柳發新萸官居雪尚壅君喜持報春衰意非舊勇芳菲即可插予髮慚種種  
送孫曼卿鑠廳赴舉

舊果豈非好截樹接新枝欲變明年花曾不根本移屈彼自然性曰茲山木卑  
子才實豔富久爲人所推固當升高科我送作此詩

依韻和劉察院送客回過渙水馬上有作

車騎踏春堤倏然思如濯望驄人自避解凍魚方樂拏流古樹根跨岸枯薪約  
煙雲澹澹天嫩綠生叢薄

不知夢

夢中不知夢但謂平常時相與共笑言焉問久別離有贈若有得及覺已失之

人生在世間何異夢寐爲

郊城道中

行行溪水邊鏡碧不可唾安知有沫流草木多偃臥潭鳥瞥復沒灘沙淨如簸  
不獨荊州民居險頸癭大

汝州後池聽水

春水泉脈動分巖臨澗源津津出石齒泠泠縈竹根猶和野雲翠復落郡池喧  
心靜意自適不知朝市煩

春鳩

鳴鳩識陰晦聒聒雌逐雄鵲巢汝得共可蔽雨與風春物况不晚杏萼已半紅  
試看池館間燕雀隨西東

留別汝守王待制仲儀

來時柳未芽去見杏吐萼相歡無幾日節候已非昨邂逅二十年三遇三睽索  
會合信難常焉用計疎數

夢覺

夕夢多夢之覺來遂成憶憶子生平時事往無一得信若此夢寐豈不見顏色  
復存來告言言虛音匪默是覺曷爲真覺夢可以惑

汝州

主人少聽我爲言風土殊美哉面有顙生此頸若壺噫號無冬夏歲禱無嗟吁  
只憐郡池上不異山林居

逢牧

國馬一何多來牧郊甸初大羣幾百雜小羣數十驅或聚如鬪蟻或散如驚鳥  
或踐麥無根或齧樹無膚牧卒殊不顧抱鞭人民墟欲酒與之飲欲食與之鋪  
日暮卒醉飽枕鞭當路隅茫茫非其土誰念有官租

寄滁州歐陽永叔

昔讀韋公集固多滁州詞爛熳寫風土上下上窮幽奇君今得此郡名與前人馳  
君才比江海浩浩觀無涯下筆猶高帆十幅美滿吹一舉一千里只在頃刻時

尋常行舟艫傍岸撐牽疲有才苟如此但恨不勇爲仲尼著春秋貶骨常苦咎  
後世各有史善惡亦不遺君能切體類鏡照媿與施直辭鬼膽懼微文姦魄悲  
不書兒女書不作風月詩唯存先王法好醜無使疑安求一時譽當期千載知  
此外有甘肫可以奉親慈山蔬採筍蕨野膳獵麋鱸膾古來美臯彘今且推  
夏果亦瑣細一一舊頗窺圓尖剝水實青紅摘林枝又足供宴樂聊與子所宜  
慎勿思北來我言非狂癡洗慮當以淨洗垢當以脂此語同飲食遠寄入君脾

衛州通判趙中舍

我久在河內頗知衛風俗沙田多種稻野飯殊脫粟况聞別乘至佇望大河曲  
飲罷何以贈桑條路傍綠

資政王侍郎命賦梅花用芳字

許都二月杏初盛公府後園梅亦芳因思江南花最早開時不避雪與霜主人  
惜春春未晚遂命官屬攜壺觴酒行守吏摘花至素豔紫萼繁於裝天桃穠李  
不可比又况無此清澹香豈辭盡醉對顏色頻艷競黏鬚蕊黃何時結子助調

鼎我心舊職不敢忘

歐陽永叔寄琅邪山李陽冰篆十八字并永叔詩一首欲予繼作因成  
十四韻奉答

我坐許昌塵土中山翠泉聲違眼耳公雖被謫守滁陽日少郡事窮山水東南  
有風西北來忽得書詩連數紙并寄陽冰古篆字字形矯矯龍蛇起其文乃只  
題姓名大曆六年春紙尾報云此篆無人知野僧好事爲公指公留巖下久徘徊  
徊公剔莓苔汲泉洗點畫雖然未苦訛霜侵風剝多皴理公疑鳥迹踏蒼崖山  
祇愛惜將有以雲藏至今不近俗月伴古源清且泚此石公知石不知公與前  
人定知己墨模幾幅許傳玩譬於玦玉終可喜况復爲詩刻其下句奇字峻驚  
山鬼何當少得從公遊爲公揮筆寧非美

依韻答范天民

古今冠佩立朝人多作北山松下塵我愛蟠桃種來久開花結子不由春

樊推官勸予止酒

少年好飲酒飲酒人少過今既齒髮衰好飲飲不多每飲輒嘔泄安得六府和  
朝醒頭不舉屋室如盤渦取樂反得病衛生理則那予欲從此止但畏人譏訶  
樊子亦能勸苦口無所阿乃知止爲是不止將如何

依韻和通判二月十五日雨中

仲春月既望物候恰分中窗聽五更雨花開前日風詩成止酒後病怯舉杯空  
短髮雖然黑心如一老翁

感春之際以病止酒水丘有簡云時雨乍晴物景鮮麗疑其未是止酒  
時因成短章奉答

東風固無迹何處見春歸土逐草心坼雨兼花片飛雖憐柔甲長只恐豔條稀  
君但惜晴景休言止酒非

和永叔琅邪山六詠

歸雲洞

洞深豈不有神物朝朝但見雲飛還雲收雨歇草樹濕澗下流水空潺潺

琅邪溪

枯藤垂溪冰已消溪水濺濺石間亂潭靜鳥呼人渡時鳥驚人語來還散

班春亭

林下鳩鳴坼晴杏田間水漫春溶溶使君固自足風美時傍青山去問農

庶子泉

沙穴石竇無限泉此泉緣底名不滅庶子去來多少年依舊清心共泉潔

石屏路

尋常畫屏多畫山何意此山還作屏峭拂直上幾千尺下有石路莓苔青

惠覺方丈

松門隱者我未識一見君詩如已讀歲月任隨人事遷此身不動雲生壁

宛陵先生文集卷第二十六

宛

陵

集

卷第二十六

七

中華書局聚



宛陵先生文集卷第二十七

答宋學士次道寄澄心堂紙百幅

寒溪浸楮春夜月敲冰舉簾勻割脂焙乾堅滑若鋪玉一幅百錢曾不疑江南  
老人有在者爲予嘗說江南時李主用以藏祕府外人取次不得窺城破猶存  
數千幅致入本朝誰謂奇漫堆閑屋任塵土七十年來人不知而今製作已輕  
薄比於古紙誠堪嗤古紙精光肉理厚邇歲好事亦稍推五六年吾永叔贈  
予兩軸令寶之是時頗敘此本末遂號澄心堂紙詩我不善書心每媿君又何  
此百幅遺重贈吾赧不敢拒且置縑箱何所爲

二月雨後有蚊蚋

春夜一二蚊蚋飛久不見之尙可喜而今稍喧來聒人向後更暖奈爾觜

春寒

春晝自陰陰雲容薄更深蝶寒方斂翅花冷不開心亞樹青帘動依山片雨臨  
未嘗辜景物多病不能尋

答韓三子華韓五持國韓六玉汝見贈述詩

聖人於詩言曾不專其中因事有所激因物興以通自下而磨上是之謂國風雅章及頌篇刺美亦道同不獨識鳥獸而爲文字工屈原作離騷自哀其志窮憤世嫉邪意寄在草木蟲邇來道頗喪有作皆言空煙雲寫形象葩卉詠青紅人事極諛詔引古稱辨雄經營唯切偶榮利因被蒙遂使世上人只曰一藝充以巧比戲弈以聲喻鳴桐嗟嗟一何陋甘用無言終然古有登歌緣辭合徵宮辭由士大夫不出於瞽矇予言與時輩難用猶篤瘞雖唱誰能聽所遇輒瘞聾諸君前有贈愛我言過豐君家好兄弟響合如笙叢雖欲一一報彊說恐非衷聊書類頑石不敢事磨礪

前以詩答韓三子華後得其簡因敘下情

前者報君詩妄說良有以昔予在京師多爲人所詆短章然無工實未甘藝比因君有過褻聊且發憤悱何言敢爲師乃是貴不韙平常遭口語攢集猶毒矢此論苟一出是非必蜂起偶爾道瘖聾多疑已竊指雖恃不欺衷恨未致速死

安得二頃田歸耕苟爲恥誰能事州郡雞狗徒聒耳

過潁橋懷永叔

昔送之官東郡時夜闌對酒風揭屋君今淮海予再過古驛依依老槐綠

槎澗晝夢

誰謂死無知每出輒來夢豈其憂在塗似亦會相送初看不異昔及寤始悲痛  
人間轉面非清魂歿猶共

靈樹鋪夕夢

晝夢同坐偶夕夢立我左自置五色絲色透縑囊過意在留補綴恐衣或綻破  
歿仍憂我身使存心得墮

汝州王待制以長篇勸予復飲酒因謝之

前因飲酒多乃苦傷營衛嘔血踰數升幾乎成病肺上念父母老下念妻兒穉  
不死常抱疴於身寧自貴樊子來勸我止飲良有謂公復遺我詩責我詞甚毅  
指以年齒衰非酒何養氣春飲景可樂夏飲暑可避秋飲心忘愁冬飲暖勝被

一珍做宋版印  
醉歌人不怪醉言人不忌在酒功實多止酒酒何罪假如壽九十今子已半世  
不飲徒自苦未必止爲利胡汨妄與真恐乖達者意屈原吟澤畔方悟獨醒累  
子居今之時安免人病議是以告子勤子守亦謬計我讀纔一過不覺顏起媿  
自茲願少飲但不使疾熾書此以謝公公言誠有味

陪王待制清涼院觀牡丹賦詩

公言牡丹盛未覩古人詩品衆自爭貴葉多方見奇名因他姓著色爲別根移  
華髮我何感洛陽年少時

和王待制牡丹詠

誰移洛川花一日來汝海濃澹百般開風露幾番改傍欄人自醉惜翦春有待  
使君方少年共賞喜我在

洛陽牡丹

古來多貴色歿去定何歸清魄不應散豔花還所依紅棲金谷妓黃值洛川妃  
朱紫亦皆附可言人世稀

汝州登慈寺閣望嵩岳

崢嶸古寺閣蒼山插晴簷少室出天外巍巍何尊嚴王都在其下風露國所霑  
日暮飛雲歸已失中頂尖

睡意

少時好睡常不足上事親尊日拘束夜吟朝誦無暫休目眚生瘡臂銷肉今踰  
四十無所聞又況喪妻仍獨宿虛堂淨埽焚清香安寢都忘世間欲花時啼鳥  
不妨喧清暑北窗聊避燠葉落夜雨聲滿階雪下曉寒低壓屋四時自得興味  
佳豈必鏘金與鳴玉萬事易厭此不厭真可養恬無天促且夢莊周化蝴蝶焉  
顧仲尼譏朽木人事幾不如夢中休用區區走榮祿

三月十四日汝州夢

我歸十九年飲不負升斗昨夕夢見之謂須多置酒雖慰魂來言定不復入口  
俟當返吾廬且爲貯罌缶夢寐何敢欺從笑愚所守

再別仲儀

前別歲月遠道同情相親三旬忽相見愈厚不厭頻昔云思數面今無媿古人  
睠然東去懷紛若陌上塵

夕發陽翟

我行陽翟道暮雨原上急麒麟冢相望霹靂碑下立農耕傍山去鬼火迸林入  
莫問泉下人馬墮衣更濕

缺月

缺月來照屋角時西家狗吠東家疑夜深精靈鬼物動僂窳古莽無風吹

道次靈井

井面水不動傍分龍鱗激泉氣時生漚上湧光的爍深苔翠堪染石底清可覲  
旱歲或來祠彈絃屬靈覲

答江十鄰幾

蔡州非所遐作書素所嬾春風領燕來得君詞款款燕迴須在秋此報莫言緩  
何日見愁康重彈廣陵散

喜謝師厚及第

時第一甲二十八人君名在二十三

宿雨洗新綠朝日初聞鶯風從天門來吹下玉簡名列星二十八經緯何縱橫  
南方朱鳥目光燄令人驚其餘撒沙衆龜鼈瓜瓠明吾欣安石後世世有令聲  
孟夏二日通判太博惠庭花二十枝云是手植因以爲答

前日已春盡夏卉抽嫩青唯君所植花餘紅猶滿庭常惜畏景逼贈未及飄零  
欲插爲之醉但慙髮星星

水丘於西湖得活鯽魚三尾見遺余頃在襄城獲數尾時歐陽永叔方  
自乾德移滑臺留待其至且有詩後居京師蔡仲謀者亦有以贈乃思  
襄時所留復有詩於今三得三詠之矣

襄城得圓鯽留以待吾友大梁又得之始憶終按酒今君復持贈重念滁陽守  
滁陽石瀨中此物豈無有二得實嘉遺我敢自私口口且不爭甘事亦難利誘

和江鄰幾見寄

自此許州起慶曆六年夏盡其年終

清風當晝起吹我庭下槐軒軒枝上葉碎影亂綠苔左右無人聲時有啼禽來

啼禽感所懷其音一何哀思歸無曉夕血滴山榴開曰予當是時爲之腸九迴  
江子方謫官復有擬古才遠寄平澹辭曷報瓊與瑗

雀奪燕巢生四雛

去年燕營巢銜泥入我廬秋歸春復來橫被雀所居翩然去不較義者欲與除  
毀覆必傷卵愛彼此何疎乃竢長黃口逐之寧曰紓果得生四雛卉色頭戢如  
後當還燕巢穿屋不害余

和歐陽永叔啼鳥十八韻

南方窮山多野鳥百種巧口乘春鳴深林參天不見日滿壑呼嘯誰識名但依  
音響得其字因與爾雅殊形聲我昔曾有禽言詩粗究一二啼號情苦竹岡頭  
泥滑滑君時最賞趣向精餘篇亦各有思致恨未與盡衆鳥評君今山郡日無  
事靜聽鳥語如交爭提壺相與來勸飲戴勝亦助能勸耕我念此鳥頗有益如  
欲使君勤以行勸耕幸且彊職事勸飲亦冀無獨醒杜鵑蜀魄哭歸去小人懷  
土慎勿聽城頭春鳩自謂拙鵲巢輒處安得平高窠喬木美毛羽哢吭葉底無

如鶯口中調簧定何益下啄蚯蚓孰曰清自餘多類不足數一一推本煩神靈  
我居中土別無鳥老雅鸚鵡方縱橫教雛叫噪日羣集豈有勸酒花下傾願君  
切莫厭啼鳥啼鳥於君無所營

和永叔桐花十四韻

湛湛碧井水其上有梧桐春隨井氣生白花飛濛濛曉枝滴甘露味落寒泉中  
結實待瑞羽歲晚半枯空桐既無鳳皇井豈潛蛟龍乃知至神物未易令人逢  
當時集潁川偶值黃次公次公入爲相此鳥曷不從遂使神鷓雀竟用奇怪窮  
我言非毀古欲遵平直蹤我願二千石但使德化隆有桐鳳不來於桐無媿容  
有鳳政不舉於鳳何爲崇答君桐華篇聊以發我衷

和王仲儀詠癭二十韻

汝水出山險汝民多病癭或如雞精滿或若猿嗛並女慚高掩襟男大闊裁領  
飲水擬注壺吐詞侔有鯁樗里既已聞杜預亦不幸秦人號智囊吳瓠繫狗頸  
臞臞常住頤伶仃安及脛只欲仰問天無由俯窺井挾帶歲月深冒犯風霜冷

厭惡雖自知剖割且誰肯不唯羞把鏡仍亦愁弔影內療煩羊羴外砭費鍼穎  
在木曰楠榴劓之可爲皿此誠無所用既有何能辟音屏 膨臍廁無首臃腫異  
臚頂難將面目施可與胎胞逞賢哉臨汝守世德調金鼎氓俗雖醜乖教令日  
脩整風土恐隨遷晨昏憂屢省儻欲便慈顏名城不難請

憶吳松江晚泊

念昔西歸時晚泊吳江口回堤遡清風澹月生古柳夕鳥獨遠來漁舟猶在後  
當時誰與同涕憶泉下婦

使者自隨州來知尹師魯寓止僧舍語其處物景甚詳因作詩以寄焉  
驛使話漢東故人遷謫處所居雖非居有樹卽嘉樹日膳或雞犬時蔬多筍芋  
夜堂蛇結蟠晝戶鵲噪聚著書今未成愛靜已得趣予欲訪其人炎蒸未能去  
夏日對雨偶成寄韓仲文昆弟

日日城頭雨還添湖上波窗中人自聽門外潦應多不畏車生耳唯愁麥化蛾  
吾廬無所有頻看壁間梭

憶將渡楊子江

月暈知天風舟人夜相語平明好挂帆白浪須出浦此身猶在吳歸夢預到楚  
今日念同來吾妻已爲土

秀叔頭蝨

吾兒久失恃髮括仍少櫛曾誰具湯沐正爾多蟣蝨變黑居其元懷絮宅非吉  
蒸如蟻亂緣聚若蠶初出鬢搔劇蓬葆何暇嗜梨栗翦除誠未難所惡累形質  
穉子獲雀雛  
屋頭小雀雛氣力苦未長乘暄學調羽忽挂蜘蛛網其母不能救啁啾空下上  
乃爲人所探不是蟲絲枉

丙戌五月二十二日晝寢夢亡妻謝氏同在江上早行忽逢岸次大山  
遂往遊陟予賦百餘言述所覩物狀及寤尙記句有共登雲母山不得  
同宮處仿佛夢中意續以成篇

晝夢與予行早發江上渚共登雲母山不得同宮處何嗟不同宮似所厭塗旅

珍傲宋版印  
樹杪俯烏巢，坼殼方仰乳。雄雌更守林，號噪見飛鼠。鼠驚豎毛怒，裊枝如發弩。逡巡吼風雲，遠望射巖雨。東南橫虹霓，萬壑水噴吐。下尋歸路迷，欲暮各愁語。忽覺皆已非，空庭日方午。

蜜

燕銜芹根泥，蜂掇花上蕊。帶雨兩股飛，所取日能幾。調和露與英，凝甘滑於髓。天寒百蟲蟄，割房霜在匕。燕已成雛歸，蜂憂凍餒死。乃見萬物心，多爲造化使。王德言自後圃來問疾，且曰圃甚蕪，何不治。因答。

幾日不行圃，野草過人頭。客怪苦荒穢，誰與持鉏鉤。雖然自薶薶，抱病方告休。卽當秋風高，埽蕻將遲遊。

夢覩

閉目光不揚，夢覩良亦審。旣非由目光，所見定何稟。白日杳無朕，冥遇嘗在寢。此恨不可窮，悲淚空流枕。

悲書

悲秋快於刀內割肝腸痛有在皆舊物唯爾與此共衣裳昔所製篋笥忍更弄  
朝夕拜空位繪寫恨少動雖死情難遷合姓義已重吾身行將衰同穴詩可誦  
合流曹光道惠鉅李知其炎酷中有此味味亦可樂也輒以詩寄

頽傍成蹊李其實小於拳誰知皴枝瘦生此紺玉鮮摘以筠梢籠沉以石根泉  
濛濛粉未落粲粲葉猶連蔭樹咀甘液安有苦熱煎報君惜茲樂時詠逍遙篇  
深夏忽見柰樹上猶存一顆實

纍纍後堂柰落盡風雨枝行樂偶散步倚杖聊縱窺林葉隱孤實山鳥曾未知  
物亦以晦存悟茲身世爲

病癰在告韓仲文贈烏賊醬生醅醬蛤蜊醬因筆戲答

我嘗爲吳客家亦有吳婢忽驚韓夫子來遺越鄉味與官官不識問儂儂不記  
雖然苦病癰饒吻未能忌

寄光化退居李晉卿

久無歸田人今喜子去祿移家漢水濱日見漢水綠川鱗可爲饕山毛可爲藪

竟歲厭往還行堤樂風俗青巾編上郎漆鬢顏如玉倚檣臨落照獨唱江南曲  
聽若在江南歡然自爲足我心雖有羨未遂平生欲更期畢婚嫁方可事巖麓  
買山須買泉種樹須種竹泉以濯吾纓竹以慕賢躅此志應不忘他時同隱錄  
汝南江鄰幾云鄖南並淮浮光山有張隱居種松檜於其上養母甚孝  
時有猛獸馴庭中又郡西麻田山土沃泉美久不墾有劉叟者闢而居  
之近董氏黃氏欲買土爲鄰故江有慕之之作予輒次其韻

峨峨淮山上中有隱者棲不知松檜下但見虎豹蹊人羣固已遠樵客入猶迷  
且奉采蘭養應無抱玉啼麻田異麻源石路春無泥高士不近俗更在西嶺西  
石泉飲自足深壑無人躋不學淮南王安問犬與雞二人逍遙性所樂唯杖藜  
復有來慕鄰他年寧答嵒願君且勉職聖世未易睽

魏文以予病渴贈薏苡二叢植庭下走筆戲謝

媿無相如才偶病相如渴溼水有丈人薏苡分叢苡爲飲可扶衰餘生幸且活  
安知惡己者不願變野葛

宛陵先生文集卷第二十七



宛陵先生文集卷第二十八

和資政侍郎湖亭雜詠絕句十首

遠山

插雲千萬重一望不可暫前嶺與後峯翠色濃復澹

蓮塘

不畏塘雨急鈿葉自相遮紋禽忽驚去衝落波上霞

漁潭

煙潭深不極鑑碧無菱花日脚下波心澄江見魚鰕

稻畦

淺淺碧水平青青稻苗長偏知楚客愛白鷺飛下上

苔徑

林間夏雨滋復有斜陽照綠淨不搖風從教春草笑

流泉

石齒嚼寒聲粼粼縈曲處有時浮落英又過城根去

小橋

伐桂向芳洲跨波灣勢小時愛游人渡游人在林杪

漁艇

古木剝爲舟野藤牽作纜釣人寒雨中遠望煙蓑暗

採菱

紫角菱實肥青銅菱葉老孤根未能定不及寒塘草

汀鷺

食魚日已晚矯翼煙際還不與鴈鶩競風標亦自閑

王德言夏日西湖晚步十韻次而和之

雨餘殘照在塘靜獨行行荷積水珠重天收霓帔輕倦禽依臥柳聚蚓帶坳泓  
帽側林枝礙裳褰野蔓縈芡韜園客剝蒲刃水祆驚泱泱流泉活濛濛夕霧平  
榴房生蠹落蛛網害蟲成坎甬無時怒渾魚自樂清高臺從獸窟古道有根橫

寫景未能就娟娟月上城

新沼竹軒

作軒仍見竹瀟灑排青幢斜烏與落月靜影畫寒窗光沒影亦沒激水自淙淙  
夜深猶讀易誰更憶清江

麥門冬內子吳中手植甚繁鬱罷官移之而歸不幸內子道且亡而茲  
草亦屢枯今所存三之一耳遂感而賦云

香草葉常碧本生巖澗邊佳人昔所愛移植堂堦前自吳北歸梁復以盆盎遷  
佳人路中死此草未忍捐與我日憔悴根不通下泉勤勤爲澆沃稍見萌穎鮮  
終當置墳側長茂松柏埏

野鴿

孤來有野鴿觜眼肖春鳩飢腸欲得食立我南屋頭我見如不見夜去向何求  
一日偶出羣盤空恣嬉遊誰借風鈴響朝夕聲不休飢色猶未改翻翅如我仇  
炳哉有靈鳳天抑爲爾儔翕翼處其間顧我獨遲留鳳至吾道行鳳去吾道休

鴿乎何所爲勿汗吾錯甌

孫曼叔暮行汴上見鶻擊蝙蝠以去語於予

野鶻性決裂所食唯獍飛小鳥不入眼拳發強弩機日暮未有獲豈擇大與肥  
瞥下攫蝙蝠去以填腸飢休笑老鴟飽銜得腐鼠歸

寄宋中道

爾書我不答爾怒從爾罵天馬新羈時氣橫未可駕儻我一日死爾豈無悲咤  
唯知道義深小失不足謝

梨花憶

欲問梨花發江南信始通開應寒食雨落盡故園風白玉佳人死青銅寶鏡空  
今朝兩眼淚怨苦屬衰公

畫竹枝扇

石上老瘦竹忽在紈扇中執之意已涼不待搖清風小節未見粉淚痕應合紅  
日將炎暑退畏蠹生秋蟲

兩日苦風思江南

擺磨萬木聲朝吼暮不止吹沙作雲飛物狀顏色死還念江上山落瀑鳴幾里  
茅茨松竹間翠的門前水下窺石穴魚出入數十尾是時殘照微古路誰家子  
羸馬入煙林區區何若此昔笑今已迷薄官正如彼何當却歸來臨流重洗耳  
我心明月在相照異盈缺

資政王侍郎南京留守

百世興王地乘時已建都離宮萬戶寄京邑四方模尹以名臣擇朝仍宿哲俞  
果資卿屬重將俾國人蘇迎餞車交轍奔馳士結塗許嗟人惠奪宋遲德恩敷  
日月天闈近山河地勢趨壓城隋柳密開苑漢池枯文物希前代謳歌得大儒  
鄒枚跡雖古賓從豈今無

送通判太博

宛

陵

集

卷一十八

三

中華書局聚

相見不在久見久未必親無爲歲月淺豈不膠漆均猶嗟欲別日事壘如排鱗  
安得獨攜酒遠送秋水濱

和韓子華桂花

莫以天下桂皆爲月中物猶言月有兔野豈無狡窟空山桂花多豔色粲然發  
樵客不知貴奈何薪爨屈

宿安上人門外裴如晦胥平叔來訪

胥裴喜我至冒雨夜出城燈前相對語怪我面骨生爲言憔悴志因意多不平  
亦見子頰鬚長黑已可驚知子有所立毛髮隨世情子心且如舊後輩苦前輕  
宋中道失小女戲寬之

宋子失汝嬰苦將造物怪造物本無惡爾責亦已隘且如工作器寧復保存壞  
收淚切勿悲他時多壻拜

刁經臣將歸南徐許子尋隱居之所及亡室墳地因走筆奉呈

欲居江上江試與問京峴常觀鮑家詩心慕已不淺行當卜結廬依農事清畎

傍葬吾先妻同穴晚未免買谷勿險深求岡要平顯松竹應所宜蒿萊預教翦  
我志決不移君言幸須踐

尉氏縣阮籍嘯臺

古城多瘦棘莽莽連荒臺不見長嘯人黃土空崔嵬北顧蓬池上枯廢生蒿萊  
當時思大梁還望已徘徊今我復懷昔豈不傷且哀烏呼有遺響英靈同土灰  
送趙仲寶永興乾耀提舉捉賊

知君少以勇曾向蕭關戰橫刀突虜圍奪馬傷胡箭當時獨免歸猛毅邊人羨  
今來提漢卒寇盜清秦縣未足賀功名功名他日見

合流河堤上亭子

隔河桑榆晚藹藹明遠川寒漁下灘時翠鳥飛我前山藥植瑣細野性仍所便  
令人思濠上獨詠莊叟篇

早至穎上縣

夜發曉未止獨行淮水西明知寒草露暗濕瘦驄蹄半滅竹林火數聞茅屋雞

秋天畏殘暑不爲月光迷

欲陰

鸚鵡知天風鶉鴣知天雨塗路厭塵昏車馬煩泥阻陰仍老易覺體質預辛楚  
安坐與壯年慎忽忘酒脯

正陽驛舍夢鄭并州寄書開之卽三山圖也

我來清淮側夢得鄭公書開書一把玩乃是三山圖山形雄且邃筆畫簡而疎  
紙幅不盈尺萬仞勢有餘卷置懷袖中意獲寤已無

新婚

前日爲新婚喜今復悲昔聞中事有託月下影免隻慣呼猶口誤似往頗心積  
幸皆柔淑姿稟賦誠所獲

登舟

向起風沙地暫假烏榜還浩然起遠思欲與魚鳥閑景目洗已清詠句稱且慳  
時看秋空雲兩意濃澹間

諭鷗

翩翩沙上鷗安用避漁舟  
漁人在魚利何異爾所求

釣蟹

老蟹飽經霜紫螯青石殼肥  
大窟深淵曷虞遭食沫香餌與長絲  
下沉寧自覺未免利者求  
潛潭不爲邈

取蟻

東灣暖無沙有蟻淵泥下輕舫復翠竿  
預致曾誰捨剗肉不知數持爲楚鄉鮓  
耆味固足珍況亦椒橙假

潁水費公渡觀飲牛人

渡口飲牛歸邨墟夕陽裏黃犢未及羣  
抱帶過寒水利心乃如仁耕領破不止  
當時彼何高獨能譏洗耳

潁水

潁水苦流瀑淺平秋與冬岸深開地勢  
底碧寫天容道在隨灣去邨淫盡日逢

迷魚是潭曲寧見窟蛟龍

打魚

插葦截灣流寒魚未能越安知罟師意設網遮其闕不須芳餌懸何待清歌發  
所獲勝綸竿寧聞憂澤竭

八月就湖上會飲呈晏相公

明當是重九黃菊還開不先將掇其英秋逕未能有頽齡無以制但不負此酒  
紅頰誰使歌公憐牛馬走

九日擷芳園會呈晏相公

今日始見菊雖見未全開猶勝昔無酒持望白衣來破頽浮金英雜蟻已盈杯  
何必探丹萸結佩上高臺自不媿佳節安聽飛鴻哀

謝晏相公

刻意向詩筆行將三十年嘗經長者目未及古人肩昔慕荀文若多稱王仲宣  
今慙此微賤重辱相君憐

道中謝晏相公寄酒

頽泥墨印幾壺醪將慰窮塗阮步兵一夜臨流對明月舉杯愁聽鴈來聲

水苔

深苔何所若苦詠費毫尖繞繞水仙髮茸茸蛟客顙綠縈秋石淨嫩值翠篙黏  
尚芊參差荇薄言無此嫌

新鴈

塞鴈與寒來夜落汀洲宿泊船人不寐月下聲相續

依韻和晏相公

微生守賤貧文字出肝膽一爲清頽行物象頗所覽泊舟寒潭陰野興入秋蒹  
因吟適情性稍欲到平澹苦辭未圓熟刺口劇菱芡方將挹溟海器小已漱澶  
廣流不拒細媿抱獨慊慊疲馬去軒時戀嘶芻秣減茲繼周南篇短橈寧及艦  
試知不自量感涕屢揮摻

以近詩贄尚書晏相公忽有酬贈之什稱之甚過不敢輒有所敘謹依

韻綴前日坐末教誨之言以和

嘗記論詩語辭卑名亦淪

公曰名不盛者辭亦不高

寧從陶令野

公曰彭澤多野逸田舍之語

不取孟郊

新公曰郊詩有五言一句全用新字

琢礫難希寶噓枯彊費春今將風什付可與二南陳

塗中寄上尚書晏相公二十韻

驚鷗入林鴉亂飛舞空落葉相追隨秋權摧物不見迹但使萬古生愁悲登山

臨水昔感別身作旅人安得宜單舟匹婦更無婢朝餐每媿婦親炊平生獨以

文字樂曾未敢齒貧賤為官雖寸進實過分名姓已被賢者知疎愚生不謁豪

貴守此退縮行將衰穎州相公乘道德一見不以論高卑久調元化費精力猶

且未倦刪書詩唐之文章別蕪穢纖悉寧有差毫釐謂其耽學可與語便語淵

奧祛倭疑浮言近意不歷口直欲海窟挈蛟螭再拜膝前荷勤誨垂橐捆載歸

忘飢解艇水驛無幾舍新詩又遣牙兵持上言行李覽物景聊可與婦陳酒厄

下言狂斐頗及古陶韋比格吾不私相公貴且事翰墨我輩豈得專遊嬉今將

蒿芹薦俎豆定亦不以微薄遺嘗令有詠無巨細當因川陸舟車貽日對順流

思疾置老魚姦怯潛鱗鬣

舟中夜與家人飲

月出斷岸口影照別舸背且獨與婦飲頗勝俗客對月漸上我席暝色亦稍退  
豈必在秉燭此景已可愛

舟中行自採枸杞子

野岸竟多杞小實霜且丹繫舟聊以掇粲粲忽盈盤助吾苦羸茶豈必採琅玕  
自異驕華人百金求祕丸昔聞王子喬上帝降玉棺此焉卽不免但願在世安

蔡河阻淺

陸乏百鈞駝水假孤艇進頽苦灣灘長曲折劇篆印蔡方阻淺涸寸步出慳吝  
膠舟看在前暗磧疑難慎誰能使稟盪空自思禹濬丈夫少壯時必在馳驅駿  
黃駁

維舟飯孤邨隔岸見黃駁瘦牧正苦飢瘡鳥復下啄閔心無柘彈投塊徒自數  
力小不能中汗顏慙且渥

入澤王河口

遠水路已別古汭未窮源定知前山雨瀑泳至且渾暗生秋草下稍復夏潦痕  
更去待月上猶應可到門

西華逢李令子翼

適從潁水歸道逢西華長不見二十年顏鬚我非曩君問洛陽日舊友多泉壤  
更別如前時應復少吾黨

合流值雨與曹光道飲

秋風號衰林秋雨阻歸客賴有故時交舉杯聊岸幘談兵與論文曾不涉陳迹  
必竟無所施醉去思泉石

寄送謝師厚餘姚宰

我從淮上歸君向海澨去安知無幾舍邂逅不相遇頗知飛空雲到月不得附  
月行既不留雲亦值風故誠知會合難豈是忘所赴我雖躡新屨心不捨舊屨  
誰謂若世人食瓜思瓠君南我起北日見陽鴈度茲欲遠寄音鴈行高且遠

但誦金石言於時儻無忤

李密學遺苔醬脯云是自採爲之

溪流寒且急岸草已彫摧石髮尙堪把江人會不來誰將烏榜去留採碧潭隈  
持作吳鄉味能令案淥杯

宛陵先生文集卷第二十八

宛陵先生文集卷第二十九

陽翟縣城凝嵩亭

西北望嵩色，憶上大室時。陟彼已不淺，坐此安能知。今誰絕壁下，但見前峯危。正與曩未異，日存迹焉追。

王仲儀寄鬪茶

白乳葉家春，銖兩直錢萬。資之石泉味，特以陽芽嫩。宜言難購多，串片大可寸。謬爲識別人，子生固無恨。

次韻和王道損風雨戲寄

小雪纔過大雪前，蕭蕭風雨紙窗穿。而今共唱新詞飲，切莫相邀薄暮天。

鬪飲鶉孫曼叔邀作

脫命秋隼下，鳴鬪自爲勇。爭雄在數粒，一敗勢莫擁。慙將縮袖閒，懷負默而拱。勝且勿苦欣，猶驚辱與寵。

和道損欲雪與家人小兒輩飲

陰雲濃壓野風獵樹高鳴寒禽並枝立頗以見物情目前兩穉子爲慰豈異卿  
欲置一壺酒且獨對婦傾

韓持國邀賦鬪山鵲

俗有巧鬪心畜此巧鬪禽搏擊無迅節爪觜自相侵胡能知遠人角勝合百金  
鳳皇安在哉從此望丹岑

依韻和酬韓仲文昆季聯句見謝

予前與道損游西湖  
淨居堂因至其第

冬日晴且暖林塘思淨居住與都未盡遂經韓氏廬韓氏兄弟賢各各趨異塗  
吾儕與之游何異田蘇俱經疑反此質學陋慚無餘況茲諸少年高論傾國都  
以及治民術縱橫無所拘又涉方外說於道曾不殊詩評杜兼李字法褚與虞  
啜茗豈非好啗栗彊爲娛久厭官局檢聊休體質舒次第極言笑左右排圖書  
終日欣博約貶異正則扶所賴存汎愛未以我爲愚持歸接士論頗亦類販沽  
復聯長詩來味若餐瓊腴其辭多自損以欲大厥譽顏子乃庶幾仲尼稱弗如  
不厭會遇頻雲龍實相須最和躡麟趾舉步未敢渝

種藥

雲外陽翟山實與嵩少接山中採藥人能自辨苗葉當須斷其根以遂素所愜  
野穽包舊土遠置風雨捷故本含新芽枯莖帶空茨植雖乖地勢培壅得專輒  
冬誰論臭香春定引蜂蝶豈唯識草木庶用補羸茶

答韓六玉汝戲題西軒

吾軒今於水吾居易爲足誰與哦其間風窗數竿竹雖無泉石清尙不媿茅屋  
所樂違俗暄此趣大已熟

和韓五持國乞分道損山藥之什

不種東陵瓜不利千畦韭山藥數十本帶土移野叟故葉萎未醒傷根亦何咎  
旣爲君子好豈與騷人負騷人比畫工丹青出其口欲分欄下苗馳奴仍置簞  
主人可無吝所尙非獨有從茲各勤灌肯在園蔬後今雖勝曝蓄畢意資玉白  
人事固已然祕方看繫肘

送長陵清辨師歸寧

山房古柏暗近在漢陵邊天供不爲樂母心常所懸朝塗髮根冷暮野鳥行先  
子道豈殊衆誰云絕世緣

依韻和李密學會流杯亭

園林固足勝景著必人賢將泛杯中物遠分湖水泉來從百花底轉向衆賓前  
易醉緣多病陪公媿少年

依韻和韓子華陪王舅道損宴集

韓氏兄弟八人而七人在坐

雲低未成雪寒氣已侵席凍醪傾白濁乾果列紫赤風微時破面亭敞宜張帟  
來望野興通古城何額額邀射弓鈞開破的翦羽白坐中聲喧呼不覺屢傾幘  
醉驚一發功誰許百金易非等將帥能聊將賓友適中酒作暴謔心親語多劇  
吾徒固不羈安可限常格去已忌無俗流起酌驚臧獲入龍觀諸韓頭角相戢迫  
參差玉峯前愛慕不知夕誰嗟短景移能使各情釋爲賀主人翁賢甥無久隔  
此會舉世稀頻頻奚所惜

飲韓仲文家

飲酒衆所嗜未若朋會樂終日不爲荒於時豈多作坐客十餘人七子實棣萼  
杯行發嚴令孰不資善謔巧詞劇探捷辨機如弩曠醉舌彊且遲罰觥奚屢酌  
正言訐詭諛簡禮去酬酢迭嘲果與蔬相呼花間藥是非不親親笑語何落落  
夜歸歡有餘孩穉扶仍噓

玉汝贈永興冰蜜梨十顆

梨傳真定間其甘曰如蜜君得咸陽中味兼冰作質遺之析朝醒亦以蠲煩疾  
吾兒勿多嗜不比盤中栗

王道損贈永興冰蜜梨四顆

名果出西州霜前競以收老嫌冰熨齒渴愛蜜過喉色向瑤盤發甘應蟻酒投  
仙桃無此比不畏小兒偷

寄題滁州豐樂亭

泠泠幽谷泉近在青峯下使君去窮源林外留車馬一徑穿篠深蔽日復瀟灑  
行盡逢泓澄翠影如可瀉雲樹陰其傍造物將有假引水開石池結宇覆碧瓦

乃知愛玩心朝夕未忍捨近移溪上石怪古蒼蘚惹芍藥廣陵來山卉雜天冶  
春禽時相鳴賓從不應寡欲問淮南趣還思洛陽社勝事已不辜吟觴無倦把  
和韓仲文西齋閑夜有懷道損舅及予

冬日每苦短方愛夜漏永積雲寒擁齋徘徊延月影獨能懷親友出門見參井  
是時發清詠筆若天驥騁

前此諸韓來飲獨仲連以小兒病不至明日仲連有夜坐見懷之什因  
成答章

夜與賢豪飲方聞默坐時我斟相樂酒君詠寄來詩莫恨殊喧寂真緣篤愛慈  
何當因雪興過此未應遲

奉和子華持國玉汝來飲西軒

我誠官局冷終日事靡括每耽古人書似與世俗闊同道三四人來過慰飢渴  
迭相陳語言曾未厭刀俎自中將過晡留飯具麤糲薄酒繼以斟不覺寒日沒  
愚妻方罷沐供飲媿倉卒凍婢昧煎和親調首忘髯每食各驚顧誰謂不黔突

倦僕暖吾薪飢馬飽吾秣馬無歸嘶聲僕有顏色活安穩不知疲明釭仍爲撥  
醉言實無次曾未窮本末諸君竟相先出口論莫奪復云天地間此能有幾達  
我聞顏汗下恐後諍難遏其間常有言但未見疵齷終當輕有若悔目已屢眦  
莫八反 信哉羣玉林豈得依朽枿吾心爲之然收舌如斷割寄音謝豪俊茲蘊只  
主撮

和道損喜雪

密雪已迎臘隨風來拂巾偏知寒夜屋不管醉歸人暗積空庭合偷裝衆樹新  
沃田將望歲壓癘且忘貧薄厚曾無意飄揚似有因既能先覆物乃見未饒春  
作陣從天落何功得地均暫欣供一賞惜逐馬蹄塵

答持國遺魴魚皮膾

海魚沙玉皮翦膾金齏醎遠持享佳賓豈用飾寶劍予貧食幾稀君愛則已汎  
終當飯葵藿此味不爲欠

與仲文子華陪觀新水碓

湖堦此興塏許俗見仍稀激射聊因勢回環豈息機水如巖下過人悟雪中歸  
坐想韓夫子心應不道非

與道損仲文子華陪泛西湖

冰消湖已綠渺渺鴨頭春船學吳兒刺吟稀楚老新對山憐去鳥隔樹識遊人  
誰念滄江上風柔採白蘋

和持國石蘚

石根雲常蒸老蘚密於毯濕翠連澗陰淨綠繞巖坎不異泉上芹丰茸猶可擊  
安知山中客遠寄趣已澹

同諸韓飲曼叔家

富貴豐盤餐日可侑清角不與賢者俱飽食何所學吾友雖日貧邀賓不辭數  
質衣爲酒肴出論輕管樂其饌精且甘刀几孰親握是時魯苦眩引去意頗確  
羸馬雪中歸醉醒誰復較

和仲文西湖野步至新堰二首

泱泱堰根水層層湖上田寒魚猶著底白鷺已飛前履惜春泥滑衣從澀蔓牽  
偶來成野望歸興自留連

潭上水容暖野中寒吹橫行塘人已晚吟步日難更凍地坼枯龜斷冰流破鏡  
王都且不遠樂此林泉性

送韓奉禮

崇道

將欲侍親去獨要予贈言世風還自有文體不須論稍愛春波急微生野岸根  
行舟寧覺遠幾日到都門

諸韓來會別

諸韓行有日別思更依依獨歎從予少還看似子稀呼童聊奏酒洒水爲開扉  
蘇合染裘美雪中闐闐歸

送仲文

三年不出戶孝行閭井聞近俗遂知化豈非由所薰御琴趨國門何必長守墳  
美哉若君子忠可移於君

送子華

識君雖恨晚說詩屢解頤吾徒固難合所合終不移冒寒躍馬來且言行有期  
河上冰始坼輕櫂去未遲

送仲連

別緒如亂絲欲理還不可却悲嬌女詩寧戀更效左是時遠道懷紛紛上歸舸  
憐君正如此豈任風雨倭

送玉汝

談笑去拘忌乃見相與深風騷得往返但見非知音明日車馬北豈不動離襟  
春風靡蕪綠別恨生遙岑

玉汝遺橄欖

南國青青果涉冬知始摘雖咀澀難任竟當甘莫敵來從萬里外或以苦口擲  
所投同木瓜欲報無瓊璧

和王待制出郊馬上口占寄兄損道次韻

日暖寒郊不起風使君車騎出城中遙知望處思兄弟鴻鴈連連下遠空

寄題蘇子美滄浪亭

聞買滄浪水遂作滄浪人置亭滄浪上日與滄浪親宜曰滄浪叟老向滄浪濱  
滄浪何處是洞庭相與鄰竹樹種已合魚蟹時可緝春羹茱白菘夏鼎烹紫蓴  
黃柑摘霜晚香稻炊玉新行吟招隱詩嬾戴醉巾憂患兩都忘還往誰與頻  
昨得滁陽書語彼事頗真曩子初去國我勉勿迷津四方不可之中土百物淳  
今子居所樂豈不遠埃塵被髮異秦伯結客非春申莫與吳俗尙吳俗多文身  
蛟龍刺兩股未變此遺民讀書本爲道不計賤與貧當須化閭里庶使禮義臻

送河東轉運劉察院

塞郡屯師久飛芻始得人權傾擁旄將詔輟繡衣臣舊里過京洛辭家渡盟津  
紫裘蘇合染驄馬玉環辰榆莢關頭兩梨花谷口春高車方陟險豐膳暫違親  
山勢北臨岱地雄西隔秦行臺知不遠能使問安頻

依韻和玉汝對月見懷西軒

珍傲宋版印  
坐見沙頭月復憐衣上輝正如從我飲還欲照君歸相逐影徒是共嗟歡已非  
夜深依岸落寒色入傷違

依韻和玉汝舟中見懷

遙聞出舟望始愛川原廣春冰未破時旋拉寒篙響鳴鴈似相隨遠日聊一仰  
能知狀物工把筆獨見想

同道損持國訪孔叅處士

高廬當大道節士不肯過窮巷獨秉德車馬一何多勢力走諛詔禮義服委佗  
是以被褐人長甘北山阿曰今豈有媿漁上有行歌

二月十四夜霜

欣欣東園杏忽值春飛霜粲然彼繁英萎若出沸湯既能與之榮而復使之傷  
向來肅殺時已共百卉黃今同草吐心不似草心長天理固難測誰要必其常

送謝師直南陽上墳

躍馬清明前行將拜孤壟松吹送悲聲緣纓淚如湧三歲宰南方奠罍阻親捧

山下獨徘徊雨來雲萋萋

奉和持國曼叔方叔送師直歸馬上同賦之什

郭外桃李花赤赤復白白爲君歌古曲行子在南陌衆人各已歸春風送無迹  
安知春風送到處花當客我病出獨難併請春風謫此情無遠近千里不能隔  
和韓子華寄東華市玉版鮓

客從都下來遠移東華鮓荷香開新包玉麴識舊把色潔已可珍味佳寧獨捨  
莫問魚與龍予非博物者

喜雨

冬涉春無雨侵晨忽霽然燕曾知社後雷未發聲前細濕林花暗輕霑土脈全  
看看一百五風勢莫狂顛

送王判官之江陰軍幕

易知

往時初渡江頗愛江南美誰知坐臥間思及烟波裏絮逐鯿魚絲鼓添蒹線紫  
君行語風物到日應相似

送王龍圖源叔之襄陽

忽驚車駕臨乃是荊州長登堂語出處陳事猶夢想別逾二十年相遇今始兩  
爵位異禮數齒髮可下上但問我何有而獨不愛曩敢告守拙愚此道未嘗枉  
行當至峴山羊公存廟像簫鼓有時奠道德其可仰

依韻和持國新植西軒

開地臨廣衢崇崇十餘畝新軒稍偏北治圃亦西西盎中植菡萏水不過升斗  
小桂未得地驗活徒槁朽上乏幽禽啼下多穴蟻走藥苗雖無補欲比山中有  
澆灌同一時萌芽或先後松株不滿尺廊廟色已厚稟性久且堅物理豈無偶  
椽櫚仍未大散葉纔八九夏綠與冬青各各自爲友吾軒還處西脩竹爾後取  
兩莫論是非但可吟對酒

送師直之會稽宰

其兄在  
餘姚

天下風物佳莫出吳與越新罷吳官來又隨越舸發連宰吳越間皆邇蛟鼉窟  
伯氏復同郡邑境接民岱寧將內隔外正以肉附骨姚江遺魚蟹稽山奉筍蕨

足得相交歡高堂未華髮送子意不盡念逐有明月

西湖觀新出鵝兒道損持國曼叔請予賦之

春菴畏雷後穀開形已完嫩毛輕染藥小掌未全丹見物初能噉浮波尙怕寒  
山陰無道士更長換應難

宛陵先生文集卷第二十九



宛陵先生文集卷第三十

送李密學赴亳州

倦輸關內粟遂請潁川符治績可稱最士民將以蘇譙都君命重苦縣祖風殊  
仙檜留陰在甘棠卽化敷行舟通遠水候騎溢長衢他日人懷望煙雲自滿湖

送樊秀才歸安州

開元有謫仙酒隱向安陸予嘗慕其人文字不拘束月下每醉吟落紙輒數幅  
今當安陸歸白酒邨中熟一名猶未成雙親淚盈目切莫苦銜杯無心不擇祿  
去去煙水間野禽噪古木聞聲不得名將投山舍宿此趣自可嘉非如走塵轂

依韻李密學合流河口見懷

二水交流抱閭井清潭幾曲自淵回已浮畫舸遙遙去更愛雙鷺泛泛來

觀理蔬

野薺不堪食蕪菁今正肥夏畦人所病老圃方可窺乳雀爭銜蝶鳴雅各護兒  
於陵豈復有空學桔槔爲

哭尹師魯

謫死古來有無如君甚冤文章不世用器業欲誰論野鳥災王傅招辭些屈原  
平生洛陽友零落幾人存

泛舟和持國

綠源去未窮夾岸樹濛濛弱蔓低侵水殘芳不隱叢浣衣思越婦折筍擬江童  
薄暮迴船處潭魚動鏡中

欲晚訪韓持國忽道損見過不克往持國示詩因答

西雲沈日脚命僕駕我車我車已在庭有客方詰廬談笑不覺夕雞黍且煩渠  
重約勿以怪但當摘園蔬

送京西轉運李刑部移京東轉運錢

列藩環王都遂分東西道統制連別京守臣多碩老外臺持權綱才具必美好  
公今且更踐入用頗不早乃令山東粟餉饋歲可保古路趨汶陽長風吹綠草

送李庭老歸河陽

五月馳乘車歸心豈畏暑道上多清陰日中不遑處函谷自控帶大河無險阻  
時平獨往還拜壽觴屢舉

詠雙杏子其核亦然

子核成雙杏將寄同心人定棲鴛鴦魄爲物豈無因

和王仲儀楸花十二韻

春陽發草木美好一同時桃李雜山櫻紅白開繇枝楸英獨步媚澹紫相參差  
大葉與勁幹蒨萼密自宜圖出帝宮樹聳向白玉墀高絕不近俗直許天人窺  
今植郡庭中根遠未可移但欣東風來不恨和煦遲山禽勿蹙踏蜂蝶休掇之  
昔聞韓吏部爲爾作好詩愛陰無纖穿就影東西隨公今亦牽此端坐曾莫疑  
目昏

我目忽病昏白晝若逢霧窺驚隻物雙書輒下筆誤來人髣髴是飛鳥朦朧度  
紆紆孰辨別此已忘好惡

送韓八太祝歸京師求醫

少年潔而腴茸茸頷有鬚胃熱跨馬去去去天王都借問去何謂就醫將疾驅  
客曰實誑我健壯其非夫敢告固不給但怪所見愚瘠者未必病病者未必癯  
天馬不著肉日走萬里塗山熊豈無膏養體唯恐痛滯結在於內安得形肌膚  
厥貌雖美好厥疾勿須與療之欲其漸熾之非愛軀此行不飲別安得持酒壺

記春水多紅雀傳云自新羅而至道損得之請余賦

赤羽異蒿鷄來自東夷國羣集成皋間翩翩皆一色舉臆發朱砂爲瑞應火德  
穿屋彼非類啄粟慚與食清聲殊啁啾所畜每陋逼應當放之去重展萬里翼

持國遺食

乞食非爲貧妻病妾且死晨爨不煖釜朝飯亦輟匕遺我我所恤食我我所恥  
我恥曾我求我恤寧我止應乏豈在豐赴意實未鄙漂母殊下鄉爲惠得終始

捫蝨得蚤

茲日頗所愜捫蝨反得蚤去惡雖未殊快意乃爲好物敗誰可必鈍老而狡天  
穴蟻不齧人其命常自保

同道損世則元輔游西湖於卞氏借雙鶴以觀

塘蒲蔭綠水菡萏豔脩渚想像華亭野但欠鳴鶴侶同來三四人趣尙頗相與  
思見此清禽無能覲翔羽城隅有大第世本官吳楚嘗同太湖石不惜持金取  
欲作園林勝園林寧暇覩今當問其家借賞無吾拒果亦致之來奮毛如喜舞  
雖生滄海心翅重不得舉還爾稻梁貪崇丘在何所

送上虞孫主簿

稽山參雲深剡水與天碧行將啼鳥親翫不游鱗隔況世住新安又嘗爲粵客  
風物知所諳窮幽梯翠壁

寄題金州孫御史處陰亭

有形則有影畏影當念形日月難久晦處陰乃暫停光照不復離疾走何所寧  
當是誚尼父我輩烏忍聽結廬雖可託夜燭亦熒熒直躬觀罔兩將此同醉醒

石榴

榴枝苦多雨過熟拆已半秋雷石罌破曉日丹砂爛任從雕俎薦豈待霜刀判

張騫西使時蒟醬同歸漢

七夕

古來傳織女七夕渡明河巧意世爭乞神光誰見過隔年期已拙舊俗驗方訛  
五色金盤果蜘蛛浪作窠

同諸韓及孫曼叔晚游西湖三首

晚日城頭落輕鞍果下涼野蜂銜水沫舟子剝菱黃木老識秋氣徑幽聞草香  
幅巾聊去檢不作楚人狂

爍電未成雨涼風先入衣青天忽開影紅日尙餘暉蛺蝶作團起蜻蜓相戴飛  
嘲謔不覺夕跨馬月中歸

舟中演滿意不淺却坐林塘景欲昏翠色蜻蜓立菱蕊青絲騾裊秣城根

韓玉汝遺澄心紙二軸初得此物歐陽永叔又得於宋次道又得於君  
伯氏子華今則四矣

三得澄心紙吾嘗再有詩初能條本末不復語興衰堪入右軍迹慚無幼婦辭

君家兄弟意將此比烏絲

和王仲儀二首

麝香

游伏柏林下食柏遂生香空知噬臍患豈有周身防赤豹以尾死猛虎以睛喪  
儻或益於用捐軀是其常

凌霄花

草木不解行隨生自有理觀此引蔓柔必憑高樹起氣類固未合縈纏豈由已  
仰見蒼虬枝上發彤霞蕊層霄不易凌樵斧誰家子一日摧作薪此物當共委  
七月二十一夜聞韓玉汝宿城北馬鋪

暗樹秋風擺葉鳴桃枝竹簟冷逾清孤燈澹澹短亭客半夜蕭蕭聞雨聲

夢過三陵

夢過漢陵聞秋風石馬閑當年侍臣淚泣盡向三山

詠扇

剪紈成薄質誰將擬月輪  
閔竭夏后德同我天王仁  
及至爲時用豈必美畫人  
何憂秋風來退藏保其真

送曼叔襄城尉

昔君乘紫駟來獵荒城下  
復乘紫駟去不逢亭長罵  
溪風欲涉時山雪獨歸夜  
此趣信所諳羈官莫悲吒

送吳給事自許昌移淮西

直道昔參輔獨將天下憂  
忠言悟明主退請拜諸侯  
坐閣政方舉移藩心所求  
蔡人迎且喜許俗愛難留  
夾路車徒盛分疆禾黍秋  
穆陵無夜閉仁化自公脩

亳州李密學寄御棗一篋

沛譙有鉅棗味甘蜜相差  
其赤如君心其大如王瓜  
嘗貢趨國門豈及貧儒家  
今見待士意下異盧仝茶  
食之無厭飫詠德曾未涯

九月五日夢歐陽永叔

朝鏡惡白髮夕夢對故人  
常恨道路隔忽喜顏色親  
相笑勿問年青銅早傷神

雞號天欲白向者猶疑真

自尉氏南至京皆水及人脛

陸行畏水深舟行畏水淺河流去時閤涂潦歸時踐事與時相違我慚行處蹇  
人生莫爲客爲客此安免

九月十六日自許昌迴至京師胥平叔宋中道迂于郊外

今日至國門二子來迎我適遇信陵冢冢棘秋葉墮翩翩隨人飛拂馬右或左  
謂此獨無情亦與吾意可

裴如晦赴河陽幕

號風一夜動作雪欲愁客客莫苦嗟行農望明年麥方來笑語同又是關河隔  
主人賢且智不待子所畫

送韓子華十月拜掃

白露已變霜孝心竟悲惻薦衣如念存拜壘不遑息帶劍蓬池外兼程困馬力  
禮畢便當還於誠乃爲得

送韓六玉汝宰錢塘

子嘗訪林  
逋湖上

頃尋高士廬正值浸湖雪雪中千萬峯參差縣前列僧居或隱見岸樹隨曲折  
驚鳧如避人遠向寒煙滅潛希爲子男儻得遂疎拙今逾二十年志願徒切切  
方聞落君手與我曾未別景多詩莫窮歸載壓車轍

得曾鞏秀才所附滁州歐陽永叔書答意

客從淮上來往問故人信袖銜藤紙書題字遠已認旣喜開其封固覺減吾吝  
新詩不作寄乃見子所慎向來能如今豈有得觀釁南方歲苦熱生蝗復饑饉  
憂心日自勞霜髮應滿鬢知予欲東歸曉夕目不瞬貧難久待乏薄祿藉霑潤  
雖爲委吏冗亦自甘以進相望未得親終朝如抱疹

追詠崔奉禮小園

前此訪君時已觀堂宇邃安知中屏開自有幽林致花拳巖桂紅石擘雲根翠  
正當秋風來不見搖落意日得吟其間何須去爲吏

宋中道快我生女

爾嘗喜詛予生女竟勿怪今遂如爾口是宜爲爾快亦旣以言酬固且殊眦眦  
慰情何必男茲語當自戒

詠宋中道宅椶櫚

青青椶櫚樹散葉如車輪擁蔭交紫髯歲剝豈非仁用以覆雕輿何憚克厥身  
今植公侯第愛惜知幾春完之固不長只與薺本均幸當救園吏披割見日新  
是能去窘束始得物理親

詠秤

聖人防爭心衡權爲之設後世失其平有星徒爾列物物尙可欺銖銖不須別  
將淳天下民安得必毀折

詠象韓子華邀賦

軀大力無用遠物賞馴柔食芻與飲水百倍於馬牛猶能絡金羈不可伏車輶  
蒼舒曾智秤千鈞空壓舟

依韻答惠勤上人

釋子本樂靜宜不事物牽我慚姑蘇守復賞杼山然三歲與之別其學已增前  
忽此有來贈老拙謬耽研

答顯忠上人

驅馬傍馳道歸自許西偏高車非舊貴立避槐樹邊心雖欲往謁僕餒行不前  
是甘處窮巷晨突微生煙儻有好事者扣門與留連或出袖中詩語熟氣頗全  
曾不類緇褐始可令勉旃京師百許寺知幾相差肩

送韓仲文奉使

往使兕奴國持節豈辭遙朔北正苦寒風汝與雪飄燕山何處是漢銘應已銷  
前車渡冰河後騎鳴金鑣行行至穹廬尊我不敢踟玉爵親獻酬名裘進狐貂  
禮成復命日苑抑舒楊條

送劉司勳奉使

授命出絕域北至單于庭駝鳴沙磧遙馬倦朔雪零幽州古道上胡笳應夜聽  
嘗聞昔時語南看北辰星使回儻可託乃得驗天形

依韻和歐陽永叔秋懷擬孟郊體見寄二首

我居西北地秋無東南風木脫不塞望高臺空九重音塵安可得鴻鴈鳴霜中  
日看紫苔生乃見三徑窮一聞離騷篇寫盡楚客胸胸懷如寶匣夜夜吼生銅  
秋思公何高堆積自崆嶸出爲悲秋辭萬仞見孤聳念我老於詩我髮實種種  
而後傷故人故人多作冢陰風夜木嗥窸窣聞鬼悚獨我忘形骸百事乃纖冗  
不眠霜月上霜月如可捧

裴如晦自河陽至同韓玉汝謁之

朝聞單騎歸徑走至其第扣門童僕頑拒我色甚戾不顧遂登堂有馬堂下繫  
辯詐大呼卿稍應西屋際逡巡冠帶出青綬何曳曳有似縮殼龜藏頭非得計  
況與二三子交分久已締恕爾避客尤新還復新壻

詠王宗說園黃木芙蓉

水中兼木末相擬有嘉花玉蕊坼蒸栗金房落晚霞涉江從楚女采菊聽陶家  
事與離騷異吾將舉以誇

二馬

舊馬十年跨老劣多緩行新駒三萬錢頗愛舉蹄輕不使異芻秣均養存其情  
君門趨早朝風勁力已生

依韻和發運許主客詠影

答影陶潛興長吟爲我聽與之相遇日曾不異於形動靜隨生趣存藏委曜靈  
莊周疾走意推本置諸銘

寄題周源員外衢州萃賢亭

昨朝江南客語子川上亭有時飛雨來不見前山青卉萼人未識烏響日可聽  
既將遲賢者無使童僕局

答楚僧智普始與吳僧顯忠來過今見二人詩進於舊矣

我初見子時子作楚人語復與吳客來音俱變齊魯乃知久處益薰蕕可同舉  
更當富於學茲言聊以補

鴨雛

鴨雛日浮波羽冷難伏卵嘗因雞抱時託以雞窠暖三旬殷旣拆乳毛寒脛短  
雞寧辨其雛翅擁情款款一日向水涯所稟殊未斷泛然去中流雞呼心寔寔  
人之苟異懷負義不足算有志在養毓勿論報德限

有覩十一月七日

來恨我馬遲去恨我馬疾馬蹄塵作雲已隔粲然質時時顧且遙亂緒如有失  
宛陵先生文集卷第三十



宛陵先生文集卷第三十一

杜挺之贈端溪圓硯

雪壓古寺深中有臥病客訪之語久清飢馬齧庭柏案頭蠻溪硯其狀若圓璧指此欲爲贈而將助吟席非意予敢貪旣拒頗不懌大出楮中有素許當自擇強持慰勤心歸以示朋戚哂曰豈其然爲汲寒泉滌滌彼僞飾物紙乾見頑石清晨走髯奴無厭願求易拜賜遂如初明月懷吞蝕微分鸚目瑩尙漬墨花碧詞答謂我愚復悔料已逆明日未央朝執手笑啞啞

吳沖卿示和韓持國詩一卷輒以爲謝

葉公所好者熟已識頭角一日真物來駭汗沛且渥我初見韓子蜿蜒噴雷雹子復蛟龍文死象不可捉畏懷但驚顧得與前事較

新息重脩孔子廟記

新息古邑也自漢以來幾因亂而孔子之廟歲享不絕于今雖邑宰有賢否祀典繫國家也儻不賢屋隳不葺有矣祀其廢諸慶曆七年清河張君伸爲是邑

始勤於治民謹於條約恪於事上既而民信訟且簡乃脩孔子祠及祭器予未知君之果學邪學而果知道邪以斯舉則君似有本者學者未必信奉如之嗚呼孔子之道與天地久與日月昭一郡一邑之廟不足以光顯厥德報厥功也略究爲郡邑之人少誦其書長就其藝遂得其祿忍負不爲一出口之勞完其廟至使瓦墮簷風雨壞桷甃缺階塵昏像犬豕穴牆垣往來其間哉新之無是患庶幾賢已然則苟因爲利廣爾宮俾不肖有說非予望於君也况邑隸蔡守吳公輔臣大儒名重天下聞君能是得不樂邪予思昔忝邑時見邑多不本朝廷祭法往往用巫祝於傍曰牛馬其肥癯疫其銷穀麥其豐瀆悖爲甚予卽革之君觀有若是者當改爲以從著式云

范景仁席中賦葡萄

朱盤何纍纍紫乳封霜厚今爲馬谷絲昔釀梁州酒乃知西土珍漢使傳應久

夜聽鄰家唱

夜中未成寐鄰歌聞所稀想像朱脣動髣髴梁塵飛誤節應偷笑竊聽起披衣

披衣曲已終窗月存餘暉

宋次道得廣南金橘爲餉且有詩因和酬

越橘如金丸爛然已盈篋誰傳嶺外信尙帶霜前葉莫嫌道路遠得與樽俎接  
主人無吝心懷歸予敢輒

李廷老席上送韓持國歸許昌得早字

馬蹄踐霜華遊客歸何早重裘不畏寒况復非遠道誰言未顧期登第鬢如葆  
解裝喜可知月下金壺倒

送韓持國

曰予非才敏乃與世寡游三四洛陽友過半已成丘晚節五六人文行皆潔脩  
韓氏棣萼盛於我爲薰蕕君比衆最篤我唱君非酬昔我竹軒下破窗風颭颭  
君時不厭過逍遙談未休頗爲俗士憎恬不防吝尤邇來我還都君亦辭舊州  
舊州君所隱安得此久留雪晴命駕歸使我生悲愁誰見潁水上定更不驚鷗

遲月

遲月月已上清光在高木未能照我庭團團隔東屋

風笛

既殊出塞聲還非江上聽夜吹送悠揚高樓月方迴

霜鐘

昔向寒溪臥遠寺撞白雲今也趨早朝殘月馬上聞

鳴琴

雖傳古人聲不識古人意古人今已遠悲哉廣陵思

和曹光道詠直廬屏中六鶴

漢家爲瑞雙黃鵠只道飛翻太液池不似雲屏六畫鶴帝宮深處有人知

晚歸聞韓子華見訪

門外多車騎後迹亂前蹤誰識此來過塵蹄重復重歸有野僕言恨不故人逢  
豈無肴酒設所向乖所從未能一往見嬾拙其必容

送丹陽新守李國博歸洪州寬

蔡水冬不枯唯愁夜冰結歸船及暖下窮臘未飛雪淮潁地漸偏川上雲常泄  
幾日接春波南風楚江徹拜親懷郡章予慕嗟才劣

食齋

世羞食齋貧食齋我所甘適見採齋人自出國門南土蠹瘦鐵刀霜亂青竹籃  
攜持入凍地挑以根葉參手龜不自飽食此尙可慚肥羔朱尾魚腥羶徒爾貪

甘陵亂

甘陵兵亂百物灰火光屬天聲如雷雷聲三日屋瓦摧殺人不問嬰與孩守官  
迸走藏浮埃後日稍稍官軍來圍城幾匝如重鎗萬甲雪色停皚皚孰敢專輒  
但取裁黃土始堅難速頽

夜飲席上賦松子

風松有霜子吹落幽人庭幽人畏狼籍日掃出巖局誰將稱遠物乃信涉滄溟

送李審言殿丞歸河陽

大河冬合時上可馳車馬歸子從橋安黃流在冰下沉命使於家其美世爲寡

是宜飭以行慰此懷慕者

送王宗說寺丞歸南京

晏歲欲飛雪滿天含凍雲犯寒單騎速獵吹紫裘薰庭鵲還先喜池鴻去始聞  
公因問貧賤善說莫如君

李審言將歸河陽值雪遺金波酒

朔吹卷天吼遠郊無鳥飛忽驚開戶白昨夜打窗微閭巷我方嬾關山君獨歸  
翻能寄醇酎爲此解寒威

對雪憶往歲錢塘西湖訪林逋三首

昔乘野艇向湖上泊岸去尋高士初折竹壓籬曾礙過却穿松下到茅廬  
旋燒枯栗衣猶濕去愛峯前有徑開日暮更寒歸欲嬾無端撩亂入船來  
樵童野犬迎人後山葛棠梨案酒時不畏尖風吹入牖更教牀畔覓鴟夷

元日朝

萬國諸侯振玉珂踏雲朝會雪初過欲聞鳳管天邊度數聽雞人樓上歌放仗

旌旗方偃亞迴頭宮闕更嵯峨謬陪王屬曾何補泛泛慚同上下波

答祖擇之遺新羅墨

海上老松死霹靂燒瘦龍胡人犀皮膠團煤煙膏濃色奪陽烏翅來涉溟渤重  
君獲乃爲贈我謬蟲鳥蹤且作異土玩不媿西域筇

對殘雪懷歐陽永叔

窮臘一尺雪跨春氣逾嚴童僕苦病瘵庭戶無與杕日消夜復凍霰積泥相醜  
嬾出獨懷遠何由寄江帆

寄題時上人碧雲堂

望望佳人來未來雲已暮當時千里恨不獨看雲故何此啓虛堂定知迎秀句  
還會古人心古人非特賦

和宋中道元夕二首

結山當衢面九門華燈滿國月半昏春泥踏盡游人繁鳴蹕下天歌吹喧深坊  
靜曲走車轅爭前鬪盛亡卑尊靚妝麗服何柔溫交觀互視各吐吞摩肩一過

難久存眼尾獲笑迷精魂貂裘比比王侯孫夜闌鞍馬相馳奔

春風來解吹殘雪燈燭迎陽萬戶燃竟看繁星在平地不妨明月滿中天赭袍  
已向端門御仙曲初聞法部傳車馬不閑通曙色康莊時見拾珠鈿

李國博遺浙薑建茗

吳薑漬吳糟越茗苞越籜咀辛聊案杯啜味可奴酪但拜故人貺何言爲物薄  
我心易厭足不比填窮壑

送臨江胥令

初從桃源還却向竟陵去今作中州官山水不曾飫且當傳竹枝莫學乘籃輦  
雲木杜鵑時千巖響行處

寄題滁州醉翁亭

琅邪谷口泉分流漾山翠使君愛泉清每來泉上醉醉纓濯潺湲醉吟異憔悴  
日暮使君歸野老紛紛至但留山鳥啼與伴松間吹借問結廬何使君游息地  
借問醉者何使君閒適意借問鑄者何使君自爲記使君能若此吾詩不言刺

戊子正月二十六日夜夢

自我再婚來二年不入夢昨宵見顏色中夕生悲痛暗燈露微明寂寂照梁棟  
無端打窗雪更被狂風送

賜緋魚

蹉跎四十七腰間始懸魚茜袍雖可貴髮短齒已疎兒女眼未識競來牽人裾  
不知外朝衆君恩漸有餘

和答韓子華餉子魚

南方海物難具名子魚珍美無與并完鱗全乙異臭腥素鹽漬曝生花輕其頭  
戢戢筠篋盈出自通印時所評遠涉川陸來都城親賓交遺已見情食指嘗動  
吾竊驚果獲異味亦足明

和答韓奉禮餉荔枝

韓盛人所希四海饋名物韓復未疎予分珍曾不一莆陽荔子乾皺殼紅釘密  
存甘尙可嘉本味固已失遙思海樹繁帶露摘初日安得穆王駿能置萬里疾

閏正月二日夜張氏納婦太素子

婚姻貴及時周有標梅詩雪後花將發人歸室且宜坐中傳漏鼓戶外轉星旗  
環佩遙聞出當脩廟見儀

酌別謝通微判官兼懷歐陽永叔

識君童穉時而今君齒壯不見二十年顏貌已非向親戚多零落欲語還悲愴  
更問平生交久從滁水上君又滁水歸寄音傾桂釀儻復二十年吾焉保無恙  
和永叔郡齋聞百舌

響舌能令百鳥羞聽時丹杏發山郵春雲不定雨來急濕翅蒼茫高樹頭  
送陶太博通判廣信軍

平時易水頭不復起邊愁壯士去來久寒波空自流臨塘遺鷺羽隔戍見旣裘  
半似江南美軍和贍燕游

答王太祝卷整

朝迴泥塗不可出飢馬倦僕驅之頑閉門獨與古人語黃卷未終聞扣關賢哉

公族肯來顧詩袖大篇令我刪珠光玉瑩絕瑕類強欲指摘徒羞顏自同培塿最淺狹安得與子論丘山

雨賦

春雨之至今風呵而雲導在上爲膏在塗爲淖被末漸本潤萬物者歟施及天下不收報者歟入波而隨流因積而成潦專好而失道者歟壞瓦漏屋蒸菌出木過而爲酷者歟朝使人愁夜使鬼哭迷而不知復者歟將告之雨雨無聽也將告之天天且復也窮居知命是何病也噫

送張太博通判袁州

君非身尤謫南州南方尙鬼其俗媮蛇爲鄰虎爲陬丹茅苦竹深幽幽邑人祠鬼拜古樹竹杯一仰來烹牛牛死齧慢常不幸誰得禁止專鉏鉤借曰未信君且往民將語怪君聽不仰山頭有行舟

依韻和宋中道雨夜

暗驚料峭寒春雪兼春雨知勝早朝人閑眠不開戶丘壑豈無容泥塗還自取

誰吟何遜詩不覺逢逢鼓

讀裴如晦萬里集書其後

君自萬里迴遂成萬里集其詩二百篇文字必已立定應侔前人未嘗有蹈襲  
古溪蠻鐵刀出冢土花澀誰將飾以玉鐔上光熠熠宋子序其端精悍孰鉗繫  
搜新造空蒙俗眼不得入示予要賦之短戈慚後執

見胥平叔

歷君門兮九重雲黜黜兮欲雨隱翠幕兮觀予心眷眷兮不語

宣麻

彬美下一國會無相印酬莫驚除拜峻自是戰功優壯士頗知勇諸儒方貴謀  
淮西封亦薄裴度死生羞

隴月

夜晴初見月雲薄未分明高樹尙無影遠鴻時有聲下階嫌履濕閉戶認苔生  
寂寂牆陰暝更長已漸傾

兵

太平無戰陣漢卒久生驕金甲不曾擐犀弓應自調嗟爲燎原火終作覆巢梟  
若使威刑立三軍豈敢躑

泥

一夜添春雨中衢長舊泥屐黏憂折齒馬滑畏顛蹄去啄從江鶴相呼任竹雞  
朝來放朝請始與逸人齊

聞韓仲文使歸

傳道使車迴柳條黃未開曉寒非絕漠春色近章臺名馬北方至賓鴻南國來  
明朝齋被見天子始稱才

未晴

未晴初止雨蒸潤尙侵衣缺月如羞出荒雲不肯歸杏花朱欲綻梅萼雪將稀  
遠鴈來何急衝風濕翅飛

夜陰

月色明還暗雲寒散復濃古堂移翹翹積霧合蛟龍濕菌飛螢出蒼苔上朽重  
獨吟嗟向老氣澀覺偏慵

夜晴

新晴月正明頻聽夜烏驚未向高枝穩時爲繞樹聲羣飛自紛泊衆鳥不屏營  
躁靜於焉見誰能度物情

古鑑

古鑑得荒冢土花全未磨背羨尖尙在鼻獸角微訛月暗蝦蟆蝕塵昏翹翹過  
但令光彩發表裏是山河

橐駝

鳴駝出西域銜尾自連連漢驛凌雲去胡人踏雪牽常時識風候過磧辨沙泉  
老覺肉封側猶蒙錦帕鮮

李庭老許遺結絲勒帛

紉絲作長帶正勝茱萸紋冉冉仍垂緋燄燄自有薰鮮華非稱我修飾未如君

曾不日來取賢哉知禮云

貧

生甘類原憲死不學陶朱但樂詩書在未憂鍾鼎無恥隨波上下難免鬼獻餼  
陋巷曲肱者終朝還似愚

行僧

風衣河揭揭有若瓠葉翻塵土不遠去白雲藏石門

宛陵先生文集卷第三十一

珍做宋版印

宛陵先生文集卷第三十二

送范景仁學士歸蜀焚黃

蒼山過秦梁山盡見川陸下馬古成都訪壘得喬木掃籜開奠席隕淚濕俎肉  
當時相如歸徒自感車轂不聞有是爲事乃今古獨還因問耆舊亦莫遺隱卜  
荒祠古柏下殘月杜鵑哭憑君約史筆書作西來目

送宋中道鄭州拜掃

酣酣道傍杏戢戢壘上柏不知煙火禁但感風露易開關掃墓隧向樹繫車乾  
灑淚有餘悲麒麟高幾尺

送韓子華歸許昌

不值風雨暴杏過梨已開社後清明前燕與人歸來湖中水方漫誰共泛其隈  
儻有問顛顛顛顛未忘杯

燕

澁澁隻來燕飛飛自舞空輕如漢家后斜避楚臺風斗折撩沙鬣相高接草蟲

向人全不畏切莫入吳宮

送周衍長官知遼州

二月遼陽去遼陽草未生春風吹胡沙卷起黃雲平土人耕耨晚種黍何時成  
塞地寒且薄百役子宜輕

寒食

墳冢徧青山高低占原谷向來路已荒今迷問樵牧涉水到雲林隔岡聞近哭  
沃酒白楊下悲風何颯颯雨止梨園殘鳩聲在茅屋

依韻和太祝同諸君遊園湖見寄

陽春何處來客自商丘至一唱新詞工始見故人意園林誰與遊卉木欣已媚  
花上有微陰水邊無近思遙憐數觴豆何必親歌吹牧馬憶當時招延遺舊地  
不逢浮沼鴈但見銜魚翠日子謬詞律答句嗟蕪累安能接賢彥樂事聯輕騎  
獨不負春風塵纓此懷媿

聞學士院試含桃薦寢廟詩擬作

交交鳴谷鳥粲粲熟荆桃寢廟此先薦離宮將以遨既同羞俎實且異獻溪毛  
露顆明朝日朱光逼赭袍戴經傳自久漢令著方高天子從茲食羣臣賜亦叨  
韓子華約遊園上馬後兩作遂歸  
誰約玩春物狂風雲驟開擺叢多落蕊蔽路足昏埃逆水燕迎雨將生鵝怕雷  
愁康今轉嬾騎馬半塗迴

### 大風

夜風晝不止天理何可常正當春木榮擺磨枝葉傷東皇務長養乃值此物狂  
曷不訴於帝斥之出遠方風伯有罪五孰肯進皂囊往時歲苦旱救熱雨欲滂  
吹之不使下雲雷遂深藏復搖江海波白日沉舟航又卷關塞沙千里填河隍  
拔木與退鷁書傳言已詳今者天柔和煦煦皆敷芳獨爾何不仁號怒事雄強  
既其背天時誅殛固所當鳶鳴兼虎嘯助惡黨亦昌

### 春風

常愁春雲低誰料春風惡搖扇無定響折幹時聞落吹花擁細草送雨來高閣

江燕倚身輕逆飛前復却

送侯寺丞知鞏縣

侯洛人

伊洛合河流正臨歸鞏路崖壁人畏崩芹泥岸長固山迴邑郭見馬入雲煙暮  
宰茲雖所淹況與鄉黨附

宋次道家摘寶相花歸清平里

往歲見此花開遲手擷羣芳因醉歟今來須約爛熳看及過風雨又已後主人  
爲我特殷勤架底深深掇孤秀密枝陰蔓不爭開薄紅細葉尖相鬪先時已落  
已掃除最晚堪憐子所厚呼童歸遺不可緩金盤付與急奔驟暮還已見映雲  
髻初拈尙覺香在袖官橋夜市正沽酒沽酒共賞莫待晝

送南京僉判寇中舍

東風莫迎船船下黃流急送車猶未動顧權已不及離宮佳氣盤賓幕平時入  
因君報親舊將去江南邑

送韓奉禮隨侍之許昌

岸之側多菖蒲蒲之下多乳魚乳魚可以饌菖蒲可以殖羨君調膳去且樂因使無忘寄我書

### 金明池遊

三月天池上都人絃服多水明搖碧玉岸響集靈鼉畫舸龍延尾長橋霓入聲飲  
波苑花光粲粲女齒笑瑳瑳行袂相朋接游肩與賤摩津樓金間采幄殿錦文  
窠挈榼車傍綴歸郎馬上歌川魚應望幸幾日翠華過

### 和應之還邑道中見寄

向老思舊交欲見恨無翅前時君來都欣喜乃一至亦旣勤我懷酌酒去拘忌  
自從離洛陽此會無三四謝尹最賢豪已嗟存沒異因酬馬上篇遂寫相逢意  
送韓仲文知許州

孰不爲太守所榮歸故鄉僚官詫舊識邸吏窺新章前去別馬上今仰立道傍  
野老拜車塵里人持壺漿至家墳篋美謁壘雲日光盛事難盡書且舉國門觴

### 送薛殿丞知達州

遠郡古通川雲煙秀重疊江從巴蜀來山與岷峨接啼鳥異方音青林四時葉  
使君當問俗市買皆紅頰

依韻朱學士廉叔憶潁川西湖春色寄獻尚書晏公且將有宛丘之命  
物景有先後春工無舊新追歡成杳藹寄詠苦逡巡湖水與濠接岸亭將寺鄰  
豔花簪舞髻弱藻胷垂緡客奏桓伊笛人歌柳惲蘋何嘗煩几案自得去埃塵  
縱語曾忘倦從游未覺頰賦詩高壓古下筆敏如神每想魂俱往終知夢是因  
廣騷常慕屈感遇亦希陳借問摛詞者當時別乘人喜公移幕府連賞二州春  
集英殿賜百官宴以雨放

春來無點雨三日始聞雷曉殿鳴簷急羣公罷食迴燕迎風翅健馬踏霧泥開  
晚覺微陽透飛光上綠槐

### 送陳太祝歸河陽

羸馬度關去夜向河橋歸水風來何急吹裂游子衣到家莫久留速書赴禮闈  
大對必有蘊時哉無闊稀

送祖擇之祕丞知海州

驥有千里足不使千里馳人有抱長才亦復不得施去去作守長政化尙可爲  
勿云海濱陋豈無彼黔黎事舉訟必簡安能忘酒后水物錯在俎鹹腥應自宜  
胸山日相對亦莫厭其卑蒼翠入畫戟濃澹若秀眉但向此中樂用舍乃繫時  
戊子三月二十一日殤小女稱稱三首

生汝父母喜死汝父母傷我行豈有虧汝命何不長雅雛春滿窠蜂子夏滿房  
毒螫與惡噪所生遂飛揚理固不可詰泣淚向蒼蒼

蓓蕾樹上花瑩絜昔嬰女春風不長久吹落便歸土嬌愛命亦然蒼天不知苦  
慈母眼中血未乾同兩乳

高廣五寸棺埋此千歲恨至愛割難斷剛性剉以鈍淚傷染衣斑花惜落蒂嫩  
天地既許生生之何遽困

與用文師

師名學佛者何乃愛吾詩吾方嗟世人各各事奔馳蒼鷹絕海至不異攫鼠鴟

所趨有遠近所向皆餒飢漱水對無語風動庭樹枝

小女稱稱塲銘

吾小女稱稱慶曆七年十月七日生至八年三月二十一日死嗚呼鳥獸螻蟻猶有歲時之命汝不然也汝稟氣血爲人豐然皙然其目瞭然耳鼻眉口手足備好其喜也笑不知其樂其怒也啼不知其悲動舌而未能言無口過動股而未能行無蹈危飲乳無犯舌之禁愛惡無有情之系若是則得天真與保和何病天之遽乎得不推之於偶然而生偶然而化偶然而壽偶然而夭何可必也吾將衣汝衣斂汝棺葬汝于野亦人道之常分汝之魂其散而爲大空其復託爲人不可知也其質朽而爲土不疑矣富貴百年者尙不免此汝又何冤瘞之日父母之情未能忘故書之塲非欲傳之久且以志其悲云銘曰  
母孕而夢夢維虺蛇古占女祥夫其豈然邪復占我夢我遺我稱我名命汝平御妾媵旣厲而乖胡然乎靡應

送吳冲卿學士歸蔡州

孟夏日南歸馬耳豎迎風急雨不及避斷霓明向東古城汝水傍化俗寄我公  
君今去拜慶酥酪美將同

下土橋送刁景純忽大風韓子華先歸遺其小方巾明日持還副以此  
詩

昨日汴水頭共餞東去人暴風吹黃沙對面不相親歸來乘大馬誤擲小方巾  
平明持奴還偷樣古逼真

刁景純期水門再別以風雨不往

餞客客未云明朝當更來風雨尋船嬾車馬向城迴烏帽吹覺重清尊想誰開  
終期江上見俗禮聊損裁

韓子華訪石昌言不遇石有詩韓邀和答

嘗聞載酒者去訪子雲居仍值徒御出遂令談笑虛爲黍寧乏具題鳳豈有諸  
一聽負荆語還想藺相如

舟中夜聽汴河水聲

夏雨漲黃流夜鳴鄰船枕乘危冒險人不識西山餓

逢王公慥太博

駑馬不惜蹄出門莫畏泥泥中逢故友十載相乖睽但怪蒼鬢色班班俯鐵驪  
少立不及語交策或東西向晚我還舟君來訪長堤對論出處迹存沒生悲啼  
勿言少壯日志意吐虹霓而今七不堪嬾又甚於愁

寄題洪州慈濟師西軒

西軒無落暉所賴西庭竹竹間有古葉竹上有緜綠夜雨一洗梢朝陽似晞沐  
焚香愛此心自不同諸俗

送謝著作歸陳州

騏驥泥中行偶蹶未千里終當至高衢尙苦泥行恥今歸雨濛濛嘶鳴欲何止  
乃念彼名駒近在清川涘他日見騰驤駑駘此垂耳

和石昌言學士官舍十題

病竹

水邊移得已傷根枝葉如枯生意少主人不使荒穢侵遂長琅玕勝凡草

石榴花

春花開盡見深紅夏葉始繁明淺綠祇知結子熟秋霖不識來時有筇竹

薏苡

葉如華黍實如珠移種官庭特蔥蒨但蠲病渴付相如勿恤謗言歸馬援

石蘭

言石曾非石上生名蘭乃是蘭之類療痲炎帝與書功紉佩楚臣空有意

萱草

人心與草不相同安有樹萱憂自釋若言憂及此能忘乃是人心爲物易

葵花

此心生不背朝日肯信衆草能驚之真似節旄思屬國向來零落誰能持

蔬畦

手自除荒手自鋤蔥鍼已插壅薤本朝芸夕灌豈不勤比食翦苗閒且穩

水紅

江天澹澹江水平江岸有花紅作穗今日特向都城開晝時只合銜魚翠

甘菊

世言此解制頽齡便當園蔬春競種到秋猶得泛其英爛醉莫辭官有俸

蘭

楚澤多蘭人未辯盡以清香爲比擬蕭茅杜若亦莫分唯取芳馨襲衣美

勉致仕李祕監

淵明歸柴桑家貧食不足當其勇去時不待秫稻熟借問何以然實恥暫屈辱  
公嘗爲近臣曾不輒媚曲一緣府舍災遂使還秩祿祿仕四十年內乏釜鍾粟  
歸來託四鄰恹恹無片屋去就異前人其義已介獨譬之食嗟來應自甘退縮  
當營負郭田漸可事水竹

送施景仁太博提點江南坑冶

楚山豈無銅楚匠豈不工大鑪常乏鑄碧井那得充積弊在鄉縣孰肯以利籠

君今承詔行諭民當得中苟能使之發亦莫取之窮此乃事可久山深山自通  
夜泊虹縣同施景仁太博河上納涼書事

與君愛清風移榻就明月月落見星綵星綵如晝熱霑衣輕露墜響岸崩湍齧  
坐思都城時誰許脚不韞

施景仁邀詠泗州普照王寺古檜

來尋淮上寺老檜莫知年劫火已鎔像樛枝寧改煙根挈怪石入節駁蒼苔堅  
欲問浮波箭空嗟此獨傳

送王判官同提點坑冶

地雖不愛寶利在與民共務國不務民儻有安得用孟氏美王圉其說久已誦  
聊此陳薄言切怛不能重

淮雨

雨脚射淮鳴萬鏃跳點起漚魚亂目濕帆遠遠來未收雲漏斜陽生半幅

舟次山陽呈王宗說寺丞

遠客雖有樂莫如逢故人夜懷夷門時月照楚水濱自居扁舟上隨處與船鄰  
宜將到此日因使報朋親

送崔黃臣寺丞宰臨海

補官桐廬時已飽嚴陵釣進吏六百石又得臨海嶠因之論出處足以見風調  
洪潮可登觀萬里漲川竅收縮尙何歸由來人莫料憑君能賦才庶或窮其妙  
楚童能捕魚乃在水邊居手取眼不顧情知獺未如鬢上浮萍草點點綠有餘  
既挈不暇理歸來莫取渠

楚童

雜詩絕句十七首

自此寶應道中  
起慶曆七年夏

蛙行動萍葉誤觀作游魚稍稍引兩股已變科斗書  
青草生水中日日隨水長水落何所依撩亂爲宿莽  
有蟲託斷葑斷葑日夕流不知止息處隨天非自由  
荒水浸籬根籬上蜻蜓立魚網挂遶籬野船籬外入

茸茸翦熟絲雨染胭脂暈滿樹斂黃昏槿花無此分  
青青老鏡葉下有鱖實尖浪頭撥船女刺手終不嫌  
岸傍草樹密往往不知名其間有啼鳥似與船相迎  
青蠅何處來聚集滿盤間誰知腹中物變化如循環  
水上賣瓜女摘瓜陂上田長麻已不識滿把青銅錢  
買魚問水客始得鯽與魴操刀欲割鱗跳怒鬚鬣張  
沙頭風雨來帖水野雲黑如觀曹公營萬弩射船側  
前時雙鴛鴦失雌鳴不已今更作雙來還悲舊流水  
度水紅蜻蜓傍人飛款款但知隨船輕不知船去遠  
塘上挽船人塘泥深及脛落日望前邨心將道塗競  
燕立茅屋脊燕銜芹岸泥巢成同養子薄暮亦同棲  
鵲銜高樹蟬危脅燥車響露腹不曾肥殺之嗟已枉  
河畔有釣翁團泥爲甕缶坐想秦人聲思傾杜陵酒

宛陵先生文集卷第三十二

宛陵先生文集卷第三十三

五月二十夜夢尹師魯

昨夕夢師魯相對如平生及覺語未終恨恨傷我情去年聞子喪旅寄誰能迎  
家貧兒女幼迢遞洛陽城何當置之歸西望淚緣纓

五月二十四日過高郵三溝

甲申七月七未明至三溝先妻南陽君奄化向行舟魂去寂無迹追之固無由  
此苦極天地心瞽腸如抽泣盡淚不續岸草風颼颼柎殮尙疑生大呼聲裂喉  
枕師爲我歎挽卒爲我愁戊子夏再過感昔涕交流恐傷新人心彊制揩雙眸  
未及歸旅櫬悲恨何時休

過茱萸堰

茱萸堰在吳牛死茱萸堰廢吳牛閑吳牛閑東南百貨來如山

詠歐陽永叔文石硯屏二首

號州紫石如紫泥中有瑩白象明月黑文天畫不可窮桂樹婆娑生意發其形

方廣盈尺間造化施工常不沒號州得之自山窟持作名卿硯傍物

鑿山侵古雲破石見寒樹分明秋月影向此石上布中又隱孤壁紫錦藉圓素  
山祇與地靈暗巧不欲露乃值人所獲裁爲文室具獨立筆硯間莫使浮埃度

永叔進道堂夜話

海風驅雲來池雨打荷急虛堂開西窗晚坐涼氣入與公話平生事不一毫及  
初探易之奧大衍遺五十乾坤露根源君臣排角立言史書星瑞亂止由不戢  
巨惡參大美微顯豈相襲陳疏見公忠曾無與朋執文章包元氣天地得噓吸  
明吞日月光峭古崖壁澀淵論發賢聖暗溜聞鬼泣夜闌索酒卮快意頻舉挹  
未竟天已白左右如啓蟄

贈劉謀閣副

聲名赫赫在窮塞眉宇堂堂真丈夫腰劍臂弓輕赴敵無人不伏魏黃鬚

長蘆江口

風駕晚潮急浪頭相趁過水歸瓜步小船下秣陵多鷗舞不停翅燕飛輕帖波

今來學楚客薄暮愛漁歌

金陵懷古

秦莫恃棧閣吳莫恃塹江不能恃以德二國竟亦降邇來屢興廢由險輕萬邦  
誰知荒涼城空存如劊腔我今經其下弔古語媿嗟哉石頭潮助怒常春撞

江畔

江畔菱蒲碧無主吳牛夜驅江干歸舟人不悟月已上花脚野蚊撩亂飛

慈姥山石崖上竹鞭

江水浸石壁峭直無鳥蹤穴垂青竹根瘦蛇愁作龍霹靂兩脚入濕點莓苔封  
世人不得用八馬今乖慵

阻風

老魚吹浪不肯休一夜南風打籬響灘下輕舟未可行山脚盤渦似車輞

慈姥磯下

蘆汀泱泱外露斂見孤嶂行舟每出觀漸近已殊狀傍來認飲牛正去忽側盞

水壑陰若春野鳥時與相且待風色迴出口始浩蕩

早發

吳雞鳴隔山江月半在水齧齧出岸潮雪雪入蒲葦解紆泛明鏡接天知幾里  
我家今不遙正住句溪尾

望夫石

征骨化爲塵柔肌化爲石高山共蒼蒼臨水望脈脈青雲卷爲髮缺月低照額  
千古遺恨深終不見車軌

過褐山磯值風

山口風偏急磯頭水似煎喧聲殊倦聽逆上正難牽暗石誰愁礙長塗未擬前  
江心看白浪卷起大於船

褐山磯上港中泊

風惡舟難進聊依浦裏邨岸潮生蓼節灘浪聚蘆根日脚看看兩江心漸漸昏  
篙師知蟹窟取以助清樽

宿磯上港

夜深風浪息月正在南斗遠水生白煙疎螢出荒莽照蟹屢燕薪張魚未發筍獨能憐野客游宦意何有

謁昭亭廟

連峯到溪止澄溜向潭瀉廟道走山腰雀雛鳴屋瓦古壁畫雲雷空庭儼輿馬眷予來故鄉絜齋陳奠畢尙想昔卍童維愚託民社每從諸父賽塲至此祠下今齒踰不惑雙親世似寡過此無所禱曷慕逢時者

昭亭潭上別

行舟晚解去親戚各還家淚落正濕衣腸翻如轉車借是昭亭水相隨亦有涯予今遊宦意曾不學匏瓜

宣州環波亭

冒暑駐輪轂徘徊北壕上棟宇起中央芙蓉生四向今吾太守樂慰此郡人望雨從昭亭來水入句溪漲蜻蜓立欄角朱鯉吹荷浪岸木影下布水鳥時引吭

心閑不競物與適每傾釀薄暮詠醉歸陪車知幾兩

### 昭亭山

曰山何必高要在出雲雨昭亭非峻峯雄雄若蹲虎旱歲一來祠霽然隨瀝酷  
有草牧爾牛有薪資爾斧有溪出其陰有潭在其塢獸則獾與貉魚則魴與鱖  
山雛水羽聲下上相雜伍呼名如謙恭號叫若怒侮崖竹或節疎嶺松或腹腐  
巨蜂結層房養子窟深土何事山中人采以爲市買其容固已多其忍吾未取

泊姑熟江口邀刁景純相見

時陳州晏相公辟

尾生信女子抱住死不疑吾與丞相約安得不顧期徘徊大江側念此親相知  
欲留時已晚欲去情難持引領望軒車豈能慰我思願聞下土禮無曰屈非宜  
見牧牛人隔江吹笛

朝與牛出牧晝與牛在野日暮穿林歸長笛初在髻面尾騎且吹音響未成雅  
隨風散遠近舉調任高下我方江上來平溜若鏡瀉悠悠經醉耳亦足發蕭灑  
苟能和人心豈必奏韶夏鄭聲實美好蠹情如剔剔況其荒敗迹亦又甚裂瓦

南箕成簸揚寺孟詵侈哆我今留此詩誰謂馬喻馬

依韻和歐陽永叔中秋邀許發運

看取主人無俗調風前喜御夾衣涼競邀三五最圓魄知比尋常特地光豔曲  
旋教應可聽秋花雖種未能香曾非惡少休防準衆寡而今不易當

永叔詩云仍約多爲

詩準備共防梅老敵難當

與夏侯繹張唐民游蜀岡大明寺

秋葉已多蠹古原看更荒廢城無馬入破冢有狐藏寒日稍清迥羣山分潏蒼  
田衣指白水此下是雷塘

寄麥門冬於符公院

佳人種碧草所愛凌風霜佳人昔已歿草色尙蒼蒼陸行載以車水行載以航  
于今五六年與我道路長思人不忍弃期植寒冢傍我嗟復北去安得畢此喪  
留植精舍中遠挈防根傷他時京峴下不比野蒿黃

送張唐民

楚甸有行客西風一孤舟遠隨淮月上若與星槎浮野岸襲幽芳氣清露已秋  
得意美魚蟹白酒問沙頭

秋夜同永叔看月

青天有右目昏明不常開常時翳雲氣古鑑生莓苔秋夜特清徹乃顧漸西迴  
靈兔不搗藥是夜無纖埃與君玩流景置酒臨層臺單衣濕白露鳴鴈方南來  
以言歡未終鴈聲一何哀

中秋不見月答永叔

天嫌物兼美而使密雲藏已向石屏見何須照席光

和永叔中秋夜會不見月酬王舍人

王人待月敞南樓淮雨西來斗變秋自有嬋娟侍賓榻不須迢遞望刀頭池魚  
暗聽歌聲躍蓮的明傳酒令優更愛西垣舊詞客共將詩興壓曹劉

觀永叔集古錄

古碑手集一千卷河北關西得最多莫怕他時費人力他時自有錦蒙馳

觀舞坐上作

誰憐嬌小好腰支老大而今莫那伊太守風流未應淺更教多唱楚人辭

留別永叔

舊友競留連我征時已晚但言會合難豈道行路遠行路到有期別離未卽返  
明當各相思念此去且嬾

觀永叔畫真

良金美玉不可畫可畫唯應色與形除却堅明盡非寶世人何得重丹青

畫真來嵩

廣陵太守歐陽公令爾畫我惟悴容便傳髣髴在縑素只欠勁直藏心胸與我  
貨布不肯受比之醫卜曾非庸公今許爾此一節爾只丹青其亦逢

別後寄永叔

前日辭親淚又爲別友出愁極反無言欲言詞已窒荷公知我詩數數形美述  
茲道日未堙可與古爲匹孟盧張賈流其言不相昵或多窮苦語或特事豪逸

而於韓公門取之不一律乃欲存此心欲使名譽盜竊比於老郊深愧言過實然於世道中固且異謗嫉交情有若此始可論膠漆

登揚州北門

樓上山如澹墨畫城中水似輕藍接揚州今似刀州景似聽中和樂職歌

因目痛有作

已爲貧孟郊拚作瞎張籍詩句但口吟世事不眼歷既能分好惡難用變青白讀書聽吾兒且未廢朝夕

宿邵埭聞雨因買藕芡人迴呈永叔

秋雨鴈來急夜舟人未眠亂風燈不定暝色樹相連寒屋猛添響濕窗愁打穿明朝持藕使書此寄公前

寄許主客

昨日山光寺前雨今朝邵伯堰頭風野雲不散低侵水魚艇無依尙蓋蓬藕味初能消酒渴蓼芳猶愛照波紅揚州有使急迴去敢此寄聲非塞鴻

八月二十二日迴過三溝

不見沙上雙飛鳥莫取波中比目魚重過三溝特惆悵西風滿眼是秋蕖

牛背雙鸚鵡

牛背雙鸚鵡煙波共入時草枯行解美日晚趁羣遲閑載寧辭遠相鳴不問雌  
初驚牧人去飛上野桑枝

廣陵歐陽永叔贈寒林石硯屏

磷磷石屏上濃澹樹林分隔水見寒鳥暗枝藏宿雲賢哉吾益友持以贈離羣  
琥珀不須問中心多化蚊

岸貧

無能事耕穫亦不有雞豚燒蚌曬槎沫織蓑依樹根野蘆編作室青蔓與爲門  
穉子將荷葉還充犢鼻褌

邨豪

日擊收田鼓時稱大有年爛傾新釀酒飽載下江船女髻銀釵滿童袍翠氎鮮

里胥休借問不信有官權

晚雲

黝黝日脚雲斷續如破灘忽舒金翠尾始識秦女鸞又改爲連牛綴燧懷齊單  
伺黑密不囂額額城未剋風吹了無物猶立船頭看

荇

荇葉光於水鉤牽入遠汀淺黃雙蛟蝶五色小蜻蜓老死懷江女飄浮笑楚萍  
西風莫苦急孤蕊有餘馨

晚日

晚日晴還暖人閑見物機葉枯蟲自裹窗響蜜尋歸林下見收柿水邊聞擣衣  
吾嗟久爲客却愧寄荆扉

寄酬發運許主客

淮上秋來物意閑又乘輕舸信帆還一浮一沒水中鳥更遠更昏天外山斜幅  
纏絆兵吏至濃金灑紙領珠頒欲酬已覺不能敵盡日臨風思自慳

前日

前日揚州去酒熟美蟹蚶秋風淮陰來沙暖拾蚌螭不言爾貧富只繫其鄙夷  
漢重二千石後世何忽之

淮陰

青環瘦鐵纜繫在淮陰城水脛多長短林枝有直橫山夔一足走妖鳥九頭鳴  
韓信祠堂古誰將跨下平

哀王孫

泗水赤龍將欲飛瘦蛟在泥雲未歸冰繭煮灰寒水擊長大王孫抱飢色誰知  
適自下鄉來日昊可哀猶未食菰飯白漿持與君王孫王孫何復云

沛公歌

赤帝醉提龍劍行徑草沒人壯士驚白蛇斷裂不可續神嫗哀哀夜深哭酒醒  
自負氣生虹從者日畏天下雄秦皇玉輿來向東安知隱在芒碭中婦人自識  
雲氣從王命艱哉豐沛公

宛陵先生文集卷第三十三

宛陵先生文集卷第三十四

使風

跨下橋南逆水風十幅蒲帆彎若弓  
淮波帶日魚鱗紅岌岌飛上北斗中  
龜山始撞人定鐘岸草澀澀鳴秋蟲

田家屋上壺

脩蔓屋頭綴大壺檐外垂霜乾葉猶苦  
風斷根未移收挂煙突近開充酒具遲  
賤生無所用會有千金時

九月二日夢後寄裴如晦

裴生安健否試問鴈經過處士賦鸚鵡  
將軍養駱駝食魚今飽未索米奈貧何  
昨夜分明夢持書認篆窠

昭信淮上

清淮渺然去白浪勢如奔同發已先遠  
獨行將向昏洲長寧辨路夜泊偶依邨  
燈火稍覺亂應聞人語喧

小邨

淮闊洲多忽有邨棘籬疎敗漫爲門寒雞得食自呼伴老叟無衣猶抱孫野艇  
鳥翹唯斷纜枯桑水齧只危根嗟哉生計一如此謬入王民版籍論

難知

自古難知不遇人朝爲蛇鼠暮龍麟魏齊客溺箚中死亭長妻輕跨下貧白石  
夜歌誰與進黃金懷印自能伸丈夫只患無才業何恨區區逐路塵

九山

我經九山問野叟崔嵬一無安曰九且恐斷岸積瓊玖復意陂原多產韭又疑  
堆壘若柱灸四者未悟叟不言使我臨流獨搔首

淮岸

秋水刷土骨峭瘦如老石虛沙歸島嶼寒浪激竅隙下過白魚尾上有蒼獺迹  
平岡自相連野籜鳴風櫟

原有禽倏鳴升遽默下

小禽不盈握羽翮自輕捷裊裊上雲鳴聲窮如隕葉雀懷啄粟娛鷄有棲蒿愜  
嗟嗟力甚微枉與鷹鷂接

浮來山

舊說此山  
產雲母

秦鬼驅卯沙聚結無蒼翠誰云海上海上移能與潮浮至洞嘘蛟鼉腥廟畫風雷異  
雲母今有無庶爲仙藥餌

泊下黃溪

黃溪晚來泊得見田家微刺艇斜陽下耕洲載耒歸牛鳴向窄犢犬喜入人衣  
復有返樵者檐枯翹雉肥

濠梁感懷

天子昔封禪吾叔從金輿迴首泰山下出建雙隼旗來尋觀魚臺遂遠承明廬  
當時十五詠螢照墨石書

渦口

秋水見灘底淺沙交浪痕白魚跳處急宿鴈下時昏帶月入渦尾落帆防石根

清淮行未盡明日又前邨

夢同諸公餞仲文夢中坐上作

已許郊間陳祖席少停車馬莫催行劉郎休恨三千里樽酒十分聽我傾

過塗荆二山遇暗石

淮流兩山間勢束秋漲急聚石如伏兵斂斂波下立輕舟不可防而況昧所習  
暗值柂已毀後者戒前及同發去漸遙更愁寒灘澀

舟上采菊

泯泯平慢流行當季秋月演漾過汀洲汀洲芳杜歇白露夜正霏黃菊寒更發  
采以泛酒卮不獨映華髮

朝暮

氣候輒未定寒暄朝暮間挾纒水風生衣綌川陽還綠草藏邃岸枯櫟植高山  
且非天時異順理心自閑

荆山

和楚人茲楚地泣玉山無所記但見楚人誇產玉古廟幽幽無鬼哭儻有鬼定無足

塗山

古傳神禹迹今向舊山阿莫問辛壬娶從來甲子多夜淮低激射朝江上嵯峨荒廟立泥骨巖頭風雨過

曉日

出舟曉日升曛曠波上爛爛黃金鎔纂歷紫煙生鏡中釣船似畫分橫縱風莫從虎雲從龍變作霏霞重復重

雞聲

雞聲踏曉呼呼起扶桑烏含光如車輪碾雲蹤迹無誰教夸父逐遠向鄧林趨復從海底轉循環似轆轤

采杞

誰謂岸無杞條其長矣誰謂杞無實爛其皇矣掇彼征矣檐旣盈矣捨棘與蠹

造此宜酒維此宜酒我挹我注我飲我助以養我籲

泊檝澗觀渡

隔岸呼舟楫臨河立馬牛解鞍沙上憩沉網渚間收殘日銜沙尾孤帆落成頭  
莫愁暄作雨晚水白煙浮

看山寄宋中道

前山不礙遠斷處吐尖碧研青點無光澹墨近有迹前林橫白雲復與後嶺隔  
孤舟川上人引望不知夕安得老畫師寫寄幽懷客

暮雨

水上魚吹白露山頭雲與龍附潭中水作潭中雨朱鱉飛道吳洲去鯉魚相隨  
不知數老蛤銜泥在深處

細雨樵行

蛟人困臥寒潭底帖波濛濛垂白綃波上女兒飛輕橈逆流自與郎去樵風吹  
鬢髮不及撩雅翅卷起蠶尾翹濃纈羅帶長繞腰日暮下來吹短簫

晨雅

雲昏月黑雅不知，鼓聲鼕鼕雞報啼。  
睥睨未辨天東西，癡雛噪舞羣翅低。  
野桑葉卷風淒淒，濃霧不起寒雨迷。  
晨雅却歸巢上棲。

會稽婦

食藕莫問濁水泥，嫁壻莫問寒家兒。  
寒兒黧黑面無脂，驥子縱瘦骨骼奇。  
買臣貧賤妻生離，行歌負薪何媿之。  
高車來駕建朱旗，銅牙文弩擐犀皮。  
官迎吏走萬馬蹄，江潮晝起橫白霓。  
舊妻呼載後乘歸，悔淚夜落無聲啼。  
吳酒雖美吳魚肥，儂今豢養慚豬雞。  
園中高樹多曲枝，一日挂與桑蟲齊。

九日次壽州

昔人把菊望青盃，今我持酒無黃花。  
自催屋裏紅鱗膾，不彈牆頭白項雅。  
壽春城高枕淮水，綠蒲疎疎暮帆起。  
登臨不學孟參軍，帽墜山風費嘲紙。

泊壽春龍潭上夜半黑風破一舟

盲風吼空來不識，前山遮迴激入灣。  
口暗浪騰水涯喧，聞破我船沈沒驚一家。

晦昧若塗漆心緒如亂麻燈光不出戶鬼火空照沙百物任飄蕩薄命誰怨嗟  
但存此空舟坐類鳥寄槎妻孥皆失色一夕鬢欲華詹惶俟天明頃刻抵歲遐  
雨寒雞唱遲況乃城上雅

潁上得鯉魚爲膾懷餘姚謝師厚

青蕘潭上老潁尾網中魚買作秋盤膾還思遠客書越齋橙熟久楚飯稻春初  
雖去故鄉遠不嫌爲饌疎

丘家渡早發

曲潁若秋蛇屈盤鱗甲活問戍得耕人拾魚逢祭獮草窠殘野燒樹挂經流沫  
百里相對看頻行媿迂闊

水次薜花

秋雨日霏霏碧花生疊疊水邊有神女妝去遺翠靨岸側小家婦不知所宜愜  
未得未還人自將渾面帖

夜行憶山中

青熒鬼火動不悟前山雨昏徑梟鳥鳴獨行毛髮聚槲葉枯綴林風動疑有虎  
低迷薄雲開心喜澹月吐

邨醪

雨濕破荆籬風搖樹亞旗小槽聲不急挈榼問沽遲摘果野棠熟望人船火隨  
燈前相對飲還似昔過時

川上田家

斜光隔河明入照桑柘下皋壟生麥苗青青尙堪把遠見牛羊歸相親童稚野  
醉歌秋草間頗與世家寡

發勻陵

秋雨密無迹濛濛在一川孤邨望漸遠去鳥飛已先向晚雲漏日微光人倚船  
安知偶自適落岸逢沙泉

聞鴈

濕雲夜不散薄處微有星孤鴈去何急一聲愁更聽心應失舊侶翅已高青冥

幾日江海上鳧鷗共滿汀

牽船人

沙洲折脚鴈疑人鋪翅行奈何暮雨來復值寒風生濕毛染泥滓縮頸無鳴聲  
爾輩正若此猶勝被堅兵

田人夜歸

田收野更迴墟里隔煙陂荒徑已風急獨行唯犬隨荆扉候不掩穉子望先知  
自是一生樂何須閭井爲

行次潁州聞張甥宗亮不捷鄉薦以詩唁而迎之

風前汝陰道雨冷江南書始歎與意異何慚定鑑疎但能存楚玉切莫道黔驢  
不負當時約馳迎一乘車

聞櫓

靜夜有舟下中流聞櫓聲隔窗燈已暗卷幔月微明漸向寒灣遠遙應宿枕驚  
客心何苦急曾是不緣名

晚鷗

晴川帶微陽鷗鳥雙飛去雙飛如有歸並宿向何處汀寒霧暮歷永落沙沮洳  
不避近行舟應知心寡慮

新晴

陰雲忽掃盡朝日吐清光萬里不礙日衆鳥欣唳草樹已搖落山川尙鬱蒼  
百事擇佳日佳日唯晴陽

將次項城阻風舟不能進

逆水寒風急輕舟晚不前因來泊古渡聊且上平田草軟行方穩鶉驚去瞥然  
却尋孤岸遠吹幘亂華顛

斫膾懷永叔

高河古穴深下有蒼鱗鯽出水鱉將飛落刀細可織香杭炊正滑白酒美少力  
但欠平生歡共此中路食

夜漁

珍傲宋版印  
夜漁歸自速短艇若飛雲水動月猶白擊音人不聞迴身明燭底撫卷至宵分  
我以此爲足勞勞非爾羣

驚鳧

驚鳧雖避人終戀舊所泊盡背船頭去却從船尾落須知取勢高不是初飛錯

十月三日相公花下小飲賦四題

拒霜

木杪芙蓉花開非紅豔早常畏晚霜寒朱華競衰草

九月二十八日牡丹

香包已向青春發又見秋深特地開應笑菊殘無意思不能邀賦洛陽才

殘菊

零落黃金蕊雖枯不改香深叢隱孤秀猶得奉清觴

三日讌集

蕭然寒圃有殘芳吟遍朱欄向夕陽旣許坐陪公袞貴却慚蒿羽接鸞皇

依韻許主客北樓夜會

一月能逢幾笑歡  
高樓紅蠟滴金盤  
吟餘隴首雲初散  
唱盡陽關露已寒  
不管星河漸西落  
自將煙水去程寬  
當時坐客各南北  
誰憶重遊泛木蘭

謹和相國屋上菊叢

屋上有叢菊結根深  
瓦縫旣無地勢美又乏土力擁  
乃因塗明生不由人所種  
亦能應節開焉取入公用公來步廣庭  
聞鴈目始縱忽見粲然英  
降植合常從賓僚席其傍  
詠玩意已重物莫厭僻  
遠會遇良可頌

寒菜

畦蔬收莫晚圃吏已能供  
根脆土將凍葉萎霜漸濃  
不應虛匕箸還得間庖饗  
旨蓄詩人詠從來用禦冬

送裴節推歸京

遠水未生凍輕舟歸大梁  
岸迴初向月篙滑始霑霜  
清世豈淹俊上公存薦章  
行應重對策莫媿漢賢良

十月菊上蜂

黃蜂得晴日不道菊開稀  
向蕊晚寒起落叢無力飛  
輕輕難自舉帖帖一何微  
莫問巢房處斜陽奈欲歸

送江學士睦州通判

涉淮淮水淺沂溪溪水遲  
君到桐廬日正值采茶時  
試問嚴陵迹今復有誰知  
和民樂

歲晚場功畢野老相經過  
有酒自斟酌適意同笑歌  
大兒緝牛衣小兒護雞窠  
困廩見餘積息戍靡負戈  
林間落熟果屋裏鳴寒梭  
會待朔雪時狐兔生罝羅  
飫鮮持作腊贈乏不言他  
是非了莫問此理當如何

和晚花

春花莫厭早秋草莫厭遲  
各不相羨慕榮枯乃繫時  
芙蓉東籬英雖晚亦自宜  
霜前給給開霜後差差萎  
深處有孤萼寒月尙見披  
野蜂徒愛香凍翼不能支  
抱枝無力去憫然見恩私

聞進士販茶

自此宣州至和  
二年五月後

山園茶盛四五月江南竊販如豺狼頑凶少壯冒嶺險夜行作隊如刀槍浮浪  
書生亦貪利史笥經箱爲盜囊津頭吏卒雖捕獲官司直惜儒衣裳却來城中  
談孔孟言語便欲非堯湯三日夏雨刺昏墊五日炎熱譏旱傷百端得錢事酒  
鬻屋裏餓婦無餼糧一身溝壑乃自取將相賢科何爾當

梅雨

三日雨不止蚯蚓上我堂濕菌生枯籬潤氣醜素裳東池蝦蟆兒無限相跳梁  
野草侵花園忽與欄干長門前無車馬苔色何蒼蒼屋後昭亭山又被雲蔽藏  
四向不可往靜坐唯一牀寂然忘外慮微誦黃庭章妻子笑我閑曷不自舉觴  
已勝伯倫婦一醉猶在傍

鳥毀燕巢

堂間兩胡燕哺雛銜百蟲老雅亦養子偷雛燕巢中燕巢忽墮地六七皆命窮  
赤身無羽翼腸斷彼雌雄來往徒鳴聲安得置室宮我閔樓窠斂俄已彊雨風

從今更生卵不若受女娥

五月十三日大水

誰知山中水忽向舍外流誰知門前路已通溪中舟窮蛇上竹枝聚蚓登階陬  
我家地勢高四顧如湖漉浮萍穿籬眼斷葑葑過屋頭官吏救市橋停車當市樓  
應念此中居望不辯馬牛危湍瀉天河漫漫無汀洲羣蛙正得時日夜鳴不休  
戢戢後池魚隨波去難留揚鬢雖自在江上多網鉤紛紜閭里兒踊躍竟學泅  
吾慕孔宣父有意乘桴浮

宛陵先生文集卷第三十四

宛陵先生文集卷第三十五

依韻和正仲賦楊兵部吳興五題

雨過見虹明長橋欲映城窗間晴氣入空際晝涼生有扇徒看畫無冰自覺清  
人知太守姓不減漢公名

清風樓

在昔有佳句故人如遠來競生吳客衽不上楚王臺稍拂清樽動時吹翠帟開  
長安在何處水鳥望中迴

明月樓

霽霽前溪白蒼蒼後嶺巍人疑查上客星合蚌中暉影轉闌干迴杯行漏鼓稀  
只知誇粉黛不向桂邊歸

碧瀾堂

虛雲臨滉漾橋勢對隆穹環珮佳人去汀洲翠帶空橘船過砌下蘭棟起雲中  
欲問芳菲地吳王一廢宮

逍遙堂

江東有賢守好客似春申自構杏梁地不生珠履塵樂章思季子後俊得吳均  
寢臥在其下知君學至人

依韻和行之都官芭蕉詩

看取有心常不展亦知隨分拆佳葩無端大葉映蓮幕却笑菖蒲罕見花

促織

札札草間鳴促促機上聲織女夜中起明河檐外橫一絲不入杼疎密工未精  
豈知天孫巧衣脫六銖輕人間唯貴重暗蟲休催成

吳仲庶殿院寄示與呂沖之馬仲涂唱和詩六篇邀余次韻焉

次韻被命出城共汎

三驄忽出乘楚艘直氣突兀如吳濤大都智勇皆世豪橫身破浪親戰舳迴舷  
受箭誰畏曹猛士心伏寒生毛風聲鶴唳傳九皋何用寶刀稱孟勞右持酒杯  
左持螯功成各慕前人高不言大享烹太牢下與尺鷃翔於蒿

依韻游陳留禪寺後池

共逢香刹住萬景筆頭堆池水蛟龍盡汀洲鴈鶻來遠游情莫落去國意徘徊  
舟子休敲鼓王程不爾催

次韻晚泊睢陽

日下繡衣客江南燕尾艎迹雖同鷁退心不假犀涼舊國旌旄去包原苑園荒  
臨隄一懷古柳上見微陽

汴渠

我實山野人不識經濟宜聞歌汴渠勞謾綴汴渠詩汴水源本清隨分黃河枝  
濁流方已盛清派不可推天王居大梁龍舉雲必隨設無通舟航百貨當陸馳  
人間牛驪驢定應無完皮苟欲東南蘇要省聚斂爲兵衛詎能削乃須雄京師  
今來雖太平盡罷未是時願循祖宗規勿益羣息之譬竭兩川賦豈由此水施  
縱有三峽下率皆麤冗資慎莫尤汴渠非渠取膏脂

次韻臨淮感事

楚舸高帆未可開滿帆風暴作陰雷聖文豐豐傷漂溺世路紛紛自往來浮磬  
猶聞傳激越沈妖不見鎖淵回連陂鼃龜鳴無數安得周官爲灑灰

次韻夜過新開湖憶二御共泛

出舟湖渺渺月白絕纖氛已見水如鑑莫生波上雲獨征何慕侶冷酌不知醺  
露下清吟久同心本愛君

答宣城張主簿遺雅山茶次其韻

昔觀唐人詩茶詠雅山嘉雅銜茶子生遂同山名雅重以初槍旗采之穿煙霞  
江南雖盛產處處無此茶纖嫩如雀舌煎烹比露芽競收青蒨焙不重漉酒紗  
顧渚亦頗近蒙頂來以遐雙井鷹掇爪建溪春剝葩日鑄弄香美天目猶稻麻  
吳人與越人各各相鬪夸傳買費金帛愛貪無夷華甘苦不一致精麤還有差  
至珍非貴多爲贈勿言些如何煩縣僚忽遺及我家雪貯雙砂罌詩琢無玉瑕  
文字搜怪奇難於抱長蛇明珠滿紙上剩畜不爲奢玩久手生胝窺久眼生花  
嘗聞茗消肉應亦可破瘕飲啜氣覺清賞重歎復嗟歎既不足吟誦又豈加

我今實彊爲君莫笑我邪

送寧國軍宰崔寺丞移臨安

六月畏嶺險乃陟川程迂遙看雲中鴈不亂江上鳧魚網離飛鴻我邑望何殊  
鱗方懷其剖鳥反值以剗爲言等王民豈限楚與吳是維見戀慕作詩贈路隅

辨疑贈獻甫

一客逢吠狗無箠制狗狂一客叱狗吠一客言狗良良狗豈妄吠好言已莫詳  
言乃仁之趨叱乃義所當趨仁不顧義非是助狗猖吾今不疑仁仁義嗟何妨

盜儒

其衣乃儒服其說乃墨夷天生物一本今爾二本爲爾忍不葬親委以飽狐狸  
吾心則孟子不聽爾矢辭

宣城宰郭仲文遺林檎

右軍好佳果墨帖求林檎君今忽持贈知有逸少心密枝傳應遠朱頰映已深  
不愁炎暑劇幸同玉漿斟

自和

陶公種五柳華氏戲五禽達性與養生共得古人心佳果能御暑致之意何深  
河朔存故事助飲莫憚斟

送王克憲奉職之彭澤

折柳贈子行況聞彭澤去將過五株下可與青青助渭城人唱罷羌管愁吹處  
江上定多閑疎陰就箕鋸

寄潘歙州伯恭

我貧性愛酒有酒無錢沽新安走牙兵六月至我廬手中持尺題肩上擔瓦壺  
高山度青天救此愁腸枯開之聊傾樽渴肺如澆酥醉來欲學李白騎鯨魚又  
思阮籍跨蹇驢上溪無健鱗下嶺無壯駒憶君南望空長吁

再寄歙州潘伯恭

青山截天去古路蔽雲中不有行人至安知與郡通高樓雖窈窕遠樹已溟濛  
今日勞君問衡門一老翁

依韻和永叔澄心堂紙答劉原甫

退之昔負天下才掃掩衆說猶除埃張籍盧仝鬪新怪最稱東野爲奇瑰當時  
辭人固不少漫費紙札磨松煤歐陽今與韓相似海水浩浩山鬼鬼石君蘇君  
比盧籍以我擬郊嗟困摧公之此心實扶助更復有力誰論哉禁林晚入接俊  
彥一出古紙還相哀曼卿子美人不識昔嘗吟唱同樽壘因之作詩答原甫文  
字駛穩如刀裁怪其有紙不寄我如此出語亦善談往年公贈兩大軸于今愛  
惜不輒開是時有詩述本末值公再入居蘭臺崇文庫書作總目未暇綴韻酬  
草萊前者京師競分買罄竭舊府歸鄒枚自慚把筆粗成字安可遠與鍾王陪  
文高墨妙公第一宜用此紙傳將來

依韻酬永叔示余銀杏

去年我何有鴨脚贈遠人人將比鵝毛貴多不貴珍雖少未爲貴亦以知我貧  
至交不變舊佳果幸及新窮坑我易滿分餉猶奉親計料失廣大瑣屑且沈淪  
何用報珠玉千里來慇懃

依韻酬永叔再示

前歲守廩京城西有如勾踐巢會稽引杯嘗膽未雪恥怒蛙起揖當泐蹄海天  
白日蔽光影霹靂一過收雲霓九皋澄明鶴翅濕欲暮刷羽聲嘶嘶客來東方  
美鬢鬣夜光出袖行無迷授予照眼已希世自顧臭辣猶萍齏文章製作比善  
塑物象變怪一以泥泥雖各用有巧拙巧之高絕非由梯又聞東夷蹈水底騎  
頸直踞通天犀曼卿子美樓入室似使二嫂治朕棲舜歸在牀不可得此實素  
分非能齊而今我獨向田里秋稼已熟烹黃雞自傾白酒坐溪上誰念往日無  
梁稊鄰邦或有寄嘉釀瓦罌土缶盛玻璃昨喜得書書滿紙官尊職大憐我睽  
怪我書亂苦簡略疲駑豈敢攀駿驪貴賤交情古來有胸中不欲置畛畦世間  
百事厭著意但願無病年壽躋田園未多亦粗給兒女況足資提攜終當去問  
綿上叟自與野老月下犁

池州蕭相樓

復所建

樓中九華峯天削水蒼玉公主何參差來雲自聯續我思唐蕭家八人居宰錄

瑀嵩華復  
俛傲真邁

朱欄幾廢興下視寒江曲吳侯來爲邦百事無窘束新之以登臨風月詠玩足安得黃鵠翼一舉遺世俗

雜興

苦棟樹青鷓鴣啄鹽土鳴嗚嗚老雅銜茶子爭噪落嶺隅不覺茶滿山漁利入江湖鹽由鷓鴣起茶由老雅趨誘以觸禁網二鳥誰與誅

東家月吐明西家犬爭吠玉兔在中天曾何競窺穢姮娥雖夜行莫比淫奔廢  
嗷嗷籬下音胡不鈐其喙

夢後寄歐陽永叔

不趁常參久安眠向舊溪五更千里夢殘月一城雞適往言猶是浮生理可齊  
山王今已貴肯聽竹禽啼

送王著作赴西京壽安

翔向

去作西畿令當趨大尹庭閑尋前代迹淨掃古槐廳未慣餐周粟還應憶楚萍  
但逢花木處知我昔常經

答了素上人用其韻

予心每澹泊世路多變詐梟鳴與鵬怪何用思彈射空山雖夜行猛虎終不怕  
功名未逢時壯士且出跨七尺無競軀市人應亦訝有香知害身扶臍見窮麝  
一朝珠出淵百金未酬價爾尋遠公去挈盃廬峯下我趨仁義急不解如陶謝

送通判黃國博入浙

西風半空鳴且號吳天點破吳鴻高東溪車馬走送客白露衰蘭輕若毛客當  
西歸乃東去爲何欲及八月十五夜觀洪濤洗蕩生前邑邑不平氣付與滄海  
之水隨滔滔却來廣陵願相見拍手大笑傾新醪一飲一石無一錢莫管寒近  
脫弊袍脫袍準酒不惜醉天意未必凍我曹

烏啄棗

樹頭陽烏飢啄棗破紅遶地青蠅老青蠅兩濕驚不飛殘棗入泥人不掃西風  
落盡烏亦歸晉客齒黃終懊惱

真上人因送毛令傷足復傷冷二首

陶令歸時遠公送石苔秋兩步遲遲凌霄花  
在古松上也笑向人人不知  
聞道山中出入稀偶來溪上坐談微野雲  
不管田袍薄寒逼瘦膚相伴歸

潘歙州怪予遂行與黃君同路黃先游浙矣依韻酬寄

未識潘岳貌已知潘岳名去年改藩屏暫  
此解佩纓一見意已合談笑僕屢更  
豈唯文學富況亦論事精溪邊昔欲罷屑  
屑秋雨零于今又聞蟬重起悲涼情  
作詩遠見招值我將西行譬彼矯翼鳥  
革然顧侶鳴蒼山不可陟空入江上舲  
黃君雖云約同泛明日自訪柳惲汀寒  
儒所向多不成或西或東車馬驚高樓  
登望酸目睛欲觀弄濤仍膾鯨新安太守  
空相迎舉手謝君江水清

潘歙州寄紙三百番石硯一枚

永叔新詩笑原父不將澄心紙寄予澄心  
紙出新安郡臘月敲冰滑有餘潘侯  
不獨能致紙羅紋細硯鑄龍尾墨花磨  
碧涵鼠鬚玉方舞盤蛇與虺其紙如彼  
硯如此窮儒有之應瞰鬼

八月七日始見白髭一莖

昔見白髭驚今見白髭喜人將拔去之我獨不然耳拔之既更生留之何所恥  
白日儻日拔日拔詎能已黑壯不爲貴白衰不爲鄙道德保於中任從髭髮齒

送僧了素游廬山

平生愛廬山夢寢不可去江上饒買船偶來看已飭釋子言南游徘徊瞻瀑布  
月飛金燄斗光展千尺素嫦娥呼織女機杼勿復措必虞山鬼笑皎潔無纖汙  
爾若見遠公贈之爲坐具

宛陵先生文集卷第三十五

宛陵先生文集卷第三十六

送方進士遊廬山

長風沙浪屋許大羅刹石齒水下排歷此二險過湓浦始見瀑布懸蒼厓繫舟  
上岸入松徑三日踏穿新蠟鞵路盤深谷出嶺望後山日照前山霾偶逢風雨  
恐衣溼側倚石脇人相乖兩收不覺在高處却見童僕提攜偕水聲不絕鳥聲  
好藥草香氣侵人懷老僧避地去足跣野客就澗開門闖樹巖隱映見寺刹層  
層杳杳躋雲階塢田將穫烏雀橫秋果正熟猴猿齧東林澹齋應似舊唯此足  
以待爾儕子心灑落撇然我方塵垢難磨揩

讀日者傳答俞生

宋忠爲大夫賈誼爲博士同與休沐下訪卜長安市吾不如二人讀書無舉趾  
借曰當乘肥乘肥非吾指唯思泉石間坐臥松風美

隱靜山懷賢師自持柏栽二十本種於會慶堂

新作齋堂祠畫像又興高閣祕天蹤今朝還藉君移柏明日已因鵝種松

近以羣鵝

換松植  
於路傍

九月六日登舟再和潘歙州紙硯

文房四寶出二郡邇來賞愛君與予予傳澄心古紙樣君使製之精意餘自茲  
重詠南堂紙將今世人知首尾又得水底碧玉腴溪匠畏持如抱虺拜祝雙珍  
不可辭年衰只怕厭飲鬼

九月十一日下昭亭舟中

平生山野性坐臥愛流水適從昭亭來興自明河起小舟浮輕查身入星辰裏  
飲牛誰家郎照鬢誰家子隔岸心相望翻然洲鵲喜灘頭磷磷石欲贈畏指毀  
留取自支機成都無卜士

和張簿寧國山門六題

山門

按碑本軌轍作二軌雙峙作雙壁第六句  
作田外峯巒回抱今陳卑尊當從碑本

青山中穴爲大門下通軌轍高莫論飛雲出納不計限雙峙平削無刀痕入門  
復見田園美田外峯巒回抱尊棲靈畜怪不可詰夔魑往往來守闔

紫雲巖

高巖日照雲常起吹作蘭花透紋綺橫爲步障看未收山雨一來風滿耳

夕陽巖

日脚射空金縷直下映壁間梭未織野老先知雨又風明朝望此重雲黑

朝陽洞

洞門雖向扶桑開洞深不放陽鳥入古來道士今莫逢石壁乳流苔正溼

漣漪洞

流泉泱泱出洞底自有細浪非風吹山花逐水到山下漏泄人間春未知

碧雲洞

誰將萬古倚雲劍刺破蒼石天窗開下貯泓淵不可極有時月漏清光來

將離宣城寄吳正仲

吳均詩語多奇揭苦倩鴛鴦謝明月昭亭川上此禽閑爲寄吳郎吾西發西歸  
千里浮輕舟夜觀蟾光逆水流水流東海月西海各去雖殊意長在月偏皎皎

隨人行水亦泆泆非浪改酒盆龍杓閑到吟梅花重葉將誰采

湯琪祕校遺沈水管筆一枝

沉香細榦天通中東毫爲呼諸葛翁久從海上厭持握乞與阮籍書塗窮物珍  
豈宜賤子有更後應合歸王公虛堂淨几塵不到硯傍置架珊瑚紅乃知用遇  
自有處君今莫歎居蒿蓬

檝舟昭亭送都官暫歸錢唐

前枉大梁城詩賦嘉入幕茲對昭亭山將行還有作別離此與彼終始情不薄  
我爲解羈馬君乃高飛鶴塵蹄未能息健翅懷棲泊尋巢望吳田一傍華亭郭  
況多丹頂雛坐看翔寥廓

依韻公澤察推

君來何所聞君去何所見自古慕虛名往往輕旣面竊常恃賦稟平直如勁箭  
是以五十年長甘守貧賤相逢嗟未幾遽遠劇飛電今雖行已晚多謝勤相唁  
晏成績太祝遺雙井茶五品茶具四枚近詩六十篇因以爲謝

始於歐陽永叔席乃識雙井絕品茶次逢江東許子春又出鷹爪與露芽鷹爪  
斷之中有光碾成雪色浮乳花晏公風流丞相族以此五色論等差遠走犀兵  
至蓬巷青箬出篋封題加紋柘冰磁作精具靈味一啜驅昏邪神還氣王讀高  
詠六十五篇金出沙已從鍛鍊出至寶終老不變傳幽遐自惟平昔所得者何  
異瓦礫空盈車滌心洗腑彊爲答愈苦愈拙徒興嗟

留題開元寺仙上人平雲閣

背市面山色平日觀白雲漁舟溪上歌游客欄邊聞俯簷翠柏瘦蔓籬秋實蕢  
偶來心意靜塵慮如埽空

送黃生

我本東西南北人窮塗不復淚霑巾亦知車馬有行色爲見長沮與問津

別張景嵩

我雖識君晚君能知我心我心昭亭水見底無尺尋照之不爲隱測之不爲深  
魚鰕既混混藻荇亦侵侵終當至滄海浴日開黃金君當下灘去石浪激寒音

猶能洗君目病醫雲銷岑

別鍾京

我憐鍾氏子冒雨爲求文暫以經茲邁與之書所聞野鷗窺筆硯舟子采蒿芹  
況有新炊飯簞漿可送君

江口遇劉糺曹赴鄂州寄張大卿

我同陶淵明遠憶顏光祿得錢留酒家醉臥江蕪綠故人已貴身獨賤籬根枯  
死佳花菊孤鴻飛去鸚鵡洲寄聲高樓謝黃鵠使君本是洛陽人嘗憐酪酊銅  
駝曲休將玉笛城上吹武昌老人聽不足已知清音通九霄定應悔說蘄州竹

送劉糺曹

溪邊前日君辭我江上今朝我送君自去蘆洲寄消息故人猶在武昌軍

寄題開元寺明上人院假山

石是青蒼石山非杳藹山諸峯生鏡裏小嶺傍池間雨不因雲出門疑爲客關  
何須費蠟屐暫到此中閑

寄李獻甫

何言自我去眼前一似空城中豈無人過目猶飛蟲又厭塵事多枳棘生胸中  
安知秋江水淨碧如磨銅尙恨有世累不及垂釣翁望望當速來止琴視孤鴻  
塗路無不通行貧足如縛輕裘誰家子百金負六博蜀道不爲難太行不爲惡  
平地乏一錢寸步鄰溝壑

題姑蘇豹隱堂

青山崔嵬藏古基文豹不見空斷碑華堂重構猶隱霧地今易主還好好奇欲邀  
明月一去飲嫦娥將悔出海遲谿邊少年意氣在來往只借白鹿騎自稱山人  
具肴酒酒酣請我留此辭謫仙境近何可問當日無詠亦所疑

雨還

雨濛濛兮欲暮路險絕兮深泥嗟予僕兮甚餒畏予馬兮顛蹄關已度兮心緩  
家將至兮涉溪喜膝前兮童穉餉燈下兮女妻

哭笑鳥

日月轉入地星辰蔽重雲夜色晦若漆怪禽巢未焚其音哭且笑哀樂詎能分  
方哭且笑時曾莫有以羣哭爲何所悲笑爲何所聞了不預人事吉凶誰復云

山行冒雨至邨家

雨急芹泥滑禽鳴苦竹秋野香生草木雲潤上衣裘入石纔通馬穿林忽隱牛  
山家多淺井下照碧峯頭

八月九日晨興如廁有雅啄蛆

飛鳥先日出誰知彼雌雄豈無腐鼠食來啄穢廁蟲飽腹上高樹跋背噪西風  
吉凶非予聞臭惡在爾躬物靈必自絜可以推始終

夜坐

夜久方慮寂空堂燈燭明落葉有暫響暗蟲無停聲力學不爲己甘貧且徇名  
聊爲詠懷篇還想阮步兵

八月十五夜有懷

天爲水蒼玉月挖潭面冰萬里絕瑕玷百文已澄凝山河了然在星斗光莫增  
借問九州內豈無陰雲興緬懷去年秋是夜客廣陵太守歐陽公預邀三四朋  
乃值連連雨共飲陳華燈旣醉公有詠屬和予未能彊賦石屏物固慙無所稱  
今來宛溪上聊以故歲徵晶明正若此霰霖且何曾美景信難并康樂語足憑  
新堂生虛明未悟追隱吏無乃隱非時唯應喧可避移花莫傷根種竹不改翠  
牀中置素琴亦見陶潛意

詠嚴子陵

不顧萬乘主不屈千戶侯手澄百金魚身被一羊裘借問此何耳心遠忘九州  
青山束寒灘濺浪驚素鷗以之爲朋親安慕乘華軒老氏輕璧馬莊生惡犧牛  
終爲蘊石玉匱古輝巖陬

與潯陽舍弟別

昭亭潭上水下與九江通去客解輕舸落潮乘順風迴頭迷遠樹沒背見飛鴻

寂寞還蓬巷桓彝宅近東

九月十八日山中見杜鵑花復開

山中泉壑暖幽木寒更華春鳥各噤口游子未還家云誰未及還對此重興嗟  
何必因啼血顏色勝曙霞

記歲

買臣四十八猶苦行負薪我免以樵給貧居年與均道上不謳歌妻亦無恚嗔  
三者固異彼異同雙朱輪

種胡麻

悲哀易衰老鬢忽見二毛苟生亦何樂慈母年且高勉力向藥物曲哇聊自薈  
胡麻養氣血種以督兒曹傍枝延扶疎脩莢繇橐韜霜前未堅好霜後可炮熬  
誠非騰雲術顧此實以勞

達觀禪師曇穎住隱靜蘭若或言自此獼猴散走不來穎嘗哂曰吾知  
是山枇杷爲多始至也未實故其去將實也必羣集後果然穎惡乎俗

之好異恐傳以爲人惑欲予詠而播之

隱靜山中寺獼猴往往過導師歸以去盧橘熟還多禪地寧求悌居人切莫訛  
未嘗嫌此物任挂古松柯

穎公遺碧霄峯茗

到山春已晚何更有新茶峯頂應多雨天寒始發芽採時林狖靜蒸處石泉嘉  
持作衣囊祕分來五柳家

送達觀禪師歸隱靜寺古律二首

初逢洛陽陌再見南徐州所歷幾何時倏去二十秋今復振霜屨還山遠莫留  
我詠阮公詩物靡必沉浮誰云西海魚夜飛東海頭世人嗟識昧豈是滯林丘  
栗林霜下熟歸摘禦窮冬帶月涉溪水過山聞寺鐘未嫌雲衲溼已喜野人逢  
且莫似杯渡滄波無去蹤

冬至感懷

銜泣想慈顏感物哀不平自古九泉死靡隨新陽生稟命異草木彼將漸勾萌

人實嗣其世一衰復一榮

冬至日得師厚宋次道中道書

水國欲爲雪野冰將合河人同一陽至淚向入行多朋意今猶在年華悵似過  
看看四十九應笑此蹉跎

擬水西寺東峯亭九詠

垂澗藤

澗深連石壁石上生長藤孤援來自熟緣飲下復登賴無樵人迹且免束薪蒸

嶺上雲

我來東峯下遠見西嶺頭白雲忽已合向此偶遲留人誰問何有自可忘殷憂

林中翠

萬木總柔翠況復新晴時日色照欲動山氣斂還遲望之如何攬舉袂隨風吹

樓煙鳥

班班遠林鳥極目波煙中各識時早暮不忘巢西東推物得真意吾將效陶公

古壁苔

陰壁流暗泉古苔長自好不改春與秋何如路傍草空山正幽藹淨綠無人埽

幽徑石

緣溪去欲遠磊砢忽礙行旁臨側身險下忽寒流聲幽客慣來往同此猿鳥情

寒溪草

青青色堪染欲辨不知名根陰託乳魚水底抽新萌康樂池上詠獨與春夢成

陰厓竹

背嶺斷厓下老竹生扶疎孤根石上引勁節松不如莫言霜雪多終見綠有餘

臨軒桂

山楹無惡木但有綠桂叢幽芳尙未歇飛鳥銜殘紅不見離騷人憔悴吟秋風

依韻和達觀禪師還山後見寄

雲歸在高嶺人見是無心矯矯將棲鳥遙遙傍故林南方雖有暖臘月易成陰  
惟恐多風雪幽期未可尋

九華隱士居陳生寄松管筆

春松抽瘦梗削束費長毫雞距初含潤龍鱗不自韜嘗爲大夫後欲寫伯夷高一獲山家贈令吾媿汝曹

古柳

岸側古大柳誰種臨長江中自出蠹蝎百歲成枯腔忽值漲流沒槎牙綴旌幢  
腹膚藏蛟龍半夜雷砰鋒飛霆痕尙白如斬馬陵龐倏爾巨雷至萬弩聲裂缸  
又爲狂風摧所殘惟朽椿臥榦越大鼎絕臚不可扛就蒸以照漁駭鱗一何厖  
始知網罟細未足禁突撞隆準以脫去城下徒焚降我從洲上泊昏曉睨船窗  
始終覩變毀欲賦挑殘缸吾交評韓詩險韻古莫雙安得共詠此但嗟各他邦

放鵲

并序

烏鵲啄豆子槽圍夫患之以機得鵲其羣噪如救爲下上突掠甚急知不可脫  
聲益哀予閱之命釋縛放去因爲之辭

鵲爲禽之靈智兮胡蹈機而不知爲庸皂以困束兮固性命之將危喜遠人之

至止兮始屢驗以如期向何預覺兮此何自昏豈專心以謀食兮昧目前之禍  
根苟所履必慮患兮莫若去人遠以圖存屑餘秣以致死兮誠咎爾而無恥維  
羣鳴之苦傷兮使吾心之惻爾予惻孔孟兮爾自解則艱皂聽予言兮釋爾而  
還撫爾况爾兮爾無甚頑後誰恤爾兮拓彈方轡

聞西山虎

猛虎畏白日孤客莫夜行彼以不暴衆此何獨忘生飢必見人食不食且無名  
麋鹿能遠遁安得逢怒獰由人不由常役役官有程

凍禽

高樹繞吾廬薄暮煙氣重將棲立傍巢已振窺落翯有來同枿枝亦各不偃擁  
颼颼陰風寒夜雪豈無恐

登乾明院碧鮮亭

餘喘不苟盡順俗來飯僧東嶺有上方脩竹蔽孤稜下有蒼石案旁挂孤蔓藤  
繫累向塵世更住殊未能

隱靜遺枇杷

五月枇杷實青青味尚酸獼猴定撩亂欲待熟應難

正月十日五更夢中

今年花似去年新去年人比今年老我勸厚地一杯酒收拾白日莫苦早

紅梅

家住寒溪曲梅先雜煖春學妝如小女聚笑發丹脣野杏堪同舍山櫻莫與鄰  
休吹江上笛留伴庾園人

寄文鑒大士

讀書夜寂冷無火捲卷遂成搖膝吟始憶高僧將偈去安知古寺託雲深寒塘  
正睡遠鐘發野鳥亂鳴殘月沈明日呼兒整籃輿欲煩重過小溪陰

海棠

江燕入朱閣海棠繁錦條醉生燕玉頰瘦聚楚宮腰曾未分香去尤宜著意描

誰能共吹笛樹下想前朝

嘗於宋宣獻宅見圖畫明皇於海棠花下臥吹簫篋寧王吹笛黃幡綽拍

送餘干李少府

作尉古來清況於于越城舟中雨新足溪上水初生蒼獺出還沒素鷗飛且鳴  
休將五色棒欲取洛陽名

宛陵先生文集卷第三十六



宛陵先生文集卷第三十七

與二弟過溪至廣教蘭若

溪水今尚淺涉馬不及韉岸口出近郭野徑通平田行行渡小橋泱泱響細泉  
萬木陰古殿一燈明象筵長廊顏頽碑字體家法傳空堂裴相真白顙垂過咽  
名迹兩不滅豈獨畫與鐫高僧鑿崖腹建閣將雲連祕此龍鸞迹足使臣僕虔  
脩竹間長松森衛若被堅是必神物護禹穴空歲年飯訖過山後井傍攜茗煎  
探幽偶轉谷忽視昭亭巔蔓草不識名步側時得牽幽禽聲各異可辨唯杜鵑  
似驚俗客來聒聒兩耳邊弊廬隔城堞畏暮遽言還道逢張羅歸鳥媒兼死懸  
遂同山梁雉令我復喟然聊追一日事書以爲短篇

晚坐北軒望昭亭山

少客兩京間熟游嵩與華歸來宛溪上厭往昭亭下何以厭昭亭衰遲倦驅駕  
況復慚詠歌嘉辭前有謝咀嚙在人口甘美如食蔗方同陶淵明苦語近田舍  
節行固不變出處亦多怕常防惡少年豪橫使出跨譬如故將軍尙被亭長罵

不若守弊廬讀書至中夜

與諸弟及李少府訪廣教文鑿師

山僧邀我輩置酒比陶潛紫蕨老堪食青梅酸不嫌野蜂時入座巖鳥或窺檐  
薄暮未能去前溪月似鎌

至廣教因尋古石盆寺

古寺近田家山尋石益差化蟲懸縊女啼護響縲車僧坐樹間石馬行溪畔沙

野香無處辨歸路傍城斜

郡人不知古石盆寺在此山之傍舊基存焉山中有井相去可一里豈圖經所傳斐休井歟近城有石盆

寺其側亦云斐相井者恐非是何則杜牧有石盆山詩是寺因山名也從近城莫究其由呼益為盆必風俗訛也

觀王介夫蒙亭記因記題蒙亭

吾年將五十尙未暇讀易一聞蒙亭說乃見適所適維時明進退豈不在泉石  
野服製升越山庖盛雞蹠牀頭龍脣琴案上科斗籍風物稍佳時把酒會三益  
況以兄為郎仕也人豈迫重之愛之深自匪逢時客

亢陽和欲行舟者

春秋書閔雨乃見先王制有意在黎民山川無不祭今者望雲霓青天絕纖翳  
爲壇割舒鴈盤血陳水汭于時頗精虔奠爵必親沈向夕有微陰掃然還復霽  
吾聞先儒言陽驕不能閉此時繫穹旻己力安所詣宣王雲漢詩曾不鑒上帝  
恨無稟盪舟空自思躍螟

黃鶯二首

內家初上翠微宮樹裏窺人在半空笑語漸高無約束侍臣偷望向雲中  
西鄰少年今出遊東家女兒未識羞門前烏白葉已暗日暮問誰牆上頭

送懷賢上人歸隱靜兼寄達觀禪師

適從山中來復向山中去爲報山中人莫厭山中住近城塵土多亂爾煙霞趣  
野蜂銜漆汁尙欲爲蒂固息此可以安其能忘我論

送瑞竹長老歸當塗因寄徐著作

謝傅青山路春來蔓草生樵蘇猶不入餅錫莫能行朝上野船去宿逢溪雨鳴

多應見康樂曾重遠公名

和師承嗣達觀  
觀徐君頗稱之

鶯

桑間小婦好聲音映葉穿枝意已深  
盡日呼郎郎不應蕭蕭風雨到前林

守宮

嘗聞漢武帝偶問東方朔臣擬作龍呼  
慚無頭上角

夏園

夏園甘果熟日覺樹林稀  
休笑道傍李無人摘自肥

孔子廟震

宣城

霹靂下虛殿破楹非夢凶  
昔嘗瞻畫衮今實見升龍  
隱隱雷聲散疎疎霧氣從  
予知仲尼廟不是蓄乖慵

寄酬睦州晏殿丞

渚潭吐明月杳杳及吾廬  
流彩滿懷袖託情非烏魚  
朝因南澗雨暮入北畦鉏  
豈不藉餘潤況茲方飯蔬

李仲求寄建溪洪井茶七品云愈少愈佳未知嘗何如耳因條而答之

忽有西山使始遺七品茶末品無水暈六品無沈祖五品散雲脚四品浮粟花  
三品若瓊乳二品罕所加絕品不可議甘香焉等差一日嘗一甌六腑無昏邪  
夜枕不得寐月樹聞啼雅憂來唯覺衰可驗唯齒牙動搖有三四妨咀連左車  
髮亦足驚疎疎點霜華乃思平生游但恨江路賒安得一見之煮泉相與誇

送闕令之潭州寧鄉

秋風逆水急挂席飛鳥輕三江去雖遠一日行幾程朝辭洞庭岸暮抵巴陵城  
長沙古建國地狹賦薄征邑宰愛民者選薦豈非精旣曰處民上固當知民情  
民居篁竹間山獠相雜并教道苟未至毫髮心起爭太剛易斷折太柔難措撐  
貴在得中道於焉無近名聞多不祥烏似鴉何足驚遠方此爲常慎勿心屏營  
賈誼度湘水爲文弔屈平因君寄杯酒爲我酹賈生

軋明院碧鮮亭

壞衣削髮遠塵垢蛇祖龍孫生屋後不等渭川千戶侯尺椽片瓦何嘗有方丈  
東頭一畝餘中軒四面無窗牖青瓊作枝鈿爲葉丹鳳未食蒼鼠走細藤織榻

白晝眠寢濃鼻息如雷吼世間百事不歷心門外寒流徹溪口

得餘干李尉書錄示唐人于越亭詩因以寄題

餘水之干越之鄙築基相對琵琶尾琵琶日日有秋聲鴈過洞庭風入葦南斗  
戛湖波不起長刀剡峯碧耳耳姍娥夜出在寒溪青銅瑩磨光幾里朝因吳客  
幅蒲輕滿紙如蠶書可喜

南軒盆植重臺蓮移種池

彤雲赤霧生緒房朝霞變蕊朱粉光白玉入泥不滿盎羽蓋裊露明月璫濁水  
一石亂鼃韻鑿池五丈如斗方萍根科斗得自在荷芰明年出水央

朝天行

大車高蓋徐方來天子雙日延英開犀鞞踏玉陛東陞從臣賜對論宮市諫官  
御史如指排捧土未能障濁水大夫言斡天關迴黃門白望顏色死始時暴奪  
何縱橫有貨晝日不敢行他時五方蛇當酒誰道張郎臨井口

會勝院沃洲亭

前溪夾洲後溪闊風吹細浪龍鱗活孤亭一入野氣深松上藤蘿籬上葛葛花  
葛蔓無斷時女蘿莫翦連古枝當年吾叔讀書處夜夜濕螢來復去

江南雜感

樹頭巧婦棲樹下秋蟲織壞衣游子心千里嘗相憶蕩子脚出門便作浮萍根  
憂來憑五北拜樹賽黃豚

依韻和達觀師山中見寄

積豕在塗龍在澤豺狼食肉麝食柏蹄毛與角不對齒啄觜兩足副以翮既能  
閑閑住深谷豈使于于佩鳴玉水邊看虹山雨霽夜與明月歸獨宿門前重嶺  
後羣峯石樓朱殿藏林中銅絲緊轉轆轤響絡緯秋老號西風榮利澹薄無易  
此彼飲甘醲茲飲水暫將分別向喉舌何異聲色亂眼耳孔孟久沒言可師千  
古布散葉與枝今來閉戶自有趣世上汙汙非我爲

送萬諤昌秀才

志士不戀家安能坐吟咀儒冠難徒行馬骨瘦可數後僕隔山陂前林遇風雨

寒邨夜宿時寂默誰對語

訪石子澗外兄林亭

前日秋水漲昨日秋水落偶來尋隱居曾未乖宿諾竹底除舊徑藤蔓繫新約  
馬留岸傍樹風掃林下籜既能置魯酒又復餉楚餗誰知北南澗照影似清洛  
平生愛幽曠斂迹誠非錯

和端式上人十詠

幽谷泉

幽谷有飛泉入溪知幾里跳珠濺木葉激雨霏巖趾但無箕潁人曾不令洗耳

古木陰

古木少直枝其下多曲影豈不愛高陰奈此性所秉千重葉蒼翳誰願憩日永

寒溪石

翠聳寒溪上半隱寒松下水鳥立稜角淵魚游穴罅尋常置庭檻瑣細不知價

孤汀蘋

瀟湘歸去人正值江南春始願逢拾羽今乃見採蘋寄語柳使君莫恨日已曛

雲際鐘

煙昏青櫟道風急隔溪鐘征馬未及息猛虎前有蹤尋聲欲投宿僮僕畏所逢

垂崖鞭

崖竹出石壁根瘦懸青蛇磔顛露老節斫骨點寒花少年莫翦去騎殺白鼻騮

天外峯

天外一尺峯國中千仞岳重雲不掩蔽萬里見頭角世人看遠碧誰識產美璞

秋原菊

不爲潭上英不助籬邊醉獨占蘭杞鄰原頭自榮悴陶令與太鑿逢人豈無意

漁舟火

蘆洲一點明知有漁人泊江溟杳不分誰方在高閣是時孤鴈去應認光中落

春溪冰

春水冰欲開傍岸已微釋魚寒未動鱗獸渡時有迹篙師畏割舟敲拉碎圭壁

十月二十一日得許昌晏相公書

哀憂向二年朋戚誰與書敢意大丞相尺題傳義廬從來鳳皇鳴不厭寒竹疎  
茂林多翔鳥要路盛高車窮巷一如此江深無鯉魚

訪施八評事

施兄今七十近郭隱茅廬嬾問齊民術喜看莊叟書竹間鳴澗水原際見邨墟  
識盡窮通理超然樂有餘

贈陳無逸秀才

良犬不取鼠其人苦尤之近識固未辨善相又能知在鹿忘守穴挫足乃焉而  
士有志功名局縮秉書詩憔悴未得展磬折忽言卑舉酒一以贈願無羞爾爲  
題陳宰戲綵亭

仕宦固已美及親此其難況慕五綵戲而奉興居安翁喜君亦喜翁餐君亦餐  
磬磬園中禽口哺心違丸邑大歲幸稔衆賴仁政寬還思彼赤子如恐君不歡

永慶僧舍松風亭

誰按黃金微滿指清風度但聽松上聲不知松間趣野僧何所樂樂此數株樹  
寧邀俗客來草綠澗西路

寄松林長老

大松五丈百歲餘小松五尺前時種俱有堅完不朽心莫以今輕古爲重東溪  
一片寒玉光夜挂高枝何所用

題松林院

靜邃無塵地青熒續燄燈木魚傳飯鼓山衲見歸僧野色寒多霧溪痕夜閣冰  
吾非謝康樂獨往亦何能

永州守王公慥寄九巖亭記云此地疑是柳子厚所說萬石亭也因爲  
二百言以答願當留詠

天地磨今古賢愚爲埃塵草樹易變改山川無故新眷言零陵守白髮駕朱輪  
間來問遺老俯迹哀昔人昔人者誰歟元和前放臣下上窮幽荒憔悴楚水濱  
試觀當此記圖寫未必真最苦來黃溪坐石數游鱗有鳥大如鵠東向立不跋

始買鈔鈔潭鄂杜難計縉冉溪袁家洞亂石多磷磷深里與沸白若盡無窮津  
石渠連巖泓菖蒲被其根窮勝得其詭衆美誰齊均西澗石爲底豈無芹與蘋  
澗崖如堂席澗響如龍脣折竹掃陳葉羅榻同衆賓其言粲星斗百歲猶比晨  
萬石乃淺近尙可資覆巾而況前所說但恐煩鑄珉

潘樂二君對雪寄聲似欲予賦適方知之走筆奉呈

南方今見雪北客定思家任凍不欺酒競春先著花樓高休厭上山近未應遮  
誰問窮居日西窗壓竹斜

過永慶院

荒涼舊蘭若古屋兩三重庭下已無柏澗邊唯有松石階生薜荔香座缺芙蓉  
化俗似禪衲破來縫不縫

雪中廖宣城寄酒

輕舟泛泛昭亭灣春雪漫漫昭亭山寒沙曲渚杳不辨素鷗翔鷺空中還宣城  
太守閔窮旅雙壺貯醞兵吏頒任從六花壅船戶滿酌春色生衰顏醒時但愛

雲水好醉後但與天地閑  
世間取樂各有分何必舞娥高髻鬟

### 翠竹亭

種竹幾千个結亭三四椽  
遊人多寂靜啼鳥亦留連  
酒有陶公愛林希阮氏賢  
我來歸路遠躍馬古城邊

### 彩霓亭

高出嶺頭樹俯窺城下溪  
半山飛急雨舉手弄晴霓  
曠望已無極萬緣都與齊  
自嗟來獨晚征權苦言西

### 留別樂和之

雪消潭水綠輕舸下灘時  
漸轉青山去還將故國辭  
野林看欲動江燕欲逢遲  
君語隨州體余慚晚始知

### 松風亭

冉冉竹連澗森森松蔭崖  
始聞清吹度似欲綠琴諧  
莫識主人意休論高士懷  
春城百花發薜荔上陰階

雪中懷廣教真人

蒼山去不遠日日起寒雲堂上看飛雪水邊思練裙銅餅生薄凍桂火壓殘薰  
欲往有餘興林幽路不分

下赤山嶺過渡至石子澗別施八評事

三歲守廬次兩迴來澗邊臨塘愛魚樂近竹見人賢今我西歸日逢君小隱年  
重將車馬去驚起野鷗眠

春日拜龔經田家

田家春作日日近丹杏破類場圃頭南嶺禽過北嶺叫高田水入低田流桑牙  
將綻霧露裊蠶子未浴箱篋收今我還朝固不遠紫宸已夢瞻珠旒

將行賽昭亭祠喜雨

未生潭上雲空望山中雨湛湛陳桂樽坎坎奏鼙鼓蕭蕭靈風來蹲蹲祝郎舞  
莫言春作遲但念寒灘阻何當發泉源綠水浸沙渚不與農者期自將舟人語  
定作榜歌行暮投丹湖浦瞻祠草樹失認嶺煙霞吐平吞東南吳遠帶西北楚

川澤見陂陁龍蛇蹙鱗膺人經興寤歎事往成前古考碑何驗今塗馬立空廡  
余知骨相貧豈敢望冥許願乘溪流深滂沛隨徹俎

若訥上人彈琴

祥哀已踰月遇子彈鳴琴安得不成聲子心異吾心十日成笙歌尼父非好音  
先王禮有節不可過於今莫作風入松懷壘情未任一聞流水曲歸思在溪陰  
此焉吾所樂目極送歸禽

發昭亭

二月十三日

春泥深一尺車馬重重迹親舊各還城山川空向夕今朝水平岸不畏舟礙磧  
始隨湍漲發已入青蒼壁落日未逢人孤邨望來客泱泱漫田流青青被壘麥  
欲霽鳩亂鳴將耕杏先白我無農畝勲千里事行役寄謝昭亭神果不吝深澤  
乘小舟訪松山法聰上人

我從溪口來正值山前雨濕衣逢梵宮有僧善吳語天寒蜜已空軒靜竹可數  
歸楫難久留汀鷗自飛舞

過鴈洲六言

船從鴈洲北去鴈背春風亦歸但見平沙綠水  
蘆蒿荻筍方肥

別達觀文鑒二大士

雲衲山中來畫橈江上發何日到山中山花應未歇

依韻和文鑒師贈

來見寒沙鳥長隨上下波乃知游宦迹不似施松蘿  
子語馬喻馬吾吟柯伐柯清江挂帆去奈憶故山何

宛陵先生文集卷第三十七

宛陵先生文集卷第三十八

贈袁大監

人以祿爲榮當知身所重祿榮身且勞豈要權衡用達人唯止足曷顧百鍾俸  
今朝西山歸芝朮不須種莊生逸老言此必久已誦矩法況自持推年心可縱  
依韻和達觀禪師贈別

平生少壯日百事牽於情今年輒五十所向唯直誠既不慕富貴亦不防巧傾  
寧爲目前利寧愛身後名文史玩朝夕操行蹈賢英下不以傲接上不以意迎  
衆人欣立異此心常自平譬如先後花結實秋共成趙壹雖空囊鄭子豈其卿  
二人貧且隱高譽動天京我蹟固尙賤我道未嘗輕力遵仁義塗曷畏萬里程  
安能苟榮祿擾擾復營營近因喪已除偶得存餘生彊欲活妻子勉焉事徂征  
徂征江浦上鷗鳥莫相驚

蕪湖阻風

春風任惡花自笑白浪不愁頭已白戢戢大船江浦邊崑崙五兩誰非客

次韻和達觀文鑒雨中見懷

出浦候波平石尤風未止密雨長蒲牙輕泥隨燕子寒侵遠客衣岸起新痕水  
各各欲還山還山能幾里

讀月石屏詩

自此起皇祐三年五月至京後

余觀二人作詩論月石月在天上石在山下安得石上有月蹟至矣歐陽公知  
不可詰不竟述欲使來者默自釋蘇子苦豪邁何用彊引犀角蚌蛤巧辨析犀  
蛤動活有情想石無情想已非的吾謂此石之蹟雖似月不能行天成紀曆曾  
無纖毫光不若燈照夕徒爲頑璞一片圓溫潤又不似圭璧乃有桂樹獨扶疎  
嫦娥玉兔了莫覓無此等物豈可靈祇以爲屏安足惜吾嗟才薄不復詠略評  
二詩庶有益

暴雨

雲薄風回雨點麤日腥土氣隨吸呼蒸然襲汗猶揮珠屋瓦裂響波生渠森森  
斗覺涼侵膚毛根癢痒粟匝軀已知燠寒變須臾雷電不止投笑壺槐端漏影

日向晡馬蹄莫惜行泥塗

和宋中道喜至次用其韻

予從江南來見子東浦榛問子何不治子兄游洛瀕子素樂文字而復養慈親  
去年始陞朝差差陪縉紳今也與吾肩行立笑語頻未經鬢髮改喜預班綴新  
思如曩時會浩飲不計巡往謁持約史文辭媿彬彬謂將一乘粟欲敵千箱困  
然而澤中蛇時得龍一鱗況復周孔教幸逢舜禹辰又究志所之茲學豈不臻  
誰其起予者視子爲席珍趨韓亦已工比孟猶欠淳慎勿驚怪奇怪奇世多擯  
吾慚遼東豕未見西狩麟汨汨塵泥間曷辨玉與珉昨來忽有知所索非所循  
使焉轉磨衡安得日不昫誠聞苑囿美難遣糜鹿馴自惟體衰茶寧堪事艱辛  
宜收蹭蹬迹却返江湖濱浸脰水活活漫灘石磷磷垂釣紅鬢登舉袂白羽振  
以此全吾性胡能往問津非同子少年柯葉正蓁蓁

齊國大長公主挽詞二首

賢行聞當世尊隆異故常每令夫結友不爲子求郎夜月初沈海姑星忽隕潢

臨門親祖祭悲吹起脩岡

魯館當年盛秦臺此日遙龍歸終合劍鳳去不聞簫挽曲方傳薤行輻競奠椒  
空餘漢官屬泣送馬如潮

招隱堂寄題樂郎中

日哦招隱詩日誦歸田賦未嘗見芸人勇拋冠冕去今聞緱山陰身退效疏傅  
一旦從犢車歡言友田父復來釣澗邊誰問袁公路

貸米於如晦

舉家鳴鵝鴈突冷無晨炊大貧凶小貧安能不相嗤幸存顏氏帖況有陶公詩  
乞米與乞食皆是前人爲

送渭州劉太保

月黑見旄頭芒角漸西向八月邊草黃胡人馬初壯無奈我兵雄方爲漢偏將  
嘗聞登壇人亦未免得喪得爲凱歌還鏡鼓喧亭障千蹄使椎牛百甕令設醢  
喪乃軍之差節制由處上進退從其呼何能求必當二事非己專願思古挾纊

送張推官洞赴晏相公辟

送子居大梁關中乃關外往者邊事繁秦民被災害今聞獨豐穰逮埃無動旌  
相公欲勤勞請以臨都會多選天下才佐佑如何賴決疑有全策何必用著蔡  
雖病君彊行寶刀仍喜帶豈是爲俗儒空言事夸大

送張著作器宰蘄水

予聞楚山竹肉好髮亦勻隴上風雪飽石根莓苔皴撥林翦橫吹龍子愁水濱  
作邑尙簡易豈必蹈昔人願爲季長賦安用瑤與珉

和瘿杯

物以美好稱或以醜惡用美惡固無然逢時乃亦共弃則爲所輕用則爲所重  
道聞瘿木器愛賞互歌頌定應初得之買不論官俸醜面生光輝貯飲發狂縱  
坐欲置於傍行欲挈以從其形何險怪曾不因藝種凹凸本自然出縮非鬪縫  
薄才難究窮詆訶茲實恐

太廟致齋答韓舍人簡

珍做宋版印  
齋舍隔牆東蕭蕭槐樹風聲顏雖不接翰墨遽能通未說涼堪飲唯愁賦少工  
此焉知素拙試與問揚雄

送張著作孟侯宰上元

天衢車馬迹急若機上梭義雖平生篤不越一再過夫子累顧我言歸泛長河  
得邑美建業風流猶可歌依稀江令宅秋草應更多五題誰復詠鍾蔣與嵯峨  
劉原甫觀相國寺淨土楊惠之塑像吳道子畫又越僧鼓琴閩僧寫真  
予解其詫

吾儕來都下將逾三十春不聞此畫塑想子得亦新茲寺臨大道常多車馬塵  
設如前日手晦昧已惑人曷分今與古曷辯僞與真閩緇圖鳳姿越釋彈龍脣  
但知五彩爛徒謂五音淳孰識商聲高孰驚眸子神不能評譜品索玉翻得珉  
二君才調高言若羽翮振將令尋常工千歲傳不泯

依韻和裴如晦秋懷

老葉已足蠹風振猶在柯高高低低聲切切感我多不念四散飛尖圓競相磨

當茲思再春宛然同俟河莫驚衡山鴈莫問洞庭波徒聞漢武帝獨有橫汾歌  
送張諷寺丞赴青州幕

朝廷久清明賢相出賢牧賢牧又選賢森森備官屬是以邦政脩良農播嘉穀  
上無租賦逋下有困廩蓄往者河朔飢奔送劇急驚富公鎮青社有來咸鞠育  
病者調藥劑起者飼饘粥老穉四十萬瘦骨生壯肉鄉縣將遣歸田園皆可復  
爲之置長犁爲之置黃犢旣完身上衣又付橐中粟庭下再拜辭望城皆感哭  
他人守一方境內猶不足至今趙魏間食飲常酹祝富公離山東寇盜頗任觸  
堂堂高平公德業人所伏幕府得才謀螻蟻不勞撲上體愛勤心掃滅得神速  
張侯三十餘瑩若無玷玉八字分濃眉純漆點雙目昨日奉辟書氣貌寧近俗  
言從必磊落事果無出縮他時爲書功誰惜千毫禿

送徐祕校廬州監酒

淮南秋物盛稻熟蟹正肥況身爲酒官醇酎飲不非儻觀衆人醉徒自使世譏  
與君伯氏好試以此言歸

韓子華江南安撫

韓侯出持節志在撫黔黎縣官負弩迎刺使躍馬隨千里宣德澤煦如春風馳  
寒潮不起浪怙怙威馮夷借問何致耳試聽將所爲立車呼父老勞以哀矜詞  
我從大明宮天子親諭之憂汝歲屢凶吏不恤汝疲已輸又索糴困橐無子遺  
此非陛下意恐使汝輩疑疾苦汝告我不憚爲汝治父老必喜拜如餒得飼麋  
我稱此大是一一無不宜南方二十州歡聲無幼耆壺漿擁大道婦女闖短籬  
行聞江漢間復有宣王詩

周仲章通判潤州

昔過京口山斷厓知鞏洛抱谷黃芹泥百丈聳垠嶸山嶺與江面地脈水可度  
欲鑿無淺泉孰云南土薄君爲別乘去便比北州樂已免卑濕憂仍離鴉鵬惡  
況逢休明時秋堞罷嚴柝夜愛寒江潮月臨甘露閣置酒發浩歌萬里波欲却  
霜蟹肥可釣水鱗活堪斫縱飲不須休未應滄海涸終當笑揚雄窮壁常寂寞  
更知首陽人薇蕨事亦錯不若阮步兵醉鞍伸兩脚太守必吾徒儻能時就酌

弟著作宰南陵

新買紫騮馬欲歸清弋江去彈琴鴈獨來認鳥鳧雙橐實收盈筐濃醅熟滿缸  
弟兄相憶否風燭舊西窗

和江鄰幾有菊無酒

種菊將飲酒菊開酒無有雖不負爾目且已負爾口昨日三四人澹坐飢腹吼  
徒與哦其傍誰能置升斗當時陶淵明籬下望亦久幸賴白衣人不媿采盈手  
悠然事頗同必竟醉則否

五知堂

代人與  
任少傅

履道坊中白家宅五橋莊北晉公堂昔年二老曾相樂今日五知名獨光舉事  
是非都不問接花時節暫能忙清尊雅曲易爲厭自有圖書列在傍

贈陳孝子庸

康州水邊龍母墳草樹蒙蒙起風雨五色五蛇時往來野鼠不穴墳上土嗟哉  
異類猶厚親豈彼人兮忘恃怙果生陳子孝且仁終日劬劬在民伍天清天順

感其和嘉禾駢枝立如股遐鄉歎慕爲爾鄰太守欣言出吾部中州士人傳以  
夸照頑爍孽良有補唯時火德君道明粵南祝融孝所生若然寧獨一陳生築  
堠表廬從此數

和原甫同鄰幾過相國寺淨土院因觀楊惠之塑吳道子畫聽越僧琴  
閩僧寫宋賈二公真

青槐夾馳道方轡下麒麟謁來游紺宇歷玩同逡巡吳畫與楊塑在昔稱絕倫  
深殿留舊迹鮮逢真賞人一見如宿遇舉袂自拂塵金碧發光彩物象生精神  
歲月雖已深奇妙不媿新驚嗟豈無意振播還有因乃知至精手安得久晦堙  
二僧感識別請以己藝陳或彈中散曲或出丞相真覽古仍獲今未枉停車輪  
李端明宅花燭席上賦

百兩禮將陳王家集上賓花光濃照席燭豔暖迴春已接冰壺潤寧辭翠罽醇  
自慚持短調重對玉堂人

送李祠部知滑州

自古重名器未嘗輕授人煌煌東郡守燦燦兩朱輪父祖繼居此恩榮誰與鄰  
秋風度河水馬足不生塵

送王正仲長官

汴渠沂復沿自可見遲速來時遲有糧去恨速無穀有糧安計程無穀不遑宿  
霜高萬物枯源水縮溪谷黃流半泥沙勢淺見蹙澳千里東歸船何日下清瀆  
澹澹風雨寒長汀號鴈驚將投孤戍遙四顧危檣獨彊語慰妻孥多虞賴僮僕  
到家秫已收綴樹橘始熟折腰無慚陶懷遺焉媿陸我方羨子行送望不移目  
廨後木芙蓉

託根地雖卑凌霜花亦茂物稟固不遷人情自爲陋幸與時菊開誰嗟發孤秀  
楚人搴木末已見離騷就

傷驥

駑驥同一軌遲速能幾里當其被問時舉策數耳耳馳騁心獨存壓抑頭不起  
空傳八駿名未遇穆天子

陳丞相燕息園

少仕旣勤勞暮節念君息小車辭漢庭緇衣賦衛國廣園樹嘉木鳴鳥來野色  
京水魚可緡東陂鴈可弋豈不有秦聲酒酣歌在側寧同扶風人自去北山北  
獨繭絲爲絃九竅珥爲軫彈風松颼颼聽水流泯泯欣者舉袖舞悲者欲涕隕  
若此輒動人干時固能準虞舜今在上南熏思無盡

依韻和胡舍人見唁

西垣閣老號文雄辭體能兼兩漢風絳帳舊生雖授學灞陵歸將已無功校文  
豈論居三上賦分由來本下中不恨早朝秋雨急猶陪鴛鴦大明宮

題三教圓通堂

處中最靈智人與天地參其間有佛老曷又推爲三共以圓通出誠明自包含  
排楹壓礎煥采塗朱藍而將置吾儒復欲籠彼聃二徒不自曉恬若均笑談  
越鳥不巢北代馬不嘶南固亦辨殊土麟鷲唯時堪

設臚示坐客

汴河西引黃河枝黃流未凍鯉魚肥隨鉤出水賣都市不惜百錢持與歸我家  
少婦磨寶刀破鱗奮髻如欲飛蕭蕭雲葉落盤面粟粟霜葡萄爲縷衣楚橙作螿  
香出屋賓朋競至排入扉呼兒便索沃腥酒倒腸飫腹無相譏逡巡餅竭上馬  
去意氣不說西山薇

杜挺之新得和州將出京遺予薪芻豆

魯公馬病不可出陶令言拙徒叩門舉家食粥焉用怪但願漉酒巾常存長安  
侏儒勝方朔水邊漂母哀王孫王孫功名立四極方朔談干至尊我才不及  
三二子摧藏自媿趨權閭前時丞叔寄秉粟一秋已免憂朝昏今君益之薪與  
菽老馬病骨生精魂昨聞新拜歷陽守王國久客蝨處禪都水借船輕復淺急  
趨寒汴流渾渾耳清眼明見野色一聽江鶴醒若噴餘糧遲鈍不暇惜均於朋  
契惟義惇設如河涸膠在步縣邑亦足供雞豚却嗟我甌有時匱莫與太倉黃

鼠論

江鄰幾邀食餽鈍學書謾成

老飢瘦腹喜食熱況乃十月霜侵膚與君共貧君餉我吹蠶不學屈大夫前時  
我膾斫鱖鯉滿坐驚晚卒笑呼誠知舉箸意淺狹一餐豈計有與無

幽廟

老狐依叢祠妖橫起百怪巢梟助鳴聲穴兔資狡獪巫給神靈言俗奏飲食拜  
三年空禱祈萬疾無愈差臙臊日已熾疑畏誰敢懈近者勇丈夫發揭窟乃壞  
始時驚其狂今盡喜其快尫茸毛尙存獨使尾徒大廟貌更一新願以邪爲戒

十月十八日

霜梧葉盡枝影疎井上青絲轉轆轤西廂舞娥豔如玉東廂貴郎才且都纏頭  
誰惜萬錢錦映耳自有明月珠一爲轆轤情不已一爲梧桐心不枯此心此情  
日相近卷起飛泉注玉壺

送鄞宰王殿丞

君行問埼鮎殊物可講解一寸明月腹中有小碧蟹生意各騰騰黔角容夫夫

願言寬賦刑越俗久疲憊

金陵與張十二傳師賞心亭飲

但嗟識君遲不恨春風惡風惡舟未前置酒共談謔  
漁歌還浦頭斜日下洲角  
明朝渡江去相望便成昨

阻風寄刁安國

江風裂瓦鳴浦口驚浪作君駕何不來客心空寂寞

阻風秦淮令狐度支寄酒

春風不獨開春木能蹙浪花高似屋江船百尾泊深灣  
鐵纜千環繫長軸遠客  
今朝愁未平主人贈榼飲還足前時共論酒可禁急世救弊且勿速我今正得  
杯中趣效陶種秫置心曲

江上遇雷雨

雷從燕尾來雨到江心急挂帆中路時望浦前舟入聲喧釜豆裂點疾盜繭立  
蕩搖魚鼈腥恐懼兒女泣稍聞人好語出顧岸已及蘆州有同行言喧氣吸吸

登瓜步山二首

瓜步山頭廟堂因魏武興亡歸從赤壁事去憶西陵軍并藏雲杪林根擁石稜  
微風認江水細甲幾千層

山上濃雲合江南暴雨來將歸林下嶺中路遇風雷心速灣猶遠行遲伴屢催  
舟師添繫纜兒女望人迴

宛陵先生文集卷第三十八

宛陵先生文集卷第三十九

韓子華遺冰

六月侍臣方賜冰我賦得之從友朋開盤一見水玉璞置坐百步無青蠅熱膚  
收汗起疹粟不有消渴同茂陵杜子每思赤脚踏韓老嘗苦如甌丞慚無二公  
才與學享此足與俗輩矜

二十二日起居退聞宣三館諸公觀瑞蓮

來朝十二旒將出未央殿微聞嘉蓮開獨許侍臣見嘉蓮其如何層樓擁霞片  
玉輦下天泉日昃不知倦恩魚應亦喜跳沫珠欲濺誰憐與衆歸博士臣疏賤  
依韻吳冲卿秋蟲

梧桐葉未老露滴玉井牀秋蟲如里胥促織何苦忙苒苒機上絲入夜爲鼠傷  
織婦中夕起投梭重徊徨那聞草根聲膏入然肝腸天子固明聖措意如陶唐  
下民唯力穡不見田疇荒豈知哀斂人督責矜健強所以機中女心鬪日月光  
年年租稅在聒耳信已常哀哉四海人無不由此戕吳侯當聽時靜坐愛初涼

方將同佳人歡樂舉杯觴繁鳴雜蟻蟻感愴情不皇況蒙朝家恩兄弟登俊良  
意慮宜恤物以慰衆所望今者秋蟲篇不異七月章

陌上二女

素手奉纂羅柔纖明春萸轉盼動桂葉陽語啓瓠犀阿姊金盛珠阿妹縹籍圭  
吹香襲行路豈獨下蔡迷

無悔

婦人未四十容貌已改前男年踰五十嗜慾固自偏勿以色敵心色衰心易遷  
勿以愛恃久愛移久多愆明鏡知惡看何須妒嬋娟

弔瑞新和尚

示化何悲戚俱焚只衲衣已隨原火盡空見野雲飛寫影誰方丈栽松舊翠微  
當年渡江盍弟子獨將歸

依韻和吳冲卿新葺南齋

移病新秋厭直廬自將僮僕治前除已栽楚客江邊草不學嚴陵瀨上漁紅穗

拂欄何舊粲綠叢無水亦蕭疎從今有月君須飲況與朋親共舍居

### 江鄰幾遷居

聞君遷新居應比舊居好復此假布囊家具何草草我貧無囊假來僮笑欲倒  
所笑還往人生計不足道非用僮僕知雖貧自懷寶

### 聞刁景純侍女瘡已

前時君家飲不見吹笛姬君言彼娉婷病瘡久屢治隔日作寒熱經時銷膏脂  
醫師尤飲食冷滑滯在脾次聞有鬼物水火陰以施乃因道士逐實得鬼所爲  
手灑桃枝湯足學夏禹馳呵叱出門牆勿復顧嘔遺今雖病且已皮骨尙尪羸  
豈暇理舊曲未能畫蛾眉當期重相見風月臨前墀

### 景純以侍兒病期與原甫月圓爲飲

古龍水底鳴素秋江雲不飛江買愁金陵舊族天祿游家有善笛能娛侯憶侯  
前年罷姑熟自買蘄州鮑霜竹顛肥頂瘦裁青玉鑽鑿商聲五音足牛渚磯邊  
夜泊時平波不起月中吹老魚跳舞龜出泥雌蛟怨泣雄鼉悲新還中都人罕

知交親奏酒隔簾幃丹脣一發妙響馳醉客欲見寧非癡昨夜劉郎辭玉卮主人勸謝當勿疑渠今纏瘡尙苦羸他日海蟾圓未遲涼肝脾畏肝熱生腦脂生腦脂不得窺

永濟倉書事

神武立四極收兵銷衆豪輸糧來萬國積庾下千艘貔虎肥於豢麒麟老向槽中州無殍餓南土竭脂膏黃鼠羣何畏青鳩啄且號古梁生菌耳朽堵出蟻螬樹腹懸蛇蛻絲窠挂烏毛塵埃雖自汨朱墨亦能操直宿愁風雨經年弊褐袍仲尼猶作吏我輩勿爲勞

依韻和磁守王幾道屯田暑夜懷寄

地厚天青冥故交榮謝并何當一壺酒以昔相與傾君今二千石未往戀山楹山楹夜對月孤懷豈忘情貴者幾何逝賤者幾何生夏簟且安寢明星上東城

依韻和孫侔鴈蕩二首

海邊巉絕有蒼山怪怪奇奇物象閑百丈素流珠噴薄千重紅樹火回環遠尋

僧寺石屏下時遇野人雲屋間今日京華見君說便思輕舸出東關  
鴈蕩高高路莫通銜蘆秋翼入雲峯山頭水闊不見影巖下沙平時有蹤千仞  
柱天何斂閃萬工揮筆漫輕濃葛巾蠟屐未能著空羨青蒼重復重

赴刁景純招作將進酒呈同會

日光如鎔金湧上滄海流一朝復一朝鑄出萬古愁大鑪石破碎世事安得休  
明月只照夜時時如屈鉤嫦娥與玉兔擣藥何所瘳大患不自治更被蝦蟆偷  
我思天地間二物最取尤措置尙如此細故曷用憂著書欲傳道未必如孔丘  
當時及後代見薄彼盱周功名信難立德行徒自脩勞勞於我生帶挂同贅疣  
不如聽鄰笛就其舉杯甌笛不煩教養酒不煩取求從今醉至春從夏醉至秋  
勿禁雞豚魚間薦鶉鴈鳩況多南方物鹹腥美咽喉計較無以過試共阮籍謀

薛簡肅夫人挽詞四首

蕭公當貴日小吏引輕軒四德有遺美六親無異言立孤傳世嗣垂範在閨門  
澮水終歸柎秋雲逐去魂

嘗聞求子壻不似怒甘公莫以昔人比皆爲當世雄家聲新慶續國禮舊恩隆  
必與齊姜墓千秋壟樹同

冠劍將朝去常知好直言戒辭猶可託先見久應存瑩白冰兼玉清芬蕙與蓀  
堂塗從此閉何日卜丘原

美合周詩播魂先岱嶽歸空堂遷舊榻素月照靈衣珠翠香沈匣丹青影挂幃  
百年親戚淚併作露霏霏

送淮南提刑孫學士

淮南木老霜欲飛順令恐縱諸侯威命書纔出邸掾謁已見衣繡車迎歸樂莫  
我聽筵莫迓清如蟾蜍夜吐暉不須久作平反吏自合橫經親帝闈

八月三日詠原甫庭前林檎花

秋蠹無完葉疎叢有瘁莖偶來庭樹下重看露葩榮衆自守常理獨開偏見情  
從今數霜月結子尙能成

送河陽通判張寺丞從富公弼

諒子

張公愛神鏢佩服近玉麟又拭華陰土光彩一以新百里無惡獸千里無冤人  
今朝欲何之去上延平津應當出匣飛騰波決秋旻

送淮南轉運李學士君錫

三都重兵廩命使總八方淮南舟車衝三楚籠利長惟時有才彥數計等桑羊  
八月賜詔行朱旆插大航汴湍入秋漲東鼓下鏜鏜今日發大梁明朝過睢陽  
睢陽授經地父老認道傍同業八十人或貴或爲郎先生歿大官弟子無荷囊  
乃知詩書傳要在明三綱隋末聞仲淹來學去佐唐唐初稱名臣鮮及杜與房  
親見慕義人專門起輝光我聞房杜流已顯惟王張雲漢幾萬里星宇爭耀芒

歸來立螭頭莫愛魚稻鄉

君錫與王伯庸張端明同在睢陽希文講下

重送楊明叔

并序

行而有以贖者助所不足也車馬子有裘服子有貨貝子有所可贈者詩言爾  
故先爲七言以送將以道彼美而樂乎往也子不爲重邀予以規又作五言應  
其請

吾將會稽去舊蹟可以嬉予因狀其美贈子臨路岐子不以爲樂但願有以規  
噫吾豈其說畏子未及裨旣求不請子吾曷忍子欺前年子渡淮夜泊洪澤湄  
有鬼稱使者來告風波期子時再拜謝乃被鄰船嗤逡巡鬼復至復附船家兒  
怒彼慢嗤士明當使驚危船兒傍舷迴走若一足夔翌日各解舟出浦風動旗  
子獨乘安流彼受橫浪吹此事非子傳焉得他人知昨逢令弟蘊備述果不疑  
越俗素重鬼慎勿啓其私子口有仁義子腹有書詩子嘗談王道怪語固未宜  
近聞蘇才翁問子辟者誰得非外戚侯子怒已豎眉今我儻得罪甘與蘇同之

送董傅秀才之汝陰

社燕已歸盡秋鶯猶繞林久爲梁國客不起灞陵心徒步赴朋館遠遊無橐金

江君丈人意莫入楚鄉深

鄰幾常  
止此行

送張子野屯田知渝州

舊居苕溪上久客咸陽東歸來得虎符馳馬向巴中歌將聽巴人舞欲教渝童  
況嘗善秦聲樂彼渝人風忠州白使君竹枝詞頗工行當繼其美貢葛勿怱怱

送楊子充愈知資陽縣

家近古臨邛聞多木蘭樹其人襲芳馨乃有相如賦成名三十年始見列鴛鴦  
出爲資陽長秋鬢已點素天子愛黔黎歸與蜀民諭當時同洛陽過半作丘墓  
屈指今所存無如君最故唯酒可餞行不飲車空駐

送司馬君實學士通判鄆州

君家世典史君復續祖爲蘭臺未成書汶陽從已知將行我何贈一誦溪堂詩  
聞彼多蒲魚可助鼎與卮在昔阮嗣宗初赴東平時醉扶乘蹇驢圖盡猶可披  
今見國門外徒馭不驅馳十里馬一歇五里車一脂不得同鴈羣相送過寒陂

送程殿丞知韶州從益

韶州使君行請問韶石名傳聞古帝舜石上奏九成鳳皇爲之下朱鳥不復鳴  
舊祠亡玉琯四序安得平至今南方熱臘月裘服輕事外共廢酒曲江風物清

寄岳州孫屯田琳

從來洞庭好都在岳陽樓明月一千里寒光三萬秋年華有時盡風物不知休

太守憐予句應如沈隱侯

大愚

大愚不量能品藻輒已出朝以軻爲同暮以丘爲匹其人豈鷹雀鳩蛤化五日  
指鹿危二世師歆造新室雖云詐力尙終自殞斧鑕

宛陵先生文集卷第三十九

宛陵先生文集卷第四十

寧陵阻風雨寄都下親舊

晝夜風不止寒樹噉未休人言雨殺風雨急風未柔獨扶慈母喪淚與河水流  
河水有冬竭淚泉長在眸予生五十二再解官居憂昨者母疾亟骨肉相聚愁  
橐中無一錢緩急何可求母當臨終時囑我貧莫羞隨宜具棺斂厚貸壓人頭  
死事定無益生償且無由泣涕聽母言心腸如剗鉤小子雖不令長養恩曷酬  
旦夕期速平後事勿預謀願母強藥食更延百千秋固云莫望我我魂已飛遊  
語畢忽奄逝撫膺呼裂喉未能一物備迷亂將安投艱窘見風義乃有令朋儔  
致賻或錢帛最力李與劉廷老原甫禁省及石渠奠助日不周裴楊乞銘蓋文篆古  
復適如晦元明潭饒兩大艦朝索暮泛浮哀憐荷君子才德慚未修三日違大梁兩  
宿此遲留聊書同些挽試託楚人謳

新霜感

前日衣上露今日衣上霜我母魂何之膏火糜我腸隔棺三寸地如在萬里鄉

噓呼不聞聲飲食空置旁昔時憂我寒縫衣紉綫長綫長必絮厚要與風霜當  
又每恐我飢羹臙自調嘗此身內外間莫得頃刻忘舉衣不忍著舉箸不下吭  
一念百感生欲問天蒼蒼

過淮

侍親數數來浮汴護欄迢迢復渡淮旨蓄曾無禦寒具細君唯有隱居釵月銜  
遠入魚銜浪潮退長汀蚌閣崖素服華顛色相似青銅不忍見形骸

淮陰

天下滔滔久厭秦英雄蛇鼠竄荆榛少年豪橫知多少不及沙頭一婦人

杪樞樹

李邕  
有碑

杪樞古樹常占歲在昔曾看北海碑今日四方俱大稔不知榮悴向何枝

就野人買兔

霜濃草白兔初肥蒼鶻調拳獵犬攜剩付錢刀買庖餽不須緣徑更求蹄

使風船

清淮直上水連天坐看高帆後復前自是乘風有遲速不由人力愛爭先

### 淮陰侯廟

韓信未遇時忍飢坐垂釣歸來淮陰市又復逢惡少使之出胯下一市皆大笑  
龍蛇忽雲騰蛭蟻豈能料亡命乃爲將出奇還破趙用兵不患多所向孰敢標  
功名塞天地翦刈等蒿藿于今千百年水上見孤廟鷺銜葭下魚相呼尙嗚叫  
高皇四海平有酒不共酌古來稱英雄去就可以照

### 又平津一首

漢家天下將廟古像公主百戰自忘楚一時空王齊鄉人奏簫鼓舟子賽豚雞  
不改寒潮水朝平暮復低

### 入滿浦

馬頭攙岸斗燕尾泊船齊風送寒潮急雲藏晚日低逢人多楚語問客煮吳雞  
難覓枚皋宅蒼葭處處迷

### 許發運待制見過夜話

許公運國儲歲入六百萬上莫究所來下莫有剝怨十年無纖乏功利潛亦建  
昨除侍從官聊爲磨世鈍比於以舌得此豈媿物論較量多少間未足數劉晏  
大計苟窘費曷不使預算欲倍卽能倍但勿惑謗訕擾民可以奪食官可以竄  
要付與權衡一切出果斷嗚呼任智力長短固有限制財猶制兵太甚則生亂  
公譬淮陰侯多多自益辦我今聽其談夜去爲扼腕書之俟采詩咨訪不可緩

登泰山日觀峯

并序

予泊瓜步山下夢王景彝問韋應物日觀峯詩予卽誦知語不屬謂景彝曰當  
爲檢韋集覺而亟閱韋集無此題尙記夢中所誦首句云晨登日觀峯遂續補  
之

晨登日觀峯海水黃金鎔浴出車輪光隨天行無蹤正視刺我目攢集如劍鋒  
照曜萬物興磨滅萬物凶草木旣無命必聞石間松當時一避雨安得大夫封  
人而苟不遇抱簡誦六龍

重過瓜步山

魏武敗志歸孤軍處山頂雖憐江上浦鑿巖山巔井豈是欲勞兵防患在萌穎  
我昔常登臨徘徊愛晴景片雨西北來風雷變俄頃疾行下危磴屢脫不及整  
霑濡入舟中幼子喜抱頸問我適何之衣濕不太冷昨暮泊其陽月黑夜正永  
雁從沙際鳴旅枕自耿耿平明夾櫓去廟樹聳寒嶺舉手生白雲飄搖水中影  
篙師枕工相整衣龍女廟中來宰豨野祝擊鼓降神語老鴉銜肉上樹飛長江  
無風平似削兩櫓夾舸行將歸南國山川都不改傷心慈姥舊時磯

龍女祠祈順風

龍母龍相依風雲隨所變舟人請予往出廟旗脚轉旗指西南歸飛帆疾流電  
長蘆江口發平明白鷺洲前已朝膳竹根杯玦不欺人世間然諾空當面

西施

濺濺溪流散苒苒石髮開一朝辭浣紗去上姑蘇臺歌舞學未穩越兵俄已來  
門上子胥目吳人豈不哀層宮有麋鹿朱顏爲土灰水邊同時伴貧賤猶摘梅

食梅莫厭酸禍福不我猜

金陵三首

恃險不能久六朝今已亡山形象龍虎宮地牧牛羊江上鷗無數城中草自長  
臨流邀月飲莫挂一毫芒

金陵逢曉雪撩亂逗雲來已失烏衣巷還成白玉臺山盤猶隱見江轉似昭回  
一聽高樓笛依稀認落梅

每入秦淮口風波更不憂重看後庭樹還起舊時愁故老都無有遺蹤莫可求  
何人能識意白鷺在寒洲

了頭石

此碑在金陵斷石岡上有吳文帝字焉

了頭石雖斷文字未全訛年算赤烏近書疑黃象多幾時經霹靂異代見干戈  
更與千秋看松煤定費摩

漫書

蒲葵兩錢扇漫寫未嫌輕老媪持將去無端色不平

閔冢

吳天冊中

盜發廣陵冢及扉開石樞中環走徹道高闊可通車五尺銅鑄人執兵冠服朱壁石刻位號列侍幽宮隅殿將將軍屬侍郎常侍俱啓棺見其尸鬢斑顏未渝白璧十雙藉雲母一尺鋪黃金塞耳鼻千歲不腐枯生爲貴與富死與人未殊後世逢暴禍雖久將焉如堯舜及周孔豈不固形軀

雪中發江寧浦至采石

泊舟斫枯葭敲火石岸旁冒嶺雲冥濛漫江雪飛揚拖冰修網澀出水朱鬢殭曠然起遠懷風旗轉危檣千帆共辭浦攙錯逆水翔落星始前瞻瞬目已後相鯨魚何時來楊花吹茫茫沙草不可辨雁立知汀長山頭化石婦忽變素質光豈復願聞笛莫逢桓野王

登采石山上廣濟寺

船從山下過直上見僧軒繫纜登磯石緣崖到寺門短籬遮竹澆危路踏松根却看滄江底帆歸烟外昏

效阮步兵一日復一日二首

一日復一日一朝復一昏來新去成故俯仰變涼溫有貴卽有賤未若賤常存  
駢牛慕孤狔黃犬悲東門禍福相爲基損益不復言吾祖入吳市應龍非伏轅  
一日復一日一晨復一夕四序相盛衰三辰運光魄下上有常理憂患何時易  
先爛泣金燃先焚歎薪積但願遠世網焚爛不能責麒麟出非時未免西狩獲  
鷗鳥浮洪波心已預海客

阻風宿大信口

東梁如印蠶西梁如游魚二山夾大江早暮潮吸噓解舟辭姑熟速欲還吾廬  
風逆未可前泊浦近烟墟波中事網罟乘月多夜拏冰灘聚鳴雁霜葭正疎疎  
是時昴畢中曠渺天地虛靜坐人已眠我慮久洗如自起取美酒獨酌邀蟾蜍  
蟾蜍射白光入盞亦躊躇醉來不解舞欲攬常娥祛昔對謫仙人此意復在予  
旣醒裂尺素立作數行書寄與青山家精靈其有諸

早發大信口

犬吠知船解邨墟尙閉門霜泥黏纜尾冰水閣潮痕撇撇鷓鴣去纖纖舴艋昏  
梅湖到不遠寄信向田園

黃池月下共酌得池字

將歸謝公郡喜見阮家兒但對月和水那能酒似池衰形疑鏡照葆鬢怯霜吹  
宿鴈不堪託鄉人知未知

泊昭亭山下得亭字

雲中峯午午潭上樹亭亭久作大梁客貧留小阮醒灘愁江舸澀祠信楚巫靈  
日暮渡頭立山歌不可聽

送鹽官劉少府古賢

我祖南昌尉時危棄仙劉郎從宦日天子治平年燥茗山中火熬波海上烟  
吳民不爲盜唯此撓君權

太師杜相公篇章真草過人遠甚而特獎後進流于詠言輒依韻和

杜詩嘗說少陵豪祖德兼誇翰墨高蘇李爲奴令侍席鍾王北面使持毫

子美祖審

言嘗自謂我詩可使蘇李  
爲奴我書可使鍾王北面  
郊麟作瑞唯逢趾天馬能行不辨毛一誦東山零雨  
句無心更學楚離騷

依韻和僉判都官昭亭謝雨迴廣教見懷

賽雨何從事高情苦愛山謝公聯句後  
謝公有昭亭賽雨與何從事聯句詩惠遠過溪間笑處巖

相荅歸時酒在顏端憂守窮巷無力共躋攀

依韻和吳正仲屯田重臺梅花詩

桃花已滿秦人洞杏樹猶存董奉祠莫怪寒梅獨多葉只緣樂府有新詩

讀吳正仲重臺梅花詩  
此樹在靈濟王廟

楚梅何多葉縹蒂攢瓊瑰常惜歲景盡每先春風開龍沙雪爲友青女霜作媒  
託根邇廟堂結子助鼎鼐吳侯本吳人筆力高崔嵬但詠同姓木予非梁棟材

依韻和正仲重臺梅花

芳梅何蓓蓓素葉吐層層近臘寒猶勁先春氣已承冷香傳去遠靜豔密還增  
有意常欺雪無功合鏤冰早烟籠玉暖凍雨浴脂凝漢女新妝薄燕姬瘦骨稜

壓枝唯恐折簇萼似難勝神物終來護江鄉未解矜獨奇心豈欲寄遠客何曾  
不見黃鸝度寧防粉蝶凌月光臨更好溪水照偏能畫軸開雲霧宮刀翦綵繒  
都無筆可銜莫信巧堪憑丹杏塵多雜天桃俗所稱故林嘗渴望大庾更愁登  
重和陽春曲聲辭猥媿仍

正仲見贈依韻和荅

平生好書詩一意在抱槧既無缺雲劍身世遭黜黜恥游公相門甘自守恬淡  
妻孥每寒飢內媿劇剗憊時賴二三友乞米慰窮慘雖然情懷惡亦未廢誦覽  
如負會稽辱欲雪效嘗膽作文持與人百不得一領聖猶嗜好殊獨取菖蒲歎  
我愚希六義將使鬼神感譬彼捕長鯨區區只持罾青天挂虹霓踴跋不可擊  
太華五千仞妄學巨靈撼幸且同蛙黽近樂在井坎蒼髮況種種存非衛鬢髡  
吳侯琅玕姿而來視亂莖鳳皇五色毛曷羨未翅蝻染夏有正采安用此淺黶  
乃知叔度陂萬頃見澄澹孟軻患爲師薄劣亦何敢

正仲往靈濟廟觀重臺梅

玉盤疊捧溪女歸魚鱗作室待水排竹間山鬼入夜啼古廟久閉誰啓扉屈原  
憔悴江之沂芙蓉木蘭託與微賈誼未召絳灌擠香草嘉禾徒菲菲曾無半辭  
助訶譏國風幸賴相因依

依韻和昭亭山廣教院文鑑大士喜予往還

山暖春烟重林昏古寺藏溪流過曉漲嶺樹見新行馬去侵雲蹟風來襲野芳  
禪衣頻斗藪蠟屐莫趨蹌飛鼠時過擲飢禽或下頰憑闌何所適望堞正相當  
捧膳溪童絜銜花鹿女香登臨無險絕不似畏巖牆

依韻荅達觀禪師穎公

霜露每懷感江山空復情老便林室靜坐厭巷童聲盡日都無語逢人亦強吟  
浮生過半百安用此虛名

題姑蘇邵氏園居

積水夫差國閒居魯叟心石科雲起潤城角竹連陰燕入池塘晚花開島嶼深  
應當效疎傳不惜橐中金

嘗正仲所遺撥醅

屈原自著漁父篇鋪糟不及漁父賢世無功名多浪死劉伶阮籍于今傳邇來  
獨酌邀明月唯有青山李謫仙謫仙歿後幾百年市樓日沽千萬錢沉湎豈少  
當道眠文字不見空月圓吳均之孫何我憐雙壺貯醅持置前豈乏阮李詩與  
瘳淺飲強對春風妍

依韻和正仲寄酒因戲之

上字黃封誰可識偷傳王氏法應真清淮始變醅猶薄句水新來味更醇欲擬  
比酥酥少色曾持勸客客何人紅梅雖是吾家物老去無心一醉春

清淮酒本  
王九傳法

於山  
陽

春雨

春雨霽霽鳴百舌林花淡淡洗燕脂眼前耳底催人殺不醉三杯大是癡

春夜聞雨

風味正不寢驟來寒氣增簷斜滴野籜缺搖春燈孺子睡中語歸人行未能

前溪波暗長定已沒灘稜

早春田行

風雪雙羊路梅花溪上邨  
鳥呼知木暖雲濕覺山昏  
婦子來陂下囊壺置樹根  
予非陶靖節老去愛田園

宛陵先生文集卷第四十

宛陵先生文集卷第四十一

依韻和馬都官春日憶西湖寄陸生

時望前湖倚玉梯，雲山橫絕路東西。只知遠目窮芳草，不見高人在曲隄。畫榭尋春應醉去，舊朋懷昔欲魂迷。海邊燕子來無數，願託雙飛寄短題。

送志來上人往姑蘇謁元曹

折取東橋柳青青，向故人欲知問館處。要識舊溪春旋灑，銅餅水休霑野寺塵。吳門逢隱者，必是漢名臣。

溫成皇后挽詞

鞏洛園陵啓函關，鹵簿聞素車。迎紫氣，靈輿度青雲。歌欲傳，長恨人將問。少君明年賀元日，無復繡衣薰。

和真上人萬松亭虎窺泉

南岡新路平東嶺，新亭成嶺上。松萬株，嶺下泉一泓。松未龍鱗老，泉曾虎迹行。虎去豈不渴，松今豈不生。泉無百尺繩，安見甘與清。松無百歲人，安見千丈榮。

道人能喻道莫使世人驚我來開醉眼不似阮步兵

種碧映山紅於新墳

年年杜鵑啼口滴枝上赤今同萋弘血三歲化爲碧因移新冢傍顏色照松柏

邵郎中姑蘇園亭

吟愛樂天池上篇買池十畝皆種蓮薄城萬竿竹嬋娟藤纜繫橋青板船折腰  
大濩不直錢鵝鶻灘鶻沙際眠水從太湖根底穿月出洞庭山上員公歸與客  
相留連秋風鶴唳春杜鵑班鱸斫膾紅縷鮮紫豉煮莼香味全我思白傳在三  
川吳船雖有吳饌偏當時九老各華顛裴令來過吟復聯至今怪石存舊鐫七  
葉樹蔭黃金田羨公有子勝昔賢高門通車千萬年

與正仲屯田遊廣教寺

春灘尙可涉不惜濺衣裾古寺入深樹野泉鳴暗渠酒杯參茗具山蕨間盤蔬  
落日還城郭人方帶月鉏

哭謝公儀學士

道路傳聞日驚嗟尙復疑疾因勤學得命不與人期賈誼年傷少相如恨見遲  
向來公輔器看取李家知

依韻和王介甫兄弟舟次蕪江懷寄吳正仲

楚客連檣泊晚風吳人江畔醉無窮少陵失意詩偏老子厚因遷筆更雄貫口  
信潮千里至平沙落日一時紅知君兄弟才名大我媿白頭遼水東

依韻和吳季野馬上口占

溪頭三月草菲菲城畔春遊惜醉稀莫信杜鵑花上鳥人歸猶道不如歸

邵考功遺鱖魚及鱖醬

已見楊花撲撲飛鱖魚江上正鮮肥早知甘美勝羊酪錯把蒹羹定是非

昨於發運馬御史求海味馬已歸闕吳正仲忽分餉黃魚鱖醬鱖子因

成短韻

前欲淮南求海味緘書未發報還臺陸機黃耳何時至罌品分傳事按杯

正仲荅云鱖醬乃是毛魚耳走筆戲之

未開誤認其器

折却毛魚一品資吳郎聲屈向吾詩若論鶯子無從著冤氣衝喉未可知

正仲詩云

歸黃鶯子出蘇臺蘇臺非出鶯也

### 春日東齋

剝剝禽敲竹薰薰日照花耳中無俗聽眼底有閒誇  
逃筍過幽草吹香到別家  
吾懷方自得切莫問生涯

### 吳正仲遺新茶

十片建溪春乾雲碾作塵天王初受貢楚客已烹新  
漏泄關山吏悲哀草土臣  
捧之何敢啜聊跪北堂親

### 閒居

讀易忘飢倦東窗盡日開庭花昏自斂野蝶晝還來  
謾數過籬筍遙窺隔葉梅  
唯愁車馬入門外起塵埃

### 依韻和季野見招

悲憂如路去無程靜節終朝酒自傾  
苦苦來朝爲醉伴西山不使伯夷清

依韻馬都官宿縣齋

常愛陶潛遠世緣  
阮家仍有竹嬾娟  
夜深風撼蕭蕭響  
誰憶北窗人正眠

吳正仲見訪回日暮必未晚膳因以解嘲

永日無車馬閑坊  
有竹鄰雨中烏帽  
至門外綠苔新  
不殺雞爲具堪題鳳  
向人山公識墨在  
知我舊來貧

昭亭潭上別第

從來潭上別先賽  
故山祠却入舟中飲  
無令瓊盞遲須拚  
一日醉便作數年期  
落日馬嘶急岸傍  
人散時

夢後得宋中道書

四月十九日

宵夢宋子語  
晝得宋子書  
書意與夢語  
曾不異  
往初昔我遭家難  
逢子亦在廬  
我南君大梁  
千里非隔疏  
念處天地中  
天地猶一車  
日月爲兩轂  
星辰隨徐徐  
晝夜轉不已  
載之將焉如  
冉冉趨死鄉  
萬古曾無餘  
其間乃有夢  
覺實夢何虛  
何虛亦何實  
及盡皆同墟  
身世旣若此  
合離休歎諸

送吳季野太博移蜀靈泉先至輦

葦箔蠶齊老桑林葉更生楚禽多異響蜀棧未堪行  
客散岸傍席馬還溪上城  
過都當有問為語欲巖耕

至和元年四月二十日夜夢蔡紫微君謨同在閣下食櫻桃蔡云與君  
及此再食矣夢中感而有賦覺而錄之

朱櫻再食雙盤日紫禁重頒四月時滉朗天開雲霧閣依稀身在鳳皇池  
味兼羊酪何由敵豉下莼羹不足宜原廟薦來應已久黃鶯猶在最深枝

依韻和吳正仲赤目見寄

尋常不病眼青白看人多暫見朱成碧難逢扁與和金篋舊說在訶子  
古方磨

我自苦風痺思君那得過

葛洪治赤日翳膜方訶子一枚以蜜口磨注目中

兩燕五月五日

兩燕去還來銜蟲為雛食雄雌濕已倦梁棟冷並息緣礎蚍蜉羣拾餒蜻蜒翼  
穀粟滿京園任從黃雀得

夏蟲

物久必自化化之猶騫騰當看廁中蛆去作盤上蠅飛聲既混雞斂迹何疑冰  
寄言漆園吏已知鴟與鵬

秋雨篇

秋雨一向不解休連昏接晨終窮秋梅生不量仰天問神官夜夢言語周日月  
是天之兩目忽然生翳無藥瘳只知淚滴爲赤子赤子豈誤天公哭霰  
霰灑涕落九州地祇不敢安泥潦已沒頭乃因從容詰神官后稷今在帝所不  
從前后稷知稼穡曾以筋力親田疇曷不告帝且輟泣九穀正熟容其收蚤時  
不泣此時泣憂民欲活反扼喉神官發怒髭奮虬下士小臣安預謀恐然驚覺  
汗交流樹上已聽呼雌鳩

中秋月下懷永叔

有朋無明月秉燭光彊致有月無樂朋獨酌顏易醉往年過廣陵公欣來我值  
期玩秋蟾圓靜掃庭下地復邀高陽公賸作詩準備特特乃多連後池風雨至

一夜看石屏恒吟無逸氣今宵皓如晝千里嗟離異固知理難并把酒遙相寄

當時出月  
石屏同詠

聞永叔出守同州寄之

冕旒高拱元元上左右無非唯唯臣獨以至公持國法豈將孤直犯龍鱗  
芟莠欲把人留楚首藉方枯馬入秦訪古尋碑可銷日秋風原上足麒麟

九日陪京東馬殿院會疊嶂樓

誰言天去遠山上有樓臺峯色引溪色共入茱萸杯行當登泰山雲掃日月開  
柏烏與城烏兩處休鳴哀

酒病自責呈馬施二公

李白死宣城杜甫死耒陽二子以酒敗千古留文章我無文章留何可事杯觴  
況承先子戒宜不著口嘗昔聞有田竇以此相滅亡禮飲不在多歡飲不在荒  
二公方逢時安得入醉鄉

宣城馬御史酒闌一夕而西因以寄之御史嘗留老馬與予僕

三更醉下陵陽峯平明溪上去無蹤  
叉牙鐵鑱謾橫絕濕槽不驚潭底龍  
斷腸吳姬指如筍欲剝玉將何從  
短翎水鴨飛不遠那經細雨山重重  
却顧舊埽老病馬塵沙歷盡空龍鍾

詠懷

西方有烏鼠生死同穴居物理固不測  
孰言飛走殊雄雌豈相匹飲啄豈相須  
一爲枝上鳴一爲莽下趨苟合而異嚮  
世道當何如

荅仲雅上人遺草書并詩

經月不出戶堂上多綠苔忽有方外客  
衣披稻畦來來從青山下手把紈素裁  
筆草數行字瘦蛇起春雷渴墨未散霧  
屈角麟欲開裝爲兩大軸置我并瓊瑰  
嬾瞋長鬢奴挂壁不埽埃智永與懷素  
其名久崔嵬師今繼此學入神在徘徊  
未料輒以我便比和羹梅我心常苦酸  
得姓何可能

讀吳季野芝草篇

阮生存詠懷美彼曜朱堂一榮不復枯  
五色異衆芳衆芳發朝露俄以斂夕陽

丹莖起瓦礫又匪媚棟梁此稟由至和君子要有常

送吳季野

贈言必有規無規固無言彊言苟無補何異秋蟲喧君行蜀道難不厭治輕軒  
母歿未歸土女長未出門誰能力爲此勞苦游牆藩

吳季野話撫州潛心閣

高閣潛心所圖書暴蠹收青山隨宅轉遠水向門流迤邐看無厭潺湲聽不休  
一聞秦洞說便欲泛漁舟

詠懷四首

一身頭面間所用蓋有長兩耳主於聽兩目主於光維鼻主於嗅維舌主於嘗  
以耳辨黑白以目分宮商以鼻識酸鹹以舌聞麝香各各反爾用安得無悲傷  
此能而兼彼自勞由不量寄言世上人欣欣蹈其常

東方有野父襁田一豚蹄復操一盃酒祝穀滿吾樓百金請救兵所欲奢所齎  
彼何滑稽生仰天獨笑齊

自余居田里未免病與貧常把神農書每以藥物親處方猶持法義比君使臣  
但恨無餘資豈及療我鄰筆頭不中書聊可備急人昨日除吏來吾邦爲長民  
欲溺復燃灰敗筆前已陳

風驅暴雨來雷聲出雲背若決千仞溪追奔下天鎧堂堂亞夫軍吳楚不足碎  
旱氣沃原田煩蒸洗闐闐深料生注射聚沫猶壅礙青蔥草樹鮮斷沒虹霓在  
向晚留霽暉夫容染新黛

送毛祕校宣城主簿被薦入補令

良驥不必大騰羈已超邁良弓不待寒調弦日勁快宣城古大邑聽訟易聳贖  
君能抉其塞宰與民共賴自當割雞用刃必無鈍敗嘗聞開元時令長多賜戒  
戒石今尙存世異事不背以此贈行行無酒勿我怪

鴨脚子

魏帝昧遠圖於吳求鬪鴨乃爲吳人料重玩志已匝江南有嘉樹脩聳入天插  
葉如欄邊迹子剝杏中甲持之奉漢宮百果不相壓非甘亦非酸澹苦衆所狎

千里競齋貢何異貴爭嘒

宛陵先生文集卷第四十一

宛陵先生文集卷第四十二

八月十五日夜東軒

隔竹已見月清光度谿來移影上素壁與我相徘徊是夜正中秋天地霧露開  
人疑玉兔出藥杵不生埃嫦娥倚冰輪豔色若自媒他夕豈不好物意爲之摧

送楊辯青州司理

儒者服褒衣氣志輕王公一落該網中折節長俯躬山東多豪士片言不可窮  
青土饒嘉棗無以人鈍蒙彼知南楚輕強始必弱終矯志合其情乃是吾徒通  
行當問友生爲我舉杯空

隱靜山訪懷賢上人不遇

松上垂青蔓蒲根瀉碧泉高僧來不見却返五峯前

遊隱靜山

心在名山久積歲未及遊將過值風雨路不通馬牛丁壯四五人籃輿時更休  
轉谷逢煙火下隰多田疇偃穠黃壓畝刈麻東盈丘始覺山門深長松如騰虬

直上百餘尺蒼髯葉脩脩五峯迎人來冷逼臺殿秋石泉出雲中引入舍下流  
緣源至巖口巖底魚可鉤天昏碧溪去果熟青猿偷草樹不盡識自起詩人羞  
濺濺澗水淺苒苒菖蒲稠菖蒲花已晚菖蒲茸尚柔靈根采九節試共野僧求  
逡巡能致之衰疾無甚憂昔聞有釋子渡江用杯浮棲心向茲地埋骨在林陬  
駭陰漏斜光徒欲窮巔幽夜還南陵郭幾落猛虎喉

路詠

五里十里消磨盡千蹄萬蹄來往蹤古今不是不經歷踏破青山重復重

書席語送馬御史

天意漫漫物自供聞香能至是喧蜂野人割蜜不須盡留與寒脾作御冬

送李南玉

小人貧於資君子貧於時小人富於貨君子富於辭貧雖同寒飢富不同路岐  
彼富歿則已此富名不移丈夫事百變未死安可期明明趨財利莫卹前人嗤  
舉家如春蠶仰食不可遲況念宿債窘何媿賤士爲買臣嘗負薪相如猶滌卮

君思此二人信吾所不欺邇者有趙壹窮憤自興詩乘驥抱美玉樂與和未知古來鮮逢遇後世無苦悲

代書寄鴨脚子於都下親友

予指老無力不能苦多書書苟過百字便覺筋攣拘京都多豪英往往處石渠作書未可周寄聲亦已疏後園有佳果遠贈當鯉魚中雖聞尺素加餐意何如

秋日家居

移榻愛晴暉脩然世慮微懸蟲低復上鬪雀墮還飛相趁入寒竹自收當晚闌無人知靜景苔色照人衣

昭亭別施度支

昭亭送客地來往四十年常視松端日每稽潭上煙風移虎旗脚寒入牛童肩待訪名山去相期廬阜前

潘歙州話廬山

潘侯話廬山落落尤可伏初云江上來遠見雲中瀑捨舟到雲外觀瀑已巖麓

往往逢平田攢攢愛深木竹門懸徑微源水陰藤覆坐石浸兩散炎膚起芒粟  
夕陽穿萬峯高下相出縮尋常杳不分但被煙嵐畜絕頂水底花開謝向淵腹  
風力豈能加日氣豈能曠攬之不可得滴瀝空在掬夜昏投僧居孤燈望溪曲  
忽聞清磬音漸近幽林屋止侯休多談已滿我心目懷遊二十年夢寐今固熟  
何當借輕舸一往如飛鷲

秋日邨行

谿霧晝又收山邨夜初晦飢禽來往飛遠樹青紅碎原上楚牛童屋頭吳婦碓  
雞肥酒已熟野老邀同輩

吳正仲遺蛤蜊

紫緣常爲海錯珍吳鄉傳入楚鄉新樽前已奪蟹螯味當日尊羹枉對人

送潘歙州

潘過宣城而送之

一見新安守便若新安江洞徹物不隔演漾心所降遠指治所山已入鄰齋窗  
捧輿登南嶺策馬懷舊邦養親將爲壽傾甘抱玉缸觀軍將勞士鬪肥堆羊腔

下車談詩書上世擁旄幢勿窺淵游鱗無吠夜驚尫他日聞課第天下誰能雙

馬都官行之惠黃柑荔枝醋壺

梁霜胡甘熟烘日荔枝美橘柚未為精葡萄安可擬郭生始能贊魏文何謬比  
二果皆世珍乃遺及賤士而復副醇醑或乞自諸己豈唯享遠味終得為直矣

郭璞贊云厥包橘櫛奇者維甘魏文帝記云南方龍眼荔枝寧比西國葡萄石蜜

前以相子詩酬行之既食乃綠橘也頃年襄陽人遺柑子辨是綠橘今

反自笑之

昔辨荊州誤今為越叟迷黃柑與綠橘正似玳瑁圭

新安潘侯將行約遊山門寺予以濔淖遂止因為詩以見懷

蒼山自為門呀豁異鐫鑿路通石壁盡潦起田稔陷傍嶺有結廬潛潭淨於鑑  
聞之固欲往久雨濕泥濫莫陪太守車然諾豈誑賺遙遙橋上去望望馬猶站  
畏滑不肯行非關惜鞵鞵

依韻自和送詩寄潘歙州

潘侯擅詩筆五色神授江世家有大勳佐舜同龐降子孫逢太平少小事書窗  
源流本慷慨吐論皆經邦量猶函牛鼎吾徒媿罌缸開口必典寶省腹唯空腔  
作者過我門應笑無戟幢窮老在弊廬何異守戶尠有心希買交白璧無一雙  
蛟龍養鬚鬣當在浩浩潯虎豹養文采當在巍巍岑我無太山高我無滄海深  
斗水與堆阜恐未慰此心

送李逢原

襴衡負其才沈沒鸚鵡洲李白負其才飄落滄江頭後亦多效此才薄空羈囚  
文章本濟時反不能自周吾嘗戒吾曹慎勿異爾流臧倉毀孟軻桓魋迫聖丘  
雖云推之天未免皇皇求吾今重子學無力薦公侯行當思吾言非教子佞柔

重送李逢原歸蘇州

吳客歸從楚霜華著馬蹄倦童持弊橐呼艇過寒谿寂寞區中飯依稀日午雞  
張儀猶舌在不必媿於妻

黃國博遺銀魚乾二百枚

乾若會稽筍色比荊州銀熟宜煨栗火飲助擁爐人低陰欲飛雪酒微生頰熱  
海上使方來多饜不爲餐

三和寄潘歙州

昔固聞陸海今復有潘江文章吞時英光芒瞻里降

爾雅曰降婁奎婁也

如游太室陽仰

見玉女窗高才生大國試政來遠邦道傍一相顧冰壺臨瓦缸逸驥美豐肉老  
癯慚瘦腔藻詠答下俚玉鈐鏘寶幢尋言不悟言自笑趁塊尫終知將門豪射  
鵬常貫雙

送天台李令庭芝

吾聞天台久未見天台狀去海知幾里去天知幾丈峯嶺隱與出巖壑背與向  
雲雷反在下泉瀑反在上幽深無窮窺杳眇無窮望至險可悸慄至怪可駭喪  
石橋彎長弓跨絕絃未放當時白道猷平步入青嶂去爲六百石亦見志所尙  
子欲廣異聞可以一尋訪

十一月十二日賽昭亭神

冷雨凝雪未成雪潭空魚寒歸石穴長篙扣穴倩鯉魚寄信山頭來奠設魚傳  
水鳥飛上山山大槎槎乾吹咽旋灰起角巫鼓鳴漆俎銅盤顛牲血琵琶嘈嘈  
神降言福汝佑汝無災孽西向啐飲東向迴谿心却望山崔嵬

依韻和吳正仲冬至

流光冉冉卽衰遲物趣迴還似轉規長景已知今日至孤懷不比少年時阻陪  
上閣鴛鸞後且與南州父老期況有春禾新酒熟百分休放手中卮

施君挽歌

哀鐸悽悽裏銘旌杳杳中澗雲銷總帳山雨入蒿宮世路行來久泉塗去莫窮  
素吟應共葬飲韻在松風

杜和州寄新醅吳正仲云家有海鮮約予攜往就酌逡巡又云幕中有  
會且罷此飲

淮南寄我玉醅酒白蚶海月君家有欲持就味明日期窮羹易覆已反手從事

開筵不可辭燕脂秀臉羅前後長頸善謳須臾謳只恐老來歡意休

依韻答吳正仲罷飲

君辭予家傾蟻醅自有嘉味須持來青篋絡餅方出戶紅妝侑席已邀杯窮愁  
一飲猶關分側望羣賢不可陪靜坐紙窗無所得只將文字眼前堆

送王景憲奉職

清羸將家子苦節自寒儒四壁我何有一錢君亦無下灘船亦急聞鴈日將晡  
行愛青山口人烟事網罟

讀毛祕校新詩

毛公明於詩其系宜善續前示五長篇大須傾幾曲豈特元和間欬唾成珠玉  
送允從上人還廬山

山高雲在下諸壑藏半空千重萬重翠正望落日中不知野僧歸石徑寒易通  
松閒無人掃隕葉如斷髮獨行逢莫寒衣裂溪上風

依韻諸公尋靈濟重臺梅

梅要山傍水次栽非同弱柳近章臺重重葉葉花依舊歲歲年年客又來雖愛  
千枝競繁密還嗟短髮已衰頽郎官博士留車騎擁蔽脩篁爲斫開

和正仲再和罷飲

吳味期君彊飲開楚醅因我破愁來何言合美將虛館却憶爭妍就捧杯夜霰  
已先庭雪集單衣難與毳裘陪踐盟幾欲驅車去塵事無端日日堆

和韻三和戲示

笞箐畫蛤瓦缸醅海若淮壩各寄來將學時人鬪牛飲還從上客舞娥杯蓬蒿

自有蔣生樂珠翠寧容鄭氏陪莫計寒暄與風雪古來黃土北邙堆鄭康成與  
盧子幹同

事馬融融後堂有珠翠  
之會康成不得預焉

嘉雪應祈呈權郡通判

臘近冬殘雲未合江南青蘆麥休肥誰將太守隨車雨一夜從風作雪飛

依韻四和正仲

四和還如九醖醅更醇更美未嫌來相逢莫作兩般眼一飲不辭三百杯嵒阮

當時無俗慮山王雖貴亦能陪如今世態尤堪薄只把官資滿眼堆

袁招飲至云自早至

暮三百餘杯

### 雪

朔雲生晚兩臘霰集狂風不數花多出安知天更工漫階夜已積萬物曉初蒙  
誰憶新豐酒乘驢灞水東

### 宛陵先生文集卷第四十二

珍傲宋版印

宛陵先生文集卷第四十三

依韻和郭祥正祕校遇兩宿昭亭見懷

君乘瘦馬來骨竦毛何長下馬與我語滿屋聲琅琅一誦廬山高萬景不得藏  
出沒望林寺遠近數鳥行鬼神露怪變天地無炎涼設令古畫師極意未能詳  
誦說冒雨去夜宿昭亭傍明朝有使至寄多驚俗章

郭來誦歐陽永叔廬山高送劉復

採石月贈郭功甫

採石月下聞謫仙夜披錦袍坐釣船醉中愛月江底懸以手弄月身翻然不應  
暴落飢蛟涎便當騎魚上青天青山有冢人謾傳却來人間知幾年在昔熟識  
汾陽王納官賞死義難忘今觀郭裔奇俊郎眉目真似攻文章死生往復猶康  
莊樹穴探環知姓羊

依韻和郭祕校苦寒

噫風鳴悲鳶鳴哀雨霰枯木爲之摧昭亭山頭野火滅海水夜凍迷蓬萊燭籠  
以爪自掩耳酒殘生冰拈不起陶潛棄官屋無米兒號妻啼付鄰里

依韻和郭祕校昭亭山偶作

知君棄官後江上尋名山心旣慣世內迹欲還人間昭亭忽來過覽古興長歎  
野寺拂塵壁丹陽已爛熳殿角虛寶鐸微風聲珊珊遺像與筆蹟始得觀裴顏  
淺井何泠泠前溪何潺潺幽幽隨猿鳥渾渾忘區寰裂裳不爲媿餌芝不爲難  
坐對寒雨中松上孤鶴還

送郭功甫還青山

來何遲遲去何勇羸馬寒僮肩竦竦昨日棄爲梅福官扁舟早勝大夫種負經  
不厭關山遙訪我猶將歲月恐得言會意若秋鷹反翅歸飛輕飽飀明朝到家  
年始開椒花壽酒期親捧何當交臂須彊行莫作區區事丘壠

送鄧生

哀哀彼鄧子扶柩歸長沙朝暮哭失聲驚聒牆上雅飛去復飛還相與棲水涯  
卜葬不當緩早晚能到家

送才上人還雪竇寄達觀禪師

春雪滿蓑笠海邊先燕歸千林新改葉百衲舊來衣谿水從何至山雲自解飛  
報言巖下客齋盃筍應肥

樂掾自淮南回示新詩

淮南歷覽還宣城囊多佳句何冰清入門先叫十年兄袖中大卷持來評我雖  
暗愚眼不盲要識合如劉長卿舉頭不言笑且驚此兄議論頗稱情我亦感君  
知我名阮籍從呼作老兵

蘇州曹琰虞部浩然堂

姑蘇臺上麋鹿號夫差城中樓觀高荒榛盡已付明月爲古憤怒空秋濤吳亡  
越霸能幾日後世擾擾猶鴻毛孟軻善養浩然氣充塞天地無飢瘝慕而爲堂  
亦有意不學屈子成離騷

紅梅篇

昨夜輕雷起風雨芍藥紅牙竹欄土南庭梅花如杏花東家殘朱塗頰顛萼爲  
裳衣蕊爲組枝爲高居幹爲戶蛺蝶未生蜂未來赤身掩斂無金縷終然有子

當助傳說羹落亦不學飛燕皇后迴風舞此意又笑麻姑與王母勾引何人擗  
麟脯是非方朔謾漢武只知此桃不知語樹不著口數而今言之已莫補放我  
渾丹鳳皇羽

依韻和吳正仲聞重梅已開見招

難開密葉不因寒誰翦鵝兒短羽攢猶是去年驚目豔不知從此幾人觀重重  
好蕊重重惜日日攀枝日日殘我爲病衰方止酒願攜茶具作清歡

寄送吳公明屯田通判秦州

一聞春禽婆餅焦竹林山木生蕭條憶君將向洛門去胡馬無塵塞路遙將軍  
本是漢丞相玉帳坐辨牙旗梟白面書生有肝膽少年曾過咸陽橋今雖老病  
由廬巷爲報緩制秦兵驕

吳正仲求紅梅接頭

君家梅溪上但見梅花白我家家樹紅求枝寄歸客翦接如交情本末不相隔  
明年舉酒時醉頰生微赤

初聞蛙

朝開南籬梅暮聞北池蛙何時科斗生草根已吐牙只畏草葉長其下可隱蛇  
游子且勿行科斗成蝦蟆

百舌

一冬常噤默乘春何多舌蒼毛無文章尖啄苦騰說曉升高高樹百鳥言漏泄  
只未聞鳳皇有亦學不徹傷哉古辯士往往遭車裂

萬表臣報山房有重梅花葉又繁諸君往觀之

前時見多葉曾何數尋常今見葉又多移賞南澗陽寄言莫苦恃更多殊未央  
去臘隱靜山僧寄榷樹子十二本柏樹子十四本種於新墳

槠柏移皆活風霜不變青冢垣雖闐寂田客每丁寧不待爲書几常流作鬼庭  
東邊夾路少更致儻能令

補題東都善惠師禪齋

香象紅蕖坐花盆白石臺上公金印去王子玉駒來心是寒餅水明無寶鏡埃

世人何擾擾時爲一言開

送萬殿丞虔州安遠軍

新雷動江雨百鳥響溪巖逆水送行客順風催挂帆過山唯廟敬團飯與烏銜  
太守雖憐舊須防有嫉讒

野望

新晴宜野望最愛是山前遠近花兼竹高低水拍田呼名鳥無數問姓客多年  
此地春耕晚吳牛樹底眠

泛溪

中流清且平捨楫任船行漸近鷺猶立已遙邨覺橫何妨綠樽滿不畏晚風生  
屈賈江潭上愁多未適情

春陰

雲壓花房冷風開柳絮遲幽人宿醒在靜館晝眠時欲雨天無雨將絲鬢未絲  
孔融過五十歲月已堪悲

新燕

前時春社畢今日燕來飛將補舊巢缺不嫌貧屋歸銜泥和草梗側翅過柴扉  
豈比驚丸雀迎人欲拂衣

梨花

處處梨花發看看燕子歸園思前法部淚溼舊宮妃月白鞦韆地風吹蛺蝶衣  
彊傾寒食酒漸老覺歡微

新筍

挑筍春雷後晴坡過雨時何言江外早已比洛陽遲園客自偷賣主人那得知  
徒令養新竹待與作藩籬

海棠

要識吳同蜀須看線海棠燕脂色欲滴紫蠟蒂何長夜雨偏宜著春風一任狂  
當時杜子美吟徧獨相忘

二月七日吳正仲遺活蟹

年年收稻賣江蟹二月得從何處來滿腹紅膏肥似髓貯盤清殼大於杯定知有口能噓沫休信無心便畏雷幸與陸機還往熟每分吳味不嫌猜

老馬

馬御史所留

吳人惜燕駿燕馬臥吳家毛骨從前貴關山欲去賒草深閑楚澤力盡憶胡沙御史乘來久時逢避路騮

自詠

閉戶無還往端居廢禮容花爲貧富燄鶯是舊過從持屐對人蠟綻衣看婦縫非同叔夜傲切莫怪疎慵

鸚鵡

一入秦宮去千山隴樹秋能言依婦女學語類俳優玉鎖閑拘束金籠不自由哀良是黃鳥死爲穆公差

曉

烏蟾不出海天地無明時萬國睡未覺一聲雞已知樹頭星漸沒枝上露應垂

人世紛紛事勞勞只自爲

朝二首

鵝鴨出欄去兒童臨水驅欲開花  
沄露聚噪鳥窺廚秣馬刈青草  
買薪嫌五銖錢刀豈今古村叟一何愚

木鑿初開水上城竹籬深閉日光生  
青苔井畔雀兒鬪烏白樹頭鴉舅鳴  
世事但知開口笑俗情休要着心行  
是非不道任挑撻唯憶當時阮步兵

宣州雜詩二十首

昭亭萬仞山古廟半山間  
賽雨使君去釣潭漁父閑  
巖肥巖向日竹暗壠連關  
北望高樓上南飛鳥自還

三洲灘口急兩水渡頭來  
下過淵聖名桓彝宅上通嚴子臺  
潺湲瀉寒月滉漾照

春梅白鷺驚起處魚多見底迴

一過響山畔常思路中丞  
開亭宴貔虎制賊象冰繩  
舊刻多磨滅今人少有稱  
茸茸春草長時有牧牛登

伍員奔吳日蒼皇及水濱彎弓射楚使解劍與漁人抉目觀亡國鞭尸失舊臣  
猶爲夜濤怒來往百川頻

每見昭亭壁高瓌筆墨存丹青虛格裏雲霧碧紗痕烏屎常愁污蟲絲幾爲捫  
貴來曾改觀世故有誰論

信讒多見逐伐國豈無仁屈子行江畔昭王問水濱包茅曾責貢香草自持紉  
莽蒼山川在漁歌屬野人

項籍路猶此力豪聞拔山八千提楚卒百二破秦關陔下圍歌合江頭匹馬還  
却思諸父老相見亦何顏

細雨春岡滑無因駐馬蹄裘單懷後侶風急過前溪近寺聞魚鼓穿林聽竹雞  
田家春正急炊飯待鉏犁

古有琴高者騎魚上碧天小鱗隨水至三月滿江邊少婦自撈撓遠人無弃捐  
憑書不道薄賣取青蚨錢

諸葛久精妙已能聞國都紫毫搜老兔蒼鼠拔長鬚露筦何時淨煙丸事染濡

班超投此去死作玉關夫

大寶木瓜熟壓枝常畏風帖花先漏日噴露漸成紅青箬包山舍馳心奉漢宮  
誰將橐駝載辛苦向驕戎

竿頭注腐鼠水次野蜂知每視銜飛翅因熏斲取脾絳囊千里道乾蛹百鈞馳  
盡入公侯第雕盤助酒卮

高林似吳鴨滿樹蹊鋪鋪結子繫黃李炮仁瑩翠珠神農本草闕夏禹貢書無  
遂壓葡萄貴秋來徧上都

鳥命若楊葉夜棲雞翼間情知羽毛薄自禦雪霜難相託爲溫燠終非學附攀  
猶勝居鶻握憂懼得生還

柳子厚鶻說云

高齋謝公歿此地卽危樓不改窗中岫無停川上舟壁陰綠薜荔城暝笑鴝鶒  
萬井曉煙合素霓橫樹頭

北客多懷北庖羊舉玉卮吾鄉雖處遠佳味頗相宜沙水馬蹄鼈雪天牛尾狸  
寄言京國下能有幾人知

五月黃梅肥終朝密雨微綠苔侵竹閣潤氣裊人衣背隴霑牛去銜蟲溼燕歸  
高山發瀑水夜漲入吾扉

斫漆高崖畔千筒不一盈野糧收椽子山屋點松明只見樹堪種曾無田可耕  
兒孫何所樂向此是平生

傳道零陵守茲亭暫解裝分羣同鴈鶩幾日到瀟湘班竹思虞舜蘋萍憶楚王  
殷勤吏部句今亦誦無忘

宛水過城下滔滔北去斜遠船來橘蔗深步上魚鰕鵝美冒椒葉蜜香聞稻花  
歲時風俗美笑殺異鄉槎

打鴨

莫打鴨打鴨驚鴛鴦鴛鴦新自南池落不比孤洲老禿鶻禿鶻尙欲遠飛去何  
況鴛鴦羽翼長

暝

杳杳鐘初發昏昏戶閉時巢禽投樹盡疲馬入城遲醉唱眠茅屋燒光透槿籬

荷鉏休帶月亭長豎毛眉

夜

日從東溟轉夜向西海沉羣物各已息衆星燦然森蝦蟆將食月魍魅爭出陰  
阮籍獨不寐徘徊起彈琴

東溪

行到東溪看水時坐臨孤嶼發船遲野鳥眠岸有閑意老樹著花無醜枝短短  
蒲茸齊似翦平平沙石淨於篩情雖不厭住不得薄暮歸來車馬疲

呂大監餉鯊魚十尾

日暖楊花四散開江邊鯊魚無數來伊魴洛鯉不堪憶丙穴漾陂何可咍賀監  
休思鏡湖去應如李白跨鯨迴

香爐

李獻甫惠

鐵鑄小香爐壁環平口鋪麝焚葵葉大獸齧竹根跌淨几羣書外閑堂一物無  
中間任灰燼終與蕙蘭俱

茶磨二首

楚匠琢山骨折檀為轉臍乾坤人力內日月蟻行迷吐雪誇春茗堆雲憶舊溪  
北歸唯此急藥白不須擠

盆是荷花磨是蓮誰龔磨石洞中天欲將雀舌成雲末三尺蠻童一臂旋

得自三天

洞吳氏

送白珙秀才

谿上桃花發山前桂舸移水流過峽急風逆出江遲南國魚鰕厭東都夢寐思  
逢人若有問不似在朝時

送閻丘殿丞

每有西歸客誰無滿袖詩都忘將別意競媚向官資憑在屋頭月照君牆上旗  
不同山一定更遠更相隨

獻甫過

幾樹桃花夾竹開阮家閭巷長春苔啓扉索馬送客出忽覺青紅入眼來

宛陵先生文集卷第四十三

宛陵集卷四十三

八  
中華書局聚

珍做宋版印

宛陵先生文集卷第四十四

寄維陽許待制

當時永叔在揚州中秋待月後池頭約公準擬與我敵是夜二雄張利矛我時  
小却避其銳風愁雨恨嫦娥羞主人持出紫石屏上有朏魄桂樹婆娑而枝虬  
作詩誇詫疑天公愛惜光彩向此收四坐稽顙歎辯敏文字響亮如清球更後  
數日我北去相與送別城門樓誰知康成能飲酒一飲三百杯不休雞鳴各自  
便分散山光寺側停畫舟我來謁公公未起臥索大白須扶頭而今倏忽已八  
載公領府事予居憂歐陽始是玉室客批章草詔傳星流問公可憶羊叔子雖  
在軍中常緩帶而輕裘寄聲千里能信不

紫微亭

在池州

江雲如旗脚墨點飛鴈行平圃采芳菊上水酌桂漿爲言此何時杜子逢重陽  
醉思莊生達哂彼齊景傷至今孤亭間獨有九日章昔我來齊山山僧迎道傍  
騎馬到寺門亂石屹若牆值雨不徧歷但取山泉嘗牧之舊游處苔滑屐莫將

却返弄水涯隔溪望青蒼絕頂見茅屋洪波日湯湯雲霞與鴈驚還動秋客腸  
去逾十五年游宦韓陳梁哀哀遘禍殃乃再居南方欲往尙未可追吟寄支郎

聞臨淄公薨

至和癸巳十二月兮友人語我火犯房芒射鉤鈐而拂上相兮禍非弼臣誰可  
當昨日聞太宰悟天道而畏忌兮歸臥其第三拜章太宰旣不得請而賜黃金  
百兩以爲壽兮諫官御史猶擊強明年孟陬臨淄公薨兮果然邦國橈棟梁豈  
無神醫善藥以起疾兮固知稟命有短長公自十三歲而先帝兮謂肖九齡宜  
相唐後由石渠鳳閣禁林以登樞兮俄佩相印居廟堂出入藩輔留守兩都兮  
其民詠歌盈康莊官爲喉舌勳爵一品兮經筵講義尊蕭匡年踰順耳不爲天  
兮文字百卷存縑箱子孫侁侁同鴈行二女貴壻富與楊未知歸葬何土鄉臨  
川松泊安可忘我爲故吏摧肝腸灑淚作雨春悲涼精魄其歸於天乎必爲星  
宿還高張骨肌其歸於土乎必爲蕙芷不滅香墓碑墓銘誰能盡其美我爲欲  
傳萬古須歐陽

吳正仲遺二物詠之

金瓊之鍾傳令公謂之醒酒花

鍾令昔醒酒豫章留此花黃金瓊何小白玉盃無瑕始入吳郎宅還歸楚客家  
從茲不能醉只恐賣流霞

疊石

十片寒湖滑千秋白浪根蒼蒼古崖色疊疊老苔痕欲象巨鼇頂俯當科斗盆  
唯愁作險說平地起崑崙

依韻和宣城張主簿見贈

韓子於文章所貴不相倣譬彼古今人同心不同貌吉從志久慕亦以重名教  
鳴鐘與亨鼎易厭非苦樂祿仕不及親揚名可爲孝君方佐大邑美錦同翦鉸  
遂令吾鄉民綢直無曲撓旣暇乃作詩欲與前人較朝來忽有贈捧若管窺豹  
又如捕鯨魚空自持網罩心降醉且睡昏昏不知覺

送吳正仲婺倅歸梅谿待闕

山水東陽去未去朋親茗雪朝復朝更無越相逃名舸猶看吳王送女潮海燕  
歸齊聲滿屋谿梅開過子生條明年十月吏迎處七里灘前權奏簫

再送正仲

擬君杜鵑花發當杜鵑時朱袍照白日光彩生路歧自比青鼠爪中心如亂絲  
絲亂復不理況復遠別離傾觴恨不深立馬恨不遲千山從此隔三歲或前期  
爾後各寄書空識滿紙辭非如笑言樂但有牽懷悲念昔蘇與李徘徊問何之

鐵獺新買小馬也

朝乘鐵獺上青山最滑春苔亂石間出入白雲勝臘屐玉驄雖貴未應閑

送回上人

因往湖州謁吳正仲

雲出任西東飄然意莫窮山川生眼界巾舄徧區中去去曾無著勞勞本是空  
梅谿人可見重爾似泓公

送徐絳祕校罷涇尉而歸

去年茶熟君得補今來茶熟君已去心曾不計茶有無隼在高風自騰翥昨日

我送吳侯歸未忍重臨離別處不若羣公憐襴衡相逐縱橫唯柳絮

志來上人寄示酴醾花并壓塲茶有感

京都三月酴醾開高架交垂自爲洞素葉層層紫蕊香釀歸光祿春生甕東陌  
西池走鈿車芳林廣囿飛朱鞵二年不到大梁城江邊淚滴肝腸痛況茲齒髮  
漸衰老已是憂愁不如衆宣城北寺來上人獨有一叢盤嫩蕪去歲遊吳求不  
得今朝還喜自持送眼底雖同往日看樽前所憶皆成夢又置新茶采雨前烏  
觜壓塲雲色弄對花却酒煮香泉彊詠才慚非白鳳

聞鶯

最好聲音最好聽似調歌舌更丁寧高枝拋過低枝立金羽脩眉墨染翎

杜鵑

蜀帝何年魄千春化杜鵑不如歸去語亦自古來傳月樹啼方急山房客未眠  
還將口中血滴向野花鮮

依韻和李察推留別

我學猶肥臄一食輒易厭君何以名虛每來車馬淹經術素所淺道義安得漸  
獨有寒苦吟可與前古兼今者抱悲哀惟悴居窮閭愁鳴無好音亟別空顧瞻  
詩言留彼美欲和慚無鹽短兵當長戈焉得不盡殲又如握枯蒿逆風乘烈炎  
膏肓靡自療誰復望鍼砭

送李節推挈內歸寧池陽并李察推往南康軍嫁妹二君同行

江上雙畫舸風帆或先後晚共泊蘆洲欣同幕中友一過長風沙一住貴池口  
當時驄馬客今是憑熊守每憐諸女賢與壻來爲壽上去至南康嫁妹事箕帚  
不畏楊瀾險不爲廬峯秀二君情義著我送何須酒

新開墳路

古徑約城斜鉏荒可過車直穿深篠去不比繞邨賒伐樹侵籬脚裨塍掘澗沙  
欲爲蘭若處松柏屬吾家

送鄒秀才游浙

鞍傍帶劍魚皮鞘馬後攜童越葛衫度水緣山君底急區區爲蒼古千巖

四月三日張十遺牡丹二朵

已過穀雨十六日猶見牡丹開淺紅曾不爭先及春早能陪芍藥到薰風

依韻和唐彥猷華亭十詠

顧亭林顧亭林湖在東南三十五里湖南又有顧亭林傳是顧野王居

鄉林空林木不見古人居猶尋古人蹟更與古人疎昔為賢豪里今作魑魅墟  
湖邊夜夜月光彩波上餘

寒穴金山有寒穴出泉甘清

山頭寒泉穴淨若鏡面平熨齒敵冰冷貯餅微玉聲傍有野鹿跡上啼林鳥清  
何由一往挹況復方病醒

吳王獵場在華亭谷東今其地為桑陸

孫氏有吳國四海未息戈獵以耀威武平野萬騎羅英雄魏與蜀貔虎一何多  
世事異莫究但見桑麻坡

柘湖在南七十里吳越春秋海鹽淪沒為柘湖吳地記秦時有女子入湖為神今存其祠

柘土久陷沒千歲嗟水濱不復吳鹽邑空有秦女神浩蕩吞海日曠闊迷天津  
扁舟誰能往日暮逢漁人

秦始皇馳道在崑山南四里有大通吳成

秦帝觀滄海勞人何得脩石橋虹霓斷馳道鹿麋遊車轍久已沒馬跡亦無留

驪山寶衣盡萬古空冢丘

陸瑁養魚池在縣西今名瑁湖云陸瑁所居也

來觀瑁湖水乃是陸生居春塘草幾變誰膾此中魚莫容科斗應亦有魯王餘

不隨蛟龍飛神鼈未可除

華亭谷在縣縈紆三百里入松江

斷岸三百里縈帶松江流深非桃花源自有漁者舟閑意見水鳥日共泛觥籌

何當騎鯨魚一去幾千秋

陸機宅華亭谷水東有崑山即其宅機詩云髣髴谷水陽婉孌崑山陰

我思陸平原廢宅荒草深才高乃速禍事往不可箴飢烏噪樹顛野鼠窟庭陰

黃耳亦已死家書無復尋

崑山華亭谷東二里有崑山陸機祖葬而生機雲人以崑山出玉以擬其美焉

陸氏幾世祖葬此生令名猶如產美璞遂爾傳嘉聲寒巖畜奇秀源水日東傾  
何言千載間二子不更生

三女岡

在東南八十里云是吳王葬女為三岡

吳王葬三女因留此岡名已化被粲質合有蘭蕙生嬋娟夜月照掩藹朝霧平  
古魂如未泯不遠闔閭城

李獻甫於南海魏侍郎得椰子見遺

魏公番禺歸逢子蕪江口贈以越王頭還同月支首割鮮為飲器津漿若美酒  
我獨媿先生饌致崇師友應知愈飢渴況是懷思久齊民要術云其俗為之越王頭

時魚

四月時魚違浪花漁舟出沒浪為家甘肥不入罟師口一把銅錢趁槳牙

烏賊魚

黃馬二君鮑

海若有醜魚烏圖有烏賊腹膏爲飯囊鬲冒貯飲墨出沒上下波厭飫吳越食  
瀾腸夾雕蚶隨貢入中國中國捨肥羊啗此亦不惑

依韻和行之枇杷

予送紅梅與之

五月枇杷黃似橘誰思荔枝同此時嘉名已著上林賦却恨紅梅未有詩

送紅梅行之有詩依其韻和

綴綴紅梅肥似蠟濛濛飛雨灑如脂吳郎齒軟食不得翻憶張公大谷梨

送王宗望罷宣城尉歸京

南土梅已黃北人舟競發去意方若渴望林殊未歇言歸向梁宋獨歎滯楚越  
行聞拜卿屬恩下蒼龍闕

寄題南陵息亭藥閣

竹裏有清館池中多藕花日光穿岸脚水影射簷牙柱穴蜂歸饗爐檀火過窠  
已知民訟息甕酒費巾紗

讀問月

我讀太白問月詩乃知白也心太癡明月在上爾在下月行豈獨君相隨白兔  
擣藥亦何療嫦娥孤棲欲嫁誰古人今人被磨滅休問有來都幾時唯有長照  
金樽裏此言萬世不可移但能自醉月自落夜夜如此誰復疑一月二十二三  
日半是風雨相乖離常願晴明對以飲耳邊流水勝鳴絲

五月十日雨中飲

梅天下梅雨綏綏如亂絲梅生獨抱愁四顧無與期妻孥解我意草草陳酒卮  
檻外百竿竹新筍高過之竹色入我酒變作青瑠璃一飲眼光再飲言語遲  
三飲頽然兀左右歎我衰有鳥從東來引頭闖深枝發聲醒我醉提壺美無疑  
典衣不直錢唯是布與絺安得如古人車傍挂鴟夷

次韻和吳季野游山寺登望文脊山

山屬宣城

楚客好山水五月上高峯峯頂望文脊草樹皆有容身旣近援鳥必欲追喬松  
石壁出雲背苔磴千萬重下視霹靂飛忽起枯株龍却還僧居宿暮踐樵子蹤  
作詩留粉牆削藁爲我封美璞世未識獨令和氏逢

宛陵先生文集卷第四十四

宛陵先生文集卷第四十五

五月十七日四鼓夢與孺人在宮庭謝恩至尊令小黄門宣諭曰今日社與卿喜此佳辰便可作詩進來枕上口占

同謁未央殿共霑明主恩  
冕旒親日月蹈舞荷乾坤  
龍尾三重峻螭頭幾級尊  
德音欣社日撫語走黃門  
陰會皆如實陽開不復存  
空餘破窗月流影到牀垠

次韻和吳季野題岳上人澄心亭

空山舊逕綠苔滿古寺齋盂白薤蒸暑雨坐中飛漠漠野泉林外落層層從來勝絕皆離俗未有幽深不屬僧  
唯愛溪頭一尋水莫聞流浪莫聞澄

次韻和馬都官宛溪浮橋

在昔當陽候建橋臨大川  
洪波不爲阻馳道南北連  
何此小溪上擬象坦且平  
馬頭分朱欄水底栽碧天  
白雨緊大竿斷虹生橫舷  
游魚不可見車騎久臨淵

寄隱靜山懷賢長老

山有枇杷樹樹多獼猴羣  
高僧心不著一似五峯雲  
隨颿來溪口石上起氤氳

果熟獼猴去自向瀑澗分

次韻和馬都官苦熱

日光亭午時赫若鎔黃金鳴鳶不生風流雲不成陰赤地有焦土烈野無沃霖  
涸潭深幽幽枯嶽高岑岑火龍將焚鬣陽烏多渴心肌膚非木石絺綌煩衣襟  
冰盤不可見空對瓊玖吟

歷陽過杜挺之遂約同入汴

滄海瀉玉自天外牛斗傍邊客正迴人說維摩居士病我同王子雪舟來汀沙  
沮洳潮新落山日曛矇霧始開去約河隄春柳動與君吹紫步徘徊

和胡公疎送嶼師移居寶光寺

宋日天王寺梁時太子園地猶隨世變物豈與人存欲問移居意還應避俗喧  
相期唯有月夜夜在高原

胡公疎示祖擇之盧氏石詩和之

盧肇家

袁州太守蓬山客來過盧家尋怪石盧家百物今已空唯石難移留舊蹟埋沒

尙存三四分兩淋日炙如皴鼓太守惻然呼健兒荷鋤秉鍤爭來役健兒掘土  
不爲堅旋旋剗沙見圭隙漸奇漸異人忘勞更索更深知幾尺瘦峯削出嵩華  
骨虛竅鑿破蛟螭額千指曳繩車四輪擊鼓助力歸東陌東陌東頭湖水傍黃  
泥洗盡何蒼碧故宅愈冷東湖喧貴賤競觀無礙隔太守自憐堅直心愛少憎  
多屢遭謫南至蒼梧及桂林名山徧訪無窮僻所宜厭慣不入眼向此歌吟尤  
愛惜我思永叔滁陽時大誇古翠濠溪獲作詩遠寄予與蘇高唱相隨無節拍  
今知賢人趨向同玩好託情忘俗格建康從事胡公疎一見詫君如李白雄才  
落筆瀉天河綴韻孤清仍險窄入探虎穴誰爲難辭通造化方能敵殿後吾雖  
膽力強獨鞭疲馬終無益

逢曾子固

前出秦淮來船尾偶攬燕遽傳曾子固願欲一相見順風吹長帆舉手但慕羨  
揚子東園頭下馬情眷眷昔始知子文今始識子面吐辭亦何嚴白晝忽飛霰  
我病不飲酒烹茶又非善冷坐對寒流蕭然未知倦

真州東園

國賦有常計計者豈不賢日夜疲精神自鑿膏火前新春力有餘鉏荒東乳偏  
壘土以起榭掘沼以秋蓮竹柏爲冬榮桃李爲春妍役役吳楚艘來泊常留連  
下江忘其險入漕忘其艱許公作此意吾亦見其權不獨利於己願書棠樹篇

行吟二首

持轡趨代北妄意希名馬代北馬如雲由來重取舍王官待才能高下不苟且  
行都未脩飾黃金誰變瓦吾當保吾真甘歸事田野

寘蟻橘林下正在結實時附緣與出入安可責於斯養大不問細使遠不問遲  
遠遲必有報細大必有期休哉豢龍氏終自辨蛟螭

僧子思以卷來見

明珠與翡翠中國反好之詩書出鄒魯誦學無蠻夸服彼而習此養驂安問犁  
古者耕釣士處心殊處卑譬彼乃可語吾病彊扶持

依韻和揚州許待制竹拄杖

楚竹翦霜叢何慚漢使邛鳩形殊用刻馬筆不同功挺特生難變支離分已窮  
輕肥思比鶴短髮任如蓬倚以爲高趣持之見素風步郊聊實下行樂偶從東  
屢刺莓苔破深穿苑圃通辯繁時畫地默意或書空古血有湘跡舊林無阮蹤  
將渠誰覺老要此豈關慵莫駭傾巢鳥須虞蠹穴蟲誰能求道術跨作上天龍

遇畫工來嵩

朝來又入揚州郭千萬中人識者誰唯有來嵩曾畫我依稀見似昔年時

省符上人

春秋一萬八千字不聞吳人楚人事佛衣儒談世已罕節行又與其徒異往來  
揚州三十年曾見華堂荆棘地獨聞依舊坐焚香尙把殘編討遺意

沈學士景休知真州

太守旛旗近國門州民迎望若雲屯家風自有東陽詠主道新移北海樽紅錦  
臂鞬觀粉質塗金珂勒駕朱軒他時儻取春秋對莫以周襄出鄭論

送杜君懿屯田通判宣州

京北外郎稱善書當時相與集江都日書藤紙爭持去長鉤細畫如珊瑚自茲  
乖隔三十載始駕吾鄉別乘車吾鄉素誇紫毫筆因我又加蒼鼠鬚最先賞愛  
杜丞相中間喜用蔡君謨爾後仿傳無限數州符縣板仍抹塗鼠雖可殺不易  
得貓口奪之煩叱驅若君字大筆亦大穿墉瑣質無長規君到官治事餘呼諸  
葛試問渠

張聖民學士出御書并法帖共閱之

又一軸蘇子美書杜懿病焉

冰膠楚舸歲將窮廣陵別乘憐老翁殷勤來邀彊一往虛堂肴酒羅甘豐我病  
胃寒不下咽匕箸謾舉叨席中主人欲客心意歡出以飛帛騰龍鸞刑政二字  
布楷法古今書帖未足觀坐間杜子好弄筆詆譏前輩無全完一見寶蹤天下  
妙稽首贊仰舌吻乾如此別識已太險我不頌詠還應難

讀黃莘祕校卷

嵇康昔彈廣陵散商聲高與宮聲緩託名山鬼未傳人古桐紉絲絲不斷一聞  
僵臥竊其音世間雖得能亦罕賢明以之知盛衰愚昧以之爲妄誕頃年過我

在蕪城忽聽長拍去欲嬾鳳皇養雛飛未高雞鶩成羣翅終短龍章秀骨苦輕  
時繼作五言須款款

贈許待制歲旦生日

天曆重更端哲人茲命世嘗聞月旦評況是高陽裔椒花作壽杯爆火通爐桂  
穹龜及蒼鶴尙以千年係曰惟五行秀復與明時契他日求老成不須從渭汭  
答宣闈司理

六經義趣深傳訓或得失後人語雖淺辨識猶百一歐陽最知我初時且尙窒  
比以爲橄欖迴甘始稱逆老於文學人尙不卽究悉宜乎與世士橫爾遭詬啣  
誓將默無言負暄方抱膝非非孰是是都莫答問詰歲暮宣參軍辭如鮑昭逸  
粲然傾明珠襲我頗過實便言楚江萍光彩侔旭日自慚流浪蹤不得蒿芹匹  
復爲苦硬句酬報彊把筆

答鵝湖長老紹元示太玄圖

鵝湖有鵝吾不問鵝湖無鵝吾不疑道士須換黃庭經釋子自明太玄辭噫嘻

今此意迴與山陰別我亦曾非逸少爲

新韻曾子進早春

新雷歲旦發聲嚴冰管寒銷細滴簷花甲將看枝上拆蛇鱗不復地中潛黃河  
分派來應早白首歸朝意自恬彊欲擬君爲秀句便無才思似江淹

依韻和馬都官齊少卿酬和

同時沈宋稱二豪曾說龍門奪錦袍我對前流接清唱泰山輕重於鴻毛

贈江寧王高士

自古江南風俗美喜君高趣慕先賢藥無遠近寧論報家有圖書不計錢已住  
秦淮借風月遍尋吳國舊山川塵纓我繫未能解每一來過駐畫船

答蕭淵少府卷

君先大夫臨終時夢中嘗賦曉寒歌騎龍跨魚不是誕直對上帝傳吟哦才如  
李賀天亦少宜其在此尤難多文章父子不相似君今平易祖襲那錮鐵錦褰  
各有用高下安得與等科大都精意與俗近筆力驅駕能逶迤野雉五色且非

鳳知時善鳴雞若何

答孫直言都官卷

具深相割啗不如無勇人以詩而酬詩徒用多少均我言雖至簡意切誰見親  
汲井欲到深磨鑑欲盡塵寒泉與青銅光潔靡故新臨觴報嘉貺醉語是天真

依韻王司封寶臣答卷

王家再見仲宣詩魚目盈車換斗璣自媿不從靈蚌吐誰教相並夜蟾飛暫增  
光價千金重終覺枯陳一芥微已屈至珍來彈雀恩蛇銜報此能希

高士王君歸建業

風雨起春寒乘潮曉帆送目看瓜步雲心近茅家洞忽覺柳已青來時枝尙凍  
羨爾向江南正開新釀甕

呂寺丞家膳

春雨薄無泥野苗青入俎深堂開畫圖飛鳥驚寒渚名筆今寂寥嘉賓競推許  
主人何太勤不異具雞黍

趙祕校見訪

文學儒家子儒本通天人  
蟪蛄尚先喜吾黨何迷津津  
亭一相過不笑復不嘖  
應此識恬泊曾匪慢爾賓

答張令卷

嘗聞甥似舅似舅詩尤少  
古意得河源新聲變春鳥  
讀之不敢倦十未能一曉  
顛倒文字間使吾心擾擾

依韻答泰州王道粹學士見寄

君同黃鵠游海嶠我學白雲歸  
帝鄉已愛健翅自鼓舞誰憐孤影  
猶飄揚安得相從在霄漢  
于今留滯嗟繫韉欲隨輕風挹君袂  
滿野春雨生迷茫

依韻和孫浦二都官展墓由大明精舍而歸

新松煙翠入衣巾  
雨後岡原不起塵  
霜露悲懷今正切  
曾非結客去尋春  
拜壘忽生寒食心  
應緣春入感啼禽  
淚霑宿草根仍凍  
馬立荒沙跡已深  
野老輟耕風料峭  
山房開晝日陰森  
歸鞍却望原頭路  
冪歷輕煙物景沈

張聖民席上聽張令彈琴

一聽履霜霜滿足再聽綠水聲緣谷我行日月  
春波嫩苔沙雨侵魚目漁歌  
晚唱泛水來天浸滄浪光可掬坐中此意自絃生中郎五弄人難熟  
人知難熟  
獨善彈彈拍未終脂駕速鄭衛古來多喜聞卒章爲我歌淇澳

時聖民赴齊少卿家會

走筆送王琪

江南二月草青青送子歸時已滿汀誰信而今有忠義祇知七日哭秦廷

宣司理餉蒸鵝

昔年相國籠之贈今日參軍饌以蒸一咀肥甘酬短句定應無復謗言興

宛陵先生文集卷第四十五

珍做宋版印

宛陵先生文集卷第四十六

依韻和許待制春雪

密雪犯陽和寒階覆短莎  
條牙摧不展鳥舌噤應多變  
令已爲失易消如未苛  
桃花禹門水早晚見通波

送廣西提刑潘比部

伯恭

白麻新拜大丞相黃紙首除南省郎  
欲使平刑安遠俗莫辭乘傳歷炎荒  
桂林地險通椎髻陽朔峯奇削劍銜  
自有王門舊勳業且須稀作上書囊

大明寺平山堂

陸羽烹茶處爲堂備宴娛  
岡形來自蜀山色去連吳  
毫髮開明鏡陰晴改畫圖  
翰林能憶否此景大梁無

次韻和王平甫見寄

尊王與霸國古莫重齊桓仲尼書  
大法亦莫重更端文章革浮澆近世無  
如韓健筆走霹靂龍蛇奮潛蟠颺風何  
端倪鼓蕩巨浸瀾明珠及百怪容畜知曠寬

其後漸衰微餘襲猶未彈我朝三四公合力興憤歎幸時構明堂願爲櫨與欒  
期琢宗廟器願備次玉珩謝公唱西都予預歐尹觀乃復元和盛一變誰爲難  
行將三十載衣被劇織紉後生喜成功往往舞朱干君家兄弟賢挺拔尤堅完  
譬彼登泰山孰辨雲徑盤忽在高高巔兩腋猶插翰我久知子名曾未接子歡  
前者和君詩薄言慚兒肝淮南喜子來袖刺字未漫明日聞渡江留書特相安  
今又獲嘉辭至味非鹹酸

依韻和丁元珍見寄

我從江南來挂席江上正輕舟自行速不與風力競乃省少時學彊勉無佳興  
初如弄機杼未解布絲經利器昧其持或反授人柄及親賢豪游所尙志已定  
不厭朝市喧不須山林靜不爲煦煦妍不爲巖巖冰遇物理自暢區處劇操令  
仍類楚野筠忽從孤根迸便成翠琅玕久與風霜硬雖然達吾真誰復究畢竟  
世間忘坦塗盡欲求密徑哂我是 疎宜乎今蹭蹬蹭蹬誠可嗟所偶亦已併  
晚逢二三友喜飲恨多病道路何遭迴季秋越春孟平生景慕者邂逅出天幸

接迹猶謂榮況此聲顏並實慚寡時用又顧無奇行愛之不忍去自旦還至暝  
在昔濁世賢徒知清酒聖但用醉爲娛一老少不更稍思桃源人翻爾乘魚艇  
尋花逐水往豈念衰與盛歌謳非俗情山響自答應以此謝君勤微言期略聽  
袞袞不足爲試共幽人評

泰州王學士寄車螯蛤蜊

車螯與月蛤寄自海陵郡謂我抱餘醒江都多美醞老來飲不滿一醉已關分  
甘鮮雖所嗜易飫亦莫問嬌女巧收殼燕脂合眉暈貧奩無金玉狼籍生恚忿  
妻孥喜食之婢妾困埽拚行當至京華耳目飽塵坌此味爽口難書爲厭者訓

張聖民席上賦紅梅

吾家有嘉樹紅藥開朝霧笑杏少清香鄙梅多俗趣江都別乘居似見句溪圃  
坐中勿苦疑結子看春暮

平山堂雜言

蕪城之北大明寺闢堂開爽趣廣而意麾歐陽公經始曰平山山之迤邐蒼翠

隔大江天清日明了了見峯嶺已勝謝朓齷齷遠視於一窗亦笑煬帝造樓摘  
星放螢火錦帆落檣旗建杠我今乃來偶同二三友得句欲霜鐘撞却思公之  
文字世莫雙舉酒一使長咽慢肌高揭鼓笛腔萬古有作心曾降

自感二首

左目忽昏花愁心亂劇麻文書都莫見藥物近憑他眸子終何似形軀且願嘉  
唯期一開泰再望日中雅

我不嫌髭白白髭何自落雖然失醜衰將恐日疎薄有生無不老歲事看秋籜  
一身憂已大毫髮誰能度 二月二十八日

依韻和孫都官河上寫望

河上風煙愛此邦吳艘越舸不相降魚鯉轟轟橋邊市花暗深深竹裏窗蹴踘  
漸知寒食近鞦韆將立小鬟雙年光取次須偷賞何用功名節與幢

依韻和試筆偶書

洗硯開書几拈毫喜子巢不爲微物撓自向小欄敲已逐游絲末還緣翠葉梢

因知生理大不必在重文

和張民朝謁建隆寺二次用寫望試筆韻

荒臺殘壘舊名邦  
曾說王師此受降  
西漢衣冠拜原廟  
五天龍象護經窗  
蜀岡井味人猶品  
隋帝宮基闕尙雙  
自古興亡不須問  
風鈴閑聽響幡幢  
躍馬侵星去啼雅  
未出巢春裘風易裂  
從騎鐙相敲紅日  
雙行柳黃金一抹梢  
乾坤功力大默誦  
易中爻

依韻和許待制後園宴賓

春來無處不幽芳  
誰復樽前歎異鄉  
繞榻綺羅觀舊豔  
傍池桃杏照新妝  
柳條拂拂牽絲嫩  
蕊粉輕輕落酒香  
聞道主公偏愛客  
翻思當日醉莎場

宛丘城頭有莎場

淄公每飲於其間

依韻和許待制偶書

曉雨射船珠瀉盤  
平明水上舞英殘  
鬪雞蹠惡輕泥濕  
調馬蹄翻軟土乾  
深屋燕巢將欲補  
密房蠶蟻尙憂寒  
爲言楚客甘蔬藪  
白芷香牙長嫩珊

閨思

望日赤如橘游梁音信稀  
愁心常似醉春絮等閑飛  
江鱖看將爛芹牙吐尚微  
何時憑燕子寄取錦書歸

代書寄王道粹學士

已具扁舟訪使君忽逢春雨起  
淮濱花寒蛺蝶猶相守  
水冷鴛鴦不暫分  
況約他時來寄蹟何須今日去  
論文解裝無復山陰興  
且對荆釵與布裙

依韻和許待制病起偶書

桐柳陰陰翠色參  
幔房深邃靜於巖  
疾疑不是因蛇影  
方秘曾傳白玉函  
煉蜜有時蜂競至  
墜羶無數蟻來銜  
女奚困觸屏風響  
林鳥飢尋蠹木鷓趨吏喜聞  
開便閣舞姬排北翦  
春衫嘉賓入幕金樽抹  
賀客衝風席帽攙  
談出古人非騁辯  
詩成王化不言讒  
提綱勿用銖銖較  
列局緣從物物豎  
龍腦篆香盤屈曲  
虎頭彫枕剔空嵌  
年踰五十惟耽易  
能格神明莫若誠

依韻和孫待制新栽竹

斲破煙叢帶筍移映軒臨檻特爲宜龍孫已見多奇節鳳實新生入翠枝不向  
阮家林下集還思渭北水邊窺一花一草公休詠慣作蘭臺侍從詩

依韻和戲題

揚州太守重交情我欲西歸未得行寒食尙賒花水近妻孥煎去到天明

依韻和孫待制春日偶書

甕面春醅壓嫩藍盤中鵝炙亦肥甘正宜醉夢輕爲蝶苦怕酬詩密似蠶病起  
羊公方隱几歸來陶令只乘籃河隄古木欣欣暗野水新秧拍拍渰已向官資  
隨分足莫將忠憤等閒談況於世上諸般厭不作人間一例貪陋巷自知當退  
縮擁門誰解更趨參高低趨向難爲合冷暖情懷固飽諳勉意妻兒猶苟祿彊  
顏冠冕未抽簪唯公恩遇留連久頻對樽罍也負慚

依韻和禁煙近事之什

狂風暴雨已頻過近水棠梨著未多窈窕踏歌相把袂輕浮賭勝各飛墮閑牽  
白日游絲颺細鷲黃金舞帶拖小苑芳菲花鬪蕊華堂嘲哢燕爭窠西州駿馬

頭如剝南國佳人頸似瑳結客追隨傾畫榼分朋游樂藉青莎鞦韆競打遺鈿  
翠芍藥將開翦纈羅我病乞求新火灸無心更聽竹枝歌

依韻和春日見示

春雨嬾從年少狂一生憔悴爲詩忙不能屑屑隨時輩亦恥區區憶故鄉白玉  
笛聲親府席六么花拍動衣香龍咽嘹唳留行月鳳翼趨蹌巧定場粉色酒容  
歡四座花光燭影照西牆虛榮浪貴知多少安得知君展肺腸

依韻和偶書相留

在昔有言無不讎故於嘉詠豈宜休出奇吳國將能戰探隱漢宮人戲鬪吹笛  
夢來猶記曲愛歌老去未忘謳車中變服爲秦客頭上南冠學楚囚日永歡呼  
遺搏齒夜深談論廢更籌海陵已有從游約今欲西歸且榜舟

讀邵不疑學士詩卷杜挺之忽來因出示之且伏高致輒書一時之語  
以奉呈

作詩無古今唯造平澹難譬身有兩目瞭然瞻視端邵南有遺風源流應未殫

所得六十章小大珠落槃光彩若明月射我枕席寒  
含香視草郎下馬一借觀  
既觀坐長歎復想李杜韓願執戈與戟生死事將壇

送寧鄉令張沆

長沙過洞庭水泊風搖釘青山接夸蠻白晝鳴鶉鷄  
竹存帝女啼夔學林雍鑿  
不嫌卑濕往教令民須聽

依許待制送行詩韻詠燕以寄

江燕銜泥日深堂拂玉琴不教關閣戶乃見主人心  
掠水飛殊捷迎風去已禁  
短書猶可記聊影託微吟

依韻和酬邵不疑見答

君才若巨賈既富仍深藏遂兼碌碌貧共處安可量  
滔滔大澤陂渺漫入幽荒  
徒欲窮端倪憑高何相望一日以文繡被此糞土牆  
門徒三千人起予唯卜商  
薄言昧纖悉懷憂思萱忘美璞委雕琢以未知我祥  
但念故時朋所樂來遠方  
慎勿以名使取敗非相當

贈張伯益

張伯益風義自足常遊遨醉彈琵琶聲嘈嘈雷車急輓蛟龍號曲終放撥解紫  
條勇氣索筆作小篆李斯復出秦碑高不數宣王石鼓文快健欲敵橫磨刀奕  
棋絲桐且置之衆善多取精神勞

依韻和邵不疑以雨止烹茶觀畫聽琴之會

彈琴閱古畫煮茗仍有期一夕風雨來目喜農畝滋中河不阻澀舟楫亦所宜  
況聞新疾愈當與嗜好睽何須顧小約豈不有他時澹泊全精神老氏吾將師  
幸因答來章敢不以此咨此咨有深理願君勤且思

依韻和不疑寄杜挺之以病雨止冷淘會

邵杜二良守相逢欲霑醉促膝一開顏袞袞言有味或歎季路宜或語伯夷是  
各懷忠義心要終豈同異我實疎賤軀政治未使試預茲高古談懦志生勇氣  
明當饌湯餅疾雨晦天地一日不見君何止如三歲口腹尙乖期榮華可推類  
嗟嗟勿復問安恬固無媿

獨酌偶作

東路歸梁嬾黃流下汴深眼穿南去翼耳冷北來音風雨昏斜日乾坤入醉吟  
不憂貧且老自有伯鸞心

答杜挺之遺鰕魚乾

百年蠹柳根半浮揭屋顛風吹欲倒寸步泥深登岸難鰕乾助飲鄰船老

宛陵先生文集卷第四十六



宛陵先生文集卷第四十七

觀邵不疑學士所藏名書古畫

野性好書畫無力能自致每遇高趣人常許出以視邵侯多奇玩留我特開筭

首觀阮與杜驢上瞑目醉

阮籍  
杜甫

韓幹貌四馬臨流解鞍轡花驄照夜白正側各

畜意繫衣穿袴鞵坐立皆廢吏精神宛如生于顛復穿鼻梅雞徐熙花竹間寒

雀睡逸少自寫真對鏡絕相類數本失姓名古胡并老驥山水樹石硬荆關藝

能至

荆皓  
關種

巨然李成者落筆愈奇異人物張僧繇雖傳恐非是其餘又莫究模

搭似未備周秦已來書行草楷篆隸聲名舊烜赫一一果可喜邵侯愛我曹咸

使紙尾記况侯有古學小字刻珉翠各贈墨本歸懷寶誰肯忘

先至山陽懷杜挺之

與君同川塗舟發偶後先順風吹我帆已過飛鳥前寄聲託飛鳥微意或可傳  
定逢檣上鳥暫向彼留連薄暮楚城下踟躕問來船

絕句五首

風過已午未肯正酒病嬰我心無慘船頭拍翅野鴨浴水上擺子鯨魚跳  
岸邊穉子戲把釣蚯蚓作餌青條長上去下來船不定自飛自語燕爭忙  
夜欲三更飢鼠鬪燈殘一點小星紅邨邊坎坎賽神鼓船底桴桴駕浪風  
葑田青灰博弈局島樹墨楹煙雨圖已去揚州百餘里回頭還隔幾重湖  
蝦蟆號沫爲科斗螺贏銜蟲化細腰蠹穴荒陂有多少乾風濕雨各飛跳

淮南轉運李學士君錫示卷

李時世能詩落落爲時豪漢陵唐太白始競二雅高益端正封賀才各傾吳濤  
于今幾代孫手持切玉刀功利旣及民又將薄風騷示我照乘珠光彩生褐袍  
曾非貧家有懷歸徒增勞神物必難祕恐隨風雨逃

觀王氏書

先觀雍姬舞六么妍葩發豔春風搖舞罷英英書大字玉指握管濃雲飄風馳  
兩驟起變怪文繅晝飛明珠跳席客聚立驚且歎筆何勁健人柔天昔時裴旻  
能劍舞丹青助氣精神超藝雖不同意有會世事相假非一朝

書二客論呈李君錫學士

我慕杜挺之磊落高世談又愛王平甫才雄天馬驂二人相議平最重李淮南  
踈跂文館彥委曲部政諳能蘇煮海民變使供租甘雖持使者權不作自裹蠶  
諄諄無威傲雍雍激廉貪書戒易滿人縱愚須起慚始時邊海鹽亭民常官逋其錢往往給腐米爲直弃  
之而去浸久亭民無本多逃者今俾中戶就邑納租給亭民民乃大利逃者復還

留別李君錫學士

淮南尙喜風流在客有殷勤載酒過不醉不歸情可見相看相笑意如何瞭眸  
自解持高論長頸稀逢缺善歌舊愛陽關亦休唱西還從此故人多

過山陽水陸院智洪上人房

有蘇子美墨蹟

十載七來此每嗟多異今池灰休辨劫川月解明心遺墨悲蘇倩高情想遁林  
能閑常似舊翹立水邊禽

淮陰侯

功旣高天下身何不自防已能成漢業無復假齊王復恥噲爲伍安知呂所忘

空名流未竭淮水共湯湯

閏三月八日淮上遇風杜挺之先至洪澤遣人來迎

曉出淮口時夜來風已止半路逢怒號客心愁欲死忠信雖可仗魚鼈將異此  
但慕前行舟漸入孤汊裏猶能有餘力遣助良可喜

宿洪澤

舟子起添纜夜潮同雨來寒聲相亂急遠夢自然迴水鳥鳴還睡風燈暗復開  
宦游嘗作客未息爲貧催

泗州郡圃四照堂

官艫客編滿淮汴車馳馬驟無閑時豈有餘力事棟宇後園荒草長離離朱侯  
下車百職舉亦治宴豆頻遊嬉梁冠爵弁各得禮道路溢譽亡高卑因隙作堂  
名四照虛光轉納娥與羲面面懸窗夾花藥春英秋蕊冬竹枝射棚寬闊習武  
事鏡沼清淺吹文漪侯之此意寧自樂夷情勞士俱忘疲後來出口勤灑掃莫  
作廢埽生蒿藜

泗守朱表臣都官荆北園

樹藝北壕上直對高城陰使君朱輪來歌管樽酒深風雷生淮雨雲物冒楚岑  
戰初習追逐飛凌捷水禽不獨耳目觀乃見預禦心事閑賓從樂景美臺榭臨  
今人忘羈旅灑慮起微吟

依韻和誠之淮上相遇

一別逋翁久不逢亦知諸葛臥龍中幾年三致千金富今日重追二謝風形槁  
已能同散木鬢霜從聽著寒篷飛光入酒舊時月來照狂歌猶未窮

泗州觀唐氏書

唐氏能書十載聞誰教精絕向紅裙百金買書蒲葵扇不必更求王右軍

同朱表臣及諸君游樊氏園

五年前上去乃從許公過舊物此君在後生新筍多朱櫻繁且熟黃鳥啄仍歌  
一一如當日乘高奈興何

七里灣得朱表臣寄千葉樓子鬢子芍藥

誰稱爲近侍宜與牡丹尊霞綵千千葉香撩黯黯魂紅樓思俠少寶髻奉王孫  
賸插不堪照顏衰汴水渾

併日得朱表臣酪及櫻桃

昨日酪將熟今朝櫻可餐紫莼休定價黃鳥未新殘甘滑已相美齒牙仍尙完  
應知消客熱遠贈益盈盤

阻淺挺之平甫來飲

泛淮忘水大我行浩以漫沂汴忘水淺我行幾以乾偶與困滯并將獨爲此難  
窮隄有來客芬芳可與言共休綠榆陰置酒聊慰安主人雖倉卒猶得具甘酸  
酸漬楚梅青甘摘夏櫻丹引觴吞日光耳熱不復歎俛仰已陳迹未可忘茲歡  
誰思費生術幻惑寧盤桓

依韻和表臣奎野亭

淮光抱城去山翠落樽前魯叟欲浮海楚人休問天野雲將拂幔水鳥不驚船  
歷覽誰能賦今聞太守賢

依韻和表臣先春亭

雜花紅間白遠樹短參長天近春歸疾城高地易涼千尋浮遠水五兩動連檣  
置酒未終樂山煙生暝隍

和表臣河南庾署西軒

飛鳥欲下蟾生時斜光冷魄常相隨右山左水清洗目虀簷曲檻生揚眉白魚  
甘肥網可得公酒美滑杯可持臨淮使君有閑佚長橋直度來莫遲

依韻和表臣見贈

中間會與別不啻二十年向來君之官我必贈以篇今過臨淮郡惠好情聯聯  
訪我車騎都宴我鶯花然此當舟航衝旅泊逾百千迓高而撫下酒壺櫃食連  
使予一日爲立可見華顛遽行恐勞君數里不得前三月汴水淺蹇滯無我先  
君乃遺我詩盛稱我爲賢比之少陵豪望我何太全又令人時用目堪事高眠  
安能事孔聖終學美周宣勤答以明懷矢辭敢欺天

依韻和表臣聞與挺之宣叔平甫飲

舟淺不能進反羨車馬馳同行各在野有酒相與期隄上聞禽處桑間落日時

使君羊筍贈更飲更追隨表臣是日送蒸羊筍束

表臣惠蜀牋借玉硯池

蜀牋珉硯池為贈知雅故慚無右軍書亦乏左思賦環水象辟雍紋花如織素

願傳君德政况已聞行路

表臣以阻水見勉次其韻

野叟津難問賢人酒不空行吟同去國退翼欲乘風憂已先天下窮方坐井中

予生一如此安得免衰翁

聞宣叔挺之圍棋

人以棋銷日我觀棋輒寐未必盡死生何茲較愚智只將多勝少復取生為利

不若酒之賢悠然共醒醉

五情篇奏方響琵琶

倩然五蛾眉妙曲動金絃犀椎玉鈴鈴龍撥雷鞀鞀響急能愈靜意閑情常專

主人昔結客一醉百金捐觀濤來吳都遇我泗水邊夜飲向明月非同聞鄰船

釋悶

呈挺之  
平甫

燕丹未歸馬未角卜子抱玉無兩脚孤城食盡兵未却度竿中懷挂一索我輩  
於此酒宜酌百歲千秋奈何樂

釋滯

帝在蒼梧妃泣竹蘇武餐毛海西曲窮山遠道車折軸深井渴汲綆不續我輩  
於此酒正綠貴無奈何歡且足

依韻和表臣憶遊竹園山寺

山攜謝公妓竹似阮家林花發日初暖鳥啼春欲深朱櫻連葉摘綠酒帶醅斟  
猶想聞歌吹僧房未暇吟

依韻和挺之晨起見寄

時阻  
汴淺

淺水不堪泛暗灘時激聲晨都望迢遞窮旅思屏營芳草同誰藉投壺自喚名  
得君晨起詠遠遠見交情

李宣叔祕丞遺川牋及粉紙二軸

蜀人擣玉屑楚客調金粉製牋君有贈草疏我無蘊宜書揚雄辭莫寫屈原憤  
誰識此意微曾非事搖吻

錢志道推官遺紗帽

遠贈烏紗帽能無白也詩山花不更插野客莫驚窺

次韻和表臣惠符離去歲重醞酒時與杜挺之李宣叔王平甫飲於阻  
水仍有筍醬之遺

贈以榴花酒沉清貴隔年不憂航滯積爲汎瓊如船加品盈盤內無花到眼前  
還招李杜醉野釀莫稱賢

表臣齋中閱畫而飲

嘗觀韓幹馬人物亦如生君收四病骨無肉只崢嶸二匹痒磨樹二匹縱其情  
意思若不任千里未可行古絹蠹已盡彩色無精明歎惜傳至此幾人金帛輕  
隋時有名筆獨寫嚴君平猶持杖頭錢罷肆心莫營魁然中貴人坐榻不知名

畫中有畫屏山石侔天成今時長沙叟獼猴榭林橫疏毛與設色前代何角爭  
餘存品雖高我未易敢評主人愈好事緘筭酒壺傾

寄送許待制知越州

喜公新拜會稽章五月平湖鏡水光菡萏花迎金板舫葡萄酒瀉玉壺漿雲歸  
秦望山頭靜雨洗若邪溪上涼天子不能煩侍從可將吟詠報時康

依韻和王司封離白沙塗中感懷

淮雨夜飛氛浸銷星纏歷歷轉隨杓黃童謾對日如月賈誼休悲鵬似鴉市骨  
已知求駿馬韜車何用載田驕不唯忠憤心如此王佐才高賦小鷄

將赴表臣會呈杜挺之

莫怪去遲遲予心君亦知膝前嬌小女眼底寧馨兒學語渠渠問牽裳步步隨  
出門雖不遠情愛未能移

醉中和王平甫

用其韻

王瓜未赤方牽蔓李子纔青已近樽我最年高雜年少風流還有杜陵孫

將解舟走筆呈表臣

昨夜謳吟瀉春酒今朝波浪下黃河主人不暇怱怱別爲倩流鶯寄語過

答再和

舟行纔及二三里已復淺流如凍河君有短書誰遠寄時因燕子拂檣過

非意篇呈表臣

人言廚傳繁乃是郡久例一日苟不脩未免衆吠睨飽尚謗所興飢必愠不細損之禮漸墮存之禮未替心莫忽賤微義莫徇貴勢我將取是然敢以爲君計

依韻和錢深推官見寄

無才不敢學陽秋嗜酒時能問大酋前日偶從河上飲文章何可並英遊

依韻答宣叔行舟相隔見寄

汴漲濺濺費挽牽輕舟難若上青天只知乘駛及先去不意遲留落那邊

力漕篇呈發運王司封寶臣

兵外肢強兵內體壯斂之盡歸歲以多餉東南軸艫銜尾而上浮江浮淮汴汴

之湍汴湍不常水衡不官惟虞溢毀靡虞舟槃舟槃糧覆糧孰爲足大計之數  
萬百惟六帛幣錯貨三倍其穀曰主厥漕王之蓋臣日憂河涸運智煩神以舫  
實土約流東津百步之間若牙與齧朝漲夕降滯舸次鱗亟乞于朝朝不卽報  
下上經營風并日曝其躬其勤秉心有操士豈無祿視此則冒彼以榮佚此以  
劬耗願答其劬錫命錫誥

四月十三日唐店寄錢推官

昨夜月如水君能攜酒來破除愁悶去洗蕩肺腸開露氣林間落河聲地底迴  
相知不須早語合自無猜

徒步訪李宣叔宣叔有詩依韻答

渡河誰道去我重子雲才鴻鴈汀洲去牛羊井落徠乍行初覺倦暫語不能該  
日色看看暮將歸意復徊

答高判官知唐君夜飲

露宿勤王客相從月下來黃流何日漲綠酒暫時開風定燈花爛天高斗柄迴

醉言多脫略吾黨不須猜

宛陵先生文集卷第四十七

宛陵先生文集卷第四十八

依韻和劉原甫舍人赴揚州塗次贈予翩翩河中船

我船緩而西君船迅而東緩迅各所向不意中路逢驥馬方騰雲野鶴還就籠  
亦言出處異同是天地中我豈不知命人空嗟其窮何當遂逸性川上作釣翁  
聞禽  
禽鳴脫破袴定無新易故此語莫相譏善貧知有素

表臣都官至十三里店

風雨催車騎駸駸來自南道傍有茅屋寧容使君驂不謂忽下馬溼衣逢我談  
田家已刈楚田婦正好蠶既將國漕急復與民事諳他年此茅屋便比棠樹甘  
泊徐城寄杜挺之王平甫

十里五里一值淺千愁萬愁過徐城王君論與河流阻杜老談思月色清岸若  
屹牆空自面樹如張蓋欲誰傾二人黨及親朝夕更晚更遲何計程

至第四鋪二首

第四鋪前風雨急搭河過盡不憂灘却愁蓬溺空征棹始信人間行路難  
輕舟已過第四鋪憶著陽關末尾聲悵悵杜公行底急白醪何處得同傾

倡姬歎

萬錢買爾身千錢買爾笑老笑空媚人笑死人不要

過青陽驛使風

天應憐逆旅乞與順風初不假卒添力任從帆自疎燕攙舟尾健鷁激水花餘  
會與王都近何須問疾徐

蠅

乘炎出何許人意以微看怒劍休追逐疑屏漫指彈與蚊更晝夜共蜜上杯盤  
自有堅冰在能令畏不難

蟬

柳上一聲蟬沙頭千里船行經朝雨後思亂暑風前物趣時時改人情忽忽遷  
感新猶感舊更復幾多年

鶯

綠柳陰猶薄黃鸝轉已清  
年年舟上客處處樹頭聲  
髣髴佳人語依稀太子笙  
夕陽聽不足飛入舊荒城

雞

昂然大雄鷄高冠紫沉羽  
星占太史局樹棲丞相府  
知時不失晦得食曾呼伍  
幸無終夜鳴須防人起舞

鶴

何時別遼海俛啄雜庭鷗  
去作仙人駕來乘衛國軒  
雲中晴引唳松上舊能言  
俱說長千歲予非學羨門

挑燈杖

油燈方照夜此物用能行  
焦首終無悔橫身爲發明  
盡心常欲曉委地始知輕  
若比飄飄梗何邀世上名

蛙

宛陵

集

卷四十八

一一中華書局聚

陂蛙怒目生科斗亦縱橫自得君王揖能爲鼓吹聲越人嘗入饌秦客不須驚  
誰解緣明月徒誇兩股輕

鳩

一世爲巢拙長年與鵲爭欲知雲脚雨先向屋頭鳴頸上玉花碎臆前檀粉輕  
何時將刻杖扶助老夫行

蚊

向晚化污積羣飛來戶庭螭螟許巢睫琥珀爲留形夜色徧容蔽雷音亦感聽  
猶矜負山力血食也露醒

鹿

羣處空山中跡在深松下周穆得同狼秦人指爲馬驚顧遠世網脫質去田野  
誰思充股脩自是全無者

犬

常隨輕騎獵不獨朱門守鷹前任指蹤雪下還狂走人思上蔡遲書寄華亭後

莫將呼作龍梁肉纔經口

豕

司原豢俗豨日見容陰昵喜比爲白麟惟憂不豐溢烈颯澤兩作真聲向人出  
司原悔何由肝膽空駭慄

蛟

橋邊三尺劍江上六鈞弧漢武帝何處周將軍已無織綃深有室泣淚自爲珠  
誰爲九淵害人猶能爾圖

兔

迷蹤在塵土衣褐戀蓬蒿有狡誰窮穴中書惜拔毫獵從原上脫靈向月邊逃  
死作功勳戒良弓合自戮

魚

洛水美頰鯉入河西去時三春登玉浪一日到天池垂釣豈容羨小鱗應莫隨  
腹中無匕首已不助吳兒

龜

玉府有寶龜名存骨未朽初爲清江使因落豫且手白玉刻佩章黃金鑄印紐  
辭聘彼莊生曳塗誠自有

鰕

自生江海涯小大形拳曲宮簾織以鬚水母憑爲目貴將蔽其私賤用資不足  
於物豈無助况能參鼎肉

至靈璧鎮於許供奉處得杜挺之書及詩

去冬過尋歷陽守江沙半遮當利口口頭沙蹙浪如山浦溆排舟魚貫柳却畏  
浪高難苦留聞解符來時不久平明挂席入揚州主人釀成百斛酒酒上玉蛆  
如笑花一日倒空罌與缶主人亦欲君舊友請我遲君同此首清明君果渡江  
至與君繼舳曾無負過淮風緊到洪澤使人助我如臂肘暮春泝汴汴流澀自  
假輕航去如走千憂萬阻經靈璧留書津吏情何厚副之佳句二十言文昌光  
芒夜侵斗平時相恤以此稀緩急求之更難有風牽月挽望符離水館野亭能

駐不葛巾輕服約登步葱臙冷淘誇甚滄書中不說王平甫應又先行君在後  
我今趁君君趁王趁入大梁須執手

永城杜寺丞大年暮春白杏花

孤素發殘枝非關比衆遲殷勤勝菖葉重疊爲農時

午日三首

有酒不病飲况無菖蒲根空懷楚風俗角黍弔沉魂  
佳人五色縷道士絳囊符瘦臂不中繫百邪何用驅  
百草堪爲藥舟行不及收岸傍蕭與艾從聽到寒休

晚得菖蒲

薄暮得菖蒲猶勝竟日無我焉能免俗三揖向樽壺

祭猫

自有五白猫鼠不侵我書今朝五白死祭與飯與魚送之于中河呪爾非爾疎  
昔爾齧一鼠銜鳴遶庭除欲使衆鼠驚意將清我廬一從登舟來舟中同屋居

糗糧雖甚薄免食漏竊餘此實爾有勤有勤勝雞豬世人重驅駕謂不如馬驢  
已矣莫復論爲爾聊欷歔

依韻和酬太師杜相公

衍

相國推心本至平欲揚蕭艾作蘭馨孤根易變終微賤美澤難霑漫晦冥楚客  
嘗聞紉若若王孫誰復顧青青東風已與生成足不敢希冀在帝庭

依韻答僧圓覺早梅

江南自寒苦花不與時同清向三冬足香傳一國中雲湖藏舊市雪樹認新豐  
未有虧冰素隨妝入漢宮

雍丘遇雨

日暮風雨急逆水舟難牽波波入杞國悄悄誰憂天闐闐陂中雷纂纂隄外煙  
驟然沃大熱蒸飶如炊煎飲水徒脹滿渴喉殊未蠲搖篷已煩倦汗額常不乾  
如何一席地長少皆在前衣巾不敢去又以禮數纏安得化巖石兩脛沒流泉  
每暑起此念念之凡幾年終當逐逸志奚必事華顛

廟子灣下作

廟子灣下百尺船杞人楚人相雜牽水底老蜃倚以怪樹頭挂紙吹作錢江蛟  
海鷗千萬里軒風簸日蠻島邊長安舊去天尺五此在大梁眉睫前高冠長劍  
乃不畏沙雨夜起噴腥涎

留侯廟下作

貌如女子心如鐵五世相韓韓已滅家童三百不足使倉海君初去相結秦皇  
東從博浪過力士袖椎同決烈曉入沙中風正昏誤擊副車搜跡絕亡命下邳  
圯上游老父墮履意未別顧謂孺子下取之心始不平終折節舒足既受笑且  
去行及里所還可說可教後當五日來三返其期付書閱他日則爲王者師果  
輔高皇號奇傑留國存祠汴水傍逢逢簫鼓賽肥羊赤松不見天地長黃石共  
葬丘冢荒

高車再過謝永叔內翰

世人重貴不重舊重舊今見歐陽公昨朝喜我都門入高車臨岸進船篷俯躬

拜我禮愈下騶徒竊語音微通我公聲名壓朝右何厚於此瘦老翁笑言啞啞  
似乎昔妻子信說如梁鴻自茲連雨泥沒脛未得謁帝明光宮冒陰履溼就稅  
地親賓未過知巷窮復聞傳呼公又至黃金絡馬聲瓏瓏紙袍寶帶照屋室飲  
水啜茗當清風邀以新詩出古律霜顙屢領搖寒松因嗟近代貴莫比官爲司  
空仍侍中今成冢丘已寂寞文字豈得留無窮以此易彼可勿媿浮榮有若送  
雨虹須臾斷滅不復見唯有明月常當空况我學不爲買祿直欲到死攀軻雄  
一飯足以飽我腹一衣足以飾我躬老雖得職不足顯願與公去歡樂同歡樂  
同治園田潁水東

李審言相招與刁景純周仲章裴如晦馮當世沈文通謝師厚師直會  
開寶塔院

自君命我飲朝暮雨傾瓦城東與城北大道泥沒馬敢忘主人勤顛撲困馭者  
衆客亦如期陳肴藉蘭若馮裴與沈謝辯論過終賈刁周事老成危坐言語寡  
酒半時謹劇揣狀類摹寫或譏項髮禿或指舌端僂或將冠帶身勸作梁武捨

謂我大耳兒此實已見假又效井市態屈強體非雅順風手沙沙逆風口哆哆  
竟席屢絕倒去忌肝膽瀉規規豈無儕達識高天下

送周仲章都官通判湖州

溪水日雪雪弁峯日峨峨中有水精宮此名其謂何湖水傳玉孃揚光遡嫦娥  
昔人美清夜高樓發微歌風流百年餘所歷才彥多我嘗居其下醉舞或傴僂  
君行貳郡事結騎黃金珂容儀苦白晷度橋鳴橐駝士女夾道看秋風吹穀羅  
言是公侯家大體儂弗過問儂底未辨撐船入芰荷應莫勸蠶織生計非杼梭  
依韻答吳安勗大祝

我於文字無一精少學五言希李陵當時巨公特推許便將格律追西京卞和  
無足定抱寶乘驥走行天下老玉已累人馬不逢皇皇何之飢欲倒還思二十  
居洛陽公侯接跡論文章文章自此日怪奇每出一篇爭誦之其鋒雖銳我敢  
犯新語能如夏侯湛于今窮困人已衰不見懸金規呂覽乃遭吾子求琢磋珠  
璣獲斗奈我何

吳沖卿學士以王平甫言淮甸會予予久未至沖卿與平甫作詩見寄  
答之

老馬力盡道路長豈若壯驥思騰驤項窮臨流歎不逝燕骨埋沒庸可傷我今  
六十趨南北飢腸不足面黧黑少年心志一點無千里區區安所得往居閭門  
乏經過閉戶讀書多廢食便從冠帶向仕塗彊顏希祿非貪職昨逢王倩昧平  
生一見如舊心相傾談經樹下任日炙酒狂便欲騎長鯨誰意同行有遲疾先  
入大梁凡幾日大梁故人憐鈍衰迭爲寄唱辭嚴密卒章言買羊與酒雖齒動  
搖能飶溢亦知紅頰教新成更願舊朋邀六七

宛陵先生文集卷第四十八

宛陵先生文集卷第四十九

寄題絳守園池

老柏麝不食古色侵青冥淺沼龍不入秋水生浮萍屋屢圯堊幾太守壁上彪  
蔚遺丹青黑石鐫辭澀如棘今昔往來人不識酸睛欲抉無聲形既不可問不  
可聽懸泉瀉竇晝未停飛玉貯藍光入屏苞潭梁島甲癸丁蔓刺交綴垂組紕  
蒼官屬槐朋在庭風蟲日鳥聲嚶嚶卉葩木果黏枝條集臺脫熱昏疴醒 文  
韓詩怪若是徑取一二傳優伶仍寄河東薛太守更與斟酌無閑局

陸子履見過

劉郎謫去十年歸長樂鐘聲下太微屈指故人無曩日平明騎馬扣吾扉論情  
論舊彈冠少多病多愁飲酒稀猶喜醉翁時一見攀炎附熱莫相譏

重送周都官

水上朱樓畫角鳴濛濛雨裏榜舟輕未逢甫里先生謁多見吳興太守迎荷葉  
半黃蓮子老霜苞微綠橘林明十年不到風煙改君去將詩與畫評

送李載之殿丞赴海州權務

瓜蔓水生風雨多吳船發櫂唱吳歌  
槎從秋漢下應快人憶故園歸奈何  
世事靜思同轉轂物華催老劇飛梭  
茶官到有清閑味海月團團入酒罍

和吳沖卿學士石屏

吳夫子佩銀龜乘天馬素怪奇忽得號略一片石  
其中白色圓如規又有樹與烏畫手雖妙何能為  
吳乃持問歐陽公比公曩獲尤可疑疑不為辨賦以詩  
詩辭粲粲明星垂復遣齋來使我和坐上鉅公旁  
睨之范侯實有揚雄學咸云此理難究推我歸  
滌慮反覆思義雖不經聊解頤月與太陽合朔時  
陽烏飛上桂樹枝枝上作窠生羣兒人不知天公  
天公欲俾世間見影著石面如黏鵝烏既不得  
去月亦不可移留為千古作好玩慎勿傾樸同玉碑

時在唐書局與歐陽永叔王原叔范景仁

會食得所示詩

永叔贈絹二十匹

鳳皇拔羽覈鶉鶉幸脫僵蒿蓬昔公處貧我同困  
我無金玉可助公今公

既貴我尙窘公有縑帛周我窮古來朋儕義亦少子貢不顧顏淵空復聞韓孟  
最相善身仆道路哀妻僮生前曾未獲一飽徒說吟響如秋蟲自驚此贈已過  
足外可畢嫁內禦冬況無杜甫海圖圻天吳且免在褐躬瘦兒兩脛不赤凍病  
婦十指休補縫廚中餒婢喜有望服鮮弃垢必所蒙梁上君子切莫下吾非陳  
寔何爾容

依韻奉和永叔感興五首

泉上有君子齋祠達主誠向來霖雨暴觸處蛟鼉鳴既祈致日出杲杲紓民情  
天子遣以報固匪媚取名因成感興章庶用語平生蹈道久已熟情田不須耕  
既負天下望必憂天下責每聞諫諍辭苦意多矯激心存義勇赤氣與虹霓白  
所論言必從豈若水投石陰邪日已銷事理頗已得莫將經濟術抑鬱向胸臆  
忽驚年齒遲勿歎時節晚寒松翳林麓射干生隴坂野蓬隨飄飄秋實綴纂纂  
萬物更盛衰有益必有損損益皆自然曷增鳧脛短人爲智慮役白髮安得免  
利澤欲及時唯恐不行遠後世豈皆愚計校徒勉勉

日出各馳趨皆爲利所迫秋蟲至微物役役網自織古來高世人林下遺憂責  
扛鼎絕臏者乃自恃以力積金苟如山何異魚貪食

唧唧復唧唧長沙何太息秋風入破衣瘦婦思補刺手中把長線無帛縫不得  
夜夜憂向寒斗柄漸垂北嫁夫欲夫富歡樂要終極歡樂既未能鬢髮霜花易

依韻奉和永叔社日

玉卵不吞龍嗜肉燕子成兒去華屋老櫪半黃田鼓鳴樹下宰平誰似玉茂陵  
常說泣秋風王母惜傳雙鬢綠東方伏日思早歸長飢不及侏儒腹積豕新烹  
白醪熟奮衣地坐無拘束驪山夜寒坑底哭漫把漆書留冢竹

社日飲永叔家

雨未雨濛濛野田擊鼓賽社翁折條跨馬社翁去醉叟臥倒梨葉紅遨頭主人  
邀客飲玉酒新賜蓬萊宮彭宣不預後堂會康成一舉三百鍾更邀明月出海  
底爛醉等是歸蒿蓬

八月十三日觀長星

長星彗雲出天狗欲墮鳴狗掃不見跡昭昭河漢橫河漢秋轉淨箕斗垂光晶  
勸爾長星酒收稜看太平

送李才元學士知邛州

太守車煌煌莫如還故鄉昔登蜀郡籍今得臨邛章過家禮耆舊接境跪壺漿  
寒經道路遠春入山川長俗將樂其化詔亦美其良相如有遺跡誰復酒壚傍

弔仲源

世家吳季子皇籍漢諸孫嚙管行車失虛堂隱几存枝摧從玉樹星隕自天垣  
寧復下貧賤停驂來里門

送梁學士知襄州

騎吹荊州去喬林漢水前鄉亭逢故老牛酒問高年翠巘臨關路黃柑逐賈船  
習家池館在賓從與留連

送薛氏婦歸絳州

在家勸爾勤女功無不喜旣嫁訓爾恭恭己乃遠恥我家本素風百事無有侈

珍傲宋版印  
隨宜具奩箱不陋復不鄙當須記母言夜寐仍夙起慎勿窺窗戶慎勿輒笑毀  
妄非勿較競醜語勿辨理每順舅姑心況逆舅姑耳爲婦若此能乃是儒家子  
看爾十九年門閭未嘗履一朝陟太行悲傷黃河水車徒望何處哭泣動鄰里  
生女不如男天親反由彼

送劉繼鄴秀才歸當塗

鷓鴣始出巢欲矜五色羽乃見郡鴟盤壤中將有取梧桐與竹實安得在平土  
所趣固已殊而何不遠舉幸失網羅目宜還蘭蕙圃故鄉有嘉林其下可以處  
會侍朝陽鳴賀夔成律呂

送裴如晦宰吳江

吳江田有杭杭香春作雪吳江下有鱸鱸肥膾堪切炊杭調橙齋飽食不爲餐  
月從洞庭來光映寒湖凸長橋坐虹背衣濕霜未結四顧無纖雲魚跳明鏡裂  
誰能與子同去若秋鷹掣

送撫州通判袁世弼寺丞

帆疏疏纖綠蒲二十四幅輕江湖高秋逆水上天去朝過瓜步暮濡須長風沙  
頭問鯉魚大孤山側鳴寒鳥魚腹無書報家信憑烏爲到西山區西山松柏應  
更好及取之官來拜掃

送石昌言舍人使匈奴

燕然山北大單于漢家皇帝與璽書持書大夫腰金魚飛龍借馬出國都胡沙  
九月草已枯草上霜花如五銖白裘貂帽著不暖莽莽黃塵車款款野廬邊月  
出隴來風靜天遙鴈聲短聞到剡庭尤苦寒譯言揉耳不譏彈公於是時已觀  
禮踏雪再拜辭可汗

依韻和宋中道觀八月二十八日車駕朝謁景靈宮

都人夾望禁槐傍閭闔初來旭日光彫玉翠鞍牽驪褭盤龍朱輦爛文章焚香  
闕殿開嚴帳汲水寒溝灑廣莊一見天顏萬人喜却迴宮禁樂聲長

度支蘇才翁挽詞二首

子美同葬

二十識君貌交游非一朝魄光沉碧海志業隕青霄洛客舊爲社楚人今作招

素車京峴路應不似蕉嶢

盛世雖多士唯公與衆殊高才飛健鶻逸句吐明珠未入周官采爭持楚璞模  
莫悲泉骨朽青史見賢愚

自昔愛春物樽深眼底紅日斜花在落身醉客西東歿歎千年隔生悲百事空  
君嘗知此理不悞學陶公

重送袁世弼

臨川內史謝康樂貝葉翻經有故臺春草生塘猶夢句秋蕖出水似君才  
駮雞肥脆聊供膳篤酒甘濃可薦杯亦說右軍遺蹟在墨池科斗喜風雷

留題景德寺吉祥講僧

我講異爾講我書非爾書彼將希白馬此亦猶大車皆行國都內轍不入委閭  
世人日擾擾來慕清涼居

閤門水

朝堂嘉祐元年九月九日宿齋  
歐陽永叔張叔之孫之翰命賦

宮井固非一獨傳甘與清釀成光祿酒調作太官羹上舍銀餅貯齋廬玉茗烹

相如方病渴空聽轆轤聲

朝堂宿齋

玉屬陪祠日宮廬寓宿時鍾來建章遠月過羽林遲寒入青綾被風牽翠鳳旗  
賈生誰復召安問鬼神爲

送杜挺之郎中知虔州

大庾嶺邊無臘雪惟有梅花與明月月光如水來向人太守得閑杯耳熱吹香  
入酒望梁宋正是苦寒絲可折亦當念君君行南南方無冰地不裂此身不到  
五侯門肥羔釀酒槐槽咽玉色少年生頰春解笑吟腸冷如鐵衝風冒霰入廣  
文老與諸生開反切重嗟君遠隔江湖雖得豐甘牙已缺官娥執樂一千指脩  
頸慢肌衣錯纈定逢賓客彊排姪舞徹六幺紅袖掣人競羨君君愈疲夜歸坐  
閣思予說

送吳辯叔知鞏縣

言爲西邑宰本是洛陽人送驛往歸魏迎車來入秦山川成鞏固陵廟壯威神

好學河陽政栽花作縣春

當世家觀畫

冰蠶吐絲織織紈妙娥貌

入聲

玉輕邯鄲曲眉淺臉鵝髮盤白角瑩薄垂肩冠銅

青羅衫日月團紅裙撮暈朝霞乾手中把筆書小字字以通情形以觀形隨畫

去能長好歲年年應不老相逢熟識眼生春重伴忘憂作萱草

送韓僉判玉汝還南京

持賀大禮表

天子甘泉祀歡聲浹九圍綠章馳騎入朱服佩魚歸賦雪上賓席買鬟更舞衣

清池無限鴈莫道信音稀

宛陵先生文集卷第四十九

宛陵先生文集卷第五十

桃花源詩

并序

嘉祐元年予在京師邂逅與都官員外郎張侯顥遇于書肆中張語往時相識於唐俞家今二十三年矣因各言出處張曰實居武陵武陵舊蹟可具道始時陶潛爲記與詩其後往往賦詠不絕君之仲父昔嘗有作聞君能詩多爲公卿大夫諷誦願得一章夸咤遠土亦當買石刊置巖下旣重其意許其錄幼時所爲五言歸閱故稿則頗不愜心遂別爲一章以塞張侯之請

鹿爲馬龍爲蛇鳳皇避羅麟避置天下逃難不知數入海居巖皆是家武陵源中深隱人共將雞犬栽桃花花開記春不記歲金椎自劫博浪沙亦殊商顏采芝草唯與少長親胡麻豈意異時漁者入各各因問人閒賒秦已非秦孰爲漢奚論魏晉如割瓜英雄滅盡有石闕智惠屏去無年華俗骨思歸一相送慎勿與世言雲霞出洞沿溪夢寐覺物景都失同迴槎心寄草樹欲復往山幽水亂尋無涯

永叔席上分韻送裴如晦

得黯字

霜華夜夜濃  
汴水日日減  
行邁唯恐遲  
離懷不須黯  
遠輕吳江潮  
乃見丈夫膽  
君意應洗然  
吾方困塵慘

永叔白兔

可笑嫦娥不了事  
走却玉兔來人間  
分寸不落獵犬口  
滁州野叟獲以還  
霜毛茸茸目睛殷  
紅絲金鍊相繫環  
馳獻舊守作異玩  
況乃已在蓬萊山  
月中辛勤莫擣藥  
桂傍杵白今應閑  
我欲拔毛爲白筆  
研朱寫詩破公顏

直宿廣文舍下

前夜宿廣文  
葉響竹打雪  
昨夜宿廣文  
窗影竹照月  
賴此數竿竹  
與我爲煖熱  
上有寒鵲棲  
拳足如瘦蕨  
平明欲飛去  
惜惜若告說  
我無喜可報  
煩爾弄觜舌  
亦嘗苦老鷄  
鳴噪每切切  
爲學本爲道  
窮蹙令素髮  
但能得酒飲  
終日自兀兀

送宋中道太博倅廣平

行役無冬春  
車馬無南北  
急若機上梭  
離別腸自織  
其間走聲利  
晝夜不能息

晚得二友生胸蛻吐五色各思強祿仕安肯坐仰食一之毛遂鄉一之太伯國  
豈無穎脫才可邁古風力明當隔大河去路指斗極誰念平原君能於衆中識

裴如晦時  
亦宰吳江

送宋端明知成都

其兄相國  
新鎮河陽

伯仲俱邦棟朝廷倚以隆出爲周九牧入是漢三公歲易星辰轉天均雨露同  
威聲滿河北事業出山東賦壓臨邛馬文高益部雄英靈當自伏教化已先通  
穀騎花川隘壺漿錦里空道塗來竿馬都邑貴耶筒刀夢殊祥後鋒車急占中  
春江須愛賞花鳳在梧桐

戲作嫦娥責

我昨旣賦白兔詩笑他嫦娥誠自癡正值十月十五夜月開冰團上東籬畢星  
在傍如張羅固謂走失應無疑不意嫦娥早覺怒使令烏鵲繞樹枝啾噪言語  
誰可辨徘徊赴寢寒寒帷又將清光射我腹但覺軫粟生枯皮乃夢女子下天  
來五色雲擁端容儀彫瓊刻肪肌骨秀聲音柔響揚雙眉以理責我我爲聽何

擬玉兔爲凡卑百獸皆有偶然白神靈觸冒由所推裴生亦有如此作專意見  
責心未夷遂云裴生少年爾謔弄溫軟在酒卮爾身屈強一片鐵安得妄許成  
怪奇翰林主人亦不愛爾說爾猶自惜知不知叩頭再謝沈已去起看月向西  
南垂

送李涇州審言二首

古章乘一障不過提千兵今握數萬衆獨自制名城諸將俯聽命莫敢輒吐聲  
堂下選驪裘帳中圖嶢嶢山川在目虜寇來必平誰人識謝艾只是一書生  
漢家舊日回中路天子新除太守行牙將握刀趨遠驛羌人下馬拜高旌雲間  
白草開邊隴山上朱樓壓郡城勇脫區區簿書內壯心應欲請長纓

送刁景純學士使北

嘗聞朔北寒尤甚已見黃河可過車驛騎駸駸持漢節邊風慘慘聽胡笳朝供  
酪粥冰生碗夜臥氈廬月照沙侍女新傳教坊曲歸來偷賞上林花

送馬仲塗司諫使北

每逆龍鱗司諫諍又持旄節使陰山貂裘不見風霜勁鴈磧遙知道路艱冰膾芥壘非楚味玉茗蘭茁說燕顏單于不敢輕中國名馬新調爲送還

重賦白兔

永叔云諸君所作皆以嫦娥月宮爲說頗願吾兄以他意別作一篇庶幾高出羣類然非老筆不可

兔氏穎出中山中衣白兔褐求文公文公嘗爲穎作傳使穎名字存無窮徧走五嶽都不逢乃至琅邪聞醉翁醉翁傳是昌黎之後身文章節行一以同滁人喜其就籠繼遂與提攜來自東見公於鉅鼇之峯正草命令辭如虹筆禿願脫冠以從赤身謝德歸蒿蓬

王祁公北園

園林多高樛園卉多芳柔紅紫經幾春青枯經幾秋我至每懷浮觴之卿翁但見浮觴之水汨汨流水流日夜曾未休高門世世生賢侯不比平泉碑缺花木記又非家鴟嘯鳳皇樓洛陽城中亦有園與宅常同歐陽翰林攜酒遊竹間池館遺翠羽戶外楊柳繫紫騮今嗟齒似舊屐作博士嘉趣只與心相仇彊騎瘦馬往城北二十三年如轉頭歸來作此辭且應主人求

觀楊之美盤車圖

谷口長松葉老瘦澗畔古樹身枯高土山慘澹遠復遠坡路曲折盤車勞二車  
迴正轆接軫繼下三車來蟻嶙過橋已有一乘歇解牛離軛童可晒黃衫烏巾  
驅舉鞭經險就易將及前轂輪傍側輻可數蹄角攙錯卷箱聯古絲昏晦三尺  
絹畫此當是展子虔坐中識別有公子意思往往疑魏賢子虔與焉皆妙筆觀  
玩磨滅窮歲年塗丹抹青尙欺俗旱龍兩日猶賣錢是亦可以祕疑亦不可捐  
爲君題卷尾願君世世傳

寄許越州

開元冠蓋裏無若賀知章乞得鏡湖水洗出明月光行坐鏡與月身衣羽人裳  
心存黃庭經目視白鳥行歲時忽已古高韻抗彭莊今聞許子春來守稽山傍  
稽山風月在鏡水菰蒲長臘市開梅萼霰雪凌早芳臥龍生茗舌鼓角催新陽  
焙邊可以啜樹間可以觴賀老於當日必定無此嘗唯有李白詩酒船芙蓉香  
安得效白也賸載借舸艙與君同醉翁智慮收肝腸

永叔請賦車螯

素脣紫錦背漿味壓蚶菜海客穿海沙拾貯寒潮退王都有美醞此物實當對  
相去三千里貴力致以配翰林文章宗炙鮮尤所愛旋坼旋沽飲酒船如落埭  
殊非北人宜肥羊啗鬱塊

寄題郢州白雪樓

楚之襄王問於宋玉玉時對以郢中歌歌爲白雪陽春曲始唱千人和再唱百  
人逐至此和者纔數人乃知高調難隨俗後來感慨起危樓足接浮雲聲出屋  
中古客應無怵悵鯤魚孟諸宿樓傾復構春又春酒瀉琉璃烹錦鱗青山繞欄  
看不盡眼穿盪槳石城人去知何在寒花雨斂自生嘔今聞太守新梁棟試選  
清喉可動塵

和永叔答劉原甫遊平山堂寄

黃土坡陀岡頂寺青煙冪歷浙西山半荒樵牧舊城下一月陰晴連嶼間人指  
廢興都莫問眼看今古總輪閑劉郎寄詠公酬處夜對金鑾步輦還

平山堂留題

蜀岡莽蒼臨大邦雄雄太守駐旌幢相基樹楹氣勢厖千山飛影橫過江峯嶠  
俯仰如奔降雷塘波小鷓鴣雙陸羽井苔黏瓦缸煎鐺瀉頂聲淙淙兩牙鳥爪  
不易得碾雪恨無居士龐已見宣城謝公陋吟看遠岫通高窗

送張子卿秀才

公武

茫茫九土中天網該時秀有鳳不收羅有麟不獲狩賢豪爲咨嗟都邑誦瓊琇  
而我當是時欲見恨未遘忽過廣平居遇子乃邂逅懷中二新篇幸出洗昏瞽

一美韓公才

稚圭也

一語南方寇鏗然青琅玕交戛風雨驟輒用告衆多亦未甚

便售固知至珍物不入市井貿昨朝驚扉鳴始悟子來扣鉅編高貯襟細卷仍  
函袖麻衣踏犀鞞再拜謹以授因之重感愴世德實有舊文體古爲徒家聲喜  
能又其間贊愚辭愧累將恐詬磨拂李杜光誠與日月鬪退之心伏降安得此  
孤陋豈能造春榮豈解易星宿一身猶寒飢生未飽藜豆高高河漢流肯下饋  
湔漱蟲魚儻無施捉撮不乖繆聊此慰窮愁文章終莫就庭前枯石榴寒雀並

清晝逍遙獨詠歌寄翼與報訓

江鄰幾學士寄酥梨

與平烹瓊乳咸陽摘冰枝秦女點山日張公開谷時刻破玉漿壺泛融金酒卮  
適從關中寄不見博士卑

答劉原甫寄糟薑

各國萬家城千畦等封侯斷當燕去前醃牙費糟丘無筋偃王笑有味三閭羞  
寄入翰林席聖以不撤優又寄蓬門下作賦誰肯休唯我廣文舍免爲蠶鹽仇  
劉公漢家裔才學歆向傳胸懷飽經史辨論出九州曾不奉權貴但與故人投  
贈辛非贈甘此意當自求

銅雀硯

歌舞人已死臺殿棟已傾舊基生黑棘古瓦埋深耕玉質先骨朽松棟爲埃輕  
築緊風雨剝埏和鉛膏精不作鴛鴦飛乃有科斗情磨失沙礫粗扣知金石聲  
初求畎畝下遂廁几席清入用固爲貴論古莫與并端溪割紫雲空負世上名

韓著毛穎傳何獨稱陶泓儻以較歲年泓當視如兄

歐陽永叔王原叔二翰林韓子華吳長文二舍人同過弊廬值出不及

見十二月  
七日

枯竹爲門扉不可容車騎況如鄭廣文無氈藉賓位窮冬月破七貴客聯玉轡  
傳騶蕭里閭下榻呼童稚問我何所往共留牆上字兒愚不知誰金章言照地  
既屈卿大夫恨莫親帝彗星躔回已高麟趾寧復至戢戢鄰巷居相見竊自喟  
豈料瘦老翁能令賢達至昔時蓬蒿徑安有此盛事

元忠示胡人下程圖

單于獵罷臥錦紅解鞍休騎荒磧中蒼駒騶駱六十匹隱谷映坡分尾鬣九馳  
五牛羊頗倍沙草晚牧生寒風貴賤小大指五百執作意態皆不同二鷹在臂  
二鷹架駿大當對寧爭功氈廬鼎列帳幕擁鼓角未吹驚寒鴻土山高高置烽  
燧毛囊貯獲閑刀弓水泉在側挹其上長河杳杳流無窮素紈六幅筆何巧胡  
環盡妙誰能通今日都城有別識別識共許劉元忠

送李太保知儀州

出塞開牙帳論兵啓玉鈐漢泉思白馬秦冢弔蒙恬族本西山大聲從渭北兼  
相如嘗學劍文士亦何嫌

劉元忠遺金橘

南方生美果且體橘包微韓彈有輕薄楚萍知是非甘香奉華俎咀嚼破明璣  
欲換齏鹽腹盈匱忽我歸

王原叔內翰宅觀山水圖

石蒼蒼連峭峯大山嵯峨雲霧中老松瘦樹無筆蹤巧奪造化何能窮古絹脆  
裂再黏續氣象一似高高嵩上有荆浩字特歸翰林公願換廷圭一丸墨誰言  
賣錢須青銅范寬到老學未足李成但得平遠工黃金白璧未爲寶文人師臣  
無不通

送廖倚歸衡山

倚來爲其兄求集  
序於歐陽永叔

雌猿夜啼別湘東曉尋故人背孤桐孤桐有聲彈不響絃絕曲在埋蒿蓬知音

萬古期必逢今日已聞天下雄陟山涉水不辭遠文章大名居禁中扣門一見  
顏色喜抱琴三歎含徵宮九疇不汨微禹力堯舜豈無明與聰推根致本賢意  
合敘述況值太史公買金得玉莫忘寶却過洞庭乘朔風爰休啼月月色好還  
來舊山伴狙翁

宛陵先生文集卷第五十

宛陵先生文集卷第五十一

還吳長文舍人詩卷

松液花茯苓又因爲琥珀遇物必得形毛髮曾不隔君子亦豹變其文蔚可觀  
个者逢吳侯滿腹貯經籍噴吐五色霓自堪垂典冊詩教始二南皆著賢聖跡  
後世竟翦裁破碎隨刀尺我輩彊追仿畫龍成蜥蜴有唐文最盛韓伏甫與白  
甫白無不包甄陶咸所索侯初守二郡山水多助益升高觴嘉賓賦筆速鷹翻  
葺書成大軸許我觀琮璧真物固易辨恨無百金易借從懷袖歸誦玩廢朝夕  
譬如遊國都恂怍失阡陌苦吟三十年所獲唯巾幘豈比夸受降甲齊熊耳積  
重見元和風珠玉敵海舶自慚寒餓爲何張空避席

和正月六日沈文通學士遺溫柑

禹書貢厥包未知黃柑美競傳洞庭熟又莫永嘉比適觀隱侯詩獲此殊可喜  
誦句擘露囊香甘冷熨齒明朝鑠禮闈何暇醉鄰里

史供奉羣鶴

出珥銀貂侍太清迴看雙鶴舞中庭翩翩曾是仙人驥兩兩尚儀君子形靜夜  
欲還緱嶺月終朝思嘒太湖萍莫將樹上雞相並會待歸飛向杳冥

雪竇達觀禪師見寄依韻荅

巖竇常留雪山雪不有心禪衣百衲重香刹四明深馴鹿來銜果栽松去作林  
自緣冠紱累未解遠公尋

和孫端叟寺丞農具十三首

田廬

結廬野田中其高足以規坐臥劣自容巢棲未嘗斂但能風雨蔽何惜茅蓬苦  
終當收穫畢寂寞懸山店

颺扇

田扇非團扇每來場圃見因風吹糠稭編竹破筠箭任從高下手不爲暄寒變  
去麤而得精持之莫肯倦

樓種

農人力已勤要在布嘉種手持高斗柄背瀉三犁壟月下叱黃犢原邊過廢冢  
安知俠少年玉食金羈擁

樵斧

適從伐枯桑莫悟刀已缺蠶工向欲迫田事不可徹丁丁背谷聲役役持柯熱  
積薪高於山焉用先後別

耒耜

古聖通物宜揉斲資粒食稼穡盡民勤墾耕窮地力推化本神農維時思后稷  
我老欲歸田茲器已先識

錢鎛

詩稱庠錢鎛南畝興農作寧唯務芟雉豈不在刈穫收功尙嘉穀託用隨芒屨  
太平茲所重坐見銷鋒鏑

耰鉏

蕪穢或不治良苗安得長薶來露未晞荷去月初上侵煙濕鵝頸近芟翻蟻壤

生具自有餘何醉汗霑頰

襖襖

上襖與下襖青蓑苦能織曉披春雨來晚曬陽披側蔽身常自足衝濕曾爲得  
任從野風吹已敵寒蓬色

臺笠

力田冒風雨緝籜爲臺笠寒蓑相與用陰野低迷入足屨固易濡鬢葆何嘗濕  
斯須未可去赫日實乃急

水車

旣如車輪轉又若川虹飲能移霖雨功自致禾苗稔上傾成下流損少以益甚  
漢陰抱甕人此理未可諗

田漏

瓦罌貯谿流滴作耘田漏不爲陰晴惑用識早暮候辛勤無侵星簡易在白晝  
同功以爲準一決不可又

耘鼓

挂鼓大樹枝將以一耘耔逢逢速遠近汨汨來田里功既由此興餉亦從此始  
固殊調猿猴欲取兒童喜

牧笛

牧人樂下牧背騎吹短笛聲穿吳雲低韻入楚梅的誰嗟苦調急自與幽意寂  
應同堯時民歌將土壤擊

和孫端叟蠶具十五首

繭館

漢儀后親蠶採桑來繭館雲母飾車上鉤籠載車畔援條露已乾受葉日將晏  
爲言天下婦茲事不可慢

織室

常聞漢皇后織室數來觀宮女豈不勤帝袞得以完亦將成纁黃非用競龍鸞  
意在奉宗廟後人其可安

桑原

原上種良桑桑下種茂麥雉雉麥秀時蠶眠葉休摘空條漏日多餘樵更誰惜  
會待黃落來酒壚燒斗石

高几

桑柔不倚梯摘桑賴高几每於得葉易曾靡憂校披躋陞類拾級下上異緣蟻  
閑置草屋傍鳴雞或棲止

科斧

科桑持野斧乳濕新磨刃繁栝一去除肥條更豐潤魯葉大如掌吳蠶食若駿  
始時人謂戕利倍今乃信

桑鉤

長鉤扳桑枝枝間挂桑籠南陌露氣寒東方日光動少婦首且笄幼女角已鬢  
競以採葉歸曾非事梳櫛

桑筥

采采向桑郊盈盈自持筥挂鉤帶月往穉葉和煙貯一心恐蠶飢搔首促儔侶  
到家傾嫩綠刀几爲咬咀

蠶女

自從蠶蟻生日日憂蠶冷草室常自溫雲髻未暇整但采原上桑不顧門前杏  
辛苦得絲多輸官官莫省

蠶簇

冰蠶三眠休作繭當具簇漢北取蓬蒿江南藉茅竹蒿疎無鬱浥竹淨亦森束  
競畏風雨寒露置未如屋

蠶槌

三月將掃蠶蠶妾具其器丘植先得音摘括辟室亦塗墍衆材疎以成多薄所得  
寄終老歸簇時應無慚弃置

蠶薄

河上緯蕭人女歸又織葦相與爲蠶曲還殊作筠篚入用此何多往售獲能幾

願豐天下衣不歎貧服卉

繰盎

朝漬一盎繭繰就幾絢絲絲成繭已盡盎亦誰復持道上有墮甌車傍有鴟夷  
二物且莫笑顧藉各因時

紡車

蠶月必紡績絲車方挑擲燈下絡緯鳴林端河漢白纖縷自有緒虛輪運無跡  
腕手已爲勞誰經用刀尺

龍梭

給給機上梭往返如度日一經復一絲成寸遂成匹虛腹銳兩端素手投未出  
陶家挂壁間雷雨龍飛出

織婦

織婦手不停心與日月速常憂里胥來不待雞黍熟但言督縣官立要斷機軸  
誰知公侯家賜帛堆滿屋

上元從主人登尙書省東樓

閶闔前臨萬歲山，燭龍銜火夜珠還。  
高樓迥出星辰裏，曲蓋遙瞻紫翠間。  
轆轤車聲碾明月，參差蓮燄競紅顏。  
誰教言語如鸚鵡，便著金籠密鎖關。

自和

沉水香焚金博山，杜陵誰復與車還。  
馬尋綺陌知何曲，人在珠簾第幾間。  
法部樂聲長滿耳，上樽醇味易酡顏。  
更貧更賤皆能樂，十二重門不上關。

又和

康莊咫尺有千山，欲問紫姑應已還。  
人似嫦娥來陌上，燈如明月在雲間。  
車頭小女雙垂髻，簾裏新妝一破顏。  
却下玉梯雞已唱，謾言齊客解偷關。

和公儀龍圖戲勉

五公雄筆廁其間，媿似丘陵擬泰山。  
豈意來嘲飯顆句，忙中唯此是偷閑。

再和公儀龍圖

千重海浪漁人醉，百戰沙場野叟閑。  
豈向鬧中還得靜，乃知朝市卽青山。

放鷄

獸烹羊豬鳥烹鴨雞唯鷄不殺置奴而攜公坐堂上見而悲悽急令開筵還故棲其間無力飛不齊公只知魚之洋洋鵝之鵝鵝噫兮噫兮

莫登樓

莫登樓脚力雖健勞雙眸下見紛紛馬與牛馬矜鞍轡牛服鞞露臺歌吹聲不休腰鼓百面紅臂鞢先打六么後梁州棚簾夾道多天柔鮮衣壯僕擗髭虬寶搗呵叱倚王侯夸妍鬪豔目已偷天寒酒醺誰爾倚倚檻心往形獨留有此光景無能遊粉署深沉空翠幃青綾被冷風颼颼懷抱旣如此何須望樓頭

莫飲酒

莫飲酒酒豈讎顏回不飲不白頭千鍾稱帝堯百觚號聖丘定國數石無滯留康成三百杯未休阮籍作詩語更道聖賢在前誰與謀喉軋舌強須潤柔照見文字勝膏油

依韻和永叔勸飲酒莫吟詩雜言

我生無所嗜唯嗜酒與詩一日舍此心腸悲名存貴大不輒思甌空釜冷不俛  
眉妻孥凍飢數恚之但自吟醉與世違此外萬事皆莫知王公謁請衆去早旣  
衰愈嬾身到遲日高倦僕顏色沮況騎瘦馬兩耳垂厭此勞苦不喜出唯有文  
字時能爲諸公尙恐竭智慮勤勤勤飲莫我卑再拜受公言竊意公矯時只愛  
詩謂余癡

和永叔內翰

來時擘繭正探官走馬傳宣夾路看便鑠青春辭上閣徒知白日近長安思歸  
有夢同誰說強意題詩只自寬猶喜共量天下士亦勝東野亦勝韓

和公儀龍圖憶小鶴

聞憶華亭雙鶴雛蒼毛未變頂微朱閑情且與稻梁飽寄語休將雞鶩驅丁令  
再歸移歲月王褒端爲約僮奴主人必欲看雙舞太液池寬肯放無

和永叔內翰思白兔荅憶鶴雜言

醉翁在東堂爲他栽桂樹待將枝條與人折憶著家中玉色兔夜看明月海上

來光彩離離入庭戶且問嫦娥一借觀翁家雖有來無路嫦娥對面幾萬里不  
聲漸漸西南去是時翁生懷抱惡却恨陸機先憶鶴致令亦念眼迷離不似傍  
池能飲啄始憂免飢僮失哺又恐白毛塵土污仍不如鶴有淺泉自在引吭時  
刷羽花前舉翅鼓春風只待翁歸向朝暮我聞二公趣向殊一養月中物一養  
華亭雞一畏奔海窟一畏巢松株我雖老矣無物惑欲去東家看舞姝

和永叔內翰戲荅

從他舞姝笑我老笑終是喜不是惡固勝兔子固勝鶴四蹄撲握長啄啄任看  
色與月光濕只欲走飛情意薄拘之以籠縻以索必不似纖腰夸倬約主人既  
賢豪能使賓客樂便歸膏面染髭鬚從今晏會應頻數

二月五日雪

二月狂風雪寒威曉更加省闈輕妒粉苑樹暗添花有夢皆蝴蝶逢袍只紵麻

凍吟誰料我相與賭流霞

聞永叔謂子華曰明日聖  
俞若無詩脩翰一杯酒

和公儀龍圖小桃花

三分春色一分休始見桃花著樹頭霰雪斗來如約勒爲公留作上林遊

感李花

二月九日

重門雖鎖春風入先折桃花後李花赤白鬪妍思舊曲舊聲傳在五王家五王  
不見留華萼華萼壞來碑缺落當時李白欲騎鯨醉向江南曾不錯

琴高魚和公儀

大魚人騎上天去留得小鱗來按觴吾物吾鄉不須念大官常膳有肥羊

嘗茶和公儀

都監攜具向都堂碾破雲團北焙香湯嫩水輕花不散口甘神爽味偏長莫夸  
李白仙人掌且作盧仝走筆章亦欲清風生兩腋從教吹去月輪傍

宛陵先生文集卷第五十一



宛陵先生文集卷第五十二

刑部廳看竹效孟郊體和永叔

用其韻

蒼蒼庭中竹事莫歎遲速不同欄下草一歲一迴綠朝開花照曜暮落風相逐  
何如飽霜雪冬夏森寒玉誰將種官舍本合近巖屋不可一日無瀟灑看未足  
阮生豈其愚林中醉醺醖我當明月時移牀來此宿

較藝和王禹玉內翰

分庭答拜士傾心却下朱簾絕語音白蟻戰來春日暖五星明處夜堂深力搥  
頑石方逢玉盡撥寒沙始見金澹墨榜名何日出清明池苑可能尋

再和

廉纖小雨破花寒野雀爭巢鬪作團手卷白雲光引素舌飛明月響傾盤羣公  
錦繡爲腸胃獨我塵埃滿肺肝彊應小詩無氣味猶慚白髮廁郎官

謝永叔答述舊之作和禹玉

天下才名罕有雙今逢陸海與潘江筆生造化多多辨聲滿華夷一一降金帶

繫袍迴禁署翠娥持燭侍吟窗人間榮貴無如此誰愛區區擁節幢

較藝贈永叔和禹玉

今看座主與門生事事相同舉世榮並直禁林司詔令又來西省選豪英飛龍借馬天邊下光祿供醪月底傾食葉蠶聲句偏美當時曾記賦將成

戲答持燭之句依韻和永叔

盧仝只有赤脚婢吏部曾吟似笑仝紅燭射眸從結客清歌帖耳苦憐翁歸時雖已過寒食芳物猶能逐暖風但點紗籠續清夜西園遊興古何窮

重答和永叔

我家唯一團月挂在颼颼草屋東玉兔已爲公取玩更休窺望桂叢中

又依韻

多病相如不復云更何曾有卓文君他時我向會稽去只是荆釵如布裙

刑部廳海棠見贈依韻答永叔二首

搖搖牆頭花蓓蓓有好色高枝笑粲粲低枝明矍矍但與風相撩不與風相得

風吹莫苦急游子歎日吳彭祖與顏回相去猶瞬息每觀形影篇曷在神所釋  
不可廢我吟畢竟焉免白

搖搖牆頭花一一如舞娥春風買豔逸豔逸此何多不爲游蜂撓卽爲狂蝶過  
日光苦給給魯叟白波波人生若朝菌不飲奈老何揚雄寂寞居豈若阮生歌

春雨呈主文

蛟龍上漢魚潛動梁棟生雲燕未知風點稍聞寒瓦急玉條初向畫簷垂何郎  
夜聽應逢句謝朓朝觀必有詩老大莫將文字困爲公牽彊不勝疲

謝鵬和公儀

聞有白鵬夢遂作白鵬詩詩記白鵬語意公於鶴私公意無薄厚爾將聽我辭  
朝給一瓢水晝給一盞糜曾不令爾渴曾不令爾飢事事不異鶴安得於鶴疑  
鶴鳴爾不和鶴舞爾不隨無以一供悅飽食番頑癡公所念爾久李白當畜之  
白固有篇詠公偶未暇爲遣爾心不平謂此鈍見遺我持爾此意請公吟莫遲  
公便納我言濡筆灑淋漓書爾在南方野羽霜雪披弄啄紅豆實飛上桄榔枝

翡翠不敢顧孔雀不敢窺將擬是白鳳脩尾晝漣漪  
虺頸而雞首峨峨如有儀而今與鶴爭此識固已卑  
公初待爾厚鵬兮知不知

較藝將畢和禹玉

窗前高樹有棲鵲記取明朝飛向東家在望春門外  
住身居華省信難通夜聞相府催張榜曉聽都堂議  
奏中龍閣鳳池人漸隔猶因朝謁望鰲宮

送白鷗與永叔依韻和公儀

致鷗猶恐鷗飢渴細織筠籠小瓦缸玉兔精神憐  
已久金鑿人物世無雙休爭白鶴臨清沼且伴鳴雞  
向綠窗美羽奇毛有多少爾身高穩勝他邦

書事和韓子華舍人

見憑蝴蝶過牆飛却夢翩然入綺闌欲撲翅輕縈  
不住覺時疑有粉霏衣

明經試大義多不通有感依韻和范景仁舍人

明經與進士皆欲取公卿自是俗儒陋非於吾道  
輕昔由羔鴈聘今乃草萊并  
不措一辭去緣何祿代耕

出省有日書事和永叔

辭家綵勝人爲日歸路梨花雨合晴庭下鞦韆應未拆籠中鸚鵡卽聞聲千門走馬將看榜廣市吹簫尙賣錫已是瓊林芳卉晚不須遊處避門生

定號依韻和禹玉

言出君門日遙聞紫禁鐘詔書中使降駿馬上閑供天下持平手毫偏不置胸文從有司較卷是近臣封勝陣無容敵精兵已善攻明朝當奏號鴛鴦看歸雒寄桂州張諫議和永叔

桂林太守幾時行泛汴桃花浪已騰目極雲陰低遠樹夜寒風急亂春燈巢鳴翡翠愁無限水宿鴛鴦冷不勝陽朔山前好峯嶺爲公憐愛萬千層

觀張中樂書大字

芝旭馳名世有孫大書如曉過秋原長松怪柏皆成炭豫氏觀傍不解吞

張淳叟獻詩永叔同永叔和之

張君獻詩詩詞巧美女插花嬌醉春公答七言夸筍筍我無千里學騏驎夜吟

謝朓澄江練露濕陶潛漉酒巾歸去應將錦囊貯已勝珠玉莫愁貧

上馬和公儀

煙火千門曉欲開五花驕馬肯徘徊已是經時隔親舊全如遠別來帝闕重看多氣象天街新霽少塵埃振冠浣服無容久便見池門放榜催

太師杜公挽詞五首

國佐三公進師臣一品歸接賓忘素貴還綬遠危機憶奉追尊冊當觀副輅旂

生榮人莫及無恨掩泉扉

慶曆中改謚章聖五后公奉冊乘副玉輅出宣德門

既老仍開國因歸得賜金念懷知主意堅介見臣心筆札尚存紙性情猶託吟

向來門下客東首淚盈襟

前歲因侍講王內翰歸省其兄於睢陽上賜公金

莫怪霑襟血無由作弔賓故池歸去鴈春信見何人已寫虛堂影猶鐫守冢麟

門生與舊吏將立道傍珉

言為當代法行不古人慚天子貴元老史官傳美談名高漢亞相學嗣晉征南

有子即家寶未嘗金玉貪

見錄尋常詠親裝復手題言從永嘉後重與建安齊自古難知己孤生每擇棲

春風寄黃鳥爲向墓間啼

去歲同在植郎中謁公  
公出手裝僕詩一軸

### 送方云秀才下第

從來釣者意豈不在得魚餌寡魚口多曾非投竿疎向登百金貴首尾必吹噓  
竭澤古所戒但保腹中書風雷變有時且復歸孟豬

### 送張待制知越州

滄海東邊會稽郡朱輪遠下相臣家已同雲漢星庭轉不與鑑湖風月賒越箭  
抽萌供美茹秦山堆翠照高牙買臣嚴助前時貴破盜論功未足誇

### 送甥蔡駟下第還廣平

爾持金錯刀不入鵝眼貫已遭俗棄擲妄意堪憤惋他時有識別終必爲寶玩  
懷之歸河朔慎勿輒鎔鍛改作毛遂錐穎脫奚足算

### 送唐紫微知蘇臺

洞庭五月水生寒盧橘楊梅已滿盤泰伯廟前看走馬闔閭城下見驂鸞吳娃

珍傲宋版印  
結束迎新守府吏趨齎拜上官曾過揚州能慣否劉郎盞底勸須寬

韓持國遺洛筍

龍孫春吐一尺芽紫錦包玉離泥沙金刀璀錯截嫩節銅駝不與大梁賒持寄  
韓郎綠蒲束莫令衛女苦思家韓郎才調偏能賦分餉唯思楚景差因之善謔  
誦淇澳欲學報投無木瓜

萊宣遺酒

白日對芳樹靜夜愛明月我飲雖不多杯杓安可闕破屋有空缸冷竈無黔突  
投餐聞韓辱乞食使陶訥鑿此不求人終身其鏤骨儻有佳客過未免貰袍笏  
風從東南來語向西北發西北多鳳雛枝間報清越玉壺盛曉露贈置醉莫歇  
却少可飲人爲告月休沒

送王正卿寺丞赴睢陽幕

廢園孝王國離宮天子都古今雖且異文物未嘗無族有栽槐美名從得桂殊  
應聞漢丞相待士倒樽壺

韓玉汝遺油

朝讀百紙書夜成幾篇書明明白晝有陽烏黝黝暗室無蟾蜍目睛須藉外物  
光日月不到卑鄙居君能置以滑油壺暝照文字燈燄舒婦將膏髮雲鬢梳餅  
底濁濃留脂車所益旣如此所感當何如

王幾道罷磁州遺澄泥古瓦二硯

澄泥叢臺泥瓦斲鄴宮瓦共爲几案用相與筆墨假賦無左思作書媿右軍寫  
初從故人來來自邯鄲下物因人以重謬當好事者

送咸陽主簿王祕較

昔見蘭叢芽今見連蔓瓜持入咸陽市本出故侯家五色相鉤蒂秦人應自誇  
行當七月薦乞巧雜盤花

和楚屯田同曾子固陸子履觀予堂前石榴花

堂下一匹鄭虔馬欄邊兩株安石榴但能有酒邀佳客亦任狂花落素甌俗女  
紅裙無好色主人白髮自侵頭欲歌翠樹芳條曲已去洛陽三十秋

送史供奉汴口都大

河爲中國患亦爲中國利其患齧隄防其利通糧饋分流入浚汴萬貨郡城萃積淫或暴漲旱暵或滯澁疏導欲其宜經度有所異曩者多邀功用之殊未至十私而五公歲久害愈熾潰溢必歸尤廟堂難決議明明聖天子自選中常侍銀璫插在貂身小勇且智上從廣武城下及淮與泗迴險帖鑿繁所畫由所寄嘗以勤厥身又能和衆吏前日有盡心于今病憔悴此職方藉人加餐當自爲

呂晉叔著作遺新茶

四葉及王游共家原坂嶺歲摘建溪春爭先取晴景大窠有壯液所發必奇穎一朝團焙成價與黃金逞呂侯得鄉人分贈我已幸其贈幾何多六色十五餅每餅包青蕝紅籤纏素綵屑之雲雪輕啜已神魄惺會待嘉客來侑談當晝永

送畢甥之臨邛主簿

自我歷官三十年有脚未曾行蜀川李白嘗言道之艱險長嗟難劇上青天烏悲援號馬蹄脫苔梯兩棧愁傾顛蒼崖下窺不見底但聽雷聲輓石懸湍濺曉

盤青泥上高煙暮盤青泥到下泉劍閣如劍巉然割腸刺恨今古連爾去三千  
九百里巴山小馬烏皮鞵一婦一奚行李單家具日貨能幾錢人皆畏避不敢  
往此獨敢往何所便況是初宦無遠適心意自許非由銓異乎哉我今送爾徒  
哀憐

依韻和公儀龍圖招諸公觀舞及畫三首

落花淨掃青陰長野蝶閑飛綠草間侍從退來看鶴舞便將樽酒欲招閑  
陰森園圃牆東地攜挈兒童樹下吟便約天邊鳳皇侶閱書觀畫味尤深  
初約看花花已盡重新邀客客應歡真花旣不能長豔畫在霜紈更好看

宛陵先生文集卷第五十二

珍做宋版印

宛陵先生文集卷第五十三

送王介甫知昆陵

吳牛常畏熱吳田常畏枯有樹不蔭犢有水不滋穉孰知事春農但知急秋租  
太守追縣官堂上怒奮鬚縣官促里長堂下鞭扑俱不體天子仁不恤黔首逋  
借問彼爲政一一何所殊今君請郡去預喜民將蘇每觀二千石結束辭國都  
絲鞵加錦緣銀勒以金塗兵吏擁後隊劍搨威前驅君又不若此革轡障泥烏  
款行問風俗低意騎更驚下情靡不達略細舉其麤曾肯爲衆異亦罔爲世趨  
學詩聞已熟愛棠理豈無

送曾子固蘇軾

屈宋出於楚王馬出於蜀荀揚亦二國自接大儒躅各去百數年高下非近局  
鈎陳豹尾科登俊何炳緝楚蜀得曾蘇超然皆絕足父子兄弟間光輝自聯屬  
古何相遼闊今何相邇續朝廷有巨公講索無遺錄正如唐虞時元凱同啓沃  
何言五百載此論不可告二君從茲歸名價同驚俗

送建州通判沈太博

昔聞醉翁吟是沈夫子所作今聽醉翁吟是沈夫子所彈聲如冰澌下石灘嚼齧碎玉遶齒寒四坐整衣容色端醉翁雖醉無慢官其音正以樂其俗便且安何害酪酏顏渥丹沈夫子邂逅相遇必已歡玉琴能寫人肺肝人所爲難君不難平明解船建谿去輕齋快意不長湍谿東白茗象月團來奉至尊龍屈盤餘爲帶銜與鬢片散在六合雲漫漫况君五臟清如水宜飲沆瀣采木欄更留瓦硯贈我看鄴宮鴛鴦誰刻刻

送王平甫擬離騷

識君兮不早君尙少兮我老蘭與蕙兮多薰搴雜佩兮芳芬蘭倏往兮蕙隨心俯仰兮徘徊與識吳兮吳樂嘗適楚兮楚悅君何爲兮我闊麒麟絜兮不馳鳳皇蔽兮挑達均莫悲兮別離悵公子兮何之絕大江兮無波奉赤鯉兮藉荷芰菹苻兮陳羹親意得兮忘榮世反是兮從貴聊送君兮傷情

送僧遊廬山

欲遊廬山去將託楚舸梢暮行長河曲月上黃公坳悠悠幾千里身世非繫匏  
恣觀瀑布虹不畏潯陽蛟誦經東林下小宇結香茅

韓持國再遺洛中斑竹筍

牡丹開盡桃花紅斑筍迸林犀角豐兩株遠寄川上鴻韓郎輟口贈楚翁便令  
剝錦煮荆玉甘脆不道簞瓢空小謝舊城昭亭下侵天笙竹谿西東螳蜋生後  
出牙茁羅列滿地爭強雄是時楚翁所食寡朝飯暮飯唯其充今來得此謂過  
分一貴一賤物苟同

送僧惠思

大車高馬塵塞軌弄石洗泉人不喜慨然擺落還吳都歸心勁於弦上矢強弩  
發復開矢往不可迴常應笑燕子時能海邊來

送魯玉太博挽詞二首

射策志何遠闔棺人共疑奠觴朋友去泣血母兄悲霧氣窗間盡車聲戶外知  
玉樓成作記此語可能欺

自昔稱王謝于今亦盛門尙看珠樹秀應見玉麟存書史辛勤學文章苦死論  
都然莫施設恨向九原吞

試問於天下誰從百歲心短長從所盡禍福乃相尋只以名賓實那論古至今  
未能忘物境空復歎人琴

蘇明允木山

空山枯楠大蔽牛霹靂夜落魚鳧洲魚鳧水射幾千秋蠹肌爛隨沙蕩流唯存  
堅骨蛟龍鐵形如三山中雄酋左右兩峯相挾翅尊奉君長無慢尤蘇夫子見  
之驚且異買於溪叟憑貂裘因嗟大不爲梁棟又歎殘不爲薪楨兩侵蘚澀得  
石瘦宜與夫子歸隱丘

哀國子黃助教

儒者務欲博誦說窮冬秋衣裙未及解含珠以見求閩稱黃夫子常恐學不流  
有徒如浮萍匝匝圍剗舟聚書將萬卷載行無馬牛去年來京師滿篋分寄投  
半在吳楚間半入趙衛陬昨日大官薦青袍變緋裘今朝爲異物寸祿與命讎

獨聞邯鄲公哀之使斂收曷其稟賦薄安得被王侯旅殯欲焉託定將葬何州  
生爲四方遊死當不擇丘豈必歸故鄉萬里過山頭

沅江李氏書堂

船從洞庭來非賈卽遊宦宦賈事風檣誰能樂清晏不如蓄書史萬古無與間  
上觀堯舜仁下覽魏晉篡善惡彼旣殊智巧徒以辯君心於此得用舍不自慢  
堂中羅高廚戶外望鳴鴈菰蔞可采掇魚鼈可釣汕卒歲身多餘世俗莫習慣

張堯夫寺丞改葬挽詞三首

洛陽交舊裏過半已凋殘在昔義投漆最先悲闔棺誰知二紀水重卜九原安  
聞說塞門路白楊風更寒

當時嗟遽歿二子未能言頻歲折丹桂買塋遷陸渾重銘太史筆不替故人恩  
爲善有終慶此焉天意存

舊墳爲潤齧新家得山深斬木來荒路移松出近岑黃鸝啼棘上玉女問泉音  
疆作挽人唱儻知哀感心

讀黃節推卷

磊落黃從事清吟古氣多少年知任俠欲老解登科辨起公卿坐時爲慷慨歌  
又持珠玉贈將奈老貧何

得陳天常屯田斑邛竹二枚

客初西蜀來遺我雙邛竹上有紅淚斑斷非湘娥哭嘗聞帝魂哀號血滴草木  
春露灑更鮮殷痕侵粉綠截爲扶衰杖萬里出洛谷今來入我手君勤意有囑  
區區四十年重趼生兩足冠鼎三男子且與詩書讀翁雖文章窮尙以字遮目  
忍弃不以教攜歸事樵牧故茲九節贈用助老追逐楊朱非爲岐賈誼非爲鵬  
及其悲慟時豈不霑盈掬揮之儻著物無迹染林麓因持此竹紋勿歎前人獨

送余少卿知睦州

青山峽裏桐廬郡七里灘頭太守船雲霧未開藏宿鳥坡原將近見燒田養茶  
摘蕊新春後種橘收包小雪前民事蕭條官政簡家書時問霽溪邊

夜直廣文有感寄曾子固

日暮蛛絲動月暗螢火明方茲步庭戶浩然懷友生友生將東歸泛若赴海鯨  
已從龍門出不慕朱鼈輕朱鼈過吳洲飛飛就東瀛沈浮未可問各有萬里程  
須憂小水魴勞勞將尾頰

重送曾子固

楚澤多年一臥龍新春雷雨起鱗蹤誰知天上爭騰躍偶落池中雜唵喁且自  
摧藏隨浪去何當駕馭使雲從劉累只說古來有暫屈泥蟠莫便慵

寄題沈比部江州齊雲樓

遠目不高不可極朱樓要與浮雲齊江流萬古平泱莽山雨一過寒淒迷賈客  
檣下望吹笛漁郎浦前看斷霓飲飛射蛟水花伏高士種柳煙條低羣鴈有時  
至自北洪潮到此不更西君家隱侯有八詠風雅未盡留人題

雲間月

明明雲間月皎皎莫可指雄烏與牡兔萬歲不生子三旬後乃合徒用成甲癸  
焉見下土物長養各私己蛇蝎滿窟隙嗣毒自未已天地豈有意盛德名不死

依韻和梅龍圖觀小錄

四百鸞皇羽翼成高低輕重出權衡他時俱作公卿去誇是王家門下生

送鮮于祕丞侁通判黔州

壺頭山下俗巴婦曲中聽汲井熬鹽白燒田種穀青巖風來虎嘯江雨過龍腥  
事簡能談者揚雄所草經

依韻閣中孚職方暴雨幸涼

天津赫日欲焦拆西北風來斗減威太帝宮庭無暑入大明冠佩退朝歸泠泠  
冷襲瑠璃簾奕奕涼翻翡翠幃交扇不須煩素手淋漓誰復汗頻揮

愛月

終夜每愛月見月常苦稀不雨卽雲晦何能藉光輝儻有一夕明豈畏露濕衣  
素娥領玉兔孤寡命亦微堂堂罕開耀多是半掩扉曾負萬家望空似隨人歸  
一歲復一歲白髮思鈞磯

呂縉叔云永嘉僧希用隱居能談史漢書講說邀余寄之

奈苑談經者蘭臺著作稱吾儒不兼習爾學若多能每愛前峯好閑穿弊屐登  
定將修史筆添傳入高僧

依韻和王景彝馬上忽見槐花

六月御溝馳道間青槐花上夏雲山退朝側帽驚時晚近樹聞香暗詠閑新雨  
賈生車喜出舊年潘岳鬢添斑老慚太學無經術空飽齋鹽疆往還

送家靜寺丞知洛南

秦愛商於地信美洛水南銀鉛與丹砂鑿山民爭貪蜀客善製錦當先務桑蠶  
衣老以及少使煦如春酣摘蔬有筍蕨釣庖有巖潭頗同故鄉味將喜獲所諧  
和王景彝省中詠孤竹

愛此孤生竹碧葉琅玕柯結根甘泉裏豈必泰山阿曾莫學兔絲徒以附女蘿  
風爲掃庭戶夜月誰與過

永叔內翰遺李太博家新生鴨脚

北人見鴨脚南人見胡桃識內不識外疑若橡栗韜鴨脚類綠李其名因葉高

吾鄉宣城郡每以此為勞種樹三十年結子防山採剝核手無膚持置宮省曹  
今喜生都下薦酒壓葡萄初聞帝苑夸又復主第褻纍纍誰採掇玉椀上金鰲  
金鰲文章宗分贈我已叨豈無異鄉感感此微物遭一世走塵土鬢顛得霜毛

陸子履示秦篆寶

其文曰二十六年皇帝盡并兼天下諸侯黔首大安號為皇帝乃詔丞相斯館法度量則不一嫌疑者皆

明一之

秦既并諸侯斯乃一度量鑄寶以永傳萬世俾勿喪精銅不生花小篆著丞相  
一歿咸陽宮千秋事更王陸君居洛城客有來渭上曰因農人耕發壤破古藏  
遂獲此物還文完字何壯始號為皇帝立語已超曠意將愚黔首釁起危博浪  
其後同玉璽不隨驪山葬今蓄於君家徒爾資奇尙物以用為珍異時皆似妄

王屋高送王屋知縣孫祕丞

王屋山高無援猱下有黃河水滔滔天壇半夜見海白光動古邑雞先號雞先  
號絕吠爨巖居林棲吏莫搔山膚有時得虞獵不比斃肉烹連毛聞君今去將  
效陶縣前種柳芟蓬蒿不問公田問民俗民安事簡教兒曹河南太守喜愷悌

如此可以無馱勞

聽文都知吹簫

晏虞部遣  
求一見之

虞舜已去蒼梧野秦女驂鸞無復下簫管人間不解傳帝樂部中能亦寡欲買  
小鬟試教之教坊供奉誰知者晏識文公始致來勸接賤生宜彊且乃呼側坐  
吹一曲驚顧頓嘶堂下馬吾妻閨中聞不聞穉女扳簾笑嬌姪未敢多聽便遣  
還贈飲單杯向身瀉

雜言送王无咎及第後授江都尉先歸建昌

白袍來黃綬迴來跨蹇驢迴跨馬麻源三谷桂花開江都作尉入風埃主人劉  
向西京才心如明月無不照恐君已到還鸞臺

宛陵先生文集卷第五十三



宛陵先生文集卷第五十四

依韻和王景彝憶秋

隴首欲看飛去雲  
槎頭安得卷輕輪  
流烏不轉西邊日  
乘馬猶知果下人  
空渴魏臺冰在井  
從悲楚客淚緣巾  
炎炎赫日偏憎老  
眼耳昏聾半塞塵

七夕永叔內翰遺鄭州新酒言值內直不暇相邀

詰朝持鄭醞向夕  
望星津俗意願添  
巧古心思變淳予  
窮少陵老公似謫  
仙人獨對金鸞月  
宮詞付小臣

依韻和永叔久在病告近方赴直道懷見寄二章

浴堂深殿近皇居  
秋夕詞臣直宿初  
宮女穿鍼爭落月  
官奴持燭看殘書  
萬家乞巧心無盡  
斜漢飛光望有餘  
枕上江山夢猶熟  
五更寒雨過簾疎

玉轡瓏瓏出絳宮  
青槐馳道曉烟中  
塵頭尙裊洗車雨  
馬耳前趨吹鬣風  
聞說自將身許國  
不須仍以醉爲公  
我今才薄都無用  
六十棲棲未歎窮

文豹篇贈黃介夫

壯哉南山豹不畏白額虎澤霧毛雖雜鼯鼠朝將具鬚暮爲乳文章子雲久已  
許還笑大夫費五殺天子仗中儀勿舉尾與旂常願看取

送韓欽聖學士京西提刑

王朝慎常刑恐民陷非辟分命遣使車謬枉得舉摘兼之勸農桑欲野無曠隙  
韓侯夙所志功利豈止百茫茫唐鄧間荒土無牛跡邵闕廢未久柘陽仍舊白  
二地儻復營萬世不可易昔在漢家時近親多占籍苟或非膏腴當應徙畿赤  
每念輒歡嗟未能俾盡畫天將富斯民事與願不隔其易謂何如拾芥由琥珀  
我今送韓侯書以贈無責

送陸子履學士通判宿州

雷雨初過草木新汴堤楊柳綠陰勻已看畫舸逐流水不惜長條折與人淮境  
秋傳蟹螯美郡齋涼愛蟻醅醇睢南莫久留才子宣室歸來問鬼神

得福州蔡君謨密學書并茶

薛老大字留山峯百尺倒插非人蹤其下長樂太守書矯然變怪神淵龍薛老

誰何果有意千古乃與奇筆逢太守姓出東漢邕名齊晉魏王與鍾尺題寄我  
憐衰翁刮青茗籠藤纏封紙中七十有一字丹砂鐵顆攢芙蓉光照陋室恐飛  
去鑠以漆篋緘重重茶開片鈔碾葉白亭午一啜驅昏慵顏生枕肱飲瓢水韓  
子飯蠶居辟雍雖窮且老不媿昔遠荷好事紓情悰

韓子華吳長文石昌言三舍人見訪

當時載酒客共過草玄人今日一寒士能來三侍臣竹門容大馬金絡照諸鄰  
雞瘦莫爲具阮家依舊貧

送吉老學士兩浙提刑

重本恤刑天子聖舟車持詔使臣賢部中漢吏無冤獄葑上吳人益美田重過  
故鄉逢故老一聞鳴鶴記山川不須歌管唯詩酒况有餘杭白樂天

永叔內翰見訪

七月二十六日

內相能來顧爲郎樂有餘兒童爭拂榻門巷劣容車掩扇知秋意窺牆省舊書  
經年三枉駕未與故人疎

送石昌言舍人還蜀拜婦

紫微星宿何煌煌掖垣華閣上相當舍人亦與泰階近兩兩聯裾如鴈行其間  
飛星入王壘天子賜告歸故鄉錦韉金轡照棧去文園渴令難可望揚雄位卑  
纔執戟豈有爵祿多文章石公官顯職且貴還家展墓酌椒漿太守趨塵里人  
避岷山松柏風淒涼椎牛行酒與耆舊耆舊醉歸呼此郎公置名分共其樂敦  
厚世俗時陶唐郎呼只作曩日視安知鏘玉侍明光歸來却向鳳池直詔言一  
出稱廟堂廟堂蕭曹不草草潤色鼓動辭琅琅鼇頭蓬萊便可到蜀人更賀烹  
猪羊

送劉元忠學士還南京

昔見相公登瀛洲今見公子爲校讎鯤鵬變化三千載我生安得不白頭君前  
拜恩父前慶暫向南都乘順流南都留守頗爲喜將吏入賀鞞聲適酒與銀甕  
羊臠炙上下和煦移涼秋歸來却上柳堤路西風健馬控花虬

送潤州通判李屯田

過江始與風沙隔京口山連北固牢刺史丰儀於體重邦人全伏此名高宴盤  
紫蟹方多味古寺青林不厭邀定挈傳家舊圖籍漕河應莫費吳艘

寄題知儀州太保蒲中書齋

中條插遠近黃河瀉直斜蒲坂之城在其涯渠渠碧瓦十萬家官商工農共擾  
擾侯獨理齋窗照紗侯方守邊聽胡笳滿屋蓄書凡幾車他年不接清商樂亦  
莫學種東陵瓜老繫戰馬向庭下廚架整妮齊籤牙朝聞鳴雞夕聞鷄眼昏秋  
匣生銅花兒孫誦習且盈耳客來休論常山蛇

哭孫明復殿丞三首

魯國先生歿夷門吉士哀因讒君席遠時賻帝恩該寂寞蒿宮啓悠揚茜旒迴  
昔賢皆不免松下作寒灰

舊業居東岱中年謁紫庭要塗無往跡至死守殘經詔許求遺稿朋鄰與葬銘  
世人無怪我涕淚爲之零

自古春秋學皆知不可過生前恩禮少歿後薦章多妻子將焉託田園有幾何

汶陽秋樹裏黃鳥謾聽歌

程文簡公挽詞三首

嘗預巖廊政終爲社稷臣作藩安舊俗飲酒得賢人  
葬禮饒簫咽明儀幣馬陳  
泉堂一經掩原上只麒麟

將相榮難及唐虞世已遭名將官愈大節固位同高哀悼王朝輟鐫埋史筆操  
空山伊水外松柏冷蕭騷

關塞秋雲冷伊川苦霧陰薤歌金鐸碎蒿里石宮深燃漆爲長夜栽松作茂林  
空留舊冠劍家廟四時心

送李殿丞通判蜀州

嘗聞蜀國海棠盛因送李侯宜有詩日愛西湖照空錦醉看春雨洗燕脂郡無  
公事中園樂民喜羣邀匝樹窺望帝烏啼空有血相如人恨不同時晨鮮深淺  
非由染解賦才華未得知聞說趙高今已老試教圖畫兩三枝

八月十夜廣文直聞永叔內當

聞向蓬萊宿鰲峯第幾層秋聲暗葉雨殘夢空堂燈推枕感孤鴈抽琴彈壞陵  
誰知廣文直桃簟冷於冰

和公儀龍圖新居栽竹二首

八月竹根移要雨逢陰便向阮家求請公靜聽蕭蕭葉斗變江南一夜秋  
都城有地誰栽竹只見寒檣與老槐聞種琅玕向新第翠光秋影上屏來

贈京西陳郎中

忽枉乘輅車鏘然響金轡駐軫與我言琅琅有深意乃知故相家事業已不墜  
信哉渥洼種千里可立致顯祖實令君名聲取高位伯叔與懿考聯榮重當世  
于今多昆孫朱紫紛曳地勉勉崇令德蘇李何難至

送董著作知北海縣

君嘗佑王屬議平天下刑出宰得古邑農鋤多帶經素琴伴飲酒綠蘚生訟庭  
舉手望海鴈高懷在青冥

送王微之學士知池州

秋江渺然生寒潮北風吹帆上青霄旗脚舒舒戰紅鬣旗心閃閃交阜鵬檣下  
健兒發金鏡屋上鸞童鳴紫簫岸傍舟人望且拜溪口直入當高譙正聞鼓角  
波動搖齊山舞翠挹岩嶢郭西猛虎夜莫入太守號令如怒颿長戈椿爾喉長  
刀斷爾腰牙兵將吏無敢囂新威烈烈野火燒

讀永叔集古錄目

古史書不足磨璞鐫美辭周宣石鼓文已缺秦政嶧山字苦隳西漢都無半畫  
在黃初而上猶得窺下及隋唐莫可數奇言偉迹恐所遺信都力黏大小軸集  
十爲秩仍第之隨目證訛甲癸推青編是非皆究知有益於古今不疑碑雖滅  
絕事弗移後人覽錄尙若披信都用意無窮期天灰地燼乃終畢信都信都名  
愈出

依韻和永叔秋日東城郊行

郊原物老莽然中寓興驅車向國東夾道名園迷屈曲壓枝秋實亂青紅寒畦  
覆綠將收菜野蝶雙飛尙繞叢田父欣來問行幸依稀還似鬪雞翁

送王景彝學士使虜

持節共知過碣石銜蘆相背有飛鴻地寒狐腋著不暖沙闊馬蹄行未窮隴上牛羊衝密霰帳前徒御立酸風歸時莫問程多少却到河湟杏萼紅

哭王畿道職方三首

前罷邯鄲守孤高與世違青雲舊知在白首故園歸既歿無兒女元貧只帳幃平生洛陽友從此更應稀

我今過五十萬事日消磨熟識世間寡故交泉下多葉秋知易隕松耐竟如何嘗亦悲前哲荒墳野鼠窠

得君音信近安穩在緱山不是國醫悞寧辭蜀道艱終然有脩短猶免歷間關便作千秋別霑襟涕淚斑

君當入西川官雖抱病無由免待闕於緱氏因衄血國醫以藥下之乘虛而卒

依韻和楊直講九日有感

也持黃菊蕊時望白衣人苜蓿從來厭菜莢却乍親護霜雲不散吹帽客何貧莫要悲搖落秋花更勝春

王侍講原叔挽詞三首

衣冠今盛族蘭玉舊嘉聲博古無遺悞遭時有重名魂輿臨水發靈馬向郊鳴  
歸葬商丘外森森柏已成

稽古逢堯舜鏘金侍冕旒生員尊鄭學子舍預夔謀翰苑事猶著岱宗魂已遊  
無情是天地玉樹掩蒿丘

丹旄秋風急清笳曉月寒明衣裋草露素士挽桐棺行哭賓徒盛觀儀里巷殫  
空餘舊編在千載莫能刊

送公儀龍圖知杭州

在昔漢中徵我祖入吳門公今領名都千騎擁高軒與古異出處素節古本原  
江觀白馬潮水花長鯨奔山飄月桂子天香一國繇壯奇已若此纖侈尙亦存  
舊聞其風俗色易而柔溫太守朝駕車闔巷焚蘭蓀太守暮還府燈燭照旗旛  
清歌延冠蓋廣湖浮酒樽成都與餘杭天下莫比論彼爲公故鄉此爲公偃藩  
吏民宜寡事愷悌有謠言

和楊直講夾竹花圖

桃花天紅竹淨綠春風相間連溪谷花留蜂蝶竹有禽三月江南看不足徐熙  
下筆能逼真璽素畫成纔六幅萼繁葉密有向背枝瘦節疎有直曲年深粉剝  
見墨縱描寫工夫始驚俗從初李氏國破亡圖書散入公侯族公侯三世多衰  
微竊買擔頭由婢僕太學楊君固甚貧直緣識別爭來鬻朝質絺袍暮質琴不  
憂明日鐺無粥裝成如得驪頷珠誰能更問龍牙軸竹真似竹桃似桃不待生  
春長在目

送李端明知河中府

才業人終服聰明帝所聞來希段干木去識大馮君金絡鳴津口朱旗點鴈羣  
山河虞舊國簫鼓漢橫汾古堞臨秋月高樓等白雲應同羊叔子緩帶隔囂氛  
依韻和永叔內翰西齋手植菊花過節始開偶書見寄

晝惜日易沈夜惜月易曉重陽種菊花此意爾大好所嗟時節晚又失澆培早  
開榮獨是遲造化徒費巧霜前擁繁萼籬下同隕槁微根發再綠復笑王孫草

莊生語鵬鷖樂不計大小能齊乃有餘但恐知者少常愛阮嗣宗遇酒醉則倒  
杯中得賢趣世上逐金裊

依韻和丁學士陪諸公城東飲

黃花秋草滿荒臺聯馬鳴珂未欲迴上苑自將馳道隔高林空望白雲開薦肴  
已去紗籠翫賜醞新從蟻甕來天氣正清風景好重門雖禁不辭杯

宛陵先生文集卷第五十四

宛陵先生文集卷第五十五

次韻和池守王微之訪別

君榮初出守我老未東歸  
病眼生花早蒼毛似葉稀  
往還從更少談笑暫相依  
不及秋鴻翼能隨向楚飛

寄題資州錢固秀才道勝堂

醮壇舊山下高臥一儒生  
有室羅經籍無心取組纓  
芊肥收歲計柑熟摘霜晴  
暫向京都見添書入蜀城

送黃國博知撫州

逆水乘風上蒲帆滿挂檣  
日行知幾里江渺不分疆  
宿浦隨潮入逢人問路長  
臨川十萬戶勸勞執壺漿

觀韓玉汝胡人貢奉圖

時世重古不重新破圖  
誰畫舊胡人臂鷹捧盤犀  
利水鐵鎖獅子同麒麟  
翹翹雉尾插頭上深目鉅鼻青  
搭巾塗朱點綠筆畫大筋骨  
怒露蠻祠神茜袍白馬

韓公子從何得此來祕珍定應海客遠爲贈中國未覩難擬倫公子自言吳生  
筆吳筆精勁瘦且勻我恐非是不敢贊退歸書此任從嗔

送韓文饒贊喜宰河南

退之曾作河南宰韓氏于今又見君縣政從來人有望家聲不墜世多文後池  
分洛貯藍水高檻看嵩迷嶺雲主簿堂前七葉樹手栽應莫已剗焚

送刁祕校授漣水主簿歸四明省親

桂得嫦娥枝婦得黃姑女直歸東海頭翁媪笑相語何當却之官古縣入平楚  
莫嫌簿書繇百事由區處

依韻和永叔戲作

琵琶轉撥聲繁促學作飢禽啄寒木木蠹生蟲細穴深長啄敲鏗未充腹擺絃  
疊響入衆耳發自深林答空谷上絃急逼下絃清正如螿螂捕蟬聲坐中賓歡  
呼酒飲門外客疑將欲行主人語客客莫去彈到古樹裂丁丁內賓外客曾未  
聽乍聞此曲無不驚還憶昭君入胡虜烏孫帳下邊馬鳴安知如今有樂事能

使女奚飛玉觥女奚年小殊流俗十月單衣體生粟言事關西楊廣文廣文空  
腹貪教曲曲奇譜新偷法部妙在取音時轉軸翰林先生多所知又笑畫圖收  
滿屋不肯那錢買珠翠任從堆插階前菊功曹時借乃許出他日求觀龜殼縮  
我嗟老鈍不如渠幸得交朋時借娛但樂休計有與無

送吳仲庶殿院使北

漢朝重結單于好歲遺名臣禮數增紫鼠皮裘從去著飛龍殿馬借來乘天寒  
將遇積中雪鼻息暗添髭上冰定見南鴻起歸思家書欲寄不堪憑

送呂沖之司諫使北

虜人多竊朝廷禮譯者交傳應對辭羊酪調羹尊漢使氈堂舉酒見闕氏矇矓  
白日穿雲出漉漉黃沙作霧吹知去燕京幾千里胡笳亂動月明時

送孫隱之都官通判秀州

柳條枯落盃不折意徘徊泛汴趨殘水到吳看早梅無耽聽鶴唳有信寄鴻來  
聞說閭亭改靈光化劫灰

依韻和王平甫見寄

兄爲太守兩輪朱仲泛吳人燕尾鱸且看洞庭多橘柚莫懷江國有枌榆少游山水殊非俗老愛詩書又似愚百事輸君休問我風沙不比在雲湖

得王介甫常州書

斜封一幅竹膜紙上有文字十七行字如瘦棘攢黑刺文如溫玉爛虹光別時春風吹榆莢及此已變蒹葭霜道途與弟奉親樂後各失子懷悲傷到郡紛然因事物舊守數易承蔽藏搜姦證繆若治絮蚤蝨盡去煩爨湯事成條舉作書尺不肯勞人魚腹將魚沈魚浮任所適偶爾及我爲非常勤勤問我詩小傳國風纔畢葛屨章昔時許我到聖處且避俗子多形相未卽寄去慎勿怪他時不惜傾箱囊知君亦欲此從事君智自可施廟堂何故區區守黃卷蠹魚尙恥親芸香我今正值鴈南翔報書與君倒肺腸直須趁此筋力強炊稷烹鱸加桂薑洞庭綠橘包甘漿舊楚黃橙綿作瓢東山故游攜舞孃不飲學舉黃金觴谿如罨畫水泱泱刺船靜入白鷺傍菱葉已枯鏡面涼月色飛上白石牀坐看魚躍

散星芒左右寂寂夜何長  
烏棲古曲傳吳王  
千年萬年歌未央  
莫作腐儒鍼膏肓  
莫作健吏繩餓狼  
儻如龔遂勸農桑  
儻如黃霸致鳳皇  
來不來亦莫愛嘉祥  
司馬君實遺甘草杖  
美草將爲杖  
孤生馬嶺危  
難從荷篠叟  
寧入化龍陂  
去與秦人采  
來扶楚客衰  
藥中稱國老  
我嬾豈能醫

逢雷太簡殿丞

長安初見君君頷微有鬚  
後於河內逢秀俊  
美頴胡又會在桐鄉  
談詩多孟盧  
學書得天然  
鐘王不能奴  
荏苒三十載  
邂逅遇京都  
朝接北扉飯  
暮應西垣呼  
坐中如夢寐  
相語故人無  
昔由處士召  
胸懷開廟謨  
今看髭已白  
議論恥非夫  
拜章陳時事  
皆與相意符  
其識固不淺  
其用當亦殊  
人多惜老大  
我復歎羈孤  
終朝重相笑  
爲君傾酒壺

雷太簡遺蜀鞭

蜀道山之峭壁兮如快刀  
一削平無痕  
其間春雷驚龍走  
竹根迸石垂  
虺尾骨

節瘦密風霜吞野夫采之維懸蔓分寸脫死持還奔他人不可得此物乃重太守公侯孫獻來一錢不肯要只乞斗酒抱歸村太守立性豈詔貴將贈故人唯義存我騎瘦馬固莫稱破韉爛轡沙塵昏明日試執趨君門孰不怪視竊笑言  
得雷太簡自製蒙頂茶

陸羽舊茶經一意重蒙頂比來唯建溪團片敵湯餅顧渚及陽羨又復下越茗近來江國人鷹爪夸雙井凡今天下品非此不覽省蜀薺久無味聲名謾馳騁因雷與改造帶露摘牙穎自煮至揉焙入碾只俄頃湯嫩乳花浮香新舌甘永初分翰林公豈數博士冷醉來不知惜悔許已向醒重思朋友義果決在勇猛倏然乃以贈蠟囊收細梗吁嗟茗與鞭二物誠不幸我貧事事無得之似贅癭

送呂寺丞希彥邠州僉判

自有仲宣樂從軍仍近親關河歷周鄭風雪過咸秦原上方驅馬鞍傍忽起鶉世家傳釣玉重問渭川濱

送施司封福建提刑

命使得才臣欽刑聖主仁銅苗休問發田種去教親白茗出溪上紅蕉連海濱  
輕車莫道遠詔意重生民

江鄰幾暫來相見去後戲寄

低頭拜我蒼顛翁來如飛鳥去如風一夕共飲斗柄北平明已向函關東衆中  
舊騎跛鼈馬塞下新買連錢驄疾驅似逐鄧林日不肯暫住行何窮

送徐無黨歸婺州

吳蠶吐柔絲越女織美紈機杼固已勤刀尺誠獨難裁縫失分寸長短爲損殘  
嘗聞仲山甫能補帝袞完袞完民衣足天下無苦寒徐從信都學染翦宜弃冠  
彼實山甫徒爾亦非絳剡東歸道自勝人誰故時看

依韻和永叔內翰酬寄揚州劉原甫舍人

東望淮海間恨無鴻鵠羽鴻鵠日已飛風雪歲將暮憶聽談老莊達生無恐懼  
我今齒髮疎何異樹有蠹辭別不必道俛仰已成故書問雖惟爲夢寐則往屢  
乘桴思仲尼好勇慚季路願希隆中臥不是邀三顧二公廊廟才酬寄封尺素

皋夔久相稱舜禹時已遇舉杯向明月此意聊可寓

和韓欽聖學士襄陽聞喜亭

亭欄下望漢江水淨綠無風寫鏡明日脚穿雲射洲影槎頭擺子出潭聲檣帆  
落處遠鄉思砧杵動時歸客情使者徘徊有佳興高吟不減謝宣城

許仲塗屯田以新詩見訪

許氏世工詩渾棠格力微獨能兼古律無不是珠璣捧卷光蓬室停車照竹扉  
陽春復高調自昔和人稀

荅祖擇之惠黃雀鮓

李白勸爾莫逐炎洲翠亦莫近吳宮燕爾不聽我言禍患今乃見吳火時雖無  
越羅日生變空知稻梁肥豈悟杯盤薦我不聞爾聲謬成先生饌咀嚼勿言非  
雉鴈猶充餼

覽顯忠上人詩

昔讀遠公傳頗聞高行僧廬山將欲雪瀑布結成冰尋跡數百載歷危千萬層

師來笑買島只解詠嘉陵

依韻和吳長文舍人對雪懷永叔內翰

紫禁低雲拂綺櫳西垣人憶玉堂翁  
捫髭覓句方傳詠著樹成花尙舞空  
不管因風吹塞外任教飛片落杯中  
曉來城郭遮無路阮籍驅車莫歎窮

送王巖夫祕校通判滑州

昔聞信都侯嘗作畫舫齋空戶兩向  
闢尊席長對排左顧樹若岸右盼堵成崖  
旣無風波虞但與物景諧一從信都去來者  
趣意乖屋室改庫廩花木爲薪柴  
君當訪其蹟更葺安舊碑記石儻尙在塵土  
加洗揩然後釀井泉吟醉前人偕  
寄言靈河守高此別乘懷

和宋次道荅弟中道寄懷

陸家兄弟苦西東黃耳傳書近已通  
共歎流年同轉轂各驚華髮似飛蓬  
河冰夜合知霜勁寒霧朝開見日紅  
臘盡春來又相遠江南江北望歸鴻

元日閣門拜表遇雪呈永叔

六花隨表拜東廂庭下遙呼萬歲長王會圖中陳璧馬漢官儀裏濕旂常因風  
亂絮霑螭首似鵠輕毛落井牀素髮垂冠少顏色衆人休笑老爲郎

王樂道太丞立春早朝

近臣頭上黃金勝殿前拜賜東風應蓼芽疏甲簇春盤肉抹長絲何旦旦寬衣  
武卒輦至庭人歸下箸殊難稱我家無火甑生塵柳絲花空著興空著興將  
底爲但願得米資晨炊不管飛雲與麥宜千官隊中身最卑五日一謁前旒垂

上元夕有懷韓子華閣老

一歲老一歲新年思舊年東樓嘗共望九陌聽爭先白髮更中笑舞姝應轉妍  
追隨都已倦強對月明前

錢君倚學士日本刀

日本大刀色青熒魚皮帖櫛沙點星東胡腰鞘過滄海船帆落越棲灣汀賣珠  
入市盡明月解條換酒琉璃餅當壚重貨不重寶滿貫穿銅去求好會稽上吏  
新得名始將傳玩恨不早歸來天祿示明游光芒曾射扶桑島坐中燭明魑魅

遜呂虔不見王祥老古者文事必武備今人褻衣何足道  
干將太阿世上無拂拭共觀休懊惱

依韻和杭州梅龍圖入懷見寄

東都車馬苦飛羅南國桅帆喜過淮船背插旗風自展沙頭迎浪雪相排  
白魚已薦糟增味紅稻新炊粟馱懷定似謝公迎遠岫錢塘應合有高齋

送周直孺祕校和州都曹

箭頭破賊棄不爲筆端射策取桂枝殿前脫袍改舊色庭下折腰甘去時  
歷陽郡小太守好督郵官閑衆吏嬉江邊竹園啼竹雞竹裏種花春過遲  
東望望夫雲脚垂煙雨隔岸風檣敲濕鴈不起沙上嘶君思歷亂如盎絲

宛陵先生文集卷第五十五

珍做宋版印

宛陵先生文集卷第五十六

送謝師厚太博通判汾州

嚙官吳越飽秔稻  
況住南陽多水田  
北登太行入汾曲  
正穫穰稔秋風前  
晉人朴厚自寡訟  
軟炊玉粒何鱗鮮  
君方少壯齒頰健  
甘美不負經腹便  
有意南飛寄我信  
滿川鳴鴈下連連

依韻和永叔都亭館伴戲寄

去年鑿宿得聯華  
二月牆頭始見花  
今日都亭公感物  
明朝太學我辭家

送李君錫學士使契丹弔慰

昨日匈奴來告哀  
殿門不識桃花開  
今聞君去作弔使  
正值鴈嗥從北迴  
風卷黃雲無遠近  
山留白雪猶枯荑  
歸看車馬汗流沫  
逃暑爲傳河朔杯

送邵裔長洲主簿

姑蘇城頭烏哺時  
長洲草綠春袍歸  
魯桑葉小蠶出遲  
吳田水暖牛耕肥  
里胥爭迎縣寮喜  
入門先自易綵衣  
拜親然後及王事  
簿書豈得長相鞿

送薛公期比部歸絳州展墓

風雨梨花殘松柏墓門晚嗣子千里駒羊腸九折坂春裘不畏寒行路未爲遠  
舊來河內守父老將衣挽

送次道學士知太平州因寄曾子固

春浦楊花撩亂飛春江魴魚來正肥采石新林兒女去茭白蒲牙艇子歸歸令  
煮魚不得熟已望使君船上磯上磯亦不待潮應爭牽篋纜泥汗衣姑熟溪頭  
槌大鼓紅抹鞞刀趨俯僂牙兵可擬岸傍蘆森森甲立雄南土更得西州謝法  
曹新詠定多傳樂府

依韻和劉原甫舍人揚州五題

時會堂二首

歲貢蜀岡茶似蒙  
頂茶能除疾延年

今年太守采茶來驟雨千門禁火開一意愛君思去疾不緣時會此中杯  
雨發雷塘不起塵蜀崑岡上煖先春煙牙才吐朱輪出向此親封御餅新

竹西亭

結雨竹西若若川揚州歌吹思當年劉郎若向風前唱夢入青樓事惘然

春貢亭

夢谷浮船穩且平泊登岡頂看茶生始從官屬二三輩時聽春禽一兩聲

蒙谷

茗園葱蒨與山籠一夜驚雷發舊叢五馬留連未能去土囊深處路微通

崑丘

寺卽煬帝離宮

隋家宮殿昔初成不道荒涼獸迹行今日知來高處望山川興廢使人驚

送江陰僉判晁太祝

去無珠履爲上賓進船申浦憶春申江田插秧鶉姑雨絲網得魚雲母鱗青天折桂香未滅紫豉煮莼甘更新平時況可樂風月吳物信美聊前陳

送晁質夫太守知深州

蕪蕪問古亭春入饒陽城豆粥君王遠壺漿刺史迎地涼宜牧馬塞近慣調兵爲寄井泉石老來思目明

送少卿知宣州

先歸  
書上

汴水清明下宣城太守行鴨頭吳蕩綠燕尾楚船輕  
族本三陽重詩從小謝清州民還最喜門下舊通名

送朱表臣職方提舉運鹽

蜃竈煮溟渤航鹹播楚越官權利言盈盜販弊相汨連艘以轉致攪灰或沈沒  
雖使日鞭鯨未易窮姦窟朝廷用朱侯提職欲無闕侯因許專畫拜跪陳其說  
曰臣有更張敢以肝膽竭荆湘嶺下城恃遠不畏罰堂堂事私賈遮吏遭驅突  
願使商自通輸金無暴猝淮江且循常約束備本末國用必餘貲亭民無滯物  
事下丞相府論議不可拔從之東南蘇拒之財賦遏聽侯侯往施所便黔黎活  
五味既和調萬里銷狂悖汴水桃花時犀舟順流發過淮逢絮觥泊岸採蘆蕨  
挂帆趨浪頭應不勞歲月

依韻和李君錫學士北使見寄

行色見車馬爲之具壺觴暫辭甘泉宮遠奉左賢王蒙茸春裘薄匝匝金絡光

唯知君命重不數沙路長魯酒雖入脣胡笳易迴腸歸來立螭頭言動書不忘  
送張山甫祕校歸緱氏

去年來折桂今年來娶婦得意春風前還家寒食後蓬巷鬧雞犬藤花蔭井白  
緱山白醪醇重酌高堂壽

送江東轉運楊少卿

世言楚使者乃是漢名卿曾欲察黃綬但能勤列城江山無改故草樹幾更榮  
有意息民甚不同求羨盈

宜春宴射篇李駙馬請賦雜言

風雨未過桐華時宜春苑中梨萼披天子賜宴羣臣嬉少年都尉方追隨暮歸  
遲喜聯留後兄弟雙弓射熊皮侯宗戚族坐上少伯仲相顧驚恩私鳳皇樓高  
玉簫吹金絡駁馬不肯騎自戒危溢作後規何郎莫媿書與詩

送王樂道太丞

相如旣擊劍仲宣亦從軍二人當其時皆以能賦聞韓公守武垣犀兵若屯雲

幄中欲寄畫才智莫有君請之天子所朝奏夕離羣爲沽斗酒飲爲買赤鯉焚  
魚盡酒亦盡醉起衣袂分

送楚屯田知扶溝

客亭多少路花信幾番風折柳贈新翠種桃思舊紅淵明節已異潘岳趣還同  
政治有餘力歸來辭賦工

呂山人同荆供奉見過

街上春泥踏始開山人忽同供奉來老奴行遲報我晚怒氣欲拔庭中槐聞說  
道心調伏久等閑休要起嫌猜

觀劉元忠小鬟舞

桃小未開春意濃梢頭綠葉映微紅君家歌管相催急枝弱不勝花信風

次韻奉和永叔謝王尚書惠牡丹

大梁有公子洛陽有游俠昔時意氣相憑陵不問興亡事栽插栽紅插綠鬪青  
春春風與開春雨颯兩都富貴不相殊走馬尋芳何合雜只聞年少竟爭先摘

葉艷花身更捷安知遺愛舊留守馳獻百葩光  
滄滄尚書最重歐陽公盈盤分去蜂偷獵但能爲樂飲醇酒何必署名黃紙牒翰林職清文字稀不比外官煩  
應接曩公爲花曾作譜端相用意隨蝴蝶擬王擬妃姚與魏歲歲年年千萬葉還將顏色定高低綠珠雖美猶爲妾從來鑿裁主端正不藉娉婷削肩胛舊品  
既著新品增偏惡妒芽須打拉嘗憶同朋有七人每失一人淚緣睫唯我與公  
今且存無復名園共攜榼公因尚書戴紅紫白髮欺公生匠匠磨墨揮毫與不  
衰作詩坐使劉曹怯副本能傳幸一觀口誦舌搖徒囁囁

送王郎中知江陰

持歸漢省青綾被去看吳都白馬潮疊鼓渡江寒浪伏鳴鏡入境野雲飄魚穿  
楊柳誇鮮膾人采芙蓉學細腰家有二槐爲太守弟兄誰似李文饒

送閻仲孚郎中南游山水

蜀山難於上青天聞之李白爲舊傳蜀客往返曾又然奇峯又與三峽連巫陽  
神女暮爲雨飛入楚臺王夢旃相如揚雄不道此宋玉景差其賦偏西州才子

邯鄲守懷章往代尙踰年家住岷峨多此宦乘閑因借下江船未浮洞庭沅湘  
去還探禹穴希馬遷春申樓觀已不見子胥怒濤猶滿川錢塘太守同鄉里一  
見君來顏已喜甘饌香脆與君游詩貯篋囊攜不起浣沙溪頭西子家自尋錦  
石菖蒲花掃歸成都與士誇君平曾已悟星槎

次韻和永叔嘗新茶雜言

自從陸羽生人閒人閒相學事春茶當時採摘未甚盛或有高士燒竹煮泉爲  
世誇入山乘露掇嫩觜林下不畏虎與虵近年建安所出勝天下貴賤求呀呀  
東溪北苑供御餘王家葉家長白芽造成小餅若帶鈴鬪浮鬪色頂夷華味久  
迴甘竟日在不比苦硬令舌窅此等莫與北俗道只解白土和脂麻歐陽翰林  
最別識品第高下無敬斜晴明開軒碾雪末衆客共賞皆稱嘉建安太守置書  
角青翦包封來海涯清明纔過已到此正見洛陽人寄花兔毛紫盞自相稱清  
泉不必求蝦蟆石餅煎湯銀梗打粟粒鋪面人驚嗟詩腸久飢不禁力一啜入  
腹嗚咿哇

次韻再和

建溪茗株成大樹頗殊楚越所種茶先春喊山搯白萼亦異烏觜蜀客誇烹新  
鬪硬要齧盞不同飲酒爭畫蛇從揉至碾用盡力只取勝負相笑呀誰傳雙井  
與日注終是品格稱草芽歐陽翰林百事得精妙官職況已登清華昔得隴西  
大銅碾碾多歲久深且窳昨日寄來新鬻片包以籜箒纏以麻唯能騰啜任腹  
冷幸免酪酲冠弁斜人言飲多頭顛挑自欲清醒氣味嘉此病雖得優醉者醉  
來顛踣禍莫涯不願清風生兩腋但願對竹兼對花還思退之在南方嘗說稍  
稍能啗蟆古之賢人尙若此我今貧陋休相嗟公不遺舊許頻往何必絲管喧  
咬哇

送許當職方通判泉州

乳鳥不遠飛乳獸不遠遊異類尙有戀人獨安所求許侯恰爲郡乃甘貳一州  
得以奉雙親時物供膳羞竹箭水順疾紅旗插歸舟歸舟莫苦急睢陽多舊儔  
丞相正喜士尊酒應爲留清源六千里到日魚蟹秋

宛陵先生文集卷第五十六

宛陵先生文集卷第五十七

送葛都官南歸

不羨新爲赤縣尹惟羨暫向江南歸江南冪冪梅雨時風帆差差並鳥飛  
曾竿夾岸長若梳水籠畜魚鮮且肥家在千山古溪上先應喜鵲噪門扉

楊樂道留飲席上客置黃紅絲頭芍藥

洛陽賣牡丹江都買芍藥賣與富人歡買爲游子樂萬絲必同心千葉必同萼  
五色相淺深百金相厚薄栽培動經年風雨便成昨蕭條洛陽城索寞江都郭  
賴有一春花能無十千酌朝看門擁車暮見門羅雀嘗聞月底人欲把月桂斫  
要使清光多四海意開廓我亦愛明月常滿不願落上弦過楊侯乃值寒雨作  
共飲三四人不覺傳鳴柝持葩金谷豪朱黃何灼爍還思溱洧上士與女相謔  
實此香草芳請我賦其略酒闌爲追詠思拙筆屢閣

項羽

羽以匹夫勇起于隴畝中遂將五諸侯三年成霸功天下欲滅秦無不慕強雄

秦滅責以德豁達歸沛公自矜奮私智奔亡竟無終

送陳郎中知和州

藹藹尚書郎出爲二千石伯父歷將相兄弟皆烜赫前罷永嘉守民俗遮阡陌  
獨將海松歸夸與都下客今去烏江邊寂寞空舊跡當求虞姬草無風舞隨拍  
城頭可曠望千里波月白俱助使君歡平時遣吏責

送薛十水部通判并州

并州自古近胡地牛酒常行十萬兵少尹曾爲五府辟將軍況有舊家聲桑麻  
故已知風俗丘隴何須訪姓名聞說至今猶好馬試求安穩衆中行

寄題西浴致仕張比部靜居院四堂

張侯歸靜居堂宇結四隅堂中何所有書畫羅籤廚四堂各異名各異義亦殊  
夷心與會真內以道德娛清白及金蘭外爲子孫模西南夜落蟾東北朝生烏  
天門風相通盛衰理可無舊爾松檜樹間之花石株雨晴氣候佳隣里或來俱  
遣摘班林筍共持香粳盃飯畢循徑行不使僮僕扶所至舊衣坐遍歷日過晡

時遇園果熟甘漿而粉膚就枝撿鮮美咀味銷冰酥以此樂歲月豈是忘形軀  
禮法不我棄勞吝不我紆上不愧二疎下不泛五湖自有逍遙趣幸世遭唐虞  
三峽蠻溪上千山楚俗兼婦人樵入市官井貨專鹽魑魅或爲患獼猴常可嫌  
君能厚風化男子使腰鎌

送江西轉運馮廣淵學士

五月江南行南風江惡遡乘潮雖有信不過溢城去船經香爐峯峯前須暫住  
三年少尹勞始得看瀑布到官未必閑舉察憂財賦迴思廬山傍塵土已生慮  
尙存滕王閣無忘一登顧

依韻和永叔景靈致齋見懷

翰林文字本雄強況復齋祠向靜坊高樹黃鸝無去意深廊朱幕動微涼不嗟  
門外塵沙苦只覺壺中歲月長庭下陰苔未教掃榴花紅落點青蒼

雜言送當世待制知揚州馮

廣陵老人爭持壺酒朝言送少年使君暮言迎少年太守少年俱是玉墀人文  
章快利生銅吼莫作蕪城賦事往復何有莫聽愁康琴商聲豈堪久今當太平  
非不偶星宿煌煌羅北斗揚州古富變荒涼萬俗一心依父母地包淮海江湖  
寬貨走荆吳楚越厚開釀剗羊願遇賓天下汙汙不輕口

送蘇公佐屯田知單州

柏上有羣鳥一鳥飛向東方棲城頭與人司吉凶八月禾已穫九月黍已春竟  
持美酒相慶樂年豐借問何能爾時平無困窮

王平甫惠畫水臥屏

臨流別君時羨君觀吳潮君行識我意遣畫一幅綃畫作繞牀屏滔滔隨驚颺  
前浪雪花卷後浪白馬跳宛然千萬重不似筆墨描窰亞亂我目坐臥疑動搖  
夜燈照河漢如有織女招朝日下天窗東海無秦橋秦橋不可度織女不可邀  
但慕乘桴公空能誦唐堯嘗聞挾柘彈意必在食鶚終當五湖上歸去學漁樵

送萬州武寧段尉希元

相見三十載喜君始成名新袍照江綠白髮憎鑑明臨水必觀魚獨傷魚命輕  
朝爲淵底游暮爲釜中烹彼方路艱遠其民亦天氓餒之則爲盜非是惡厥生  
捕多勿夸能能在不犯兵

次韻答黃介夫七十韻

春風不擇草萬卉皆發萌盛夏一長養秋實俱與成春粒以蒸炊刈枯以煎烹  
工師調五音不問咸與諛自取衆律和黍谷動華英可以薦祖廟可以陳帝庭  
良將統萬卒所向若驚霆戰鬪衆益勇號令夜益明破敵必拉朽不見堅陣橫  
我觀欲物際亦在農力興我觀合奏時亦在考擊并我觀成功日亦在間得情  
草木有美惡造化無喜憎五聲有高下一致不可評三軍用貔虎不較蚊睫螟  
大君設時網廣海無漏鯨磊落黃夫子爲學不自輕四十登賢科良賈售百朋  
得志豈計晚成名等衆榮舊交半存歿新知慕徒傾老鶴晴一唳隨風無近聲  
好論古今詩品藻笑鍾嶸欲掃李杜壇未審誰主盟我衰百事倦白首聊窮經  
兩目生昏花猶勝張籍盲讀書愛日永秉扇自驅蠅但惡亂我思非與小物勅

清颺颯然來喜得如弟兄散帙空堂上垂冠髮星星載誦堯舜篇幸今時太平  
不學遁世士投竿泛東溟不襲貪生人煉氣喻日精不羨富貴翁歌吹滿重城  
獨守螢火光莫擊蟾蜍晶人生轉頭間未免一銘旌區區逐甘鮮鼎鼎夸佩纓  
安知西山餓熟識絲上耕彼勿歎鳳衰此正歌鴻冥分合歿窮巷迹澀蹈高閔  
妻子易爲飽粟帛不足營豈乏一器飯豈乏一杯羹肯爲濁河濁願作清濟清  
韓愈嘗有言百物皆能鳴特稱孟東野貧篋文字盈到死只凍餒何異埋秦阮  
今我已過甚日醉希步兵神仙多羽翼一一飛蓬瀛乃知無道氣難可強留形  
鄙性實樸鈍曾非傲公卿昔隨衆一往或值謗議騰曰我非親舊曰我非門生  
又固非賢豪安得知爾名是時聞此言舌直目且瞠俄然我有答賢相持權衡  
喜士同周公其德莫與京我去豈不送我往豈不迎自爲筋力寡路遠艱於行  
未若歸教子遺金徒滿籩歲月苦易得顏貌日可驚身雖厭役役心亦遠硜硜  
歸思吳州橘夢憶楚江萍試看兩圍棋白黑何所爭朝脫泥塗困暮失雲衢亨  
物理旣難常達生重飛觥曾以文豹章遠喻子懷能曩者恃貴勢悔說烏烏靈

烏靈反見怒終恨屈此誠當時語頗錯盍呼爲大鵬於茲儻遇之應解頸頰頰  
韻盡意未盡且用此報瓊

永叔內翰見索謝公遊嵩書感歎希深師魯子聰幾道皆爲異物獨公  
與余二人在因作五言以敘之

昔在洛陽時共遊銅駝陌尋花不見人前代公侯宅深堂鎖塵埃空壁鬪蜥蜴  
楸陰布苔綠野蔓纏石碧池魚有偷釣林鳥有巧射園隸見我來朱門暫開關  
園婦見我還便掃車馬跡何以掃馬跡實亦畏他客我輩唯適情一葉未嘗摘  
他人或所至生果不得惜又憶遊嵩山勝趣無不索各具一壺酒各蠟一雙屐  
登危相扶牽遇平相笑噓石擣雲衣輕巖裂天窗窄上飲醒心泉高巔溜寒液  
下看峯半兩廣甸飛甘澤夜宿岳頂寺明月入戶白分吟露氣冷猛酌面易赤  
明朝循歸塗兩脛痛苦刺日旰就馬乘香草路迫阨却望峻極居已與天外隔  
薄暮投少林漱濯整冠幘碑觀巡幸僧指古定空壁誓將新詠章燈前互詆摘  
楊生護己短一字不肯易明年移河陽簿書日堆積忽得謝公書大夸遊覽劇

自嵩歷石堂蘚花題洞額其文曰神清固非人筆畫乃知二公貴逆告意可贖  
遂由龍門歸里埃環數驛我時詩已答或歌或辨責責我不喜僧性實未所獲  
凡今三十年纍冢拱松柏唯與公非才同在不同昔昔日同少壯今且異肥瘠  
昔日同微祿今且異烜赫昔同騎破韉今控銀轡昔同自謳歌今執樂指百  
死者誠可悲存者獨窮厄但比死者優貧存何所益

送謝師直祕丞通判莫州兼寄張和叔

河湟宿兵地勁勇天下聞侵疆古甚熾薄伐詩所云往今勢且異利害理頗分  
遠以塘設險遂輕甲屯雲昔傳嘗膽國能破怒蛙軍越雖隔大江吳遭若枯焚  
實由恃阻懈抉目悲伍員夫子負美才議論高不羣況有令兄弟今亦貳河汾  
助守戒不虞慎勿倚和獯張侯爲刺史大族獨此君法明而不奇可共飾以文

送白秀才福州省親

士憂行不脩不憂祿不及之子久好學何患名未立聖時開賢科子獨不肯入  
固非遠仕進服期難赴集南歸慰親顏道路正暑濕悠悠幾千里赤日薄行笠

暫憩青林下，賴有寒泉汲。漱齒去塵埃，土風須漸襲。

送温州楚屯田

鴈蕩山頭鴈如隨，太守來秋風既與至。春日定同迴，上宰無忘舊。明時必用才，白於章句老。經冊向螢開。

送僧在己歸秀州

前歲嘉興火僧居，化劫灰四方持鉢去。千里渡江來，心向王城講。緣從海客迴，水天聞唳鶴。不復有塵埃。

送祖印大師顯忠

黃紙賜祖印，鑄名不鑄金。力笑蘇季子，責望小人深。渡江見海月，秋光上遙林。團團冰玉盤，瑩然如禪心。

題譯經院同文軒

有書無異文，有車無異軌。貝多得旁行，白馬來萬里。清軒延高僧，一歲譯幾紙。譯罷坐焚香，庭草灑寒水。

和江鄰幾學士得雷殿直墨竹二軸

昔見雷子之小篆今見雷子之墨竹節瘦已似蛟龍孫葉暗曾無鳳皇宿江翁  
得之尤愛憐作詩寫意酬雙軸挂在空堂坐臥看如玩蕭蕭巖畔綠莫疑昏黑  
眼生花松煤濃色切寒鴉不問主人兼客至明朝騎馬到君家

永叔內翰見過

我居城東隅地僻車馬少忽聞大尹來僮僕若驚鳥入門且坐笑豐頰光皎皎  
問我餐若何依舊抱糜麩問我詩若何亦未離纏繞我庭有藜莧不堪秣騾裹  
我壺無醪醴不能犒介侶乃喜百事稀來此與世矯固非傲不往心實厭擾擾

韓子華內翰見過

但見公軒過未見我馬去我懶宜我嫌公會不我惡秋雨天街涼蕭蕭入槐樹  
遙聽高車聲騶導門前駐僕夫驚入扉遽曰能來顧度量何其宏始終不改遇  
索以新詩章徧覽日欲暮誠慚兜離音唐突韶與濩明朝當負荆人莫譏貴附

送董察推赴江寧

金陵從事去不歎食無魚尺鯉日登俎故鄉時得書衰荷摘短袂秋蘚曳長裾  
若見府公問年來嬾更疎

次韻和司馬君實同錢君倚二學士見過

棲棲太學官日厭塵坌積朋游絕經過都未昧相識幸得養疎慵不能事役役  
天京二賢佐向晚忽來覲笑我似盧仝環然空四壁只欠長鬚奴訴尹惡少摘  
移榻近簷楹談詩俄至夕迴車閭巷隘跛馬愁所歷平明看蒼苔已覺生轍跡  
次韻和錢君倚同司馬君實二學士見過

府僚忽方駕乃知決訟餘大尹不苛察羣吏不牽拘嘗稱二三賢助治無偏隅  
新晴乘此涼行行過我居何以延君子唯有滿牀書何以解君頤淡句無足娛  
何以留君久燈燭已照塗登車莫言遠騶從美且都夾道行人止按轡寧馳驅  
我老焉所羨送子立躊躇

送閬州駐泊荆供奉

青天不可上蜀道未嘗行每說襄斜險唯聞猿鳥聲去爲千里客自握一方兵

所重恩威立無將遠戍輕

江鄰幾沈文通二學士見過

東城車馬多巷無蹄與轍如何二賢豪侵晨顧衰茶喜言雨後涼早暮脫炎熱  
愛子屋室靜塵土都已絕不唯清耳目亦粗養愚拙江碑讀頭陀沈賦賞雌霓  
固知世德高學問冠時哲我慚於其閒荆華參蟻垤然推鵬鷄分自足不少別  
君歸邀此吟把筆強搜抉

送壽州司理張元輿

清川夜流明月光城上有烏啼女牆月明不掩斗與氣烏啼未歸雲點霜霜寒  
月冷古時獄下有苔蠹之雄銜水方軒眉大靈智見我西北天門傍自言昔有  
切玉寶嗟今非後百鍊鋼用之補履亦何益穎脫未如錐處囊誰能爲封華陰  
土背負七星生焜煌君去味我書此意莫歎淮水來湯湯

宛陵先生文集卷第五十八

吳長文紫微見過

豈敢以貧賤而輒傲賢貴但恨門闌遙赫日去可畏瘦馬汗常流寸步出無謂  
是以逾十旬景慕腸欲沸近因秋雨來纖纖有涼氣九陌可以行輕服可以衣  
方將事請見瘡足痛苦躄忽在騶騎過顏厚言莫既尙期新醪熟還往襲經緯  
乃知君子德曩分替則未

范景仁紫微見過亦謁不遇道上逢之

朝游翔鳳池暮直中書省無由見顏色況乃當畏景退朝八月朔因得修造請  
高閣一何新未歸閭巷靜版刺留姓名不遑佇軒屏驅馬返我廬道逢騶從整  
斂轡莫敢行顧望立俄頃還家稚子言有車來炳炳傳是紫微人將迴猶引領  
如何互相乖徒自想形影更待秋風高緩步時往省

送王道粹學士知亳州

古者二千石高車駕青驪車前陳曲蓋車後建朱旗金鼓鳴兩旁壺漿擁通達

所付重威惠所仰撫惇嫠景毫實鉅屏往俾國相之國相稱疾還正值民阻飢  
朝廷急恤養選守莫與宜君嘗典海陵政績爲衆推今授輒辭命大夫多飛綏  
屢上不得請飭馭俄輕齎旣體堯舜仁又答稷禹知八月風漸高木葉將披披  
郊原棗已剝場圃黍可治必期寬賦斂無乃息疲羸何當過苦縣肯暇觀舊碑

和江鄰幾學士畫鬼拔河篇

蒲中古寺壁畫古畫者隋代展子虔分明八鬼拔河戲中建二旗觀却前東廂  
四鬼苦用力索尾拽斷一鬼顛西廂四鬼來背挽雙手碓下抵以肩龍頭魚身  
霹靂使持鉞鎮立旗左偏拔山夜叉右握斧各司勝負如爭先兩旁搗鼓鼓四  
面聲勢助勇努眼圓臂梟張拳擊捧首似與暴謔意態全當正大鬼按膝坐三  
鬼帶鞮一執旃操刀擐囊力指督怒髮上直筋舊纏虎尾人身又踣顧疾藜短  
挺金鎚堅高下尊卑二十四二十四鬼無黃泉角錐競強欲何睹曷不各各還  
荒埏

送制置發運唐子方學士

本以諫諍稱今以財賦用所爲各有能何必於茲重東南周萬里海陸竭耆種  
斂之爲公上豈是與民共民方苦久弊將缺太平頌有利得設施無不可抑縱  
大都守繩墨曷異虱處縫從來許國心曾未苟祿俸願無輸羨餘終亦歸侍從  
次韻和司馬學士慮囚

縲囚往慮問勤恤意不息猛虎在陷狝挑尾尙求食常憂有註誤非罪懼暴迫  
藹藹萬乘都憧憧四方客一遭纖微豐鑑垢莫磨拭是以大君心惟恐橫抵摘  
前法著以律後法編以冊每當炎蒸時獄器用刷滌應無古冤血地下化爲碧  
我今因牽吟聊以肝膽瀝刑人皆得辜不似尤地脈間歸卽解鞍浣手嫌控勒  
昔言善烹魚必先漑釜鬲願言保兢慎切勿厭此役夜月可留翫清尊可獨適  
一榻寬且平羣動都已寂可用休其勞不休庶終夕

和吳沖卿江鄰幾二學士王景彝舍人秋興

我謂蓬瀛客清切不畏炎及觀秋興篇無遠此窮閭乃知天地大節候無愛嫌  
寒不爲富減暑不爲貧添向者遭蒸炊靡不同炮燂西風吹雨至涼氣何纖纖

霈然沃萬物不更畢宿占紈扇捉苦倦盤冰得仍厭蠅癡驅又來蚊嚙喙猶尖

絺衣不復浹醅醪壓初甜客有憎壁蝎詩吳客有困鞞襜詩江一以礫為喜一以嬾

自謙唯有螭頭人朝立宮殿簷威誇樓觀高又極星斗瞻詩王予慚異羣公歸意

如陶潛自念菊將坼復思禾可鎌春禾作釀熟獨邀影與蟾此樂雖易有彼榮

安得兼

送覺上人歸湖州富相國與紫衣

古寺一盂飯弊衣三歲塵相應維帝祝子已得袍新范叔復何望原生甘自貧

歸看五湖上終有泛舟人

送閔郎中知池州

一送池陽守頗懷當日遊青山臨岸盡翠水入江流楚舊茅為貢燕來鴈報秋

牧之登覽處故事待君修

和吳沖卿學士省中植菊

園果未熟實未墜野卉已老葉未瘁菊叢是時方發榮潭上籬邊俱有為一從

潭島輔長年一自籬根圖暫醉今將移近省中蘭壅培早與陶潛異黃土肥濃  
沃井泉朱欄屈曲侵階地勁風不到何動搖清露能霑誰著意看看重九各登  
高金藥滿頭無所忌及此頻邀同舍歡向來莫羨鍾繇賜我家蓬藿不足云強  
對嘉章顏起愧

張仲通追賦洛中雜題和嘗歷覽者六章

伊川

山斷瀉伊流灘聲朝暮急東渡馬將登西堤人已立日看東西舟爭塗如不及  
誰見捕魚郎寒蓑雨中濕

洛州

上陽宮樹影不隨寒波流天津橋下石激響無時休至清自照物遇險豈能柔  
東過白馬去凡經幾千秋

潛溪

寒溪隨山迴脩竹隱深寺頗逢老僧談能憶先到事白栝聖君憐緋花土人時

不到三十秋依稀猶可記

真宗嘗駐蹕白栝樹下  
花譜有潛溪緋一品

### 石樓

山腰古石樓杳藹石梯上  
低窺巖際樹對見龕中像  
簷中嵩雲飛檻逼伊湍響  
同遊已零落歲月成俯仰

### 大字寺

庭中兩大樹池上千竿竹  
竹有紅淚斑樹無衆鳥宿  
昔日白傅歸愛吟裴令續  
閒流水西園翻然入他族

### 蘄竹

顛肥節腦瘦蘄水長笛材  
洛陽袁氏塢此竹舊移來  
雪霰飽已久竅星誰爲開  
與君作龍吟吹發江南梅

### 次韻任屯田感予飛內翰舊詩

二十四年君日哦翰林風韻  
郢中歌歲華荏苒都如昨  
世事升沈亦苦多燕國  
駿蹄猶待樂荆山美寶已  
逢和賸求海內多何用爛  
醉人間理莫過歷覽昔賢

皆泯泯尋思魯叟自波波我今不敢希高躅蹇步年來任跌跼

次韻答德化尉郭功甫遂以送之

江南有嘉禽乘春弄清吭流音入我耳慰愜若獲貺朝聽已孤高暮聽轉幽曠  
何多燕雀羣聲跡不相傍始聞汾陽生文行衆所諒獨哦青山閒悼古或悲愴  
弃官不屈人頗學陶元亮是時予愛之顏采莫得望倏然能見過遠涉丹湖浪  
袖攜一卷詩行橐更無長固與俗人殊於焉識敦尚嗟嗟二千石不知子所向  
駭子發論高萬仞聳孤嶂又如決河湍捧土安可障吾方歎壞材恨未逢良匠  
信哉騏驥駒誰用伯樂相自從昔還朝汨汨走俗狀未嘗寄子書子言今行行  
亦似昧相知曾非事高閎把筆誠不勤強意乃爲妄茲晨去潞城聊以和子唱  
子辭猶瀑布敢挹不知量

送李師錫太博通判懷州

洛陽古道登北邙河內碧山橫太行朝騎快馬暮可到風物人心皆故鄉竹林  
無蹤懷阮籍路傍有家嗟宣王別乘差同二千石教民唯在親耕桑

送潘士方建昌

軍壘近仙山麻源第三谷靈運詩亦存魯公記可讀幸時無寇攘閑日望雲木  
儻見西王母白麟如白鹿來尋鳥爪人神光生石屋無念癢背搔還恐懼怒扑  
學道我未成鍊氣不飽腹安得羽翼生下上同黃鵠送君想君遊星斗壇邊竹

次韻和吳仲庶舍人送德化郭尉

蒲葉高帆十二幅秋風逆水滿檣開是時不畏浪頭起到日定將船尾堆用捨  
東方言虎鼠賤疎梅福比蒿萊少年才辨無如美廬岳峯前莫滯迴

和劉原父舍人樂郊詩

太守東平來固殊阮步兵步兵醉乘驢太守整佩纓事物既已遺駕車出東城  
園荒久不治道路生棘荆地僻人馬入草閒狐兔驚舊池堙猶窳遺址巋不平  
窳者使之濬巋者使之營博野高榭起陳漁危臺成榭前東山秀臺下盧泉清  
傍塢梧竹密翳水芹藻并渠渠有深堂燕賓飛玉觥芍藥廣陵美謔贈鄭女情  
公子莫言歸古人未以輕欲知學山簡倒載去敬傾

送張聖民學士知登州

慕君才行美風義亦倜儻在遠恨未逢既近不屢往非以近爲輕恃易遂成曩  
倏爲東牟守別我駐征鞅又作千里遙依然復懷想昔聞之衆山秦碑元有兩  
一存東頂中一在西頂上篆寶丞相斯缺剝不可仿願言試歷覽聞見欲以廣  
海晴望石橋神仙事愀怛始皇安得長陰怪役罔象橋斷水無涯焉知有方丈  
邇者地出金發掘壤沃壤良民皆逐末茲事誰用長凡爲二千石唯在勸耕紡  
幸君經術高教化人所仰

送王言秀才歸建昌

來時槐開花去日木隕葉作賦未得薦著書已盈篋舊居近仙壇獨往遇農饑  
莫問烏爪人欲取月桂捷

次韻和劉原甫遊樂郊贈同遊

積歲阻顏色何以慰我思聞初遊樂郊頗慕登望詩下車未幾日倏見白露滋  
月弦不常滿星畢屢已離幸無風雨晦時從寮窠嬉大喜酒客難莫顧尙書期

獨守詩書愚未悟朝夕疲引領君子風東首自忘移但當觀魚鳥辟去旄與麾  
優悠民亦康何必苦吏爲

次韻和王尚書答贈宣城花木瓜十韻

百果各甘酸或由人所植木瓜聞衛詩贈好非玉色投此瓊玖報蓋重車馬飾  
貴賤今旣殊凌紙字翕翹一一如明珠自得見安格復何備國風庶亦見王澤  
捧之爲重賜誦已乃忘食幸資藥品用少助宣調力南土加文章中州異肥瘠  
公將和鼎鍊微意願尋繹

九月晦日謁韓子華遂留邀江鄰幾同飲是夕值其內宿不終席明日  
有詩予次其韻

乘興驅車偶一來旋呼江老舊遊陪驚風送雨寒初動舉酒浮蛆撥不開騏驥  
韉時聞內宿琵琶彈急怨虛催接籬帶去令傳樣自此逢歡未便迴

送王省副寶臣北使

紫服黃金帶銀鞍翠錦韉犯寒辭漢省持禮入胡天左衽通華語名王接右賢

舊山迴可記碣石與燕然

送李學士公達北使

萬里使窮域山川入馬蹄  
馳鳴沙水凍鵬擊雪雲低  
食飲羊兼酪供迎虜雜奚  
禮成迴近日喜聽早朝雞

送祖擇之學士北使

燕山常苦寒漢使涉窮臘  
路長人馬愁風急沙霰雜  
宿造氈廬開行逢獵騎合  
獻鮮禿髮馳問譯華言答  
每食冰生盤欲飲酒凍榼  
見其酋長時國禮何勤納  
中朝厚仁恩四海望聞闔  
乃知日月光照必蠻夷  
匝歸來易輕裘賜對延英閣  
送許璋監簿歸泰州

木枯鳥不巢泉涸魚不游  
我非魚鳥情貧縛路阻脩  
高陽有令子嗣世學已優  
前日來京城問恤忍涕流  
今失王府薦命奇言非讎  
家聲喜未墜辭我還海陬  
爲酌一壺酒敘懷心如抽  
子之伯父歿遺奠固莫由  
豈欲寡恩義力薄難置郵  
因寄緣睫淚灑向君衣裘

送棣州唐虞部

人持左符去馬逆北風行古路草初白大河冰未成暖科桑柘美寒織杼梭鳴  
風俗已如此顛棠無訟爭

金陵有美堂

李白愛山如洛陽三盃爲歌愁日長廢基臺殿不可識玉燕舊棲王謝堂公來  
碧瓦起棟宇羅列圖書牙作牀池頭古月城下江照見萬里冰雪光江流不盡  
月不死寒浪素影東西翔願公樂此殊未央慎勿區區思故鄉

送張中樂屯田知永州

畏向瀟湘行不入洞庭去鞍馬踏關山衣裘冒霜露零陵三千里楚俗未改故  
王澤久已覃國刑亦當措皆聞柳宗元山水尋不飫其記若丹青因來問潭步  
石燕飛有無香草生觸處仙姑異麻姑歲月樓中度不食顏渥赭言語神靈預  
莫將車騎喧獨往探幽趣有信報我知惡欲驅塵慮

宛陵先生文集卷第五十八

宛陵先生文集卷第五十九

陽武王安之寄石榴

安榴若拳石中蘊丹砂粒割之珠落盤不待蛟人泣舊友大河濱作宰實畿色  
巖霜百果熟爲贈忽我及始時童稚嬌爭取猴猿集老夫所食微何暇更收拾  
聊答君意勤作詩恨短澀

寄致仕余少卿

仕苦戀朝廷多爲老所逼朝廷雖愛賢不欲竭其力君歸頗得宜湖上遂偃息  
男能智自謨孫亦俛就職人事當置之自可樂胸臆

和吳沖卿學士冬日私居事

人知何晏宅近住白楊頭車馬不還往詩書多蓄收風庭吹落葉霜樹立鳴鳩  
頗與市朝遠閉門凡幾秋

和吳沖卿藏菜

霜前收美菜欲以禦冬時備乏且增品挑新那復思菘菹嗜西伯薑食語宣尼

未免效流俗竟將髻盜爲

依韻和王景彝學士紫宸仲冬早謁

朝開閭闔九重深望拜珠旒照玉簪  
霜氣稍迴龍陛峻日光微轉鳳樓陰  
庭中細仗穿旗脚案外薰爐對殿心  
我預千官少裨補欲將歌頌播堯音

依韻荅景彝謝予訪其居

日暮乘羸馬因過太史家  
竹窗談脫塵槐樹暝棲鴉  
邦瘁稽前詠人亡起彼嗟

夜分歸不寐猶照角巾斜

其日聞石昌言卒

哀石昌言舍人三首

十一月二十一日

朔日望顏色衣冠朝帝闈  
西靈未生魄東岱已收魂  
弔哭新居啓封題舊篋存  
善人吾不見何可問乾坤

聖賢無不死壽夭復何云  
唯有名常在其餘理莫分  
朝榮金玉寶暮殞蕙蘭焚  
今日寢門哭緒言長絕君

賈誼過秦畢相如論蜀歸  
二人名旣大一日命何微  
瘡似烏常渴災成鵬不飛

百年今已矣冰結淚霑衣

鄭州王密諫漱玉齋

渠渠梁照日泯泯水分京激作飛巖勢流爲雜佩聲圖書無近蹟草樹有冬榮  
景落人間處漂花出古城

書李學士北使集後

蘇武艱窮只四篇五言風格到今傳節旄盡落都無詠枉在胡中十九年

送李學士河東轉運

重持使者節北上太行行未注螭頭筆來調塞下兵朱轡邦伯至黃綬縣官迎  
臘雪臨關密宵烽出堠明山川壯分晉戎馬說幽并此部多才俊其人不易輕  
次韻和吳仲庶苗蔡二君村墅間居

聞說江南庾子山卜居泉石愛孱顏古來得喪何須問世上榮枯只等閒高闕  
浮雲徒有戀夕陽飛鳥亦知還子貧不及三君子老愧朝紳進退閒

送良玉上人還崑山

來衣茶色袍歸變椹色服孤舟洞庭去落日松江宿水煙晦琴徽山月上巖屋  
野童遙相迎風葉鳴橡榭

依韻和宋次道學士紫宸早謁

陸生聲譽在雲間來預簪裾謁帝顏冠劍有容夔與禹文章全盛馬兼班耿耿  
玉宇龍纏棟藹藹金鋪獸齧環却出常衙殿前過戟衣風動自相攀

和次道省中初直

江南太守歸夜直省中闈霜氣冷侵被月光斜入扉官奴休執燭侍史正薰衣  
展轉不成寐幽懷吟更微

去年宋中道自洛州以書令魏殊來謁予魏遂託主第後辭歸予因中  
道之兄次道有孔雀賦以送魏生

置從南海桄榔林籠入西州鸚鵡地聳冠翕翼脩尾張鱗鱗團花金縷翠一身  
燦爛文章多引聲笙竽奈遠何五侯池館不可戀桂樹深枝自有窠鳳皇樓頭  
饒燕雀入屋穿簾非爾樂非爾樂去何之北方佳人或歌粵

依韻和宋中道見寄

歲在涪灘初別子子適廣平裨郡理廉頗臺傾有遺址今逢四方弓久弛時不用兵皆樂鄉念我貧居天子庠抱經臨案空循行貌垢不洗顏蒼蒼得時少壯相揄揚獨行無侶心泮浪腸如轆轤轉井牀內飢外寒膚粟芒若此煎妙何心腸王都浩浩多球琅懷珉安可爭焜煌舊朋升騰皆俊良歿不發語生括囊魏魏堯舜開明堂大調金石來鳳皇鴛鴦戢翼方在梁福祿其宜無不臧已甘老死填溝隍殭尸闔棺猶目張仲尼生世尙徨徨豈能強聒爭踰踰未由見子舉以觴北望大河衣袂攘牽牛橫漢不服箱欲往乘車無可當天駟有星名曰房又欲乘馬行幽荒牛雖蹄瑩馬眼光既不我駕路阻長我懷炳炳何日忘半夜攬琴彈履霜寫意絨辭無雁將低雲作雪正蒼茫

雷逸老以仿石鼓文見遺因呈祭酒吳公

石鼓作自周宣王宣王發憤蒐岐陽我車我馬攻旣良射夫其同弓矢張舫舟又漁鱗鱖何以貫之維柳楊從官執筆言成章書在鼓腰鐫刻藏歷秦漢魏

下及唐無人著眼來形相村童戲坐老死喪世復一世如鳥翔唯閱元和韓侍  
郎始得紙本歌且詳欲以氈衣歸上庠天官婢阿馳肯將傳至我朝一鼓亡九  
鼓缺剝文失行近人偶見安碓牀亡鼓作白剝中央心喜遺篆猶在傍以白易  
白庸何傷以石補空恐春梁神物會合居一方雷氏有子胡而長日模月仿志  
暮強聚完辨舛經星霜四百六十飛鳳皇書成大軸綠錦裝偏斜曲直筋骨藏  
攜之謁我巧趨蹌我無別識心傍徨雖與乃父非故鄉少與乃父同盃觴老向  
太學鬢已蒼樂子好古親縑箱誰能千載師史倉勤此冷淡何肝腸而今祭酒  
裨聖皇五經新石立兩廊我欲效韓非癡狂載致出關無所障至寶宜列孔子  
堂固勝朽版堆屋牆然須雷生往度量登車裏護今相當誠非急務須紀綱太  
平得有朝廷光山水大字輦已嘗於此豈不同粃糠海隅異獸乘舟航連日道  
路費芻糧又與茲器殊柔剛感慨作詩聊激昂願因諫疏投阜囊夜觀奎壁正  
吐芒天有河鼓亦焜煌持比負鼎干成湯

和宋次道奠石昌言舍人

金羈白馬曉朝天  
嗟管行車暮已傳  
上帝樓成何處召  
青霄路絕不應還  
飄階  
隕葉聲淒若隔幕  
孤燈夜寂然來奠  
一觴空湛湛却思  
平昔淚漣漣

和王景彝寄呂縉叔

白盡髭鬚史未成  
不知能賦易登瀛  
三冬足用腐儒飽  
千里從看跛鼈行  
知有清名在公議  
自無餘力到高閔  
磻溪八十猶垂釣  
祖例推來亦後生

依韻和宋次道荅弟中道喜還朝

白首謬陪兄弟閒  
阿連初喜客兒還  
池塘夢句君能得  
咳唾成珠我未閒  
陋巷閉門誰扣扣  
茂林飛鳥自班班  
歸來又接同袍會  
月下朱閔不用關

依韻和荅王安之因石榴詩見贈

當年仕宦忘其卑  
朝出飲酒夜賦詩  
伊川嵩室恣游覽  
爛熳徧歷焉有遺  
是時交朋最爲盛  
連值三相更保釐  
謝公主盟文變古  
歐陽才大何可涯  
我於其間不量力  
豈異鵬搏蒿鷄隨  
見君弟兄入太學  
俊譽籍籍聞一時  
而今兩鬢各已白  
偶因贈酬言及斯  
升沈是非休要問  
百歲歡樂誰能期

陽武王安之寄兔魚

原上一雙兔河中兩尾魚兔皮空被褐魚腹不藏書長跪置遠意故人情何如  
二物本潛伏誰言置網疎崢嶸歲亦晚將駕歸吾廬

依韻和王景彝對雪

天雪霰成先暴集地中陽復已如期穿林陡覺縈風急入袖初驚學舞遲樓上  
溫貂方賁酒竹間寒雀未辭枝平明君向螭頭立玉座爐煙細細時

依韻和荅永叔洗兒歌

夜夢有人衣帔蛻水邊授我黃龜兒生男前一夕夢道士贈龜一枚仰看星宿正離離玉魁東

指生斗威明朝我婦忽在蓐乃生男子實秀眉自磨丹砂調白蜜辟惡辟邪無  
寶犀我慚暮年又舉息不可不令朋友知開封大尹憐最厚待酒作歌來慶之  
畫盆香水洗且喜老駒未必能千里盧仝一生常困窮亦有添丁是其子

重送祖擇之北使

文章世德已能傳得桂高枝二十年持節欲同蘇武勁下帷曾似董君賢衣裘

衽領無嫌左飲食盃盃暫厭羶一過范陽應感概歸來圖畫彼山川

題老人泉寄蘇明允

泉上有老人隱見不可常蘇子居其間飲水樂未央淵中必有魚與子自徜徉  
淵中苟無魚子特翫滄浪日月不知老家有雛鳳皇百鳥戢羽翼不敢言文章  
去爲仲尼歎出爲盛時祥方今天子聖無滯彼泉傍

景彝率和唐崇徽公主手痕詩

兩壁美人虹已收蒼崖纖手蘚痕秋和親只道能稽古沉略從來不解羞漢月  
明明掌中照胡塵漠漠指間留昭君歿後更多恨彈作琵琶曲未休

觀黃介夫寺丞所收丘潛畫牛

丘畫吳牛希戴嵩吳牛角偃彎如弓老牯望特犢望母母下平坡離牧童牧童  
吹笛坡頭坐古樹蕭騷葉戰風黃君買畫都城中不惜滿貫穿青銅賣從誰家  
不肖子傳自幾世賢卿翁今時貴人所尙同競借觀玩題紙窮紙窮磊落見墨  
妙東府西樞三四公應識古人丹青蹟又辨古人於物通一毛一尾不取次豈

以後代為盲聾願推此意佐國論況乃聖德同堯聰

題嘉興永樂院橋李亭

土化吳王甲骨朽越王兵五月菖蒲草千年橋李城蒲根蛙怒噪城上烏夜鳴  
吳越滅已久客心空屏營落日孤亭閒悠悠鐘磬聲

吳沖卿鼓契

猶是唐時契有司嘗欲昌耕上不許

暮契出朝契歸出入未嘗逢日暉雄雌曾不離鍾室百年元弊知者稀時移世  
異不改易俗眼厭舊君前非君王萬年千年壽獨憐古器與眾違昨日霜華厚  
如雪百官凍鞞朝紫微吳王偷就温漏火始一識之增歎唏不知逢逢六街鼓  
自此發號通帝闈人閒鍾鼓有多少多少亂鳴誰肯譏

江鄰幾寄羊羝

去歲為翊造者

細肋胡羊臥苑沙長春宮使踏霜羝疾藜苗盡初蕃息首宿盤空莫歎嗟自乏  
良謀甘更鄙猶能大嚼快無涯磨刀為削朝霞片時引清盃與轉嘉

周仲章都官示卷因以贈之

赭白西北來本是天馬種朝秦暮至吳嵩華如歷冢伯樂曾未逢垂頭牧青隴  
今朝顧我鳴振鬣耳聳聳聲生秋風悲已喪荆軻勇誰牽駕鸞車高躡雲勢擁

宛陵先生文集卷第五十九



宛陵先生文集卷第六十

覽翠亭記

郡城非要衝無勞送還往官局非冗委無文書迫切山商征材巨木腐積區區規規襲不爲宴處久矣始是太守邵公於後園池旁作亭春日使州民遊遨予命之曰共樂其後別乘黃君於靈濟崖上作亭會飲予命之曰重梅今節度推官李君亦於廨舍南城頭作亭以觀山川以集嘉賓予命之曰覽翠夫臨高遠眎心意之快也晴澄雨昏峯嶺之顛也心意快而笑歌發峯嶺明而氣象歸其近則草樹之烟絲溪水之澄鮮銜鱗翻來的的有光掃黛侍側嫵嫵發秀有趣若此樂亦由人何則景雖常存人不常暇暇不計其事簡計其善決樂不計其得時計其善適能處是而覽者豈不暇不適者哉吾不信也

林和靖先生詩集序

天聖中聞寧海西湖之上有林君蘄蘄有聲若高峯瀑泉望之可愛卽之逾清挹之甘潔而不厭也是時予因適會稽還訪於雪中其談道孔孟也其語近世

之文韓李也其順物玩情爲之詩則平淡邃美讀之令人忘百事也其辭主乎靜正不主乎刺譏然後知趣尙博遠寄適於詩爾君在咸平景德間已有大聞會天子修封禪未及詔聘故終老而不得施用於時凡貴人鉅公一來相遇無不語合慕仰低回不忍去君旣老朝廷不欲強起之而令長吏歲時勞問及其歿也諡曰和靖先生先生少時多病不媿無子諸孫大年能掇拾所爲詩請予爲序先生諱逋字君復年六十一其詩時人貴重甚於寶玉先生未嘗自貴也就輒棄之故所存百無一二焉嗚呼惜哉

紅鸚鵡賦

相國彭城公尹洛之二年客有獻紅鸚鵡籠之甚固復以重環繫其足遂感而賦云

蹠而毛翼而羽以形以色別類而聚或嘯或呼遠人而處在鳥能言有曰鸚鵡產乎西隴之層巒巢於喬木之危端其性惠其貌安與禽獸異爲籠檻觀吾謂此鳥曾不若尺鷃之翻翻復有異於是者故得以粗論吾昔窺爾族喙丹而綠

今覽爾軀體具而朱何天生爾之乖邪俾爾爲爾類尙或弗取況爾殊爾衆不其甚與何者徒欲謹其守固其樞加以堅鑊置以深廬雖使飲瓊乳啄彫胡以充飢渴鑄南金飾明珠以爲關閉又奚得於烏鳶之與雞雛吾是知異不如常慧不如愚已乎已乎

### 述釀賦

少居楚鄉楚多釀者故物識酒之然夫酒之作也必良其器必香其泉法式具舉酸敗罕旃取有豐約味有釀泊則曰聖曰賢和神懌氣積日彌年自時厥後茲道寢墮昔飲其醇今飲其醜昔也熙熙終日不亂舒暢四肢今也冥冥迷魂倒魄不知其醒吾觀於世未始達此夫以天下爲壚鬯北庶爲梁米君臣爲麴糵道德爲酒醴酣仁漱義四海熏和莫知所以逮乎率土澆弊材不授矣君臣乖異法不施矣道德遂薄酒弗飴矣鋪詐啜僞昏然而無歸矣安得滌其具更其術時其物清其室然後漬以椒桂侑以棖橘吾將霑醉乎窮日

### 靈鳥賦

烏之爲靈者何噫豈獨是烏也夫人之靈大者賢小者智獸之靈大者麟小者駒蟲之靈大者龍小者龜鳥之靈大者鳳小者烏賢不時而用智給給兮爲世所趨麟不時而出駒流汗兮擾擾於修塗龍不時而見龜七十二鑽兮寧自保其堅軀鳳不時而鳴烏鴟鴞兮招唾罵於邑閭烏兮事將北而獻忠人反謂爾多凶凶不本於爾爾又安能凶凶人自凶爾告之凶是以爲凶爾之不告兮凶豈能吉告而先知兮謂凶從爾出胡不若鳳之時鳴人不怪兮不驚龜自神而刳殼駒負駿而死行智鶩能而日役體劬劬兮喪精烏兮爾靈吾今語汝庶或汝聽結爾舌兮鈐爾喙爾飲啄兮爾自遂同翱翔兮八九子勿噪啼兮勿睥睨往來城頭無爾累

南有嘉茗賦

南有山原兮不鑿不營乃產嘉茗兮踞此衆坻土膏脈動兮雷始發聲萬木之氣未通兮此已吐乎纖萌一之日雀舌露掇而製之以奉乎王庭二之日鳥喙長擷而焙之以備乎公卿三之日槍旗聳舉而炕之將求乎利羸四之日嫩莖

茂團而毓之來充乎賦征當此時也女廢蠶織男廢農耕夜不得息晝不得停  
取之由一葉而至一掬輸之若百谷之赴巨溟華夷蠻貊固日飲而無厭富貴  
貧賤不時啜而不寧所以小民冒險而競鬻孰謂峻法之與嚴刑嗚呼古者聖  
人爲之絲枲絺綌而民始衣播之禾薺菽粟而民不飢畜之牛羊犬豕而甘脆  
不遺調之辛酸鹹苦而五味適宜造之酒醴而燕饗之樹之果蔬而薦羞之於  
茲可謂備矣何彼茗無一勝焉而競進於今之時抑非近世之人體情不勤飽  
食梁肉坐以生疾藉以靈葺而消腑胃之宿陳若然則斯茗也不得不謂之無  
益於爾身無功於爾民也哉

鳴鳩賦

時人謂鶡鷄癡拙禽也茲禽然癡且拙猶能以喙寫心布于辨音者焉曰我智  
不如燕鴈識氣候之早晚隨陽而來知社而返勇不如鷓鴣鸞鷓恣搏擊於秋  
天下無全物落不空拳惠不如鸚鵡鸚鵡入崇堂兮蔭夏屋事言語以如人餌  
果梁而飫腹巧不如女匠挂巢室於枝上畏風雨之漂搖紘茅莠而密壯年不

如鸛鶴絜羽毛於寥廓希霖雨而鳴埴和氣類而靡爵茲五者實無有於羣鳥分馴馴於林表癡亦誠多拙亦不少雖不能趨暄暝之時亦毛翮而自持雖不能決爪吻之利亦飲啄而自遂雖不能弄喉舌之辯亦呼鳴而自善雖不能理窠之完亦棲處而自安雖不能適變赴情亦隨宜而自寧噫唯癡與拙天之所生若此而已矣又烏足爲之重輕

塵尾賦

野有壯塵兮懼虞人於廣原其身已殺其肉已燔其骨已棄獨其尾之猶存飾雕玉以爲柄入君握而承言聊指麾之可任雖脫落而蒙恩噫譬諸犬豕其死則均其肉與骨亦莫逡巡自古及今若此泯沒者日有億計曾不一毫以利人是生若蚍蜉死若埃塵生無以異於其類死不爲時之所珍故仲尼疾沒世而名滅子長亦著論而有因乃感茲獸而用告乎朋親

擊甌賦

余觀今樂愛乎清越出金石之間所謂擊甌者本埏埴異琳球入伶倫兮間齊

優其可尙者鳴非瓦釜律度合鼓非土缶音韻周和非埴篔上下應作非鐘磬  
節奏侔而又冰質瑩然水聲修然度曲泠然入耳瀏然猶有非之者曰善則善  
矣未若豔女之歌喉何則是謂絲不如竹竹不如肉以其近自然之氣況此曾  
何參於樂錄之目乎余辯之曰融結合於造化堅白播於陶鈞發和於器導和  
於人可以樂嘉賓可以暢百神安得絲竹謳吟之匪倫也哉

哀鷓鴣賦

并序

余得一鷓鴣飼之甚勤既久開籠肆其意其一翻然而去其存者特愛焉鷓鴣  
於禽最有名頃未識也思持歸中州與朋友共玩之凡養二年呼鳴日善罷官  
至蕪湖一夕爲鼠傷死遂作賦以哀云

物有小而名著亦有大而無聞吾於禽類得鷓鴣兮不羣其音格磔其羽爛斑  
其生遐僻其趣幽閑飲啄乎水裔棲翔乎竹間往咨羅者求之於野生致二雛  
形聲都雅愛之蓄之籠之服之爲日已久言馴熟兮縱晞朝旭一逸而不復兮  
謂之背德非我族兮戀而不去尤可穀兮晨啼暮宿何嗟獨兮固當攜之中國

爲士大夫之目兮不意孽鼠事潛伏兮破箴嚙縻何其酷兮嗚呼翻飛遠逝不爲失兮安然飽食不爲福兮焉知不爲名之累兮焉知不爲鬼所瞰而禍所速兮哀哉誠不如禿鶻鴟鵬兮凡毛大軀妖鳴飮腹何文彩之佳何名譽之淑前所謂大而無聞其自保而自足者與

問牛喘賦

和人六首

鄧

客有感前史問牛喘廣而賦義有由余得撫遺辭掇遺韻索遺意而用以酬夫寒爲冬燠爲夏和爲春肅爲秋和以發生則物萌而抽燠以長養則物盈而周肅以登就則物實而收寒以閉結則物藏而休是則陰陽之道順而燮和之職修若乃當春而燠是爲行夏令而火侵於木時則有雨水不降艸樹早落火訛相驚疾疫多作故丞相當是月而見牛喘恐天令之愆錯問從來之遠邇兮或力或曠而可度匪賤人而憂畜實原微而意博所以元化日調萬彙時若及其後世我自我物自物天自天人自人胡爲乎冬胡爲乎春孰謂差忒孰謂平均曰吾委佩而端冕服美而食珍上奉天子下役烝民夫何預於我哉我亦無媿

於茲辰

凌霄花賦

厥草惟夭厥木惟喬草有柔蔓木有繁條緣根兮附質布葉兮敷苗朱華粲兮  
下覆本榦蔽兮不昭嗟乎此木幾歲幾年而至於合抱夫何此草一旦一夕而  
遂曰凌霄是使藜藿蒿艾慕高豔而仰翹翹也安知蘋藻自潔蘭蕙自芳芙蓉  
出汗而自麗芝菌不根而自長或紉珮帶或采頌筐或製裳於騷客或登歌於  
樂章故得爲馨爲薦爲嘉爲祥皆無附著亦以名揚奚必託危柯而後昌吾謂  
木老多枯風高必折當是時將恐摧爲朽芟不復萌蘖豈得與百卉並列也耶

矮石榴樹子賦

并序

襄城縣庭下生矮石榴往來者異之余作賦寫其狀因以自勵云

有矮石榴高倍尺中訟庭麗戒石訪諸走胥云非封植忽此生榮三傳歲曆密  
葉如蓋繁條如織萎蕤下垂疲軟無力細苞貯露纍纍仄仄下人俯視顛本可  
識雀媿卑棲而不肯集兮故啾啾以矯翼偃偃盤盤若屈若鬱紉紉結結非曲

非直榦不足攀陰不足息夫何挺質之可惑耶意爲異與爲妖與人以爲異我不知其異曰殊衆人之類類人以爲妖我不知其妖曰乖衆木之翹翹然而不生樊圃臺榭遊觀之所產茲堂下其有以警而有以覩因形戕義庶將有補當革蔓衍之多枝無若輒柔之不舉勿俾苞苴之流行勿使吏氓之輕侮勿澳忍以自抑勿猶豫而失處勿闌茸以接卑勿上下之不撫夫如是則異也妖也固弗取維戒懼斯主

風異賦

并序

庚辰歲三月丙子天大風壬午詔出郡縣繫獄死罪已下夫風者天地之氣也猶人之呼噓喘吸豈常哉若應人事之變則余不知故賦其大略云

吾因迓勞適於郊憩亭舍日昃時羣輩外囂曰火來

音懼

火來嗑呼噫噦出屋遠

望西北之陞巨天接地混混赫赫不見端倪涯逡巡則赤埃赭霧突盪奔馳陽精失色白晝如晦號空吼穴揚砂走塊衆心驚惶廣衢翳昧莫辨誰何執手相對其少頃也稍明故歸人未寧兮相與而爲隊順前者措足之不暇逆進者舉武

而愈退睇山川兮安陳趨城郭兮安在所可視者五六步之內越翼日四方恬  
霽乾坤黯慘物色憔悴牛復馬還絕銜鼻艸靡木折莢實墜禽鳥墮死泥滿喙  
几案傾欹塵覆器民廬毀壞商車顛躓既而衆曰此何景也伺彼往來兮問遠  
邇之所自或曰起浚都播許鄭歷洛汭以及唐鄧漢隋之地稽厥時厥狀無與  
此土異未迨旬浹德音遐暨是知本聞之不僞聊綴辭也若此言變咎則非愚  
者之能議

### 乞巧賦

孟秋七日夕戶未扃余歸自外見家人之在庭列時花與美果祈織女而丁寧  
乞天巧之付與惡心手之鈍冥余既寢而弗顧又烏辨乎列星兒女前曰故事  
所傳餘千百齡何獨守拙迷猶未醒遂起坐而歎曰吾試語汝汝其各聽夫芒  
忽之間變而有氣氣而有形形而有生生而有靈愚愚慧慧自然之經賦已定  
矣今反妄營則何異高山之木兮不能守枝葉之亭亭欲戕而爲犧象兮利塗  
飾乎丹青且復天巧與人巧將不同也天孫又安得此而輒私天之巧者總陰

陽運四時懸日月星辰而不忒其璇璣鼓雷風雨雪而不失其施生萬物死萬物而物得其宜此天之所以任大巧而不虧人之巧者非它直心口手足也心巧於慮口巧於詞手巧於技足巧於馳亦各有極不可強爲故慮之巧不過多智謀使爾多謀多智則精驚而魄離詞之巧不過多辯言使爾多言多辯則鮮仁而行遺技之巧不過多能藝使爾多能多藝則藝成而跡卑馳之巧不過多履歷使爾多履多歷則速老而筋疲如是則吾焉用而乞之吾學聖人之仁義尙恐沒而無知肯乞世間之輕巧以汨吾道而奪吾之所持吾決守此而已矣爾勿吾疑

思歸賦

祿有可慕祿有可去何則移孝爲忠曾無內顧則祿可慕而可據上有慈顏以喜以懼故祿可去而不可寓噫吾父八十母髮亦素尙爾爲吏負焉遐路嗷嗷晨烏其子反哺我豈不如鬱其誰訴惟秋之氣至慘慄而感人日與愁思側睇江濱憶爲童子當此凜辰百果始就迭進其珍時則有紫菱長腰紅芡圓實牛

心綠蒂之柿獨苞黃膚之栗青芋連區烏稗五出鴨脚受彩乎微核木瓜鏤丹  
而成質素乳之梨蘋壺之橘蜂螭淹醴榘楮漬蜜膳羞則有鳩鵲野鴈澤鳧鳴  
鶉清江之膏蟹寒水之鮮鱗冒以紫薑雜以菱首觴浮萸菊俎薦菁韭坐溪上  
之松篁掃門前之桐柳僕侍不譁圖書左右或靜默以終日或歡言以對友信  
吾親之所樂安閭里其茲久切切余懷欲辭印綬固非效淵明之褊衷恥折腰  
於五斗蓋自成人以及今未嘗一日侍傍而稱壽豈得不決去於此時將恐貽  
恨於厥後

鬼火賦

放舟於潁水之上夜憩於項城之野陰氣四垂而雨微下左右望之若無覩者  
有光熒然明於水邊人皆謂之鬼火吾獨未爲然焉噫謂鬼爲無吾不敢謂之  
無謂鬼爲有吾不敢謂之有但觀韓氏之言舊矣曰鬼無形鬼無聲旣無聲與  
形又安得此而明嘗聞巨浸之涯百物皆能發光而吐輝又草木之腐亦能生  
耀而化飛爾知彼是而此非曰若電者因形乎因勢乎苟因形因勢則此何疑

而弗及嗚呼昔人有論電者陰陽之氣相薄而成何須形勢將就此妄名謂爲物光可也謂爲鬼火則吾不敢聽

### 鬼火後

吾旣爲鬼火賦客有謂余曰嘗觀舊說鬼火曰燐前人有述子何不信言未畢余遽辨曰爾不熟究吾旨耶吾豈忽而不知且聞兵死之血久而化之旣云血化安有鬼爲比夫艸木之腐固合其宜宜曰物光又豈爲過此論確如牢不可破尙恐未然更聽吾言彼燐燐者胡可以烹煎彼熒熒者胡可以燠暄彼熠熠者胡可以炎上彼熠熠者胡可以燎原蓋無此並蔓說徒繁客慚忸無辭而起余方掩乎衡門

### 魚琴賦

并序

丁從事獲古寺破木魚斲爲琴可愛玩潘叔冶從而爲賦余又和之將以道其事而寄其懷

爲琴之美者莫若梧桐之孫枝夫其生也附崖石遠水涯陰凝其腋陽削其皮

曾亡漫戾而沈實之韻資噫始其遇匠氏也有幸不幸焉故未得盡厥宜其於不偶若陷於夷剗中刻鱗加尾及髻宛然而魚日擊而椎主彼齊衆之律令則聲聞囂爾而四馳粵有好事者竭來晚之取爲雅器製擬庖犧徽以黃金絃以壓絲音和律調乃升堂室嗚呼琴兮遇與不遇誠由於通窒始時效材雖甚辱兮於道無所失今而決可以參金石之奏焉無忘在昔爲魚之日

### 針口魚賦

有魚針喙形甚小常乘春波來不少人競取之一掬不重乎銖杪其爲針也穎不能刺肌膚目不能穿絲縷上不足以附鑿而愈疾下不足以因工而進補以口得名終親技女大非膾材唯便鮓滷烹之則易爛貯之則易腐嗟玉色之可愛聊用實乎雕俎過此已往未知其所處

### 靈鳥後賦

靈鳥我昔閔爾之忠告人之凶遭人唾罵於時不容覆巢彈類驅逐西東余是時作賦以弔汝非乘爾困而責爾聰今也主人悟彈者去豐爾食於太倉置爾

巢於高樹晨鷄不鳴百鳥爭慕傍睨鳳皇下窺鷓鴣爾於此時徒能縱蒼鷹逐  
狡兔不能啄叛臣之目伺賊壘之去而復憎鴻鵠之不親愛燕雀之來附既不  
我德又反我怒是猶秦漢之豪俠遠已不稱昵已則譽夫然吾分足而已矣又  
焉能顧

宛陵先生文集卷第六十

余被命來守宛陵視事之翌日有客謂余曰郡學請鏤版印書公留意否乎乃問其目曰梅聖俞詩集自遭兵火殘編斷簡靡有全者幸郡教官有善本余樂聞而應之曰昔龐參爲漢陽太守郡人任棠有奇節參到先候之棠不與言但以薤一本水一盂置戶屏前抱兒伏於戶下參思其微旨曰水欲吾清拔薤欲吾擊強宗抱兒當戶欲吾開門恤孤率而行之漢陽大治余殿此邦之初學官諸生以學校爲言今客又以聖俞梅公詩集爲言客其吾之任棠也與聖俞公以詩聞於當世實此邦之前哲客其欲余先庠序之教而借梅文以爲諭余固淺陋雖不足以發揚幽光敢不率行或庶幾乎如漢陽之治也乃命學官董其事鏤版旣成請序於余余豈敢辭聖俞公之詩簡古純粹華而不綺清而不癯涵泳於仁義之流出入於詩書之府而其工歐陽文忠公已序於集首此不復道姑敘鏤版之由云爾紹興十年上元日檢校少傅保信軍節度使知宣州軍州事兼管內勸農營田使新安郡開國公食邑五千二百戶食實封二千一百戶汪伯彥後序



右宋都官員外郎宣城梅堯臣聖俞宛陵集六十卷今宣城太守袁旭廷輔所重刻也何爲刻之表先賢以儀後進者太守職也始宣城郡政久弛袁君至單志竭慮薙姦滌穢葺歲之間橫民以戢良民以妥修舉學政爰興教化表章先賢風勵多士於是修都官之墳率學諸生行展謁之禮而詢求其文蓋郡人莫或知者及訪都官之後始得此編遂刻以傳聖俞當仁宗朝與韓范富歐諸公游聖俞詩名特盛於時最初王文康公曙覽之歎曰三百年無此作矣而見知歐公尤深相與尤密時蓋有擬歐梅於韓孟者非宣城山川靈秀之所鍾歟今天下學士君子皆知聖俞爲宣之傑出顧宣之人有不能如此袁君之心所不容已也聖俞平生所著又有唐載廿六卷詩小傳廿卷注孫子十三篇又嘗編修唐書此亦後來宣之人所當知也因并及之正統己未冬十一月乙巳朔光祿大夫少師兵部尙書華蓋殿大學士廬陵楊士奇題

奇題